

# 高雄市大狀元經典會考（題庫大）公告檔

## 【C基礎道學】

### 01【道之宗旨】

敬天地 禮神明 愛國忠事 敦品崇禮 孝父母 重師尊 信朋友  
和鄉鄰 改惡向善 講明五倫八德 闡發五教聖人之奧旨  
恪遵四維綱常之古禮 洗心滌慮 借假修真 恢復本性之自然  
啟發良知良能之至善 己立立人 己達達人 挽世界為清平  
化人心為良善 冀世界為大同



### 02【禮運大同篇】

大道之行也 天下為公 選賢與能 講信修睦 故人不獨親其親 不獨子其子  
使老有所終 壯有所用 幼有所長 鰥寡孤獨廢疾者 皆有所養 男有分  
女有歸 貨惡其棄於地也 不必藏於己 力惡其不出於身也 不必為己  
是故謀閉而不興 盜竊亂賊而不作 故外戶而不閉 是謂大同



### 03【發一崇德精神指標】

成功 2020 年 精進更上一層樓 慈悲喜捨 萬眾一心 精誠團結  
邁向標準 學道越學越和氣 修道越修越歡喜 講道越講入性理  
辦道越辦越契機 行道越行越中矩 我們要感謝天恩師德  
感謝老前人 感謝前人 感謝道場 感謝大家 我要珍惜今天  
知恩 感恩 報恩 立德 立功 立言 立愿了愿 盡忠盡孝



### 04【彌勒救苦真經】

佛說彌勒救苦經 彌勒下世不非輕 領寶齊魯靈山地 拈花印證考三乘  
落在中原三星地 大證四川王桃心 天真收圓掛聖號 等待時至點神兵  
雲雷震開戊己土 天下神鬼不安寧 親在仁天中華母 九蓮聖教歸上乘  
天花老<sup>母</sup>垂玉線 收圓顯化在古東 南北兩極連宗緒 混元古冊在中央  
老<sup>母</sup>降下通天竅 無影山前對合同 嬰兒要想歸家去 持念當來彌勒經  
用心持念佛來救 朵朵金蓮去超生 識得西來白陽子 鄉兒點鐵化成金  
每日志心常持念 三災八難不來侵 要想成佛勤禮拜 常持聰明智慧心  
休聽邪人胡說話 牢拴意馬念無生 老<sup>母</sup>降下真天咒 用心持念有神通  
滿天星斗都下世 五方列仙下天宮 各方城隍來對號 報事靈童察的清

三官慈悲大帝主 赦罪三曹救眾生 救苦天尊來救世 親點文部揭諦神  
 八大金剛來護法 四位菩薩救眾生 緊領三十六員將 五百靈官緊隨跟  
 扶助彌勒成大道 保佑鄉兒得安寧 北方真武為將帥 青臉紅髮顯神通  
 扯起皂旗遮日月 頭頂森羅七寶星 威鎮北方為帥首 速請諸惡掛甲兵  
 搭救原人鄉兒女 火光落地化為塵 四海龍王來助道 各駕祥雲去騰空  
 十方天兵護佛駕 保佑彌勒去成功 紅陽了道歸家去 轉到三陽彌勒尊  
 無皇敕令寄下生 收伏南閻歸正宗 來往造下真言咒 傳下當來大藏經  
 嬰兒姪女常持念 邪神不敢來近身 持念一遍神通大 持念兩遍得超生  
 持念三遍神鬼怕 魍魎邪魔化為塵 修持劫內尋路徑 念起真言歸佛令  
 南無天元太保阿彌陀佛



### 05【參辭駕禮節】

作揖 跪

明明上帝 五叩首

諸天神聖三叩首

彌勒祖師三叩首

南海古佛一叩首

活佛師尊一叩首

月慧菩薩一叩首

師 尊一叩首

師 母一叩首

點 傳 師一叩首

引 保 師一叩首

前人大眾一叩首

起 作揖 參（辭）駕禮畢 放手鞠躬 退



### 06【早晚獻香禮】

作揖 跪

獻香五炷 獻香三炷 獻香三炷 獻香三炷 獻香一炷(公共佛堂)

獻香五炷 獻香三炷 獻香一炷(家庭佛堂)

明明上帝十叩首

諸天神聖五叩首

彌勒祖師五叩首

南海古佛三叩首

活佛師尊三叩首  
月慧菩薩三叩首  
各位法律主三叩首  
灶 君一叩首  
師 尊一叩首  
師 母一叩首  
鎮殿元帥一叩首  
鎮殿將軍一叩首  
教化菩薩一叩首  
各位大仙一叩首  
老前人一叩首  
前 人一叩首  
點 傳 師一叩首  
引 保 師一叩首  
前人大眾一叩首  
自己祖先一叩首

默唸愿懺文 (乾)餘蘊○○○ (坤)信士○○○

虔心跪在

明明上帝蓮下 幸受真傳三叩首

彌勒祖師 妙法無邊 護庇眾生 懺悔佛前 改過自新

同註天盤三叩首

凡係佛堂 顛倒錯亂 望祈祖師 赦罪容寬十叩首

南無阿彌十佛天元十叩首

金公祖師五叩首

天然古佛五叩首

中華聖母五叩首

白水聖帝三叩首

不休息菩薩三叩首

白陽大仙三叩首

謝謝

老 尊 大慈大悲一百叩首

起 作揖 獻香(叩首)禮畢 放手鞠躬 退



## 07【獻供禮】

獻供禮開始

請獻結緣香人獻香就拜位

作揖 跪 獻香三炷 三叩首

起 作揖 鞠躬 退

兩邊排班 對面作揖 各就拜位 作揖 跪 三叩首

起 作揖 前進就獻位 作揖 後兩位跪 作揖 三叩首

端 跪 舉眉齊

接 舉眉齊

接 舉眉齊

獻 誠敬奉獻 上清 下濁

作揖

端 跪 舉眉齊

接 舉眉齊

接 舉眉齊

獻 誠敬奉獻 上手居中

作揖

端 跪 舉眉齊

接 舉眉齊

接 舉眉齊 獻 誠敬奉獻（重複如此，至獻完為止）

（佛殿有的須兩邊分獻）獻 誠敬奉獻 兩邊分獻

（最後獻畢，端供人自行至拜位作揖跪）

作揖 三叩首

起 同作揖 後退歸拜位

作揖 跪 三叩首

起 作揖 兩邊分班

對面作揖 獻供禮畢 放手鞠躬 退



## 08【初一十五禮節】

作揖 跪 初獻香三炷 三叩首

起 跪 亞獻香三炷 三叩首

起 跪 終獻香三炷 三叩首

起 作揖 跪 獻香五炷 五叩首

起 作揖 跪 獻香五炷

明明上帝十叩首

起 作揖 跪 獻香三炷

諸天神聖九叩首

起 作揖 跪 獻香三炷

彌勒祖師九叩首

起 作揖 跪 獻香三炷

南海古佛五叩首

獻香三炷

活佛師尊五叩首

獻香三炷

月慧菩薩五叩首

獻香三炷

各位法律主五叩首

獻香三炷

灶 君三叩首

師 尊三叩首

師 母三叩首

獻香三炷

鎮殿元帥三叩首

鎮殿將軍三叩首

教化菩薩三叩首

各位大仙三叩首

老前人一叩首

前 人一叩首

點傳師一叩首

引保師一叩首

前人大眾一叩首

自己祖先一叩首

起 作揖 跪 獻香三炷

金公祖師五叩首

獻香三炷

天然古佛五叩首

獻香三炷

中華聖母五叩首

獻香一炷  
獻香一炷  
白水聖帝三叩首  
不休息菩薩三叩首  
獻香一炷  
白陽大仙三叩首

起 作揖 獻香(叩首)禮畢 放手鞠躬 退



## 09【引保師愿詞】

○○○虔心跪在

明明上帝蓮下 今天願引願保 (大眾) 求發一大道 性理真傳  
如若引入保入 左道旁門 哄騙人之錢財者 願受 天人共鑑



## 10【求道人愿詞】

虔心跪在

明明上帝蓮下 今天願求 發一大道 性理真傳 求道以後  
誠心抱守 (乾)實心懺悔 (坤)實心修煉  
如有虛心假意 退縮不前 欺師滅祖 藐視前人 不遵佛規  
洩漏天機 匿道不現 (乾)不量力而為者 (坤)不誠心修煉者  
願受 天人共鑑



## 11【求道表文】

表文呈奏

據

民國 年歲次 月 日 時前後在

臺灣省 (縣) 市

佛堂之中 今有 欽加

頂恩 張光壁 孫慧明 率引 (引師) 保 (保師) 虔心跪在  
明明上帝蓮下 曰竊自開天以來 已經三佛之運 生民而後  
未得天道普傳 理義不明道統已墜 至今三千餘年矣 今蒙  
皇天開恩 正宗鍾毓於東土

祖師鴻慈 正派再振於巴郡 今時眾生塗炭 未得救拯 水火劫煞  
已到眼前 所以立下此會 廣救無數眾生 整起此著

普收有緣種子 不啻

湯武鴻恩

堯舜大德 壇前

上帝哂納 案下 神祇俱庇 今有（眾生等）

突破塵緣 醒悟迷津 懇祈

上帝大賜明路 兒等別無可陳 惟獻清供素蔬 以達

上聞

兒 率眾等俯伏百叩

❧❧❧❧❧❧

## 12【辦道禮節】

請壇禮開始

請請壇人獻香就拜位

作揖跪 獻香五炷 五叩首

起 作揖 鞠躬歸班

兩邊肅立靜聽請壇（請壇人念至毋違特宣）

對面作揖 各就拜位

作揖跪 初獻香三炷 三叩首

起 跪 亞獻香三炷 三叩首

起 跪 終獻香三炷 三叩首

起 作揖 跪 獻香五炷 五叩首

跪讀申請（請壇人念至：虔心跪在明明上帝蓮下）一叩首

（請壇人念至：又申請三期應運彌勒古佛）一叩首

（請壇人念至：末後大事明白同報恩情）三叩首

新求道人就拜位 作揖 跪 靜聽讀表（讀畢）

求道人姓名對否 焚表

這張表文叫做龍天表 表文升天 天榜掛號 地府抽丁

從今以後你們的姓名已經在 三官大帝那裡註冊

脫離十殿閻君之掌管 以後要存好心 說好話 做好事

好好行功立德 以報答 天恩師德 一同十叩首

起 作揖 兩邊分班 對面作揖 請壇禮畢 放手鞠躬 退

請傳道師就點道位

引保師就拜位

作揖 跪 引保師代表 獻香三炷 三叩首

引保師當愿各報自己姓名 請報出聲音來

請你們隨我唸

虔心跪在

明明上帝蓮下

今天願引願保 (三人以上說大眾)(二人以下說姓名)

求發一大道 性理真傳 如若引入保入

左道旁門 哄騙人之錢財者 願受天人共鑑 三叩首

起 作揖 引保師當愿禮畢 放手鞠躬 退

請求道人就拜位

請傳道師慈悲講幾句話(講畢)

作揖 跪 求道人代表 獻香三炷 三叩首

請傳道師傳合同(傳道師唸至莫要漏縫)(傳畢)三叩首

平心靜氣 眼看佛燈 靜聽禮囑

(傳道師唸至〔乾〕一切諸神護庇靈壇)三叩首

(傳道師唸至〔乾〕傳你本來玄妙關

〔坤〕慈悲傳你真玄關 )三叩首

求道人當願各報自己姓名 請報出聲音來

請你們隨我唸

虔心跪在

明明上帝蓮下

今天願求 發一大道 性理真傳 求道以後 誠心抱守

(乾)實心懺悔 (坤)實心修煉 如有

虛心假意 退縮不前 欺師滅祖 藐視前人 不遵佛規

洩漏天機 匿道不現

(乾)不量力而為者 (坤)不誠心修煉者者 願受

天人共鑑 三叩首

(傳道師唸至)

(乾)洪誓大愿永不能完 (坤)無有別囑誠聽點玄 三叩首

平心靜氣 眼看佛燈 敬待點玄(點畢)三叩首

請傳道師傳口訣(傳畢)三叩首

謝謝

老皇開道之恩三叩首

諸天神聖一叩首

彌勒祖師一叩首

南海古佛一叩首



活佛師尊一叩首

月慧菩薩一叩首

師尊一叩首

師母一叩首

點傳師一叩首

引保師一叩首

前人大眾一叩首

起 作揖 求道禮畢 放手鞠躬 退



### 13【十五條佛規】

01. 尊敬仙佛 02. 遵前提後 03. 齊莊中正 04. 循規蹈矩 05. 責任負起  
06. 重聖輕凡 07. 謙恭和藹 08. 勿棄聖訓 09. 莫著形相 10. 手續必清  
11. 出告反面 12. 不亂系統 13. 愛惜公物 14. 活潑應事 15. 謹言慎行



### 14【講師、講員、辦事人員愿文】

尊師重道 謹守佛規 代天宣化 普渡眾生 任勞任怨 見道成道

正己成人 三清四正(講師：捨身辦道 清口茹素)財施 法施 無畏施 量力而  
為 聽師調遣 始終如一 千魔萬考 永不退志



### 15【壇主愿文】

尊師重道 謹守佛規 捨身辦道 財法雙施 清口茹素 改毛病去脾氣

三清四正 追隨前人 始終如一 赴湯蹈火 萬勞不辭 同心同德

共駕法船 負責了愿 千魔萬考 永不退志



### 16【講師應有之資態】

01 學問充實 02 道德培養 03 口才藝術 04 性理印證

05 經典研究 06 各教考據 07 道教分析 08 精神活潑

09 體力健康 10 慈悲熱誠 11 風度瀟灑 12 舉止尊重

13 尊師重道 14 謹守佛規 15 承上啟下 16 謙恭忍讓

17 誨人不倦 18 正心修身 19 孝順父母 20 奉公守法

21 敬老尊賢 22 濟世救人 23 受勞受苦 24 以身作則



## 17【每日持戒生活】(白水老人手記)

修行首先要持戒 不能輕鬆要認真  
簡單持戒日日做 分秒修持不離身  
清晨早起六點正 一日之計在於晨  
互相鞠躬問聲早 昨晚睡得好不好  
齊來喝杯溫開水 調調身心氣通順  
再來讀個經和訓 今日修行有信心  
認真日背一小訓 日積月累長學問  
但是不可假虛應 如此才可日長進  
行住坐臥來唱訓 謹言慎行拴妄心  
這種生活人仙同 因為道在二六中  
晚餐之後不亂食 清茶水果稱上品  
過失記在過失簿 條條反省日日新  
有否好勝嫉妒心 有否護己護短心  
有否懈怠圖外表 驕傲虛假與妄心  
有否聞過則喜心 有否寬宏大量心  
有否隱惡而揚善 推功攬過與低心  
心境火候煉如何 二六朗悅功夫深  
總要認真去修煉 不二過來方賢英  
否則因循苟且過 前途茫茫苦海沉  
濟公徒弟繫眾生 怎容過失隨在身  
念在九玄七祖盼 念在師德與天恩  
念在眾生心慈憫 念在自己前途奔  
明日一定勤修行 清清靜靜天人欣  
再來老<sup>母</sup>蓮前叩 懺悔過失有真心  
月終焚表告蒼天 此後修行加嚴謹  
眼前守玄靜一靜 迴光返照復光勳  
如此持戒守本份 自然道行日日深  
但要兩點謹記牢 即是有恆與認真  
心性未定根不穩 一曝十寒失方針  
活潑運用智仁勇 靜時渡己動渡人  
時存慈憫有愛心 時常笑容傳鄉音  
做個氣象轉播台 承上啟下運乾坤  
晝夜裡來勤加工 內德外功齊修進

來日修成上品蓮 天人共喜樂殷殷  
父母養育才報答 前人苦心方慰問  
九玄七祖得超生 如此算是盡了心  
趕到南屏恩師叩 直回理天拜娘親  
龍華會上定位品 逍遙無極萬八春



### 18【三清四正】

三清：聖凡清 錢財清 男女清

四正：身正 心正 言正 行正



### 19【小徒兒怨師尊(一)】

先天大道在世間	修道由人成由天
不肯加工前進步	臨時後悔是枉然
小徒兒見師尊跪拜蓮前	心悽慘眼落淚問聲師安
叩罷頭平身起四下觀望	師修的真威嚴各樣齊全
師修的古佛體祥光滿面	穿一身黃袈裟藍翠鑲邊
手拿著齋戒珠五十四對	端坐這金蓮臺赤腳雙盤
武將軍穿金甲兩邊排站	一個個執寶器侍立駕前
有護法和韋馱懷抱天杵	左金童右玉女面帶笑顏
滿牆上各顯工畫的好看	後閃屏有山景墨水丹青
龍鳳輦內端坐師傅形像	逢大會萬人朝香煙沖天
黃羅傘並鸞駕兩廂放滿	金爪斧朝天鐙照眼明鮮
金字匾玉石牌高懸前殿	紫金樑白玉柱下鋪金磚
觀不盡廟裡邊各樣仙景	再敘明廟周圍霞光電閃
遠望著密松林威武好看	到眼前活龍地綠水青山
左護山自生的青龍戲水	右輔沙長就的白虎登山
山門外石獅子張牙睜眼	三層門各都有把門靈官
四圍牆似皇城賽過金殿	松柏樹週圍繞廟在中間
從山門往上觀五進宅院	勝過那西方景仙佛洞天
金寶殿滾龍脊上安大穩	金獅子玉海馬廟脊站嚴
上扣著琉璃瓦明煜耀眼	四角的風鈴響震地驚天
墀階台八寶砌三十六級	迎路寬月牙橋玉石欄杆
樂舞樓修的好對住正殿	左鐘閣右鼓樓擺列兩邊
地脈靈廟宇大清雅翠棟	上水石下清泉不俗不凡

宮殿前十方堂兩邊道院  
後山上何首烏綠葉罩滿  
每早晚進香人來往不斷  
有善男合信女來把供獻  
小徒兒越觀看心中越嘆  
受一個小香火離河不遠  
逢秋夏漲大水心驚膽戰  
三伏天無樹蔭曬的出汗  
到冬日乞丐兒燒火做飯  
薰得我眼流淚睜不開眼  
成年月無一人來把供獻  
小香火無供養這還不算  
臭髒氣薰的我實難停站  
我面前無執事沒多陪伴  
有一雙舊雲鞋穿在足上  
有一頂破頭巾頭上所戴  
我修的蓮台小只把師怨  
高看我寬待我害我不淺



## 20 【小徒兒怨師尊(二)】

老師傅蓮臺上微微冷笑  
我教你休動火你說性暴  
我教你去開荒替天闡道  
我教你開佛堂天橋搭起  
我教你多立德憑功定果  
我教你看破些紅塵是假  
我教你對道友總要恭敬  
我教你惜口福勿貪美味  
我教你加猛勇始終不怠  
我教你真行持改過遷善  
我教你清潔白功德賑款  
我教你避嫌疑榜樣學好  
我教你心低小嚴守皈依  
我教你拜罷佛多講規戒

紫竹林聚仙亭還有花園  
吃一個就成了大羅金仙  
有求福有求壽有祈平安  
香花果盡擺在師傅蓮前  
自愧我沒修成淚滴胸前  
又低矮又窄狹小廟一間  
颳大風下大雨漂濕衣衫  
只有棵小茅枸枝葉不全  
濕柴草又不乾薰滿濃煙  
無奈何坐不住站在外邊  
元旦節三炷香要等一年  
叫化子無人管餓死裡邊  
成月餘無人埋叫我作難  
有一個小金童面不喜歡  
吾座前無寶貝赤手空拳  
身穿著藍道袍也不新鮮  
怨只怨在紅塵勸我輕言  
嚴緊我責罰我我把光沾

提起你在塵世行道根源  
我教你少說話你不厭煩  
你偏說出遠門實在作難  
你偏說日子薄房屋不寬  
你偏說哄愚人花費銀錢  
你偏說兒女小再遲幾年  
你偏說無暇空應酬此端  
你偏說不食葷總是口饞  
你偏說愚蠢人慢慢向前  
你偏說修行事半聖半凡  
你偏說聖凡利何必太嚴  
你偏說不和光混俗也難  
你偏說過整齊人心膽寒  
你偏說身勞累不勝困倦

我教你存敬畏遵行條例  
我教你辦罷事急速行走  
我教你待後學不分彼此  
我教你佛家錢莫肥家計  
在紅塵講規矩全然不記  
在紅塵你只說日子長遠  
在紅塵這件事你作懈怠  
到此時果位小你把誰怨  
遇風波怕生死藏身退步  
你說我蓮臺大排場體面  
我也曾為大道遭風受害  
我也曾為大道沖風戴雨  
我也曾為大道受人誹謗  
我也曾為大道拋家離遠  
我也曾為大道受責受怨  
我也曾為大道受些驚險  
任隨甜任隨苦不起恨念  
說不盡在紅塵修道苦難  
善男女遵規訓加緊調辦  
凡拜佛上品供不可省儉  
逢講道側耳聽不許攪亂  
可惜這當天任他不去辦  
到臨危歸上方賬不好算  
到那時你才信道要實辦  
既得緣又失緣難把人怨  
當領袖要廉潔清白謹慎  
不圖升不圖賞聽天由命  
於後學勤講究不厭不倦  
這才是好領袖規矩嚴整  
自盤古先天道單傳一貫  
周末時水精佛倒裝下世  
講治世講禮法道不露現  
將一貫授顏回復聖克己  
顏去世這大道曾參繼續

你偏說誰能夠照得十全  
你偏說佛堂好多停幾天  
你偏說這個好那個無緣  
你偏說借一時過日再還  
辦道去不遵規糊塗麻纏  
停幾日再去辦不在一天  
我催你學謹慎惹人心煩  
可知道此非輕後悔遲焉  
到如今你想與諸佛並肩  
全沒想我當日受過熬煎  
我也曾為大道受過艱難  
我也曾為大道晝夜不眠  
我也曾為大道上下包涵  
我也曾為大道忍飢受寒  
我也曾為大道花費銀錢  
我也曾別父母難盡孝念  
任千魔並萬難我沒鬆肩  
才修成丈六體上品金蓮  
晝夜裡勤加工才算英賢  
強將就造罪過心不誠虔  
截斷了人的話實在不賢  
領命的常在家不駕法船  
降品級削職分難佔上蓮  
不實辦落虛名歲月空遷  
想自在好便宜墮落深淵  
品行高規矩好令人謹嚴  
不愛銀不愛錢不為吃穿  
不論富不論貴不論貧寒  
靜渡己動渡人功果兩全  
堯傳舜舜授禹歷代相傳  
生尼山成至聖教化三千  
內藏著出世法率性先天  
居陋巷緊抱守參悟妙玄  
述中庸乃孔伋孟軻七篇

亞聖後失真傳翰墨教演  
至梁朝達摩佛興教普渡  
虛無祖命五老治規調辦  
趁此時外加修內果苦煉  
不投魔不信邪法門不二  
自天子至庶人修身為本  
每日裡忙偷閒參研禮懺  
口裡省肚裡儉多培功善  
外積德內修果善早學滿  
在世上得大道受盡苦難

習夫子之文章誰言性天  
到如今十六代末後宗傳  
排十地選萬靈駕舟收圓  
一度十十度百百度萬千  
勿欺師勿滅祖認真道盤  
正其心誠其意常存先天  
夜晚間靜坐著三省行言  
十二時鑒察神寸功不瞞  
十惡去八邪除功備三千  
功行滿丹書詔返本還原



### 21 【小徒兒怨師尊(三)】

小徒兒聽師訓抱怨自己  
為兒女在紅塵每日勤儉  
為兒女在紅塵家治萬貫  
為兒女在紅塵日忙貪戀  
為兒女貪活路做到天晚  
為兒女存奸巧心血使盡  
為兒女苦貪求未把道辦  
空治下田萬頃金銀千石  
夫妻恩兒女愛纏身枷鎖  
到此時可知道莫大夢幻  
悔只悔我沒有開荒下種  
悔只悔怕支應懶開佛場  
悔只悔心高大不受人勸  
悔不該佛堂內朝日不掃  
悔不該佛桌上不拭灰燼  
悔不該佛堂屋同廚做飯  
悔不該懶燒香供茶不換  
悔不該我一生食黑財奸  
悔不該行外面心口不一  
悔不該燒香去髒衣不換  
悔不該誦經卷不淨手臉  
悔不該師傅來不接不送

哭了聲為兒女枉費千般  
在道中我不肯花費銀錢  
到臨終只落得兩手空拳  
我一世沒結下半分佛緣  
到夜間沒用功乏困貪眠  
沒認真耽誤了上品金蓮  
耽誤了我萬世西方福田  
兒女享自身罪我去承擔  
世上人看不破被他牢拴  
將靈光未煉就後悔遲焉  
道成了果位小缺少站班  
功德小只落得小廟一間  
到如今才知道金玉之言  
到如今叫化子穢污不堪  
牧牛童睡神臺腳踏蓮前  
叫化子廟燻成黑墨一般  
成年月少善人來進香煙  
到如今沒供果享受艱難  
廟修到窄險處近河溝邊  
落一個破廟宇漏濕衣衫  
放羊孩游玩耍搬弄胡纏  
道成時小廟神伶仃孤單

在道中鞋與襪未捨一件  
在道中分人我存些偏見  
看不破假紅塵一時上當  
一世功萬世果何等便宜  
我一世巧打算功果缺欠  
千後悔萬後悔悔之已晚  
勸世上修行客以我為戒  
好行持上品蓮功德所換  
大功德受超品三千六百  
一分功一分果不錯一毫  
我只說存私心誰能看見  
仙佛聖本正直驚天動地  
卻不知鑒察神時刻察看  
怕行持皈不清戒又不整  
駕慈舟渡原人遍流苦勸



## 22 【小徒兒怨師尊(四)】

在紅塵身懶惰惜力不進  
在紅塵普結緣如開飯店  
在紅塵廣捨財捐助賠墊  
在紅塵捨寒衣並施茶飯  
在紅塵捨鞋襪又捨雨傘  
在紅塵為普渡奉茶奉飯  
在紅塵勤功德無人無我  
在紅塵受飢寒不把人怨  
在紅塵好講解提破愚漢  
在紅塵能屈伸包天涵養  
仙與佛盡都是借凡成聖  
那一個不下苦上得仙卷  
那一個不培德證得上品  
這一回幸遇著三期普渡  
這一回若不得性理天道  
這一回大普渡不在貧賤  
這一回看得破遠往前盼

道成時動步行旋風轉圈  
茅枸樹被樵童枝葉砍完  
上品蓮沒修成慚愧千年  
千年罪一世消才算清完  
修座廟少磚瓦木材不全  
悔斷腸哭瞎眼也是枉然  
莫學我假支應錯認定盤  
到西方極樂宮逍遙無邊  
次行持得中品四萬八千  
有一分私欲心難瞞蒼天  
有一分人欲私難回西天  
不費力怎成了大羅金仙  
三尸神時刻間跟隨身邊  
洩了道十二萬難把身翻  
到上方坐蓮臺萬人朝參

到上方當執事手腳不閑  
到上方坐蓮臺清福無邊  
到上方龍鳳閣玉瓦金磚  
到上方佩綬帶頭頂冠簪  
上天梯登雲鞋行動足穿  
歸上方飲瓊漿逍遙樂歡  
歸上方各樣寶手中俱全  
歸上方居靈閣金光明鮮  
到上方迎仙閣遍滿香蓮  
到上方為率領掌管群仙  
那一個不立功成得金仙  
那一個不立志返本還原  
那一個不修果回到瑤天  
認真道急早修鰲頭佔先  
再想修還得要十二萬年  
不在老不在少只在心田  
趕得上這才算九六奇男

這一回看不破罪孽深瀚  
這一回大收圓大清惡善  
把富貴把功名一眼看淡  
想高超盡忠心猛勇實辦  
真行持有功德上天有眼  
上品蓮非功德誰肯讓你  
在紅塵一分功增你十件  
無私心無偏見才算大器  
能盡忠能盡孝稱起大善  
不投東不下世逍遙自在  
外功滿內果圓丹書下詔  
說到此小徒兒想起一件  
趁此時普渡事還未落點  
老師傅蓮臺上笑容滿面  
再下凡倘若是迷了本性  
小徒兒尊恩師放心膽大  
這一次下凡去不做愚漢  
這一次要學個八仙過海  
我總要立一個沖天志願  
我總要立奇功掙得千萬  
我總要在神上不在人下  
我總要內果圓外功修滿  
真辦道龍華會考功定位  
做一個靈霄客永遠不轉

到臨危終難躲水火三關  
有根基有緣份快上慈船  
把酒色與財氣全然不觀  
怕墜落受師訓過犯除完  
實功夫實體行自然高攀  
各自修各自得上品金蓮  
西方果讓一分想著艱難  
能忍讓有涵養才是高賢  
成仙佛成聖賢萬代流傳  
無晝夜無寒暑福壽雙全  
也不枉在東土為人一番  
與恩師上叩頭禮跪蓮前  
為徒兒再下凡去助收圓  
就怕你說的好志向不堅  
還不如就受那小小香煙  
這一次下凡去不照從前  
學一個孫悟空大戰東川  
各自顯各手段神通妙玄  
修一個常不老大覺金仙  
我總要三千滿八百果圓  
我總要與恩師大壯體面  
得下了大果品徒才回還  
赴皇<sup>皇</sup>蟠桃筵群仙樂歡  
我終要與師尊一處團圓



### 23【皇<sup>皇</sup>訓子十誡第一告誡】

訓垂東土指流源	子女返本拜天然
十字街前點靈竅	誠告皇胎力篤前
一誠告原佛子細聽根源	金筆動洩盡了天機妙玄
憶當初天未分混沌未判	杳冥冥無人我空空一團
九六億原佛子先天同聚	無憂愁無煩惱自在安然
仙兄弟仙姊妹 <sup>身</sup> 來伴	隨 <sup>身</sup> 來隨 <sup>身</sup> 去不離身邊
極樂國任逍遙隨意玩耍	乘青龍跨彩鳳無量尊嚴
不懼寒不懼暑無束無管	無陰陽無對待至理純然



暇無事任遨遊先天妙景  
吃的是仙桃果瓊漿玉液  
論無極為聖域至善寶境  
自從那交子會氣數已到  
萬八載氣數定天始成就  
清氣升為天盤佈置星斗  
至寅會天地交日月合照  
此即是先天妙開闢之本  
道即理理即道虛靈之妙  
一本散萬殊栽自無入有  
天既成地既立萬物齊備  
那時節為 我無奈之處  
屢次的差原佛東土而下  
無奈何為 我造下血酒  
設一個大仙池齊來洗澡  
眾佛子酒醒來不見 面  
為娘我悲痛淚原子呼喚  
如若是仙衣鞋交與爾等  
折樹枝合樹葉遮寒蔽冷  
眾佛子如掉魂悲哀悲嘆  
言答三期末大開普渡  
眾兒女心猶疑悲聲大放  
自此我原佛子東土而遼  
子分各東西好不難過  
至今時屈指算六萬年載  
今時下運已至為 降道  
前後的真實語一一說盡  
登上了金線路隨 天返  
言至此不由我痛淚下滾

悶倦來或下棋或將琴彈  
穿的是登雲鞋仙衣仙衫  
靜而應通萬化萬類根源  
為 我命七佛治理坤乾  
又待至丑會滿地始完全  
濁氣降凝為地湖海山川  
會陰陽合氤氳萬類生全  
無極靜太極動皇極坤乾  
道生一一生二二又生三  
其奧妙是神仙亦難盡言  
東土裡無人烟缺少女男  
方捨我九六子齊降凡間  
來一次返一次不肯治凡  
三山坡哄醉了菩薩佛男  
趁機會仙衣鞋收回理天  
又不見仙衣鞋可在那邊  
爾眾等速東遼莫要再戀  
爾那個亦不肯在世治凡  
餓了吃松柏子渴飲清泉  
問 我至何時方把家還  
親捎書親寄信親渡佛原  
為 我寫合仝付與皇原  
治世界為男女栽立人烟  
自此我眾佛子受盡熬煎  
每想兒在世苦 心難安  
差三佛辦末後普渡收圓  
望我的原佛子速求真傳  
不醒悟墜苦海永難身翻  
只得是稍止機再為批全 停

## 24【皇 皇 訓子十誠第二告誡】

天道闡發聖脈傳 勅令三佛辦收圓  
若還不求天然渡 歷劫千生身難翻  
再誠告原佛子洗耳聽真 今本是三期劫苦不堪云  
天該老地該殘氣數已盡 為 皇 我豈忍得傷害兒身  
開文運垂覺路撒下金線 闡天道稱一貫貫滿乾坤  
差彌勒掌天盤萬旁歸正 命天然掌道盤靈妙化身  
賜大肚掌勅令萬神助道 代天宣飛鸞化諸佛諸真  
先天裡 皇 不留仙佛神聖 眾菩薩眾仙真俱投凡塵  
論天大論地大惟 皇 命大 順者昌逆者亡天淵之分  
此一次開普渡亘古無有 萬古的真奇緣巧遇此春  
上渡仙下渡鬼中渡善信 收千門收萬教同歸正根  
傳末後一着鮮天機玄妙 得一指開金鎖現出金身  
先傳這古合仝靈山原證 次點這玄關竅白陽法門  
再傳這無字經通天神咒 念動了仙佛聖來護兒身  
得天道天榜上英名高掛 地府中勾了賬脫出苦輪  
朝聞道夕死可憑此一指 指出來無價寶直返瑤琳  
上上乘一步超至簡至近 脫凡體成聖體極樂長春  
並非是空口說真憑真證 而且這假色身可證明分  
冬不挺夏不臭容顏端正 此本是脫皮囊得證金身  
如不信命真靈來壇可證 事事真件件實豈有虛云  
真天道真天命三界無二 有道統祖祖傳直到而今  
二九盤收束起弓長應運 在家中如出家火宅僧人  
今時下真機展普遍大地 諸天神眾仙佛共下東林  
各處裡施顯化驚惺迷子 或飛鸞或借竅親渡原真  
苦海中駕法船渡挽九二 三天事人間辦天借人云  
各應當加慇懃孜孜精進 替天傳代天化助爾師尊  
道賴人而宏展人賴天助 天人接活潑潑建立功勳  
現如今北方道開化已久 難選這大棟樑真中之真  
故此的為 皇 我今垂十誠 催促我好兒女一齊知音  
修天道離不了開闡渡化 發婆心用苦口不倦誨人  
必須要立定了沖天大愿 貴乎汝實行辦正己成人  
掛虛名圖好看濫竽充數 像如此難以返極樂家門  
又或是假面具敷衍了事 終久來必然是墜落沉淪

忽行止忽作輟半途而廢  
望我的原佛子早些快惺  
外功滿內功圓速速渡化  
任兒是大羅仙佛祖降世  
聽<sup>也</sup>勸再不可不肯發奮  
為領袖為壇主責任重大  
如若是一人明智慧廣大  
今曉諭辦事人壇主領袖  
設何法能渡得迷津登岸  
心要似行雲變意如流水  
和而流是大過依理為準  
功愈高位愈險時時謹慎  
爬得高跌得重一定之理  
畏三畏思九思言行相顧  
遵訓行登聖域極樂長享  
又批了一篇語佛子牢記

打殘靈壓陰山永難翻身  
猛勇進貫始終定然成真  
上乘位千葉蓮立於凡塵  
無真功無實善難返瑤琳  
如若是慢一步難立功勛  
一人愚萬人墜悞己悞人  
能引賢能調眾萬人成真  
各應當發剛毅勤上加勤  
用何法能催眾齊發真心  
隨上下隨方圓能屈能伸  
掃貪嗔斷痴愛清靜法身  
登極峰墜下來萬丈深淵  
又豈可聰明子作了痴人  
遵三省守四勿方是賢真  
不遵守任己意地獄安身  
三才息少靜坐再垂訓文 停



## 25【皇<sup>也</sup>訓子十誠第三告誡】

惟道獨尊我獨尊  
三界十方<sup>也</sup>為主  
三誠告原佛子心性早明  
有即無無即有有無一本  
想當初氣未分混沌未判  
無極動太極現陰陽評定  
判六候列七政九宮八卦  
論奧妙談虛無幾個能懂  
無陰陽無對待不增不減  
非青紅非寒暑非靜非動  
費隱間無色相至玄至妙  
不動變不顯章無為而化  
高無上超九重色空之外  
貫乾坤貫三界無處不貫  
強曰道稱真一挽化宇宙  
道在天天清爽棋盤動轉

生尅制化老身分  
養育聖凡一靈根  
悟真理參天道真空不空  
色是空空是色非色非空  
一團理無聲臭杳杳冥冥  
生三才分四相又化五行  
分順逆現盈虛萬類盡生  
這真理古靈光至虛至清  
又無形又無象又非頑空  
萬化源真玄機隱於此中  
視弗見聽弗聞彌羅色空  
真主宰大樞紐達化萬靈  
淵無下裹地府九幽十冥  
天與地合萬類離此成空  
此本是真來源無極根恒  
佈星斗運日月一氣流行

道在地地凝結山川潤育  
道在人人得生知覺動轉  
三教理無有二皆欽命  
道金丹釋舍利儒曰天性  
千古來無二法道無二道  
明一法知萬法法法盡曉  
自三聖歸天後涅槃止渡  
至今時三千載無人明曉  
今時下開普渡奉天承運  
上繼續無極秘三聖奧旨  
上上乘真妙訣誰能明曉  
得天道速行功修真藉偽  
人生世如海中一粒粟米  
酒色財迷住了原來佛性  
慾海波無休止情枷愛鎖  
石火中閃電光怎能長久  
迷人們他豈悟紅塵是假  
百年間是三萬六千餘日  
少而壯壯而老老而歸盡  
生老病死與苦誰能脫過  
空手來空手去一文難帶  
何論你富王侯賞罰判定  
自寅會至今時數萬年載  
這竅出那竅入改房換舍  
愈轉變而愈迷日流污下  
人之本先天降靈山一脈  
惺悟者成聖賢身登極樂  
這神仙俱都是凡人來作  
望我的眾兒女早明真偽  
批至此三才倦停止機管

生萬有長萬物賴一而成  
人有道不知有故難超生  
來傳道本傳這虛無妙靈  
皆本是此靈光名異理同  
仙佛聖傳心印一本同宗  
千佛經萬聖書一理貫通  
斷線路不傳道教存於東  
岐途出萬教展真理未明  
龍華會天開選大展宗風  
下開啟眾生等同把舟登  
想覓真求弓長大道得成  
道雖空空不了萬有成空  
隨潮來隨潮去不分西東  
貪七情染六慾蔽住本靈  
貪榮華戀富貴名利網繩  
如曇花閃一閃孽果結成  
認其苦以為樂如同蟻蠅  
不想想能幾時身得安寧  
這酸甜合苦辣好不傷情  
一轉眼幼童兒白髮成翁  
只落得一孤墳靈赴幽冥  
了因果畜轉人人轉畜牲  
輪迴苦永無止淒涼難評  
張家男李家女場場成空  
忘却了先天娘生性無生  
聖不增凡不減聖凡同宗  
迷昧者是凡庸墜落幽冥  
未曾見生成就仙佛神明  
惺迷途拜真師還原歸宗  
三才者充充飢再為批評

停

## 26【皇 皇 訓子十誠第四告誡】

真真假假假假真

塵凡立功廣宣化

四誠告原佛子修真為強  
人生世如蜉蝣朝生暮喪  
終日裡苦勞碌南遼北闖  
數十年之光景生老病喪  
爭名利圖富貴生死流浪  
論紅塵淒涼世苦不可講  
任兒等置下了家財萬貫  
任兒等蓋高樓大廈寬廣  
任兒等有金銀堆如山廣  
任兒等穿綢緞衣服鮮亮  
任兒等食美味酒筵異樣  
任兒等日作樂心舒意爽  
任兒等好妻妾俊俏兒女  
嘆一聲五濁世痛淚下降  
凡塵世好比是遊玩之場  
如若是能惺悟合家修養  
在後天修真道一家吉祥  
這奇緣這奧妙古未現相  
為名者至一品王位還想  
只管貪只管戀全不思想  
能惺悟早修真先天而往  
這天淵分二路一念所想  
地府裏苦情處一言難講  
如作善還算好來生福享  
若作孽不上算口難辯講  
有刀山有油鍋刑罰異樣  
奈河內墜落了老幼少壯  
提起來這苦處難以再講  
一失足千古恨實是此樣  
聽 皇 勸修天道精神振爽  
爾九祖在輪迴日夜盼望

真假悟透定超塵

化世歸根同求真

這紅塵是苦海波濤茫茫  
有那個能脫得十殿閻王  
又好比是牛馬來遼荒場  
千般景萬般事花露草霜  
貪嬌妻戀愛子大夢一場  
有七情合六慾迷住兒郎  
田千頃收萬石日食升糧  
亦不過眠八尺難臥兩床  
歸陰去怎能把一文來裝  
也不過遮寒暑以禦風霜  
圖口腹殺生靈罪孽難搪  
百年間昏如夢彈指時光  
黃泉路四處分好不淒涼  
望我的皇胎子莫迷心腸  
誰是爺誰是孫誰是女娘  
同行功同立德同返仙鄉  
功成後到先天同聚一堂  
只可悲世迷人不惺黃梁  
為利者賺百萬不足心腸  
忘却了生死路來見閻王  
不惺悟迷心性地獄淒涼  
如一時心念差永受悲傷  
孽鏡台照一照畢露罪殃  
福盡時終須墜怎能久長  
照罪孽上刑罰自己去搪  
大鋸解鐵磨研狗食血湯  
十八層大地獄令人慘傷  
不由我淚珠滾落滿胸膛  
失人身永下流難返仙鄉  
立堅志冲天愿心似金剛  
盼爾等行功超好脫汪洋

一念差墜下去不算怎樣 連累了上祖先痛哭泉黃  
壓陰山六萬載何等苦狀 等下元遇普渡再登慈航  
如若是那時節佳期趕上 能否知轉人身得求玄黃  
莫不如趁今時西天速往 醒迷途隨我返回瑤邦  
批至此稍靜坐再為壇上 止機管訓中意再參再詳 停



## 27【皇 皇 訓子十誡第五告誡】

天運迭轉末三秋 三災八難遍地流

九九浩劫誰能脫 救世惟憑一貫舟

五誠告原佛子躬踐實修 明機運識天意方是賢儔  
今本是末劫日道劫雙降 改乾坤整山河卦相添抽  
論為原本是仁慈為本 却為何這大劫降下東疇  
爾不想亘古來大劫何有 堯舜禹聖安邦得樂悠悠  
人心正天心順有何劫降 人心邪惡孽招浩劫橫流  
觀凡塵這風俗日流污下 古聖賢綱紀禮無人追求  
學奸貪講詭詐坑崩拐騙 敗人倫壞綱常一言難究  
君不君臣不臣朝綱難整 父不父子不子世風下流  
夫不義婦失規仁德敗壞 兄不寬弟不忍結為冤仇  
交朋友失信用言行不顧 五倫墜八德廢再不追求  
為士者只說理不按理作 為農者擲桑界真理未究  
為工者他不講精勤堅樸 為商者賣假貨誑哄愚流  
僧家子失却了三皈五戒 道家子變左旁正法全丟  
儒士子讀皮毛假自稱聖 觀一觀不由我悲在心頭  
今時下如果是無此劫降 舉世上再無有一個賢儔  
降三災佈八難刀兵水火 九九劫八十一普遍全球  
差來了五大魔東土大鬧 設萬法定連環惡孽來收  
天數至地數滿氣數已到 亦是那人造孽夙結冤仇  
六萬年大清理應於斯世 分玉石分善惡各地插籌  
用慧眼觀一觀血淚下滾 見惡霧沖霄漢滾滾橫流  
遍四海起妖風無有安定 干戈起盜賊亂十人九愁  
瘟疫劫飢饉劫旱澇不等 普天下絕五穀寸草不收  
這種災那種難不為奇論 最怕這水火風刷洗全球  
黑七七四十九無有日月 開地府放鬼魂齊把命拘  
黑漆漆陰森森寒光滿世 齊討債命還命債將錢酬

罡風降掃乾坤並掃宇宙	掃氣象刷三界另換樞紐
任兒是金剛體銅鐵打就	難脫我真劫火性命難留
雖然是這浩劫為 <sup>粵</sup> 降下	在先天日夜裡血淚長流
不忍得這玉石俱焚不判	垂金線現靈光海內行舟
千條路萬條路難逢生路	逢生路惟一貫天道速求
為念我眾兒女東顛西跑	捎千書垂萬信屢屢東投
怕只怕傷了我皇胎兒女	故此的苦苦告來把函修
叫一聲孝順兒賢良之女	速速的快上岸加功進修
得天道再不可三心二意	智慧劍斬牽纏名利速丟
若戀凡又豈知世界是假	用目觀這世上愁也不愁
任兒有千方法萬種妙計	到其時不由爾身赴劫流
十分中死七分三分受苦	只死得血成河骨堆山坵
如若是貪凡情背理忘聖	九九劫打殘靈地獄來囚
想脫劫想避難速立功果	為 <sup>粵</sup> 我命仙佛護兒優游
醒悟者隨 <sup>粵</sup> 我無極而返	不醒悟遭浩劫打入牢囚
諸佛子齊送駕率侍回返	至彼處接續批金石垂留

退



## 28【皇<sup>粵</sup>訓子十誠第六告誡】

明明一顆珠 上帝賜兒儲

無皇垂覺路 老<sup>粵</sup>指迷途

我

造物真主 無皇老<sup>粵</sup> 率侍衛駕蒞東土 佛子分立 聽

娘批書

真道真理真天命 修者還須真心行

一念之差千里遠 臨淵履薄戰兢兢

六誠告原佛子金鐘速敲 老無生想兒女心如火燒

憂孩兒迷心性不聽娘語 將娘書拋一旁不觀不瞧

麻木子頑梗子實實難化 費盡心用盡力屢下九霄

為操辦三期事作難之甚 差千佛命萬祖齊降東郊

用千方並萬計不見功效 屢次的寄血書心亦枉勞

難得我無生<sup>粵</sup>悲聲大放 思一思想一想淚如雨澆

急一急停了渡不再化世 捨不得原來子珠淚雙拋

<sup>粵</sup>因此今又修血書十誠 誠告我原佛子速醒塵牢

論世上這百行以孝為首 失了孝稱甚麼修道英豪

望兒女切不可娘前失孝  
是孝子何用娘再三言告  
從今後立標杆速速修道  
四海內皆兄弟速當拯救  
己欲立而立人天道之本  
先覺者化後覺同登覺路  
拉人者必須要拉上覺路  
渡一個成一個方合也意  
今時下天時緊急緊之甚  
緊前行種得速能結大果  
修天道更不論貧窮富貴  
貧捨身富捨財可把道辦  
急速開急速闡切勿遲怠  
能文者作文用替天行道  
助人力助財力見道成道  
論天道辦道子決無作用  
修道子全憑有洪誓大愿  
皆本是為救世東顛西跑  
俱都是奉也命普化九六  
如若是我天道有了虛假  
娘何願出此言增兒罪過咳  
今時下立功果萬八聖業  
抖抖神壯壯膽一往直透  
或成立佛堂地第一大善  
如若是遵也訓開荒下種  
現如今天道在半明半暗  
因時濟因機化小心為妙  
現時下天開科那個知曉  
三千六四萬八全然有份  
明白了時機運隨也回返  
望佛子知而行速速宣化

娘囑語遵依行即是賢僚  
亦應當體也意虔代也勞  
念也慈亦當念爾之同胞  
先正己再成人化渡塵囂  
己欲達而達人化醒未覺  
為前人打精神提拔後學  
救人者救到底方是傑豪  
萬不可渡上岸不把心操  
速立功速培德開闡道苗  
遲一步種得慢虛花成泡  
不論乾不論坤皆應勤勞  
財法施福慧圓清洪雙爵  
再遲疑趕嚴霜難立功勞  
能武者傳音信遼波塵勞  
皇天恩本無私德無不包  
亦並非領袖子有何巧招  
指佛食賴佛穿雷擊難逃  
仙佛聖他尚且受盡苦勞  
真天道有真證非是虛描  
爾洪誓為也擔非哄兒曹  
迷昧子雖如此疑謗滔滔  
享清福享洪福快樂逍遙  
拚上命亦要修大志堅牢  
或開荒或下種莫大功勞  
命仙佛助兒力功成道高  
正好是立奇功以顯英豪  
真天道在暗選拔取賢僚  
希聖賢希仙真在己勤勞  
行得遲走得慢枉自嚎啣  
不識時生痴心大劫難逃  
靜靜心坐一時也再批描

停



## 29【皇 皇 訓子十誡第七告誡】

無縫金鎖無縫塔 無縫鑰匙開開他

明師一指恩莫大 無價真寶放光華

七誡告原佛子珠淚滿腮 為掛我皇胎子久迷塵埃  
在先天日夜裡悲哀悲嘆 哭斷肝痛斷腸悲碎心懷  
兒不惺與為娘有何妨碍 怕的是嬌生子遭了浩災  
聽 皇 勸速速惺修身立命 體 皇 慈念師恩方是賢才  
這師恩一指點殺身難報 重如山恩似海時記心懷  
若不受師指點怎能脫苦 又怎能了生死不受浩災  
上超祖下蔭孫全憑師力 各應當報大恩遵師安排  
修道子如若是違背師命 遭天譴受五雷九祖同哀  
遵師命重天道方為賢士 學溫良恭儉讓和言悅色  
盡人道合天道敦倫盡性 行禮義守綱常中正莊齊  
男遵着五倫禮八德常守 女遵着三從行四德勿歪  
學忠信行仁義大德速立 對道親如手足皆 皇 胎  
再不可嫌這那彼賢此愚 乾坤道貧與富分別黑白  
為領袖能包含裝山藏海 時指導後學輩同把道開  
男兒漢能屈伸能忍能耐 涉山水受風霜永無怨懷  
聞功懼聞過喜不善則改 若如此方稱得頂天良才  
為後學敬前人同心和氣 為前人提後進寬量心懷  
今時下天時緊各當努力 勿負 皇 金石語屢指皇胎  
人非聖誰無過有過必改 知過者不改過難返瑤台  
先行功後作過此功不算 前有過後有功兩得清開  
如若是改前過再立功果 當然是功記功不負賢才  
功多者過處少天盤註上 過處多功果少打落浩災  
先天賬如此算各有交待 未行功先改過方是棟才  
亘古來修天道原非易事 今時下較古比另有安排  
皇 寬恩施大德乾坤拯救 故此的佛規寬減少魔災  
現如今修天道容易得很 又不受大難處又不遭災  
雖然是受辛苦南顛北跑 渡回我原佛子 皇 賜蓮台  
雖然是受風霜寒暑之苦 一份苦一份功尊榮光靄  
雖然是受謗毀惹人心厭 到其時智愚賢自然分開  
雖然是受冤屈吞聲忍氣 上皇天有權衡定然表白  
雖然是不爭強亦不好勝 存其心養其性菩提花開

雖然是受魔考有逆有順 不受魔不成佛理也應該  
雖然是惡者強善者為弱 今本是報應日掃盡惡乖  
自古來修大道必有魔害 功德修誹謗興道高毀來  
亦並非是他謗冤孽過大 無根基怎能擔千葉蓮台  
福薄人命小輩心性難定 縱得道心必退難返蓬萊  
兒莫說修道子他是瘋傻 實地行立奇功名揚塵埃  
兒不想三教聖開化立教 苦受盡清洪享永久不衰  
至今時三千載人天瞻仰 道成天名垂世何等光彩  
那時節還本是道盤查補 何況今化三曹普渡大開  
三千六立白陽廟貌威武 四萬八享俎豆清洪齊來  
進者賢行者聖貴乎實辦 光於前裕於後善德永栽  
能奉行登上品否者墜落 三才等靜靜坐 再批排 停



### 30【皇 皇 訓子十誠第八告誡】

萬古奇緣奧妙多 三期末劫開天科

三元運會龍華選 考拔佛子證大羅

八誠告原佛子心酸肉麻 觀一觀眾兒女不醒塵沙  
認假樂受真苦日夜勞碌 對天道作應酬無有空暇  
幾多是貪凡情背理忘聖 幾多是怕魔考心志不佳  
這真道有真考亘古之理 考的是金剛志美玉無瑕  
玉不琢不成器此話不假 真黃金經百煉方顯光華  
一棵樹作棟樑斜枝必去 造工程蓋高樓地基必砸  
將人物來相比一樣如是 受打擊受琢磨智慧好發  
家貧寒方顯出真心孝子 國家亂方顯這忠良精華  
疾風中顯勁草果然不假 無考懲不見實真偽相雜  
修道子若論來亦非一個 屈指算難備載稍為表發  
曾記得姜太公來賣白麵 受魔考煉心性種種不佳  
文王子在羑里囚困七載 他何嘗不知曉定數所轄  
還有這仲尼子亦受大難 過宋衛受厄難削跡檀伐  
在陳蔡絕糧草整整七日 人視聖如瘋傻難談難(从皿)  
邱長春修道時何等之苦 餓死了七八次心志倍加  
妙善女為修道受斬受絞 孫不二油鍋烹面容成麻  
今時下較古來修道相比 這魔考輕百分自在無轄  
考驗得原本是大根大器 魔煉得真佛性大顯光華

仙佛聖之階梯由斯而立  
 為我定妙計妙中又妙  
 修天道如果是無有魔考  
 無有考怎分出愚賢真假  
 慢說是得天爵有考有驗  
 眾不曉多退志難為於我  
 屢次的為兒女捎書寄信  
 再三囑再三告為何不醒  
 叫一聲眾兒女早明心性  
 守善道貫始終恒心久志  
 古時來修大道跋山涉水  
 遊千山合萬水真宗難遇  
 受千折合萬魔苦難言盡  
 試驗得果然是真真無假  
 功三千果八百得成正果  
 現今時修天道何等容易  
 此本是應機現非時不洩  
 現而今天時緊輕凡重聖  
 寫一篇血書語望兒惺吧  
 為兒女將心血操得碎亂  
 批至此止機管三才稍靜  
 識得透解得破極樂得達  
 將風波遮門面外暗內華  
 這酒肆烟花輩皆返婆娑  
 又誰肯讓誰先端坐蓮花  
 得人爵十年苦金花頭插  
 不由我放悲聲血淚滴沙  
 捎一次又一次不明根芽  
 如若是違我訓陰山來壓  
 任千魔合萬考心無疵瑕  
 存至誠魔自息無有駁雜  
 拋家產棄妻子遊走天涯  
 將鐵鞋踏破了難覓真法  
 心至誠感動了真人點化  
 這方才歸古洞煅煉黃芽  
 亦不過歸氣天暫得榮華  
 先受點後再修立化塵沙  
 我開恩半修仙半顧俗家  
 用慇懃踏實地不可偷暇  
 這非是勸世文閒談閒(从皿)  
 諸佛子牢牢記廣闡佛法  
 為我再上壇再畫盤沙 停



### 31 【皇我訓子十誠第九告誡】

心非天邊明月鏡 性非雪裡開梅花  
 不住纖塵真空現 潔白無染光至華  
 九誠告原佛子血淚下滴 只為我皇胎子膽掉心提  
 論道路有千條全然非正 若不登金線路難返無極  
 今時下旁門興萬教齊起 怕的是皇胎子悞被人迷  
 這千門合萬戶全是我降 先傳書後送信諭知三期  
 時不至我不降天道一貫 又只見眾兒女心性久迷  
 故此的撒旁門朝山拜頂 鎖心猿拴意馬行善修積  
 但等着真天道收圓普渡 共前來求真師同返故西  
 非今時我不洩天機玄語 今本是收圓時萬教歸一  
 我降道化三千賜名一貫 渡三曹挽四海共登雲梯

為我言言真毫無虛語  
這三教歸一理一歸何處  
要修道必明曉根本來路  
收圓法傳的是上乘祕密  
如不信我還有一理再證  
此真一原本是先天之理  
明心性觀自在佛家所講  
修心性以復命道德所煉  
道德修常清靜三品一理  
佛講得空與靜一合理相  
講三皈守五戒佛家所修  
行三綱守五常儒士之禮  
一不殺真仁愛木氣返本  
三不淫守禮節真火煉性  
五不妄守信用土氣歸本  
這三教原本是無有二理  
自伏羲一畫開真易出現  
青陽會命燃燈倒裝降世  
至紅陽命釋迦又化凡世  
青紅期共渡了四億佛子  
現如今白陽展彌勒應運  
先天裡不留仙佛神聖  
先渡貧後渡富再渡官宦  
今時下天時緊速加努力  
論天大論地大惟道為大  
如若是遵訓語實行而辦  
往後來這事關多多重大  
這千門合萬教大地普展  
指天開指地裂搬山倒海  
五行遁陰陽法騰雲駕霧  
到這時所望我佛子牢記  
此本是天數定三期發現  
原來這天主權為我執掌  
萬仙陣再來看熱鬧之甚

有憑據有證驗可察實虛  
由一本散萬殊一從何起  
不明曉真來路怎返瑤熙  
萬古的稀奇事現於三期  
將三教三綱領提上一提  
儒貫一釋歸一道德守一  
存心性克復功儒之修基  
此心性原本是至靈至虛  
儒士煉知定靜天理不昧  
皆本是由靜修性合無極  
三花聚五氣朝道家根基  
今時下所傳的三教合一  
二不盜守忠義金氣凝集  
四不酒有智慧真水既濟  
五氣朝五戒清五常俱齊  
如有二即非正道路必歧  
此本是天道降根本之基  
暗選了二億子返回無極  
又渡回二億子也返故西  
剩下了九二億苦海永迷  
命天然掌道盤普化中西  
齊投胎共化世扶助聖基  
渡王侯渡萬國同登天梯  
各應當發剛毅宣化啟迷  
天命大我命大至靈至極  
為我命仙佛護兒安逸  
不久的天時至大顯真機  
念符咒呼風雨飛沙走石  
跨板凳能上天妖法更奇  
種種的妖魔術亦難盡提  
如隨他失靈光永受悲淒  
此內中定妙計我有用意  
至其時勅令下法術盡息  
笨兒子合瘋人神通廣極

拿杏黃勅令旗空中一擺 呼一聲諸神退各歸班級  
法亦無術亦無神聖不助 空赤赤一雙手難以復敵  
萬旁門拜彌勒同歸正理 扶古僧現佛光道貫三極  
富貴人他倒把貧窮來拜 道德展貫全球中外同一  
大智的原佛子速速下手 莫等待舟行江補漏則遲  
批至此三才倦停止金管 多靜坐為 我 我再為細批 停



### 32【皇 我 訓子十誠第十告誡】

時至雲城大開放 對上三寶是皇原  
八大金剛威嚴現 口令錯了打泉黃  
十誠告原佛子書信寫全 收圓事多重大勿作戲玩  
三極道傳一理佛子登岸 普天下遍全球共現金蓮  
論大道分三乘真理為上 理上乘氣中乘下乘象談  
論天外還有天此語不假 理無極氣太極皇極坤乾  
無極境為聖域極樂清淨 太極界為賢關法輪週還  
皇極土為凡庸動植飛潛 由三乘方分出聖賢俗凡  
修元神煉性理上乘至妙 降龍虎轉法輪中乘參禪  
言下乘實難講著形著象 這敲打合唸唱總難超凡  
現如今出世法末後一着 聞者成得者超希聖希賢  
一十八小童兒中州坐定 響霹靂驚惺了大地坤乾  
將萬國與九洲全然渡盡 千神聖萬仙佛共聚中原  
三曹清會一案白陽立定 刷盡了惡孽子盡留良賢  
將苦海化成了蓮花寶國 這東土要改成淨土西天  
活佛世四千載快樂無盡 斷宰殺歸善路物各生全  
顯鍾靈和毓秀麟鳳現野 海波息慶昇平共慶豐年  
你也敬我也愛再無爭鬪 五日風十日雨挽回堯天  
諸佛祖各了愿九六渡盡 彌勒祖登寶台點將封仙  
皇胎子脫苦海共登彼岸 天然子率原人共朝 我 顏  
至此時為 我 我心纔放下 各個的大功子喜在心間  
某某人首開荒鰲頭獨佔 某某人建奇功位昇魁元  
某某人財法施高昇上品 某某人捨身辦上乘尊嚴  
某某人立佛堂金仙得坐 某某人代天化賜與品蓮  
某某人盡苦心仙班得列 某某人多慇懃昇賞無邊  
到那時分三乘九品來列 有功的眾佛子皆大喜歡

不歸空在紅塵外王內聖 享榮華享富貴自在安然  
歸空的眾佛子西天而返 脫凡胎成聖體大羅金仙  
速穿上仙衣裳金光燦爛 插金花戴仙帽雲鞋生蓮  
拜見我無生<sup>也</sup>用手拉起 叫一聲嬌生子今日纔還  
說今後不叫你東土而遶 再也不為凡人苦受熬煎  
吃仙桃與仙菓瓊漿玉液 喜無極樂難盡快樂無邊  
顯一顯神通廣貫徹天地 用一用仙家妙旋轉坤乾  
真法身日月照無影無痕 入水火不焚溺永壽無邊  
不被這天與地陰陽轄管 不懼風不懼霜不怕暑寒  
穿金石無阻碍無束無管 來無影去無踪遊遍三千  
爾九玄爾七祖共同脫苦 爾幾品他幾品共現威嚴  
群佛子無極宮設下筵宴 龍華會聚群真聖神佛仙  
一個個俱前來朝拜我<sup>也</sup> 只喜得老無生有口難言  
斟一盃菩提酒賜與兒等 眾佛子食仙宴快樂無邊  
大團圓大聚會快活無盡 無極宮鼓掌笑喜地歡天  
方顯出修天道至尊至貴 不虧我苦心子頂天良賢  
書批此已完竣收回金管 將<sup>也</sup>語印心中終日虔虔  
此書名是皇<sup>也</sup>訓子十誠 靜一靜為<sup>也</sup>我再垂幾言 停

書訓垂留鎮中華 廣闡宣佈渡善家  
良賢共登菩提岸 兒女功竣坐蓮花  
復提機叮嚀又叮嚀 告佛子實行切實行  
望兒女心盡心多盡 喚皇胎啟迷啟瞶聾  
極樂國今時淒涼甚 為救世仙佛共臨東  
四億子共同投凡界 今時下誰曉誰根恒  
掀門帘得見真故主 追悔時踪足又捶胸  
切不可佳光錯過了 金雞唱大道世界宏  
趁此時半明與半暗 遵<sup>也</sup>訓步步實地行  
此書訓抄寫多有錯 下壇後筆下速改更  
抄成後此書速刊印 多印刷方合<sup>也</sup>心情  
立功德速勸速渡化 挽眾生共出水火坑  
娘批完言語不下判 率佛子乘輦返瑤京  
去而來難割又難捨 問佛子是否心實行  
言此語血淚滴滴落 <sup>也</sup>之語莫當耳旁風  
天淵路盡由兒女走 生懈怠永墜萬丈坑



【D啟蒙文學】

01 【百孝經】

天地重孝孝當先	一個孝字全家安
孝順能生孝順子	孝順子弟必明賢
孝是人道第一步	孝子謝世即為仙
自古忠臣多孝子	君選賢臣舉孝廉
盡心竭力孝父母	孝道不獨講吃穿
孝道貴在心中孝	孝親親責莫回言
惜乎人間不識孝	回心復孝天理還
諸事不順因不孝	怎知孝能感動天
孝道貴順無他妙	孝順不分女共男
福祿皆由孝字得	天將孝子另眼觀
人人都可孝父母	孝敬父母如敬天
孝子口裡有孝語	孝婦面上帶孝顏
公婆上邊能盡孝	又落孝來又落賢
女得淑名先學孝	三從四德孝在前
孝在鄉黨人欽敬	孝在家中大小歡
孝子逢人就勸孝	孝化風俗人品端
生前孝子聲價貴	死後孝子萬古傳
處世惟有孝力大	孝能感動地和天
孝經孝文把孝勸	孝父孝母孝祖先
父母生子原為孝	能孝就是好兒男
為人能把父母孝	下輩孝子照樣還
堂上父母不知孝	不孝受窮莫怨天
孝子面帶太和象	入孝出悌自然安
親在應孝不知孝	親死知孝後悔難
孝在心孝不在貌	孝貴實行不在言
孝子齊家全家樂	孝子治國萬民安
五穀豐登皆因孝	一孝即是太平年
能孝不在貧和富	善體親心是孝男
兄弟和睦即為孝	忍讓二字把孝全
孝從難處見真孝	孝容滿面承親顏

父母雙全正宜孝 孝思鰥寡親影單  
趕緊孝來光陰快 親由我孝壽由天  
生前能孝方為孝 死後盡孝徒枉然  
孝順傳家孝是寶 孝性溫和孝味甘  
羊羔跪乳尚知孝 烏鴉反哺孝親顏  
為人若是不知孝 不如禽獸實可憐  
百行萬善孝為首 當知孝字是根源  
念佛行善也是孝 孝仗佛力超九天  
大哉孝乎大哉孝 孝矣無窮孝無邊  
此篇句句不離孝 離孝人倫顛倒顛  
念得十遍千個孝 念得百遍萬孝全  
千遍萬遍常常念 消災免難百孝篇



## 02【朱子治家格言】

黎明即起灑掃庭除，要內外整潔；既昏便息關鎖門戶，必親自檢點。一粥一飯，當思來處不易；半絲半縷，恆念物力維艱。

宜未雨而綢繆，毋臨渴而掘井。自奉必須儉約，宴客切勿留連。

器具質而潔，瓦缶勝金玉；飲食約而精，園蔬愈珍饈。

勿營華屋，勿謀良田。

三姑六婆，實淫盜之媒；婢美妾嬌，非閨房之福。

童僕勿用俊美，妻妾切忌艷妝。

祖宗雖遠，祭祀不可不誠；子孫雖愚，經書不可不讀。

居身務期簡樸；教子要有義方。勿貪意外之財，勿飲過量之酒。

與肩挑貿易，勿占便宜；見窮苦親鄰，須加溫恤。

刻薄成家，理無久享；倫常乖舛，立見消亡。

兄弟叔侄，需分多潤寡，長幼內外，宜法肅辭嚴。

聽婦言，乖骨肉，豈是丈夫，重貲才，薄父母，不成人子。

嫁女擇佳婿，無索重聘；娶媳求淑女，勿計厚奩。

見富貴而生諂容者，最可恥；遇貧窮而作驕態者，賤莫甚。

居家戒爭訟，訟則終凶；處世戒多言，言多必失。

勿恃勢力而凌逼孤寡；勿貪口腹而恣殺生禽。

乖僻自是，悔誤必多；頹隳自甘，家道難成。

狎暱惡少，久必受其累；屈志老成，急則可相依。

輕聽發言，安知非人之譖愬？當忍耐三思；



因事相爭，焉知非我之不是？須平心暗想。  
 施惠無念，受恩莫忘。凡事當留餘地，得意不宜再往。  
 人有喜慶，不可生嫉妒心；人有禍患，不可生喜幸心。  
 善欲人見，不是真善；惡恐人知，便是大惡。  
 見色而起淫心，報在妻女；匿怨而用暗箭，禍延子孫。  
 家門和順，雖饕餮不繼，亦有餘歡；  
 國課早完，即囊橐無餘，自得至樂。  
 讀書志在聖賢，為官心存君國。守分安命，順時聽天。  
 為人若此，庶乎近焉。



### 03【諸葛亮誡子書】

夫君子之行，靜以修身，儉以養德。非澹泊無以明志，非寧靜無以致遠。夫學須靜也，才須學也，非學無以廣才，非志無以成學。慆慢則不能勵精，險躁則不能冶性。年與時馳，意與日去，遂成枯落，多不接世，悲守窮廬，將復何及！



### 04【三字經】

人之初	性本善	性相近	習相遠	苟不教	性乃遷	教之道	貴以專
昔孟母	擇鄰處	子不學	斷機杼	竇燕山	有義方	教五子	名俱揚
養不教	父之過	教不嚴	師之情	子不學	非所宜	幼不學	老何為
玉不琢	不成器	人不學	不知義	為人子	方少時	親師友	習禮儀
香九齡	能溫席	孝於親	所當執	融四歲	能讓梨	弟於長	宜先知
首孝弟	次見聞	知某數	識某文	一而十	十而百	百而千	千而萬
三才者	天地人	三光者	日月星	三綱者	君臣義	父子親	夫婦順
曰春夏	曰秋冬	此四時	運不窮	曰南北	曰西東	此四方	應乎中
曰水火	木金土	此五行	本乎數	十干者	甲至癸	十二支	子至亥
曰黃道	日所躔	曰赤道	當中權	赤道下	溫暖極	我中華	在東北
曰江河	曰淮濟	此四瀆	水之紀	曰岱華	嵩恆衡	此五岳	山之名
曰士農	曰工商	此四民	國之良	曰仁義	禮智信	此五常	不容紊
地所生	有草木	此植物	遍水陸	有蟲魚	有鳥獸	此動物	能飛走
稻粱菽	麥黍稷	此六穀	人所食	馬牛羊	雞犬豕	此六畜	人所飼
曰喜怒	曰哀懼	愛惡慾	七情具	青赤黃	及黑白	此五色	目所視
酸苦甘	及辛鹹	此五味	口所含	羶焦香	及腥朽	此五臭	鼻所嗅
匏土革	木石金	絲與竹	乃八音	曰平上	曰去入	此四聲	宜調協

倫忠終文原書義治求奧備惡事始盛世社久出篡晉齊基由世陵焚誇歿衰通鑑斯且勤苦卓  
人之臣五講能知至說仁義當書禮樂別記終稱遷最七王迄與創皆絕都神治滿知參夕學自猶  
族敬總麻字說終道德齊經命言貶要系遜載強平國周亂五代金武出富帝亂經斯仕不教勞  
九則至既但小學自號有述寓撮考相四八五至號宇除稱元號洪李民傳載兼朝彼彼身雖  
曾朋功遵繁初止子春秋誥記作子史帝天下誅戰業漢東西義漢周稱帝大明如林嘉弱茲四惟論股角  
玄與小共其有篇曾春秋訓禮春秋方讀諸號家始終漢爭分起及皆國寇歷宣全志而魯刺掛薪  
至友大入懼必七乃禮有註春秋讀號家始終漢爭分起及皆國寇歷宣全志而魯刺掛薪  
孫序衰學廣學者大學易謨戴亡通虞子春秋興蜀魏高祖唐梁遼太祖權由同古今後漢而中令梁懸負薪  
自長斬惟若為孟子作詩有大小詩經子武始高魏北唐梁遼太祖權由同古今後漢而中令梁懸負薪  
孫恭背具亂讀言易詳體詠梁莊世王說爭獻陵緒改混廢禎定鄙國書目學勉不輟  
子弟勿違今不可明記庸始三存當及居稱至尚楚終都失國南北國至克擾建漢若尚且學  
子則敘藝繼詁子偏經易官詩氏子皇武載戈世二百年朝傳之傳十年世方英法一今聖賢書貧  
而友順六草訓弟不六周易著號有文中號周六逞傳四為不再梁十八九十十六靖始立史通古彼家  
身則當古隸詳群中如周著號有文中號周六逞傳四為不再梁十八九十十六靖始立史通古彼家  
身從同數篆究篇如周著號有文中號周六逞傳四為不再梁十八九十十六靖始立史通古彼家  
而婦人所書大小講孔四有作曰公荀至商國王始為梁一三受超遷鷹變廢讀考師削如  
父夫御大須乃四有作曰公荀至商國王始為梁一三受超遷鷹變廢讀考師削如  
祖恩義射古文蒙者中庸通山公風者農禹夏氏興繼至隋興圖成祖世咸興繁者尼編螢  
曾子十樂古訓語者中庸通山公風者農禹夏氏興繼至隋興圖成祖世咸興繁者尼編螢  
高父子此禮有凡論作孝有我曰三五自夏湯周嬴光宋迨二十炎興迨清道革命史讀昔披如

蘇老泉	二十七	始奮發	讀書籍	彼既老	猶悔遲	爾小生	宜早思
若梁灝	八十二	對大廷	魁多士	彼既成	眾稱異	爾小生	宜立志
瑩八歲	能詠詩	泌七歲	能賦基	彼穎悟	人稱奇	爾幼學	當效之
蔡文姬	能辨琴	謝道韞	能詠吟	彼女子	且聰明	爾男子	當自警
唐劉宴	方七歲	舉神童	作正字	彼雖幼	身已仕	有為者	亦若是
犬守夜	雞司晨	苟不學	何為人	蠶吐絲	蜂釀蜜	人不學	不如物
幼兒學	壯而行	上致君	下澤民	揚名聲	顯父母	光於前	裕於後
人遺子	金滿贏	我教子	惟一經	勤有功	戲無益	戒之哉	宜勉力



## 05【千字文】

天地玄黃，宇宙洪荒，日月盈昃，辰宿列張，寒來暑往，秋收冬藏，  
 閏餘成歲，律呂調陽，雲騰致雨，露結為霜，金生麗水，玉出崑岡，  
 劍號巨闕，珠稱夜光，果珍李柰，菜重芥薑，海鹹河淡，鱗潛羽翔，  
 龍師火帝，鳥官人皇，始製文字，乃服衣裳，推位讓國，有虞陶唐，  
 弔民伐罪，周發商湯，坐朝問道，垂拱平章，愛育黎首，臣伏戎羌，  
 遐邇壹體，率賓歸王，鳴鳳在竹，白駒食場，化被草木，賴及萬方，  
 蓋此身髮，四大五常，恭惟鞠養，豈敢毀傷，女慕貞烈，男效才良，  
 知過必改，得能莫忘，罔談彼短，靡恃己長，信使可覆，器欲難量，  
 墨悲絲染，詩讚羔羊，景行維賢，克念作聖，德建名立，形端表正，  
 空谷傳聲，虛堂習聽，禍因惡積，福緣善慶，尺璧非寶，寸陰是競，  
 資父事君，曰嚴與敬，孝當竭力，忠則盡命，臨深履薄，夙興溫清，  
 似蘭斯馨，如松之盛，川流不息，淵澄取映，容止若思，言辭安定，  
 篤初誠美，慎終宜令，榮業所基，籍甚無竟，學優登仕，攝職從政，  
 存以甘棠，去而益詠，樂殊貴賤，禮別尊卑，上和下睦，夫唱婦隨，  
 外受傳訓，入奉母儀，諸姑伯叔，猶子比兒，孔懷兄弟，同氣連枝，  
 交友投分，切磨箴規，仁慈隱惻，造次弗離，節義廉退，顛沛匪虧，  
 性靜情逸，心動神疲，守真志滿，逐物意移，堅持雅操，好爵自縻，  
 都邑華夏，東西二京，背邙面洛，浮渭據涇，宮殿盤鬱，樓觀飛驚，  
 圖寫禽獸，畫綵仙靈，丙舍傍啟，甲帳對楹，肆筵設席，鼓瑟吹笙，  
 升階納陛，弁轉疑星，右通廣內，左達承明，既集墳典，亦聚群英，  
 杜稟鍾隸，漆書壁經，府羅將相，路俠槐卿，戶封八縣，家給千兵，  
 高冠陪輦，驅轂振纓，世祿侈富，車駕肥輕，策功茂實，勒碑刻銘，  
 磻溪伊尹，佐時阿衡，奄宅曲阜，微旦孰營，桓公匡合，濟弱扶傾，

綺迴漢惠，說感武丁，俊乂密勿，多士寔寧，晉楚更霸，趙魏困橫，  
假途滅虢，踐土會盟，何遵約法，韓弊煩刑，起翦頗牧，用軍最精，  
宣威沙漠，馳譽丹青，九州禹跡，百郡秦并，嶽宗泰岱，禪主云亭，  
雁門紫塞，雞田赤城，昆池碣石，鉅野洞庭，曠遠綿邈，巖岫杳冥，  
治本於農，務茲稼穡，俶載南畝，我藝黍稷，稅熟貢新，勸賞黜陟，  
孟軻敦素，史魚秉直，庶幾中庸，勞謙謹敕，聆音察理，鑑貌辨色，  
貽厥嘉猷，勉其祗植，省躬譏誡，寵增抗極，殆辱近恥，林皋幸即，  
兩疏見機，解組誰逼，索居閒處，沈默寂寥，求古尋論，散慮逍遙，  
欣奏累遣，感謝歡招，渠荷的歷，園莽抽條，枇杷晚翠，梧桐早凋，  
陳根委翳，落葉飄颻，游鶡獨運，凌摩絳霄，耽讀翫市，寓目囊箱，  
易輶攸畏，屬耳垣牆，具膳餐飯，適口充腸，飽飫烹宰，飢厭糟糠，  
親戚故舊，老少異糧，妾御績紡，侍巾帷房，紈扇圓潔，銀燭煒煌，  
晝眠夕寐，藍筍象床，絃歌酒讌，接杯舉觴，矯手頓足，悅豫且康，  
嫡後嗣續，祭祀蒸嘗，稽顙再拜，悚懼恐惶，牋牒簡要，顧答審詳，  
骸垢想浴，執熱願涼，驢騾犢特，駭躍超驤，誅斬賊盜，捕獲叛亡，  
布射僚丸，嵇琴阮嘯，恬筆倫紙，鈞巧任鈞，釋紛利俗，並皆佳妙，  
毛施淑姿，工顰妍笑，年矢每催，曦暉朗曜，璿璣懸幹，晦魄環照，  
指薪修祜，永綏吉劭，矩步引領，俯仰廊廟，束帶矜莊，徘徊瞻眺，  
孤陋寡聞，愚蒙等誥，謂語助者，焉哉乎也。



## 06【弟子規】

### 總敘

弟子規 聖人訓 首孝悌 次謹信 汎愛眾 而親仁 有餘力 則學文

### 入則孝

父母呼 應勿緩 父母命 行勿懶 父母教 須敬聽 父母責 須順承  
冬則溫 夏則清 晨則省 昏則定 出必告 反必面 居有常 業無變  
事雖小 勿擅為 苟擅為 子道虧 物雖小 勿私藏 苟私藏 親心傷  
親所好 力為具 親所惡 謹為去 身有傷 貽親憂 德有傷 貽親羞  
親愛我 孝何難 親憎我 孝方賢 親有過 諫使更 怡吾色 柔吾聲  
諫不入 悅復諫 號泣隨 撻無怨 親有疾 藥先嘗 晝夜侍 不離床  
喪三年 常悲咽 居處變 酒肉絕 喪盡禮 祭盡誠 事死者 如事生

### 出則悌

兄道友 弟道恭 兄弟睦 孝在中 財物輕 怨何生 言語忍 忿自泯  
或飲食 或坐走 長者先 幼者後 長呼人 即代叫 人不在 己即到

稱尊長 勿呼名 對尊長 勿見能 路遇長 疾趨揖 長無言 退恭立  
騎下馬 乘下車 過猶待 百步餘 長者立 幼勿坐 長者坐 命乃坐  
尊長前 聲要低 低不聞 卻非宜 進必趨 退必遲 問起對 視勿移  
事諸父 如事父 事諸兄 如事兄  
謹

朝起早 夜眠遲 老易至 惜此時 晨必盥 兼漱口 便溺回 輒淨手  
冠必正 紐必結 襪與履 俱緊切 置冠服 有定位 勿亂頓 致污穢  
衣貴潔 不貴華 上循分 下稱家 對飲食 勿揀擇 食適可 勿過則  
年方少 勿飲酒 飲酒醉 最為醜 步從容 立端正 揖深圓 拜恭敬  
勿踐闔 勿跛倚 勿箕踞 勿搖髀 緩揭簾 勿有聲 寬轉彎 勿觸稜  
執虛器 如執盈 入虛室 絕勿問 事勿忙 忙多錯 勿畏難 勿輕略  
鬥鬧場 絕勿近 邪僻事 絕勿問 將入門 問孰存 將上堂 聲必揚  
人問誰 對以名 吾與我 不分明 用人物 須明求 倘不問 即為偷  
借人物 及時還 後有急 借不難  
信

凡出言 信為先 詐與妄 奚可焉 話說多 不如少 惟其是 勿佞巧  
奸巧語 穢污詞 苟輕諾 進退錯 見未真 勿輕言 知未的 勿輕傳  
事非宜 勿輕諾 苟輕諾 莫閒管 凡道字 重且舒 勿急疾 勿模糊  
彼說長 此說短 不關己 無加警 見人善 即思齊 縱去遠 以漸躋  
見人惡 即內省 有則改 勿生感 唯德學 唯才藝 不如人 當自礪  
若衣服 若飲食 直諒士 漸相親 聞過怒 聞譽樂 損友來 益友卻  
聞譽恐 聞過欣 倘揜飾 增一辜 無心非 名為錯 有心非 名為惡

### 汎愛眾

凡是人 皆須愛 天同覆 地同載 行高者 名自高 人所重 非貌高  
才大者 望自大 人所服 非言大 己有能 勿自私 人所能 勿輕訾  
勿諂富 勿驕貧 勿厭故 勿喜新 人不閒 勿事攪 人不安 勿話擾  
人有短 切莫揭 人有私 切莫說 道人善 即是善 人知之 愈思勉  
揚人惡 即是惡 疾之甚 禍且作 善相勸 德皆建 過不規 道兩虧  
凡取與 貴分曉 與宜多 取宜少 將加人 先問己 己不欲 即速已  
恩欲報 怨欲忘 報怨短 報恩長 待婢僕 身貴端 雖貴端 慈而寬  
勢服人 心不然 理服人 方無言

## 親仁

同是人 類不齊 流俗眾 仁者希 果仁者 人多畏 言不諱 色不媚  
能親仁 無限好 德日進 過日少 不親仁 無限害 小人進 百事壞

## 餘力學文

不力行 但學文 長浮華 成何人 但力行 不學文 任己見 昧理真  
讀書法 有三到 心眼口 信皆要 方讀此 勿慕彼 此未終 彼勿起  
寬為限 緊用功 工夫到 滯塞通 心有疑 隨札記 就人問 求確義  
房室清 牆壁淨 几案潔 筆硯正 墨磨偏 心不端 字不敬 心先病  
列典籍 有定處 讀看畢 還原處 雖有急 卷束齊 有缺壞 就補之  
非聖書 屏勿視 蔽聰明 壞心志 勿自暴 勿自棄 聖與賢 可馴致

## 弟子規終



## 07【人生必讀】

壞事勸人休莫作 舉頭三尺有神明 善惡到頭終有報 只爭來早與來遲  
一年之計在於春 一日之計在於寅 一家之計在於和 一生之計在於勤  
父子和而家不退 兄弟和而家不分 有子之人貧不久 無子之人富不長  
萬事不由人計較 一身都是命安排 命理有時終須有 命理無時到底無  
貧乏求謀事難成 百計徒勞枉費心 屋漏更遭連夜雨 行船又被對頭風  
有緣千里能相會 無緣對面不相逢 貧居鬧市無人識 富在深山有遠親  
龍游淺水遭蝦戲 虎落平洋被犬欺 黃河尚有澄清日 豈可人無得運時  
在家不會迎賓客 出外方知少主人 相逢不飲空歸去 洞口桃花也笑人  
有錢有酒多兄弟 急難何曾見一人 人情似紙張張薄 世事如棋局局新  
有意摘花花不發 無心插柳柳成蔭 畫虎畫皮難畫骨 知人知面不知心  
相逢好似曾相識 到底終無怨恨心 逢人且說三分話 未可全拋一片心  
錦上添花人人有 雪中送炭世間無 不信但看筵中酒 杯杯先勸有錢人  
求人須求大丈夫 濟人須濟急時無 渴時一點如甘露 醉後添杯不如無  
山中也有千年樹 世上難逢百歲人 世上若要人情好 賒去物件莫取錢  
平生莫作皺眉事 世上應無切齒人 是非只為多開口 煩惱皆因強出頭  
枯木逢春猶再發 人無兩度再年少 百世修來同船渡 千世修來共枕眠  
父母恩深終須別 夫妻義重也分離 人生似鳥同林宿 大限來時各自飛  
櫻花猶怕春光老 豈可教人枉度春 紅粉佳人休便老 風流才子莫教貧  
大抵選他飢骨好 不搽紅粉也風流 牡丹花好空入目 棗花雖小結實成  
近水樓台先得月 向陽花木早逢春 古人不見今時月 今月曾經照古人  
馬行無力皆因瘦 人不風流只為貧 誰人背後無人說 那個人前不說人

易漲易退山溪水 易反易覆小人心 長江後浪催前浪 世上新人趕舊人  
筍因落籜方成竹 魚為奔波始化龍 記得少年騎竹馬 看看又是白頭翁  
月過十五光明少 人到中年萬事休 兒孫自有兒孫福 莫把兒孫做馬牛  
乍富不知新受用 乍貧難改舊家風 知音說與知音聽 不是知音莫與談  
不孝父母。敬神無益。兄弟不和。交友無益。  
貪淫好賭。勤儉無益。不惜元氣。服藥無益。  
欠債怨財主。不孝怨父母。兒不嫌母醜。犬不厭家貧。  
姜女送寒衣。沿路苦風霜。丁蘭孝父母。刻木為爹娘。  
大家都是命。半點不由人。山中有直樹。世上無直人。  
相識滿天下。知心能幾人。莫信直中直。須防仁不仁。  
海枯終見底。人死不知心。藥能醫假病。酒不解真愁。  
點石化為金。人心猶未足。求財恨不多。財多害人己。  
近水知魚性。近山識鳥音。路遙知馬力。事久見人心。  
兩人一般心。有錢堪買金。一人一般心。無錢堪買針。  
有錢道真語。無錢語不真。錢財如糞土。仁義值千金。  
力微休負重。言輕莫勸人。無錢休入眾。遭難莫尋親。  
人老心未老。人窮志不窮。人無千日好。花無百日紅。  
明知山有虎。莫向虎山行。若要斷酒法。醒眼看醉人。  
莫道君行早。更有早行人。酒逢知己飲。詩向會人吟。  
虎生猶可近。人熟不堪親。來說是非者。便是是非人。  
人不勸不善。鐘不打不鳴。路不行不到。事不為不成。  
客來主不顧。應恐是癡人。賢婦令夫貴。惡婦令夫敗。  
小時是兄弟。長大各鄉里。妒財莫妒食。怨生莫怨死。  
人善被人欺。馬善被人騎。兄弟是兄弟。過江須用錢。  
富人思來年。貧人思眼前。夫妻相好合。琴瑟與笙簧。  
國亂思良將。家貧思賢妻。家中無才子。官從何處來。  
相見易得好。久住難為人。庭前生瑞草。好事不如無。  
寧向直中取。不可曲中求。欲求生富貴。須下死功夫。  
人不通古今。馬牛如襟裾。同君一夜話。勝讀十年書。  
結交須勝己。似我不如無。但看三五日。相見不如初。  
讀書須用意。一字值千金。運去金成鐵。時來鐵成金。  
自恨枝無葉。莫怨太陽偏。久住令人賤。貧來親也疏。  
美化不足。惡化有餘。為善最樂。為惡難逃。善事可作。惡事莫為。  
順天者存。逆天者亡。善有善報。惡有惡報。不是不報。日子未到。

得忍且忍。得耐且耐。不忍不耐。小事成大。人為財死。鳥為食亡。  
人殺一萬。自損三千。人生一世。草木一春。兄弟相害。不如不生。  
龍生龍子。虎生豹兒。人貧不語。水平不流。出家如初。成佛有餘。  
在家由父。出嫁從夫。一日夫妻。百世姻緣。養兒待老。積穀防饑。  
養子不教。不如養驢。養女不教。不如養豬。先到為君。後到為臣。  
養君千日。用在一朝。官有正條。民有私約。天眼恢恢。報應甚速。  
人心似鐵。官法如爐。成事莫說。覆水難收。一言既出。駟馬難追。  
一言不中。千言無用。黃金無假。阿魏無真。癡人畏婦。賢女敬夫。  
寧可負我。切莫負人。人貧志短。馬瘦毛長。死生由命。富貴在天。  
長安雖樂。不是久居。賊是小人。智過君子。人相面形。馬相毛色。  
合理可作。小利莫爭。君子愛財。取之有道。小人愛財。不顧體面。  
人死留名。虎死留皮。鬧裏有錢。靜處安身。來如風雨。去似微塵。  
家用長子。國用大臣。山高水深。地瘦人貧。積善之家。必有餘慶。  
不善之家。必有餘殃。奉勸君子。各宜守己。只此呈示。萬無一失。



## 08【賢良詞】

一勸賢良即早修	莫在紅塵浪裡遊	世事如花開易謝	光陰似夢不能留
昔日容顏今日老	今日容顏易白頭	爭名奪利成何用	勞碌奔波苦憂愁
一朝大限無常到	萬般事務一齊丟	不知修行錯過了	一失人身幾萬秋
賢良若是早回頭	逍遙快樂永無憂	二勸賢良躲無常	貪戀紅塵不久長
有朝一日閻君接	此身就是臭皮囊	恩愛十分留不住	空在閻浮走一場
兒女成群難替死	啼哭悲哀慟斷腸	看來世事皆如夢	何必貪求日日忙
貧窮富貴天排定	安樂無憂自主張	急早尋個安身法	各人前程學妙方
三勸賢良學修行	訪拜明師辦前程	各人生死各人了	他人難替半毫分
忠奸善惡隨心轉	急早調和一點心	善惡到頭終有報	久後自然見分明
惡者打入酆都府	善者接引上天庭	看來還是修行好	那怕閻君不順情
念動真經來對號	夜間惡鬼兩邊分	急早參禪學妙方	同登快樂見親娘
四勸賢良學善人	須學前朝好古人	男學湘子立大志	女學妙善別紅塵
斬斷名利恩和愛	一心參道學修行	男子肯修成羅漢	女人肯修成觀音
羅漢本是男人體	觀音也是女人身	神仙本是凡人做	只怕凡人心不誠
古來多少男共女	成佛成祖成真人	莫把人身墮落了	立定真心學修行
五勸賢良早辦功	參求正道樂無窮	老者肯修添福壽	少者肯修喜氣隆
富者肯修功德大	貧者肯修運限通	有兒肯修後代旺	無身肯修不落空
夫妻同修同受福	夫妻各修各有功	各人修成各人德	還要自己顯神通



善男信女早回頭 修成正果往天宮 坐在九品蓮臺上 逍遙快樂福無窮  
色作船頭氣作艗 中間財酒兩相交 勸君莫在船頭坐 四面都是殺人刀  
了悟猶如夜得燈 無窗暗室忽光明 此身不向今生度 更待何時度此身



## 09 【古佛勸世文】

月裡嫦娥笑呵呵 八仙慶壽念彌陀 麻姑親獻長生果 願度眾生出婆娑  
一法通來萬法通 藕在池中節節通 不遇名師親指點 總總陷在污泥中  
四月忙種五月苗 六月車水汗淋腰 無功受人齋和供 吃在腹中怎能消  
一句彌陀九個灣 包盡乾坤水共山 有朝一日歸家去 便是靈山佛祖關  
世間善惡永無差 善似青松惡似花 有朝一日嚴霜到 只見青松不見花  
七寶池中一樹茶 枝枝葉葉有開芽 有人識得茶中味 三歲孩兒也出家  
此茶本是佛祖栽 朵朵蓮花向上開 栽時不用根和土 開時不怕風雨來  
須彌山上一口鐘 半邊生鐵半邊銅 東邊敲起西邊響 好個靈鐘肚裡空  
大道原來顛倒顛 看見牛郎水上眠 無足能行千里路 無頭能頂十方天  
海底明珠萬丈深 大道只在世人身 明珠尚有人求得 大道如何不去尋  
我吃長齋爾莫愁 賽過長江活石頭 遇了幾多黃泥水 撞破幾多鐵頭船  
金盤金鎖金蓮台 自從金鎖未曾開 若是如來真弟子 為何不帶鎖匙來  
香在爐中我自燒 一點去塵透九霄 香煙沖得佛國開 佛祖忙把手來抬  
這碗佛飯世間稀 開天闢地幾人知 有人跳出牆垣外 便是長生不老仙  
酒色財氣四座牆 多少迷人在中央 觀音菩薩人人有 何須南海去朝尊  
念經須念無字經 經中只念觀世音 觀音菩薩人人有 好向靈山塔下修  
佛在靈山莫遠求 靈山只在爾心頭 人人有個靈山塔 白玉中間一朵蓮  
如來親自造法船 造在婆娑海岸邊 珍珠瑪瑙為船底 十殿閻君把索牽  
觀音老母為船主 把舵艗公是普賢 文殊菩薩來搖櫓 無緣不度度有緣  
請問佛船多少大 頭是滄海尾是天 來了一個度一個 又說今年等明年  
有朝一日船開了 又要拾萬八千年 勸爾上船不上船 一篙撐到天外天  
來年又有來年事 閻君要命不要錢 請問佛船幾時轉 妻墮地獄誰人知  
夫要修來妻不依 每日終朝說是非 夫今修來天堂去 夫墮地獄受孤悽  
妻要修來夫不依 打破香爐扯破衣 妻在天堂嘻嘻笑 為人修早莫修遲  
小小孩童小小修 善才童子七歲修 二十修來正當時 不念彌陀等幾時  
風花雪月如春夢 花開能有幾多時 三十年前結夫妻 終日奔波幾時休  
有朝一日無常到 夫往東來妻往西 四十光陰幾時秋 莫在陽間結冤仇  
不信但看天邊月 十五團圓十六缺 五十修來白了頭 不愁生死只愁貧  
陽世光陰容易過 陰司報應實難受 人生六十心不明 不愁生死只愁貧

可嘆世間痴呆人 不管生死只為錢 人生七十古來稀 燈盞無油漸漸微  
世間多少英雄漢 無常一到後悔遲 八十修來身子虧 要念彌陀氣力微  
早知修行有好處 鬢邊頭髮白如絲 人生難滿一百歲 時時刻刻怕無常  
山中只有千年樹 世上難逢百歲人 學道容易守道難 真心難得道難參  
若能肯下真心意 便是靈山佛祖關 一朵白雲子時栽 兩儀未判在塵埃  
三花聚頂明真性 四季神通現本來 五氣朝元成正果 六根清淨結聖胎  
七層寶塔玲瓏響 八仙慶壽下瑤階 九品蓮花大放開 十方諸佛登蓮台  
嗟嘆女人罪孽多 搽面搽粉剪綾羅 生男育女千般罷 不念彌陀怎奈何  
女人不修實是呆 血池地獄苦哀哀 鐵面閻君無情面 萬劫千年不得來  
夫妻恩愛兩相丟 夫也修來妻也修 同心修到蓮花會 西方佛祖任君遊  
紅塵滾滾誅魂劍 滿頭珠翠殺人鎗 胭脂花粉迷人鬼 眼淚汪汪泡人湯  
巴巴結結解不開 慢慢等等無常來 朝朝夕夕何日了 煩惱惱幾時休  
明明白白一條路 萬萬千千不肯修 急急修來急急修 莫等水流過三丘  
水過三丘難回轉 人到中年便是休 人命無常呼吸間 眼觀紅日落西山  
寶山力盡空回首 一失人身萬劫難 祖師昔日在西方 百萬眾生念金剛  
有人識得西來意 看破紅塵早還鄉 高山嶺上有黃金 只怕凡人不肯行  
行盡世間天下路 惟有行善便是真 勸爾修來汝不修 莫學船兒水上遊  
船兒損壞有修整 人身一壞不堪留 世人笑我念佛癡 我笑世人等幾時  
閻君取人無老少 一去不來後悔遲 不行善事不公平 枉在凡間作世人  
有朝一日陽壽盡 自有閻君問分明 西方路上幾座橋 金橋銀橋奈何橋  
行善之人橋上過 作惡之人下了橋 今生富貴前生修 種子盡是隔年留  
世人只說無天眼 豈知遲早天不留 佛叫世人及早修 撐來撐去幾時休  
丁爛木朽難行走 直向艄公趁早修 分明一句古彌陀 莫貪名利逞風流  
紅塵便說儒道釋 人身又叫精氣神 修到如撐上水舟 篙篙著力不停留  
少林傳得西來意 曹溪一派透天河 勇猛還要加勇猛 參求更要再參求  
勿因灘乾而歇手 莫把水急便來丟 夫妻雙修是前緣 火坑化作白玉蓮  
一篙撐上灘頭去 五湖四海任君遊 日出東邊太陽開 世人不可亂貪財  
夫扯風帆妻把舵 順風相送出奈何 彭祖年高宿世來 少不修來癡又呆  
顏回命短前生定 無常一到萬事休 佛祖靈山下凡來 嗟歎世人好癡呆  
多少英雄爭強弱 萬畝糧田素手來 佛祖有卷無字經 用心清靜去修行  
千間房屋空身去 方是智慧玲瓏人 這個齋字說得明 大眾仔細去修行  
若還有人參得透 難躲閻君地獄門 三寶皈依在人身 一心只念本來經  
修行不識這條路 便是人間活世尊 不皈三寶是迷人 枉在娑婆走一尋

同行同坐同睡臥 常與迷人共一群 一炁三才天地人 天上名為日月星  
石崇豪富命安排 范丹貧苦少修來 再把良言說與君 修行須要惜精神  
精神原是身中寶 本位身強道自成 性在人身遍體靈 四面八方放光明  
性在眼中觀萬物 性在耳中聽聲音 性在鼻中聞香臭 性在口內會談經  
性在手中提萬物 性在兩足便能行 性在身時人命在 性在身亡命不存  
迷人不識性中理 率性返本上天庭



## 10【太上感應篇】(首二段真言)

1. 太上曰：禍福無門，惟人自召；善惡之報，如影隨形。是以天地有司過之神，依人輕重以削人祿，祿減則貧耗，多逢憂患。
2. 人當是道則進，非道則退。不履邪徑，不欺暗室；積德累功，慈心於物；忠孝友悌，正己化人；矜孤恤寡，敬老懷幼；昆蟲草木，猶不可傷，況在人乎？宜憫人之凶，樂人之善；濟人之急，救人之危。見人之得，如己之得；見人之失，如己之失。不彰人短，不炫己長；遏人之惡，揚人之善。衣食知足，言行防過。施恩不求報，施捨不求功。是謂之善。



## 11【笠翁對韻上卷】

### 一、東

天對地，雨對風，大陸對長空。山花對海樹，赤日對蒼穹。  
雷隱隱，霧濛濛，日下對天中。風高秋月白，雨霽晚霞紅。  
牛女二星河左右，參商兩曜斗西東。

十月塞邊，颯颯寒霜驚戍旅；三冬江上，漫漫朔雪冷漁翁。  
河對漢，綠對紅，雨伯對雷公。煙樓對雪洞，月殿對天宮。  
雲鬢鬢，日瞳矇，臘屐對漁蓬。過天星似箭，吐魄月如弓。  
驛旅客逢梅子雨，池亭人挹藕花風。

茅店村前，皓月墜林雞唱韻；板橋路上，青霜鎖道馬行蹤。  
山對海，華對嵩，四嶽對三公。宮花對禁柳，塞雁對江龍。  
清暑殿，廣寒宮，拾翠對題紅。莊周夢化蝶，呂望兆飛熊。  
北牖當風停夏扇，南簾曝日省冬烘。

鶴舞樓頭，玉笛弄殘仙子月；鳳翔臺上，紫蕭吹斷美人風。

### 二、冬

晨對午，夏對冬，下晌對高舂。青春對白晝，古柏對蒼松。  
垂釣客，荷鋤翁，仙鶴對神龍。鳳冠珠閃爍，螭帶玉玲瓏。  
三元及第才千頃，一品當朝祿萬鍾。

花萼樓間，仙李盤根調國脈；沉香亭畔，嬌楊擅寵起邊風。  
清對淡，薄對濃。暮鼓對晨鐘。山茶對石菊，煙鎖對雲封。  
金菡萏，玉芙蓉。綠綺對青鋒。早湯先宿酒，晚食繼朝饗。  
唐庫金錢能化蝶，延津寶劍會成龍。

巫峽浪傳，雲雨荒唐神女廟；岱宗遙望，兒孫羅列丈人峰。  
繁對簡，迭對重，意懶對心慵。仙翁對釋伴，道範對儒宗。  
花灼灼，草茸茸，浪蝶對狂蜂。數竿君子竹，五樹大夫松。  
高皇滅頂憑三傑，虞帝承堯殛四凶。

內苑佳人，滿地風光愁不盡；邊關過客，連天塞草憾無窮。

### 三、江

奇對偶，隻對雙，大海對長江。金盤對玉盞，寶燭對銀缸。  
朱漆檻，碧紗窗，舞調對歌腔。興漢推馬武，諫夏著龍逢。  
四收列國群王伏，三築高城眾敵降。

跨鳳登臺，瀟灑仙姬秦弄玉；斬蛇當道，英雄天子漢劉邦。  
顏對貌，像對龐，步輦對徒杠。停針對攔杼，意懶對心降。  
燈閃閃，月幢幢，攬轡對飛艙。柳堤馳駿馬，花院吠村尨。  
酒量微醺瓊杏頰，香塵沒印玉蓮艘。

詩寫丹楓，韓女幽懷流節水；淚彈斑竹，舜妃遺憾積馮江。

### 四、支

泉對石，幹對枝，吹竹對彈絲。山亭對水榭，鸚鵡對鸕鷀。  
五色筆，十香詞，潑墨對傳卮。神奇韓幹畫，雄渾李陵詩。  
幾處花街新奪錦，有人香徑淡凝脂。

萬里烽煙，戰士邊頭爭保塞，一犁膏雨，農夫村處盡乘時。  
菹對醢，賦對詩，點漆對描脂。璠簪對珠履，劍客對琴師。  
沽酒價，買山資，國色對仙姿。晚霞明似錦，春雨細如絲。  
柳絆長堤千萬樹，花橫野寺兩三枝。

紫蓋黃旗，天象預占江左地；青袍白馬，童謠終應壽陽兒。  
箴對贊，缶對卮，螢炤對蠶絲。輕裾對長袖，瑞草對靈芝。  
流涕策，斷腸詩，喉舌對腰肢。雲中熊虎將，天上鳳凰兒。  
禹廟千年垂橘柚，堯階三尺覆茅茨。

湘竹含煙，腰下輕紗籠玳瑁；海棠經雨，臉邊清淚濕胭脂。  
爭對讓，望對思，野葛對山梔。仙風對道骨，天造對人為。  
專諸劍，博浪椎，經緯對干支。位尊民物主，德重帝王師。  
望切不妨人去遠，心忙無奈馬行遲。

金屋閉來，賦乞茂陵題柱筆；玉樓成後，記須昌谷負囊詞。

## 五、微

賢對聖，是對非，覺奧對參微。魚書對雁字，草舍對柴扉。  
雞曉唱，雉朝飛，紅瘦對綠肥。舉邀明月飲，騎馬踏花歸。  
黃蓋能成赤壁捷，陳平善解白登危。

太白書堂，瀑泉垂地三千尺；孔明祀廟，老柏參天四十圍。  
戈對甲，幄對幃，蕩蕩對巍巍。嚴灘對邵圃，靖菊對夷薇。  
占鴻漸，彩鳳飛，虎榜對龍旗。心中羅錦繡，口內吐珠璣。  
寬宏豁達高皇量，叱咤啞啞霸主威。

滅項興劉，狡兔盡時走狗死；連吳拒魏，貔貅屯處臥龍歸。  
衰對盛，密對稀，祭服對朝衣。雞窗對雁塔，秋榜對春闈。  
烏衣巷，燕子磯，久別對初歸。天姿真窈窕，聖德實光輝。  
蟠桃紫闕來金母，嶺荔紅塵進玉妃。

霸王軍營，亞父丹心撞玉斗；長安酒市，洞仙狂興換銀龜。

## 六、魚

羹對飯，柳對榆，短袖對長裾。雞冠對鳳尾，芍藥對芙蕖。  
周有若，漢相如，王屋對匡廬。月明山寺遠，風細水亭虛。  
壯士腰間三尺劍，男兒腹內五車書。

疏影暗香，和靖孤山梅蕊放；輕陰清晝，淵明舊宅柳條舒。  
吾對汝，爾對余，選授對升除。書箱對藥櫃，耒耜對耰鋤。  
參雖魯，回不愚，閥閱對閭閻。諸侯千乘國，命婦七香車。  
穿雲採藥聞仙犬，踏雪尋梅策蹇驢。

玉兔金烏，二氣精靈為日月；洛龜河馬，五行生克在圖書。  
欵對正，密對疏，囊橐對苞苴。羅浮對壺嶠，水曲對山紆。  
驂鶴駕，待鸞輿，桀溺對長沮。搏虎卞莊子，當熊馮婕妤。  
南陽高士吟梁父，西蜀才人賦子虛。

三徑風光，白石黃花供杖履；五湖煙景，青山綠水在樵漁。

## 七、虞

紅對白，有對無，布穀對提壺。毛錐對羽扇，天闕對皇都。  
謝蝴蝶，鄭鷓鴣，蹈海對歸湖。花肥春雨潤，竹瘦晚風疏。  
麥飯豆糜終創漢，蓴羹鱸膾竟歸吳。

琴調輕彈，楊柳月中潛去聽；酒旗斜掛，杏花村裡共來沽。  
羅對綺，茗對蔬，柏秀對松枯。中元對上巳，返璧對還珠。  
雲夢澤，洞庭湖，玉燭對冰壺。蒼頭犀角帶，綠鬢象牙梳。

松陰白鶴聲相應，鏡裏青鸞影不孤。

竹戶半開，對牖不知人在否；紫門深閉，停車還有客來無。  
賓對主，婢對奴，寶鴨對金鳧。升堂對入室，鼓瑟對投壺。  
規合璧，頌聯珠，提甕對當壚。仰高紅日近，望遠白雲孤。  
歆向秘書窺二酉，機雲芳譽動三吳。

祖餞三杯，老去常斟花下酒；荒田五畝，歸來獨荷月中鋤。  
君對父，魏對吳，北嶽對西湖。菜蔬對茶菹，苴藤對菖蒲。  
梅花數，竹葉符，廷議對山呼。兩都班固賦，八陣孔明圖。  
田慶紫荊堂下茂，王裒青柏墓前枯。

出塞中郎，羝有乳時歸漢室；質秦太子，馬生角日返燕都。

## 八、齊

鸞對鳳，犬對雞，塞北對關西。長生對益智，老幼對旄倪。  
頌竹策，剪桐圭，剝棗對蒸梨。錦腰如弱柳，嫩手似柔荑。  
狡兔能穿三穴隱，鷓鴣權借一枝棲。

角里先生，策杖垂紳扶少主；於陵仲子，辟纊織履賴賢妻。  
鳴對吠，泛對棲，燕語對鶯啼。珊瑚對瑪瑙，琥珀對玻璃。  
絳縣老，伯州犁，測蠡對燃犀。榆槐堪作蔭，桃李自成蹊。  
投巫救女西門豹，賃浣逢妻百里奚。

闕里門牆，陋巷規模原不陋；隋堤基址，迷樓蹤跡亦全迷。  
越對趙，楚對齊，柳岸對桃溪。紗窗對繡戶，畫閣對香閨。  
修月斧，上天梯，蝮螭對虹霓。行樂遊春圃，工諛病夏畦。  
李廣不封空射虎，魏明得立為存麋。

按轡徐行，細柳功成勞王敬；聞聲稍臥，臨涇名震止兒啼。

## 九、佳

門對戶，陌對街，枝葉對根荑。鬥雞對揮塵，鳳髻對鸞釵。  
登楚岫，渡秦淮，子犯對夫差。石鼎龍頭縮，銀箏雁翅排。  
百年詩禮延餘慶，萬里風雲入壯懷。

能辨名倫，死亦野哉悲季路，不由徑襪，生乎愚也有高柴。  
冠對履，襪對鞋，海角對天涯。雞人對虎旅，六市對三階。  
陳俎豆，戲堆埋，皎皎對皚皚。賢相聚東閣，良朋集小齋。  
夢裏山川書越絕，枕邊風月記齊諧。

三徑蕭疏，彭澤高風怡五柳；六朝華貴，琅琊佳氣種三槐。  
勤對儉，巧對乖，水榭對山齋。冰桃對雪藕，漏箭對更牌。  
寒翠袖，貴荊釵，慷慨對詼諧。竹徑風聲籟，花溪月影篩。

攜囊佳韻隨時貯，荷鋤沉酣到處理。

江海孤蹤，雪浪風濤驚旅夢；鄉關萬里，煙巒雲樹切歸懷。  
杞對梓，檜對楷，水泊對山崖。舞裙對歌袖，玉陛對瑤階。  
風入袂，月盈懷，虎兕對狼豺。馬融堂上帳，羊侃水中齋。  
北面鬻宮宜拾芥，東巡岱峙定燔柴。

錦纜春江，橫笛洞簫通碧落，華燈夜月，遺簪墮翠遍香街。

## 十、灰

春對夏，喜對哀，大手對長才。風清對月朗，地闊對天開。  
游閨苑，醉蓬萊，七政對三台。青龍壺老杖，白燕玉人釵。  
香風十里望仙閣，明月一天思子台。

玉橘冰桃，王母幾因求道降；蓮舟藜杖，真人原為讀書來。  
朝對暮，去對來，庶矣對康哉。馬肝對雞肋，杏眼對桃腮。  
佳興適，好懷開，朔雪對春雷。雲移鳩鵲觀，日曬鳳凰台。  
河邊淑氣迎芳草，林下輕風待落梅。

柳媚花明，燕語鶯聲渾是笑；松號柏舞，猿啼鶴唳總成哀。  
忠對信，博對賅，忖度對疑猜。香消對燭暗，鵲喜對蛩哀。  
金花報，玉鏡臺，倒屣對銜杯。巖巔橫老樹，石磴覆蒼苔。  
雪滿山中高士臥，月明林下美人來。

綠柳沿堤，皆因蘇子來時種；碧桃滿觀，儘是劉郎去後栽。

## 十一、真

蓮對菊，鳳對麟，濁富對清貧。漁莊對佛舍，松蓋對花茵。  
蘿月叟，葛天民，國寶對家珍。草迎金埒馬，花醉玉樓人。  
巢燕三春嘗喚友，塞鴻八月始來賓。

古往今來，誰見泰山曾作礪；天長地久，人傳滄海幾揚塵。  
兄對弟，吏對民，父子對君臣。勾丁對甫甲，赴卯對同寅。  
折桂客，簪花人，四浩對三仁。王喬雲外鳥，郭泰雨中巾。  
人交好友求三益，士有賢妻備五倫。

文教南宣，武帝平蠻開百越；義旗西指，韓侯扶漢卷三秦。  
申對午，侃對閭，阿魏對茵陳，楚蘭對湘芷，碧柳對青筠。  
花馥馥，葉蓁蓁，粉頸對朱唇。曹公奸似鬼，堯帝智如神。  
南阮才郎差北富，東鄰醜女效西顰。

色豔北堂，草號忘憂憂甚事；香濃南國，花名含笑笑何人。

## 十二、文

憂對喜，戚對欣，二典對三墳。佛經對仙語，夏耨對春耘。  
烹早韭，剪春芹，暮雨對朝雲。竹間斜白接，花下醉紅裙。  
掌握靈符五嶽篆，腰懸寶劍七星紋。

金鎖未開，上相趨聽宮漏永；珠簾半捲，群僚仰對御爐熏。  
詞對賦，懶對勤，類聚對群分。鸞簫對鳳笛，帶草對香芸。  
燕許筆，韓柳文，舊話對新聞。赫赫周南仲，融融晉右軍。  
六國說成蘇子貴，兩京收復郭公勳。

漢闕陳書，侃侃忠言推賈誼；唐廷對策，岩岩直諫有劉蕡。  
言對笑，績對勳，鹿豕對羊羶。星冠對月扇，把袂對書裙。  
湯事葛，說興殷，蘿月對松雲。西池青鳥使，北塞黑鴉軍。  
文武成康為一代，魏吳蜀漢定三分。

桂苑秋宵，明月三杯邀曲客。松亭夏日，薰風一曲奏桐君。

## 十三、元

卑對長，季對昆，永巷對長門。山亭對水閣，旅舍對軍屯。  
楊子渡，謝公墩，德重對年尊。承乾對出震，疊坎對重坤。  
志士報君思犬馬，仁王養老察雞豚。

遠水平沙，有客泛舟桃葉渡；斜風細雨，何人攜榼杏花村。  
君對相，祖對孫，夕照對朝暉。蘭台對桂殿，海島對山村。  
碑墮淚，賦招魂，報怨對懷恩。陵埋金吐氣，田種玉生根。  
相府珠簾垂白晝，邊城畫角動黃昏。

楓葉半山，秋去煙霞堪倚杖；梨花滿地，夜來風雨不開門。

## 十四、寒

家對國，治對安，地主對天官。坎男對離女，周浩對殷盤。  
三三暖，九九寒，杜撰對包彈。古壁蛩聲匝，閑亭鶴影單。  
燕出簾邊春寂寂，鶯聞枕上漏珊珊。

池柳煙飄，日夕郎歸青鎖闥；階花雨過，月明人倚玉欄杆。  
肥對瘦，窄對寬，黃犬對青鸞。指環對腰帶，洗鉢對投竿。  
誅佞劍，進賢冠，畫棟對雕欄。雙垂白玉箸，九轉紫金丹。  
陝右崇高懷召伯，河南花滿憶潘安。

陌上芳春，弱柳當風披彩線；池中清曉，碧荷承露捧珠盤。  
行對臥，聽對看，鹿洞對漁灘。蛟騰對豹變，虎踞對龍蟠。  
風凜凜，雪漫漫，手辣對心酸。鶯鶯對燕燕，小小對端端。  
藍水遠從千澗落，玉山高並兩峰寒。



至聖不凡，嬉戲六齡陳俎豆；老萊大孝，承歡七袞舞斑斕。

## 十五、刪

林對塢，嶺對巒，晝永對春閑。謀深對望重，任大對投艱。  
裙裊裊，佩珊珊，守塞對當關。密雲千里合，新月一鉤彎。  
叔寶君臣皆縱逸，重華父母是囂頑。

名動帝畿，西蜀三蘇來日下；壯游京洛，東吳二陸起雲間。  
臨對仿，吝對慳，討逆對平蠻。忠肝對義膽，霧髮對雲鬟。  
埋筆塚，爛柯山，月貌對天顏。龍潛終得躍，鳥倦亦知還。  
隴樹飛來鸚鵡綠，池筠密處鷓鴣斑。

秋露橫江，蘇子月明遊赤壁；凍雪迷嶺，韓公雪擁過藍關。



## 12【笠翁對韻下卷】

### 一、先

寒對暑，日對年。蹴鞠對秋千。丹山對碧水，淡雨對覃煙。  
歌婉轉，貌嬋娟。雪鼓對雲箋。荒蘆棲南雁，疏柳噪秋蟬。  
洗耳尚逢高士笑，折腰肯受小兒憐。

郭泰泛舟，折角半垂梅子雨；山濤騎馬，接籬倒著杏花天。  
輕對重，脆對堅。碧玉對青錢。郊寒對島瘦，酒聖對詩仙。  
依玉樹，步金蓮。鑿井對耕田。杜甫清宵立，邊韶白晝眠。  
豪飲客吞波底月，酣遊人醉水中天。

聞草青郊，幾行寶馬嘶金勒；看花紫陌，千里香車擁翠鈿。  
吟對詠，授對傳。樂矣對悽然。風鵬對雪雁，董杏對周蓮。  
春九十，歲三千。鐘鼓對管弦。入山逢宰相，無事即神仙。  
霞映武陵桃淡淡，煙荒隋堤柳綿綿。

七碗月團，啜罷清風生腋下；三杯雲液，飲餘紅雨暈腮邊。  
中對外，後對先。樹下對花前。玉柱對金屋，疊嶂對平川。  
孫子策，祖生鞭。盛席對華筵。解醉知茶力，愁消識酒權。  
絲剪芰荷開凍沼，錦妝鳧雁泛溫泉。

帝女銜石，海中遺魄為精衛；蜀王叫月，枝上遊魂化杜鵑。

### 二、簫

琴對管，釜對瓢。水怪對花妖。秋聲對春色，白縑對紅綃。  
臣五代，事三朝。斗柄對弓腰。醉客歌金縷，佳人品玉簫。  
風定落花閑不掃，霜餘殘葉濕難燒。

千載興周，尚父一竿投渭水；百年霸越，錢王萬弩射江潮。

榮對悴，夕對朝。露地對雲霄。商彝對周鼎，殷濩對虞韶。  
樊素口，小蠻腰。六詔對三苗。朝天車奕奕，出塞馬蕭蕭。  
公子幽蘭重泛舸，王孫芳草正聯鑣。

潘岳高懷，曾向秋天吟蟋蟀；王維清興，嘗於雪夜畫芭蕉。  
耕對讀，牧對樵。琥珀對瓊瑤。兔毫對鴻爪，桂楫對蘭橈。  
魚潛藻，鹿藏蕉。水遠對山遙。湘靈能鼓瑟，嬴女解吹簫。  
雪點寒梅橫小院，風吹弱柳覆平橋。

月牖通宵，絳蠟罷時光不減；風簾當晝，雕盤停後篆難消。

### 三、饒

詩對禮，卦對爻。燕引對鶯調。晨鐘對暮鼓，野饌對山餽。  
雉方乳，鵲始巢。猛虎對神獒。疏星浮苜葉，皓月上松梢。  
為邦自古推瑚璉，從政於今愧斗筲。

管鮑相知，能交忘形膠漆友；藺廉有隙，終為刎頸生死交。  
歌對舞，笑對嘲。耳語對神交。焉鳥對亥豕，獺髓對鸞膠。  
宜久敬，莫輕拋。一氣對同胞。祭遵甘布被，張祿念綈袍。  
花徑風來逢客訪，柴扉月到有僧敲。

夜雨園中，一顆不雕王子柰；秋風江上，三重曾卷杜公茅。  
衙對舍，廩對庖。玉磬對金鐃。竹林對梅嶺，起鳳對騰蛟。  
鮫綃帳，獸錦袍。露果對風梢。揚州輸橘柚，荊土貢菁茅。  
斷蛇埋地稱孫叔，渡蟻作橋識宋郊。

好夢難成，蛩響階前偏唧唧；良朋遠至，雞聲窗外正嚶嚶。

### 四、豪

芡對芡，荻對蒿。山鹿對江螯。鶯簧對蝶板，麥浪對松濤。  
騏驥足，鳳凰毛。美譽對嘉褒。文人窺蠹簡，學士書兔毫。  
馬援南征載薏苡，張騫西使進葡萄。

辯口懸河，萬語千言常疊疊；詞源倒峽，連篇累牘自滔滔。  
梅對杏，李對桃。棧樸對旌旄。酒仙對詩史，德澤對恩膏。  
懸一榻，夢三刀。拙逸對貴勞。玉堂花燭繞，金殿月輪高。  
孤山看鶴盤雲下，蜀道聞猿向月號。

萬事從人，有花有酒應自樂；百年皆客，一丘一壑盡吾豪。  
臺對省，署對曹。分袂對同胞。鳴琴對擊劍，返轍對回艚。  
良借箸，操捉刀。香茶對醇醪。滴泉歸海大，簣土積山高。  
石室客來煎雀舌，畫堂賓至飲羊羔。

被謫賈生，湘水淒涼吟鵬鳥；遭讒屈子，江潭憔悴著離騷。

## 五、歌

微對巨，少對多。直幹對平柯。蜂媒對蝶使，雨笠對煙蓑。  
眉淡掃，面微酡。妙舞對清歌。輕衫裁夏葛，薄袂剪春羅。  
將相兼行唐李靖，霸王雜用漢蕭何。

月本陰精，豈有羿妻曾竊藥；星為夜宿，浪傳織女漫投梭。  
慈對善，虐對苛。縹緲對婆娑。長楊對細柳，嫩蕊對寒莎。  
追風馬，挽日戈。玉液對金波。紫詔銜丹鳳，黃庭換白鵝。  
畫閣江城梅作調，蘭舟野渡竹為歌。

門外雪飛，錯認空中飄柳絮；巖邊瀑響，誤疑天半落銀河。  
松對竹，苻對苻。薜荔對藤蘿。梯雲對步月，樵唱對漁歌。  
升鼎雉，聽經鵝。北海對東坡。吳郎哀廢宅，邵子樂行窩。  
麗水良金皆待冶，崑山美玉總須磨。

雨過皇州，琉璃色燦華清瓦；風來帝苑，荷芰香飄太液波。  
籠對檻，巢對窩。及第對登科。冰清對玉潤，地利對人和。  
韓擒虎，榮駕鵝。青女對素娥。破頭朱泚笏，折齒謝鯤梭。  
留客酒杯應恨少，動人詩句不須多。

綠野凝煙，但聽村前雙牧笛；滄江積雪，惟看灘上一漁蓑。

## 六、麻

清對濁，美對嘉。鄙吝對矜誇。花鬚對柳眼，屋角對檐牙。  
志和宅，博望槎。秋實對春華。乾爐烹白雪，坤鼎煉丹砂。  
深宵望冷沙場月，邊塞聽殘野戍笳。

滿院松風，鐘聲隱隱為僧舍；半窗花月，錫影依依是道家。  
雷對電，霧對霞。蟻陣對蜂衙。寄梅對懷橘，釀酒對烹茶。  
宜男草，益母花。楊柳對蒹葭。班姬辭帝輦，蔡琰泣胡笳。  
舞榭歌樓千萬尺，竹籬茅舍兩三家。

珊枕半床，月明時夢飛塞外；銀箏一奏，花落處人在天涯。  
圓對缺，正對斜。笑語對咨嗟。沈腰對潘鬢，孟筍對盧茶。  
百舌鳥，兩頭蛇。帝里對仙家。堯仁敷率土，舜德被流沙。  
橋上授書曾納履，壁間題句已籠紗。

遠塞迢迢，露磧風沙何可極；長沙渺渺，雪濤煙浪信無涯。  
疏對密，樸對華。義鶻對慈鴉。鶴群對雁陣，白苧對黃麻。  
讀三到，吟八叉。肅靜對喧嘩。圍棋兼把釣，沉李並浮瓜。  
羽客片時能煮石，狐禪千劫似蒸沙。

黨尉粗豪，金帳籠香斟美酒；陶生清逸，銀鑪融雪啜團茶。

## 七、陽

臺對閣，沼對塘。朝雨對夕陽。遊人對隱士，謝女對秋娘。  
三寸舌，九回腸。玉液對瓊漿。秦皇照膽鏡，徐肇返魂香。  
青萍夜嘯芙蓉匣，黃卷時攤薜荔床。

元亨利貞，天地一機成化育；仁義禮智，聖賢千古立綱常。  
紅對白，綠對黃。晝永對更長。龍飛對鳳舞，錦纜對牙樁。  
雲弁使，雪衣娘。故國對他鄉。雄文能徙鯉，艷曲為求凰。  
九日高峰驚落帽，暮春曲水喜流觴。

僧占名山，雲繞茂林藏古殿；客棲勝地，風飄落葉響空廊。  
衰對壯，弱對強。艷飾對新妝。御龍對司馬，破竹對穿楊。  
讀班馬，識求羊。水色對山光。仙棋藏綠橘，客枕夢黃梁。  
池草入詩因有夢，海棠帶恨為無香。

風起畫堂，簾箔影翻青苒沼；月斜金井，轆轤聲度碧梧牆。  
臣對子，帝對王。日月對風霜。烏台對紫府，雪牖對雲房。  
香山社，畫錦堂。蔀屋對巖廊。芬椒塗內壁，文杏飾高梁。  
貧女幸分東壁影，幽人高臥北窗涼。

繡閣探春，麗日半籠青鏡色；水亭醉夏，薰風常透碧筒香。

## 八、庚

形對貌，色對聲。夏邑對周京。江雲對澗樹，玉罄對銀箏。  
人老老，我卿卿。曉燕對春鶯。玄霜舂玉杵，白露貯金莖。  
賈客君山秋弄笛，仙人緱嶺夜吹笙。

帝業獨興，盡道漢高能將；父書空讀，誰言趙括善知兵。  
功對業，性對情。月上對雲行。乘龍對附驥，閨苑對蓬瀛。  
春秋筆，月旦評。東作對西成。隋珠光照乘，和璧價連城。  
三箭三人唐將勇，一琴一鶴趙公清。

漢帝求賢，詔訪嚴灘逢故舊；宋廷優老，年尊洛社重耆英。  
昏對旦，晦對明。久雨對新晴。蓼灣對花港，竹友對梅兄。  
黃石叟，丹丘生。犬吠對雞鳴。暮山雲外斷，新水月中平。  
半榻清風宜午夢，一犁好雨趁春耕。

王旦登庸，誤我十年遲作相；劉蕡不第，愧他多士早成名。

## 九、青

庚對甲，巳對丁。魏闕對彤庭。梅妻對鶴子，珠箔對銀屏。  
鴛浴沼，鷺飛汀。鴻雁對鶻鷁。人間壽者相，天上老人星。  
八月好修攀桂斧，三春須繫護花鈴。

江閣憑臨，一水淨連天際碧；石欄閑倚，群山秀向雨餘青。  
危對亂，泰對寧。納陛對趨庭。金盤對玉箸，泛梗對浮萍。  
群玉圃，眾芳亭。舊典對新型。騎牛閑讀史，牧豕自橫經。  
秋首田中禾穎重，春餘園內菜花馨。

旅次淒涼，塞月江風皆慘澹；筵前歡笑，燕歌趙舞獨娉婷。

### 十、蒸

萍對蓼，芰對菱。雁弋對魚罾。齊紈對魯綺，蜀錦對吳綾。  
星漸沒，日初升。九聘對三征。蕭何曾作吏，賈島昔為僧。  
賢人視履成規矩，大斧揮斤校準繩。

野渡春風，人喜乘潮移酒舫；江天暮雨，客愁隔岸對漁燈。  
談對吐，謂對稱。冉閔對顏曾。侯嬴對伯嚭，祖逖對孫登。  
拋白紵，宴紅綾。益友對良朋。爭名如逐鹿，謀利似趨蠅。  
仁傑姨慚周不仕，王陵母識漢方興。

句寫窮愁，浣花寄跡傳工部；詩吟變亂，凝碧傷心歎右丞。

### 十一、尤

榮對辱，喜對憂。繾綣對綢繆。吳娃對越女，野馬對沙鷗。  
茶解渴，酒消愁。白眼對蒼頭。馬遷修史記，孔子作春秋。  
莘野耕夫閒舉耜，渭濱漁父晚垂鈎。

龍馬遊河，羲帝因圖而畫卦；神龜出洛，禹王取法以明疇。  
冠對履，烏對裘。院小對庭幽。面牆對漆地，錯智對良籌。  
孤嶂聳，大江流。芳澤對園丘。花潭來越唱，柳嶼起吳謳。  
鶯懶燕忙三月雨，蛩摧蟬退一天秋。

鍾子聽琴，荒徑入林山寂寂；謫仙捉月，洪濤接岸水悠悠。  
魚對鳥，鵲對鳩。翠館對紅樓。七賢對三友，愛日對悲秋。  
虎類狗，蟻如牛。列辟對諸侯。陳唱臨春樂，隋歌清夜遊。  
空中事業麒麟閣，地下文章鸚鵡洲。

曠野平原，獵士馬蹄輕似箭；斜風細雨，牧童牛背穩如舟。

### 十二、侵

歌對曲，嘯對吟。往古對來今。山頭對水面，遠浦對遙岑。  
勤三上，惜寸陰。茂樹對平林。卞和三獻玉，楊震四知金。  
青皇風暖催芳草，白帝城高急暮砧。

繡虎雕龍，才子窗前揮彩筆；描鸞刺鳳，佳人簾下度金針。  
登對眺，涉對臨。瑞雪對甘霖。主歡對民樂，交淺對言深。  
恥三戰，樂七擒。顧曲對知音。大車行檻檻，駟馬聚駸駸。

紫電青虹騰劍氣，高山流水識琴心。

屈子懷君，極浦吟風悲澤畔；王郎憶友，扁舟臥雪訪山陰。

### 十三、覃

宮對闕，座對龕。水北對天南。蜃樓對蟻郡，偉論對高談。  
遊杞梓，樹榲楠。得一對函三。八寶珊瑚枕，雙珠玳瑁簪。  
蕭王待士心惟赤，盧相欺君面獨藍。

賈島詩狂，手擬敲門行處想；張顛草聖，頭能濡墨寫時酣。  
聞對見，解對諳。三橘對雙柑。黃童對白叟，靜女對奇男。  
秋七七，徑三三。海色對山嵐。鸞聲何噦噦，虎視正眈眈。  
儀封疆吏知尼父，函谷關人識老聃。

江相歸池，止水自盟真是止；吳公作宰，貪泉雖飲亦何貪。

### 十四、鹽

寬對猛，冷對炎。清直對尊嚴。雲頭對雨腳，鶴髮對龍髯。  
風臺諫，肅堂廉。保泰對鳴謙。五湖歸范蠡，三徑隱陶潛。  
一劍成功堪佩印，百錢滿掛便垂簾。

濁酒停杯，容我半酣愁際飲；好花傍座，看他微笑悟時拈。  
連對斷，減對添。淡泊對安恬。回頭對極目，水底對山尖。  
腰裊裊，手纖纖。鳳卜對鸞占。開田多種粟，煮海盡成鹽。  
居同九世張公藝，恩給千人范仲淹。

簫弄鳳來，秦女有緣能跨羽；鼎成龍去，軒臣無計得攀髯。  
人對己，愛對嫌。舉止對觀瞻。四知對三語，義正對辭嚴。  
勤雪案，課風檐。漏箭對書箋。文繁歸獺祭，體艷別香奩。  
昨夜題梅更一字，早春來燕卷重簾。

詩以史名，愁裡悲歌懷杜甫；筆經人索，夢中顯晦老江淹。

### 十五、咸

栽對植，薤對芟。二伯對三監。朝臣對國老，職事對官銜。  
鹿麇麇，兔兔兔。啟牘對開緘。綠楊鶯睨睨，紅杏燕呢喃。  
半籬白酒娛陶令，一枕黃梁度呂嵒。

九夏炎飆，長日風亭留客騎；三冬寒冽，漫天雪浪駐征帆。  
梧對杞，柏對杉。夏濩對韶咸。澗瀟對溱洧，鞏洛對崤函。  
藏書洞，避詔巖。脫俗對超凡。賢人羞獻媚，正士嫉工讒。  
霸越謀臣推少伯，佐唐藩將重渾瑊。

鄴下狂生，羯鼓三搥羞錦襖；江州司馬，琵琶一曲濕青衫。  
袍對笏，履對衫。匹馬對孤帆。琢磨對雕鏤，刻劃對鐫鐫。

星北拱，日西銜。卮漏對鼎饒。江邊生桂若，海外樹都咸。  
但得恢恢存利刃，何須咄咄達空函。  
彩鳳知音，樂典後夔須九奏；金人守口，聖如尼父亦三緘。



### 13【幼學瓊林卷一】

#### 天文

混沌初開，乾坤始奠；  
氣之輕清，而上浮者為天；氣之重濁，而下凝者為地。  
日月五星，謂之七政；天地與人，謂之三才。  
日為衆陽之宗，月乃太陰之象。  
虹名蜺蜺，乃天地之淫氣；月著蟾蜍，乃皓魄之精華。  
風欲起而石燕飛，天將雨而商羊舞。  
旋風名為羊角，閃電號曰雷鞭；青女是霜之神，素娥即月之號。  
雷部至捷之鬼曰律令，雷部推車之女曰阿香。  
風師係是屏翳，雪神號為滕六。  
豐隆謝仙，俱掌雷火；飛廉少女，悉是風神。  
列缺乃電之光，望舒是月之御。甘霖豐澤，俱指時雨，玄穹彼蒼總稱上天。  
雪飛六出，預兆年豐；日上三竿，乃云時晏。  
蜀犬吠日，比人識見甚疏；吳牛喘月，嘲人畏懼太過。  
望切有若雲霓，恩深莫如雨露；  
參商二星，每出沒不相見，牛女兩宿，惟七夕一相逢。  
羿妻奔於月窟，號為姮娥；傳說死後精神，託於箕尾。  
戴月披星，謂奔馳於蚤夜；櫛風沐雨，謂勞苦於風塵。  
事非著意，譬如雲出無心；恩可遍施，乃謂陽春有腳。  
餽物致敬，敢效獻曝之忱；託人轉移，全賴回天之力。  
感救援之恩曰再造，頌覆庇之德曰二天；  
勢易盡者若冰山，事相懸者如天壤。  
晨星謂賢人寥落，雷同謂言語相符；  
心多過慮，何異杞人憂天，事不量力，奚殊夸父逐日。  
趙盾如夏日之可畏，趙衰如冬日之可愛。  
齊婦含冤，三年不雨；鄒衍下獄，六月飛霜；  
親仇不共戴天，子道須當愛日。  
盛世黎民，嬉遊於光天化日之下；太平天子，致召夫景星慶雲之祥。

夏時神禹在位，上天雨金；春秋孝經既成，赤虹化玉。  
箕風畢雨，比庶民之願欲不同；風虎雲龍，擬諸臣之會合不偶。  
雨暘時若，係是休徵；天地泰交，斯稱盛世。

## 地輿

黃帝畫野，始分都邑；夏禹治水，初奠山川。  
宇宙之江山不改，古今之稱謂各殊。  
北京原屬幽燕，金臺乃其異號，南都本為建業，金陵又是別名。  
浙江係武林之區，原為越國；江西是豫章之地，又號吳皋。  
福建省隸七閩，湖廣地名三楚。  
東魯西魯，即山東山西之分；東粵西粵，為廣東廣西之域。  
河南在華夏之中，故曰中洲；陝西即長安之地，原為秦境。  
四川古稱蜀國，雲南漢置滇池；貴州僻處蠻方，荒服舊為黔地。  
東嶽泰山，西嶽華山，南嶽衡山，北嶽恆山，中嶽嵩山，此之謂五嶽；  
饒之鄱陽，湘之青草，巴之洞庭，潤之丹陽，蘇之太湖，此之謂五湖。  
金城湯池，謂疆圉之鞏固；河山帶礪，實封建之誓盟。  
帝都曰京師，故鄉曰梓里。  
蓬萊弱水，非飛仙不可渡；十洲三島，惟真修乃可居。  
滄海桑田，慨世代之更變；河清海晏，兆寰宇之昇平。  
水神曰馮夷，又曰陽侯；火神曰祝融，又曰回祿；  
海神曰海若，海眼曰尾閭。  
望人包容曰海涵，謝人調恤曰河潤。  
無繫累者，江湖散人；負豪氣者，湖海之士。  
問舍求田，原無大志；經天緯地，方是奇才。  
空中起釁，謂之平地風波，獨立不移，謂之中流砥柱。  
黑子彈丸，渺小之邑；咽喉右臂，要害之區。  
獨力難持，一木焉能支大廈；英雄自恃，丸泥可以封函關。  
事先敗而後成，曰失去東隅，收之桑榆；  
事垂成而中止，曰為山九仞，功虧一簣。  
以蠡測海，喻人之見小；精衛銜石，比人之徒勞。  
跋涉謂行路艱難，康莊謂道途平坦。  
瘠土曰不毛之地，沃壤曰膏腴之田，得物無用，如獲石田；  
為學有成，已登道岸。  
淄澠之滋味可辨，涇渭之清濁當分；泌水樂飢，隱居不仕，



東山高臥，清節可風。

聖人出而黃河清，太守廉而越石見。

醇俗曰仁里，惡俗曰互鄉。

里名勝母，曾子不入；邑號朝歌，墨子回車。

擊壤而嬉，上世之黎民自得；讓畔而耕，西周之百姓相推。

長房有縮地之方，始皇有鞭石之法。

堯有九年之水患，湯有七年之旱災。

商君不仁而阡陌開，夏王無道而伊洛竭。

路不拾遺，由在上之有善政；海不揚波，知中國之有聖人。

## 時序

爆竹一聲除舊，桃符萬戶更新。履端為首祚，人日是靈辰；

獻椒花頌，為祝遐齡，飲屠蘇酒，可除疫癘。

新正曰首春，去年曰客歲；

火樹銀花合，言燈節之輝煌；星橋鐵鎖開，謂金吾之放夜。

二月朔為中和節，三月三為上巳辰；

冬至百六是清明，立春五戊為春社；

寒食是清明前一日，初伏是夏至第三庚。

孟夏乃為麥秋，端午是為蒲節；

六月六日，節名天貺，五月五日，序屆天中。

競渡端陽，弔屈原之溺水，登高重九，效桓景之避災。

二社燕雞豚，羣飲治顰之酒；七夕會牛女，家穿乞巧之鍼。

月朗中秋，唐帝神遊月府；風高九日孟生落帽於龍山。

漢人蜡祭曰臘，故稱十二月為臘；秦皇御諱曰政，故讀春正月為正。

東方曰大皞，乘震而司春，故春曰青帝；

南方曰炎帝，居離而司夏，故夏曰赤帝；

西方曰少皞，當兌而司秋，故秋曰白帝；

北方曰顓頊，乘坎而司冬，故冬曰黑帝；中央屬土，黃帝乘權。

夏至一陰生，天時漸短；冬至一陽生，日晷初長。

冬至而葭灰飛，立秋而梧葉落。

月光都盡曰晦，月光復蘇曰朔，半圓半缺曰弦，月與日對曰望。

初一為死魄，初二旁死魄，初三哉生明，十六哉生魄。

翌日詰朝，皆言明日；吉時穀旦，悉是良辰。

片晌即云片時，日曛乃云日暮。

疇昔曩者，俱前日之稱；昧爽黎明，皆將曙之謂。

月分三澣，學足三餘；以術愚人，朝三暮四；為學求益，日就月將。  
焚膏繼晷，日夜辛勤；俾晝作夜，晨昏顛倒。  
自愧無成，曰虛延歲月，與人偶語，曰少敝寒暄。  
到處人情冷暖，從來世態炎涼；衰周無寒歲，暴秦無燠年。  
泰階平曰太平，時序和曰玉燭；歲歉曰饑饉之歲，年豐曰大有之年。  
唐世凶年，醉人為瑞；梁時儉歲，野苳堪憐。  
豐年玉，荒年穀，言人品之可珍，薪如桂，食如玉，言物用之騰貴。  
春祈秋報，農父之常規；夜寐夙興，士人之勤事。  
韶華不再，學者惟當惜陰；日月其除，志士正宜待旦。

### 統系

盤古首出御世，天地初分；天皇澹泊無為，干支始建。  
地皇定三辰以分晝夜，人皇掌九區以奠山川。  
有巢構木為巢，而民知居處；燧人鑽木取火，而民知飲食。  
伏羲畫八卦以開文教，作六書以代結繩，甲曆姓氏，人事漸繁；  
神農樹五穀以資民生，嘗百草以療民疾，農事方書，制度乃備。  
粵惟有熊，啓自少典；外治兵，內修德，開征誅弔伐之先；  
明律曆，制冕裳，肇禮樂文章之祖；  
得六相而天地治，畫九野而政教敷。  
金天為軒轅之子，顓頊乃黃帝之孫；  
帝嚳之祖曰少昊，陶唐之父曰高辛。  
聖聖傳流，賢賢繼統，稱元建國，惟唐及虞。  
仁如天，智如神，放勳之德，民無能名；  
解民愠，阜民財，重華之德，人莫能及。  
夏后家天下而代虞，受禪成功曰禹；  
商王拯生民而伐夏，除暴去虐曰湯。  
桀紂異世，同稱暴君；文武相承，均推聖主。  
卜世三十，卜年七百，周過其曆而日衰；  
春秋五霸，戰國七雄，秦併其地而漸促。  
亦帝子誅白帝子，漢祖興劉，假皇帝逼真皇帝新莽篡漢。  
白水真人實開東漢；中山帝胄爰霸西川。  
典午竊當塗之緒，金牛承石馬之宗；  
五姓據中華而擾晉，六朝依江左而終陳。  
元魏迅掃羣邦，北伐齊而西授周；宇文兼併高氏，得之元而失之楊。  
隋帝弑父篡位，身喪國亡；唐宗劫父稱兵，逆取順守。

惜夫牝后艷妃，亂之於中；悲哉宦官方鎮，擾之於末。  
紛紛五季，八姓十三君；莽莽羣雄，九州數十主。  
若度德而度義，果孰是而孰非？  
宋祖翦諸兇而獨秉乾綱；太宗承兄業而懋膺大寶。  
汴梁九帝，為遼之兄，為夏之父；臨安九君，為金之姪，為元之俘。  
徽欽二宗，蒙塵於北，益廣二主，行遯於南。  
有元起自北方，上世號為蒙古；自世祖之混一，迄順帝之淪亡，數幾百年，  
代凡十易。  
太祖奮迹濠滁，實開南國；燕王興師靖難，定鼎北平。  
逮夫明季之頹靡，爰有思宗之殉烈；  
儲君不能效靈武之蹟，諸藩不能繼江表之蹤。  
滿族入關，旗兵制勝。  
有聖祖高宗之盛治，有教匪髮捻之奇氛。  
曾左雖號中興，華洋漸開兵釁。  
以攝政始，以攝政終；總是宮闈之失德。  
由竊位興，由遜位廢，未聞忠烈之捐軀。  
十二帝歸結清廷，三百年略如明祚。  
辛亥革命，民國肇興；專制推翻，共和成立。  
袁氏以稱帝而即蹶，張勳欲復辟而未成。  
軍閥跋扈飛揚，政客甚囂塵上。  
全國統一，端賴北伐之成功；舉世和平，庶遂大同之願望。

## 朝廷

三皇為皇，五帝為帝；尚德者王，尚力者霸；  
天子萬邦之主，諸侯列國之君。  
五帝官天下，以位讓賢；三王家天下，以位傳子。  
陛下天子之尊稱，殿下藩王之懿號；  
新主登極曰龍飛，羣臣覲君曰虎拜。  
皇帝之言曰綸音，皇后之命曰懿旨；  
椒房是后妃所居，楓宸乃君王所蒞。  
天子尊崇，故稱元首，臣鄰輔弼，故喻股肱。  
麟之趾，龍之種，俱譽宗藩；邦之貞，國之貳，皆稱太子；  
建儲位，立青宮，傳國寶，稱玉璽。  
宗室之派，演於天潢，帝胄之譜，名為玉牒；  
前星耀采，共祝千秋，嵩嶽效靈，三呼萬歲。

聖主德配昊天，遂動華封之祝，帝子覃恩少海，爰興樂府之歌；  
尊帝父曰：太上逍遙，頌國母曰：女中堯舜。  
神器大寶，皆言帝位；淑妃貴嬪，總是宮娥。  
帝女乃公侯主婚，故有公主之稱，帝婿非正駕之車，故有駙馬之職。  
縣主、鄉君，侈言宗女之貴，儀賓、郡馬，艷稱戚里之榮；  
試觀人世繁華，誰似皇家富貴。

## 相猷

有道之世，元首明而股肱良；盛德之君，輔弼周而疑丞備。  
燧人四佐，結繩之政聿興，黃帝六相，垂裳之化乃著；  
五臣佐舜而懷襄之害消，十亂興周，而弔伐之功遂。  
聘伊尹於莘野，除暴救民，求傅說於巖阿，中興致治。  
周公，召公，夾輔王朝；吉甫，方叔，並為元老。  
管、晏建霸顯之勳，僑、肸推邦家之選。  
蕭、曹以運籌匡贊，開炎漢之先；房，杜以碩畫訂謨，啓盛唐之業。  
武侯輔漢於蜀，梁公反周為唐，是旋乾轉坤之手；  
汾陽恢復二京，西平重安九廟，洵補天浴日之功。  
姚宋同心輔政，故開元之治，比於貞觀；  
趙張戮力匡君，故紹興之治，幾於元祐。  
尚文尚儉，唐有張燕公，杜魏侯；大忠大雅，宋有寇忠愍、王文正。  
申屠嘉之與王商，想西京之威重；謝安石之與王導，具江左之風流。  
石慶數馬，寅畏小心，丙吉問牛，調燮大體；  
公孫弘以儒術佐漢，李衛公以謀略興唐。  
一清一寧，王戎簡要而能言；十漸十思，魏徵嫵媚而善諫。  
安用三寸毛錐，桑維翰指麾定亂；只須半部論語，趙韓王經濟守城。  
李沆持衡，貴戚不夤緣而拜臺席；司馬秉軸，遼人戒生事以擾邊疆。  
至於父子登庸，則伊尹之子伊陟，巫咸之子巫賢，韋賢之子韋玄成，李吉甫  
之子李德裕；兄弟濟美，則王祥之弟王覽，卞粹之弟卞純，崔陵之弟崔仲  
文，曾布之弟曾肇。  
三世為相，則張嘉貞之若子若孫也，呂公著之乃祖乃父也；  
四世為相，則弘農之有楊震也，汝南之有袁安也。  
一十二，二十四，秦甘羅，漢鄧禹，何其少也；  
八十二，九十一，張柬之，文彥博，不亦晚乎。  
四朝元宰。裴晉公莫與京焉，長樂老敘，馮可道何足觀也。

## 14【幼學瓊林卷二】

### 將略

治世以文，弼亮之臣攸賴；戡亂以武，熊羆之士宜先。

起、翦、頗、牧，秦趙之干城；衛、霍、英、彭，炎劉之上將。

太公黃鉞白旄以董六師，武侯葛巾羽扇而臨大敵，將在謀而不在勇；

曹公渡江八十萬，敗於周瑜，先主連營七百里，破於陸遜，兵在精而不在多。

熾牛尾以衝燕，竊虎符而救趙，為轟雷掣電之師；

雅歌投壺以臨戎，輕裘緩帶而拒敵，乃鎮靜雍容之將。

韓信囊沙以破楚，鄧艾踰崖以襲蜀，孫臏收減竈之功，馬援定聚米之策，此多算而勝之驗也；

飛將軍一見而魂銷，真天威七擒而心服，郝玘怖小兒之啼，石虔愈病夫之瘡，此威名素著之徵也。

至於濟河焚舟，誓死不回而報晉；臥薪嘗膽，深謀積慮以平吳。

鳴琴擁篲，無兵而示以莫測；唱籌量沙，不足而見其有餘。

班定遠三十六人，收西域五十餘國，不費斗粟以成功，實建不世之業；

曹武惠二十萬眾，下江南四十餘州，不殺一人而定國，乃稱王者之師。

是以信陵歸魏，強秦不敢加兵，樂毅去燕，全齊得而復失；

每覘俊傑之行藏，可卜邦家之貞悔。

### 科第

士人入泮曰采芹，舉子登科曰釋褐；

賓興為大比之年，賢書即鄉試之錄。

鏖戰棘闈，青錢中選；榮膺鶚薦，席帽離身。

鹿鳴以榮文榜，鷹揚以耀武科；

文章中式，望朱衣之點頭，經術既明，取青紫如拾芥。

宴罷曲江，快紅綾之賜餅；名登天府，羨柳汁之染衣。

特拔謂之出頭地，崛起謂之破天荒；

中狀謂之占鰲頭，發解謂之魁虎榜。

賜宴瓊林，宋朝盛典；探花杏苑，唐世殊恩。

主司稱為座主，衣鉢相傳；同榜皆是同年，姑蘇大會。

貢籍見遺，龍門點額，公車獲雋，雁塔題名；

金殿唱第傳臚，鄉會放榜曰撒棘。

攀仙桂，步青雲，皆言及第，紅勒帛，孫山外，總是無名。

詩美作人，程試即薪樵之典；易推連茹，進賢乃彙征之途。

入彀英雄，喜羅多士；滿城桃李，賀得門生。

慰人之下第，則曰賺了英雄，憐士之無依，亦云傍誰門戶；

雖然有志者事竟成，竚有榮華之日，

信乎成丹者火候到，莫辭烹煉之功。

## 文階

聖主有出震向離之象，大臣有扶天捧日之功；

公孤位比三台，即官序應列宿。

宰相爵居鼎鉉，選曹職掌銓衡。

曰天官，曰地官，曰春官，曰夏官，曰秋官，曰冬官，

六官寮采之通稱；

曰冢宰，曰司徒，曰宗伯，曰司馬，曰司寇，曰司空，

尚書侍郎之總號。

柏府烏臺，推崇都憲，鳳池薇省，贊美詞林；

皇華以譽行人，司成以尊祭酒。

內而科道，總稱柱後惠文；外而督撫，並號中丞開府。

方伯藩侯，布政參議之職；臬司廉憲，提刑按察之名；

學政號曰文衡，鹽法稱為鹺憲。

郡侯刺史，太守名尊；別駕治中，府寮望重。

州牧邑長，乃知州知縣之號；貳尹少府，即縣丞縣尉之稱。

仕宦俗號鄉紳，農官古稱田畷；鈞座台臺，皆推顯宦；憲轅虎幄，並譽尊僚。

初官曰筮仕，蒞任曰下車；任滿曰及瓜，歸田曰解組。

秩官既分九品，命婦亦有七階；

婦人受封曰金花誥，中書詔勒曰紫泥封。

唐帝以金甌覆宰相之名，宋主以美珠箴諫臣之口。

金馬玉堂，羣羨翰林聲價，朱輜皂蓋，爭看郡守威儀。

八座皆紫閣名公，五馬即黃堂太守。代天巡狩，直指通稱；

指日高陞，官僚美譽。

藩垣屏翰，有侯伯之尊，墨綬銅章，乃子男之列。

太監掌宮門之禁令，故曰閹宦；朝臣皆搢笏於紳間，故曰縉紳。

樹愛甘棠，召伯化行於南國；碑名墮淚，羊公澤被於襄陽。

魚頭贊魯直之丰稜，伴食嘲盧相之緘默。

王德用稱黑王相公，趙清獻號鐵面御史；

劉守愛民，蒲鞭示辱；羊君潔己，官署懸魚。

直言不諱，何殊鳴鳳朝陽；彈劾無私，未許豺狼當道。

鄧侯政美，挽之不留；謝令性貪，推之不去。

蜀郡民歌五袴，漁陽麥秀兩歧。

魯恭三異，中牟桑下有雉馴，郭伋重來，并境兒童迎竹馬。

鮮于乃一路福星，司馬是萬家生佛。

鸞鳳不棲枳棘，主簿快覩仇香；河陽遍種桃花，縣令欣逢潘岳。

劉昆宰江陵，反風滅火；龔遂守渤海，賣劍買牛；皆由德政可稱，是以令名攸著。

## 武秩

韓柳歐蘇，固文人之最著；起翦頗牧，更武將之多才。

小范老子，腹中數萬甲兵；西楚霸王，江東八千子弟。

孫武吳起，方略堪誇；司馬尉繚，機權莫測。

尚父六韜，有文武龍虎豹犬之別；石公三略，有上略中略下略之分。

蒐、苗、獮、狩，四時以簡車徒；虎、貔、熊、羆，三軍以張威武。

開府元戎，即都督總兵之號；參戎都閫，即參將都司之稱。

遊擊守備，有遊戎鎮撫之名，守禦把總，有千侯百宰之譽。

以車相向曰轅門，顯揭戰功曰露布，

刻日交鋒曰對壘，議和釋怨曰行成；

戰勝班師曰凱旋，戰敗奔走曰追北；

為君洩憤曰敵愾，為國紓難曰勤王。

獨立大樹下，馮將軍不炫戰功；勞軍細柳營，漢文帝方知將略。

庸主侈言兵衆，投鞭可以斷流；英流自薦才奇，處囊便當脫穎。

國士無雙，受辱於胯下；孺子可教，進履於圯橋。

隱跡為牧豕奴，卒膺長平之秩；降身為屠狗輩，竟啓舞陽之封。

求士莫求全，毋以二卵捐勇將；用人如用木，勿以寸朽棄良材。

總之君子之身，可大可小；丈夫之志，能屈能伸。

甯學淮陰之將兵，多多益喜；毋為平原之從者，碌碌無奇。

自古英雄，難以枚舉；欲知兵略，須諳韜鈴。

## 父子（祖孫類附）

何謂五論？君臣，父子，夫婦，昆弟，朋友；

何謂九族？高，曾，祖考，兄弟，子，孫，曾，玄。

始祖尊為鼻祖，遠孫號曰耳孫；

父子相繼，肯構肯堂，作述俱賢，是橋是梓。

祖稱王父，父曰嚴君；

父母康寧，比椿萱之並茂，子孫發達，似蘭玉之聯芳。  
不癡不聾，不作阿家翁；得親順親，方可為人子。  
孝養祖母，李密陳情；尊奉家公，侯霸垂訓；  
蓋前愆，名為幹蠱；育義子，乃曰螟蛉。  
生子當如孫仲謀，曹公歎美之語；生子須如李亞子，梁主羨慕之詞。  
菽子承歡，貧士養親之樂；義方立教，賢父愛子之心。  
紹我箕裘，克昌厥後；纘戎祖考，無忝所生。  
具慶下，表父母俱存；重慶下，謂祖孫相繼。  
詒厥孫謀，乃稱燕翼，繩其祖武，是謂象賢。  
家有令子，慶麟趾之呈祥；室有佳兒，羨鳳毛之濟美。  
王右軍分甘自娛，郭汾陽問安惟頷。  
和丸教子，仲郢母賢；戲彩娛親，老萊子孝。  
毛義捧檄而喜，感親之在；伯俞被笞而泣，痛母之衰。  
慈母望子，倚門倚閭；遊子思親，陟岵陟屺。  
家督斯堪主器，門子乃能克家。  
父期其子曰充閭，子勝其父曰跨竈；寧馨英物，無非羨彼之兒；  
國器掌珠，悉是譽人之子。  
可愛者子孫之多，若螽斯之揖揖；堪誇者似續之盛，如瓜瓞之綿綿。

### 兄弟（叔姪類附）

天下無不是底父母，世間最難得者兄弟。  
須貽同氣之光，無傷一本之誼。  
玉昆金友，羨兄弟之俱賢；伯壻仲篋，喻聲氣之相應。  
兄弟既翕，花萼相輝；孟季齊芳，棣華競秀。  
患難相顧，似鵲鴿之在原，手足分離，如雁行之折翼。  
元方季方俱盛德，難兄難弟；景文元憲共登科，大宋小宋。  
潁川八龍著譽，河東三鳳馳名。  
賈門三虎，偉節獨優；馬氏五常，白眉為最。  
八元八愷，希世之才；雙璧雙珠，曠代之勝。  
征東破斧，周公大義滅親；遇賊爭先，趙孝輕生代弟。  
煮豆燃萁，諷其相害；斗粟尺布，譏其不容。  
變起鬩牆，尚堪禦侮；天生羽翼，自是同仇。  
姜家製被以同眠，宋帝灼艾以分痛。  
田氏分財，忽悴庭前之樹；孤竹讓國，共甘首陽之薇。  
雖曰不如友生，亦云莫如兄弟。



至於世父諸父，皆伯叔之稱；若夫猶子從子，乃諸姪之謂。  
家有名士，王濟諱言叔癡；阿大中郎。道韞雅推叔美。  
名以鎮惡，王猛知孫之非常；譽以龍文，揚昱誇弟之特異。  
烏衣郎稱王謝之子弟，千里駒羨苻朗為可兒。

竹林杯酒，阮家叔姪之狂；玉樹芝蘭，謝氏門庭之盛。  
存姪棄子，悲伯道之無後；事叔如父，羨仲郢之居官。  
盧邁無兒，以姪主身之後；張範遇賊，以子代姪而生。  
百犬同牢，陳氏義門獨著；九族均賚，范公高誼無倫。  
非遵象山之三聽，焉能亢宗；必師公藝之百忍，斯堪裕後

### 夫婦

孤陰則不生，獨陽則不長，陰陽和而後雨澤降；  
男以女為室，女以男為家，夫婦和而後家道成。  
夫謂妻，曰內子，曰細君；妻稱夫，曰丈夫，曰良人。  
受室自言娶妻，納寵謂人買妾。  
賀人成婚曰諧伉儷，稱人納妾曰如夫人。  
結髮係是初婚，續絃乃為再娶。婦人重婚曰再醮，男子無偶曰鰥居。  
如鼓瑟琴，好合之謂；琴瑟不叶，反目之稱。  
牝雞司晨，比婦人之預事；河東獅吼，譏丈夫之畏妻。  
蒸梨出妻，曾子善全孝道，殺妻求將，吳起何其忍心。  
張敞畫眉，兒女之態可哂；董氏封髮。貞潔之性堪誇。  
冀缺夫婦，相待如賓；仲子夫妻，自食其力。  
糟糠不棄，宋弘可謂義夫；眉案相莊，梁鴻喜得賢婦。  
樂昌破鏡之分，蘇蕙回文之織，悵矣生離；  
張瞻炊白之夢，莊子鼓盆之歌，悲哉死別。  
鮑宣妻提甕出汲，內助斯賢；陶潛婦同志耕鋤，隱德最著。  
可怪者買臣之妻，家貧求去，不思覆水難收；  
可醜者相如之婦，夤夜私奔，但識絲桐有意。  
要之身修而後家齊，必也夫義自然婦順。

### 師友（賓主類附）

宣聖杏壇，弟子三千，而賢人七十；  
馬君絳帳，後列女樂，而前授生徒。  
設教有如振鐸，待問何異叩鐘。  
賈氏舌耕，後人謙為餬口；孔門心服，諸生賴以折衷。  
師號西賓，尊師席曰函丈；學名家塾，餽學俸曰束脩。

門牆桃李，謂受業之衆多；苜蓿闌干，言供膳之菲薄。

冰生於水而寒於水，比後進之過於先生；

青出於藍而勝於藍，喻弟子之優於師傅。

未獲及門，曰宮牆外望；已承秘授，曰衣鉢真傳。

楊震是關西夫子，賀循乃當世儒宗。

負笈為千里遊，李固就師之篤；候門立三尺雪，游揚敬學之誠。

稱師善教，如坐春風之中；感業有成，得沾時雨之化。

師嚴乃道尊，甄陶必資模範；友良斯德備，攻玉端藉他山。

取善輔仁，貴於益友；往來交際，爰有嘉賓。

爾我同心，似金蘭之最摯；友朋合志，可麗澤以相滋。

先世通家，尊為父執；平生齊契，號曰同袍。

行合趣同，乃云莫逆；披衿領契，是謂忘形。

廉慶為刎頸之交，孫周原總角之好。

膠漆雖堅，不若雷陳之誼合；雞黍有約，應知張范之情通。

王陽在位，貢禹因以彈冠；杜伯遭刑，左儒不辭死諫。

信乎同人于野，如襲芝蘭之香；倘若比之匪人，如染鮑魚之臭。

肝膽相託，是謂心期；意氣不孚，無非面友。

始終如一曰耐久，老幼相得曰忘年。

果能如水以全交，須融冰炭；勿以乾餼之失德，遂致參商。

落月屋梁，相思顏色；暮雲春樹，企望丰標。

陸士和折梅逢使，聊寄江南一枝春；

王摩詰攀柳贈行，快唱陽關三疊曲。

班荊傾蓋，途遇交歡；操篲掃門，迓迎致敬。

頻來無忌，居然入幕之賓；不召自來，洵是不速之客。

敘別則曰分袂，締交則曰盍簪。

設醴不常，楚王禮賢之意怠；投轄無厭，陳公留客之心殷。

中郎倒屣以迎賓，大聖握髮以待士。

府尹重徐生之德，下榻為歡；延陵遇子產之賢，縞紵相贈。

絕絃傷友，為乏知音；割席拒朋，謂非同志。

分金多與，獨知管仲之貧；遇故贈袍，深憐范叔之困。

賓主情聯，須盡東南之美；友朋義合，共期惻切之誠。

## 婚姻

良緣必由夙締，佳耦本是天成。

蹇修執柯，媒妁之號；冰人掌判，傳語之人。

婚姻須六禮之周，嫁娶合二姓之好。女嫁曰于歸，男婚曰有室。  
新婦謁祖曰廟見，女子省親曰歸寧。  
問名納采，叶陳敬仲之鳳占；嫁女婚男，畢向子平之素願。  
成親有日，預訂星期；傳命而來，全憑月老。  
委禽納幣，聘禮孔嘉，合卺交杯，新婚宴爾。  
侍巾櫛，執箕帚，嫁女謙詞；嫺姆訓，習閭儀，相夫賢德。  
綠影垂窗，憫貧家之女；紅樓夾道，誇富室之姝。  
桃之華，曰夭夭，曰灼灼，謂婚禮之及時；  
標有梅，其實七，其實三，謂吉期之已過。  
御溝流葉，洵是良媒；繡幕牽絲，方為快婿。  
宮中論婦，願得金屋以貯嬌；月下言婚，方知赤繩之繫足。  
朱陳一村而結好，秦晉兩國以聯姻。  
藍田種玉，雍伯之良緣；孔雀射屏，唐皇之盛事。  
故禮先親迎，所以端人倫之始；詩始好逑，正以崇王化之原。

## 外戚

論婚姻固推尹媯，言懿戚更屬潘楊。  
冰清玉潤，同時翁婿皆賢；秦水泰山，外氏舅姑並重。  
新婿曰嬌客，贅婿曰館甥。  
坦腹東牀，執半子之禮；乘龍華閬，誇百兩之將。  
女子號門楣，貴妃榮施於父族；外甥稱宅相，魏舒期報於母家。  
敍舊曰原有瓜葛之親，自謙曰忝在葭莩之末。  
稱姑子為外家之寶，尊舅氏為渭陽之情。  
大喬小喬，有雙美之譽；連襟連袂，皆僚婿之稱。  
蒹葭依玉，敢分戚屬之光；蔦蘿附松，全仗懿親之庇。



## 15【幼學瓊林卷三】

### 列女

男秉乾體之剛，女配坤德之順。聖后稱女中堯舜，健婦為女中丈夫。  
曰閨秀，曰淑媛，皆稱賢女；曰楚娃，曰宋豔，並號佳人。  
婦主中饋，足徵內助之賢；妻念薰砧，斯叶女貞之吉。  
何謂三從，從父從夫，夫死從子；何謂四德，婦德婦容，婦言婦功。  
姬氏母儀訓世，有周姜，有太任，有太姒；  
三代女寵喪邦，以妹喜，以妲己，以褒姒。  
蘭質蕙心，名姝之美譽；柏操霜節，嫠婦之清聲。

女貌娉婷，謂之尤物；婦容婉媚，實可傾城。  
潘妃步，朶朶蓮花，小蠻腰，纖纖楊柳。  
玄妻髮光可鑑，絳仙秀色可餐。  
麗娟氣馥如蘭，呵成香霧；楊妃淚紅如血，點滴堅冰。  
詩傳柳絮，信道韞之才高；裙號留仙，美飛燕之善舞。  
至若緹縈之上書救父，盧氏之冒刃衛姑，此女之孝者；  
陶母之截髮留賓，絡秀之具饌供客，此女之賢者。  
韓女之投身於穢，陳婦之殞軀於崖，此女之烈者；  
李氏之引斧斷臂，曹女之引刀割鼻，此女之節者。  
大家之續成漢史，文姬之謄寫賜書，此女之才者；  
荀灌之突圍求救，木蘭之代父從軍，此女之勇者。  
戴女之練裳竹筍，孟光之荆釵布裙，此女之貧者，  
任妻之禿豔妃髮，劉婦之怒洛陽賦，此女之妬者。  
賈午之私贈異香，文君之夜奔邸舍，此女之蕩者。  
東施之效顰可厭，無鹽之刻畫難堪，此女之醜者。  
自古貞淫各別，人生妍醜不同，莫因許婦之乏容，遂效蕭郎之遠逝。

## 人事

大學首重明新，小子先嫻應對。修容固宜合度，出言尤貴有章。  
智欲圓而行欲方，膽欲大而心欲小。  
執事足下，稱人之詞；不佞鯁生，自謙之語。  
恕罪曰原宥，惶恐曰主臣。  
翰撰春元，鄉會之稱不一；貶封碩望，仕隱之譽多殊。  
大掾史贊美吏員，大柱石尊崇官宦。  
賀入泮曰雲程發軔，賀新冠曰元服始加。  
仕途榮假，謂之錦旋；經商獲財，謂之捆載。  
送禮曰獻芹，辭餽曰返璧。謝人曰厚貺，自謙曰菲儀。  
餞行之禮，謂之贐儀；拜見之貲，謂之贄敬。  
賀壽曰祝敬，弔喪曰奠儀。接風曰洗塵，送行曰祖道。  
犒勞僕夫，謂之旌使；開筵演劇，謂之優觴。  
答人寄書，曰辱承華翰；謝人致問，曰多蒙寄聲。  
索人回信，曰早賜玉音；謝人許物，曰已承金諾。  
具東曰投刺，啓函曰開緘。  
思念之久，素切瞻韓；想望之殷，夙懷慕藺。  
相與未深，纔有半面之識；不期而遇，實乃邂逅之緣。

登龍門謂參名士，瞻山斗謂仰高賢，  
相思則一日三秋，不遇則渴塵萬斛。  
睽違已久，未免鄙吝復萌；來往無憑，有似飄蓬靡定。  
虞帝慕聖，見於羹，見於牆；顏子從師，趨亦趨，步亦步。  
曾經晤語，向荷承顏接辭；偶獲談心，幸蒙耳提面命。  
吹噓乃資其汲引，包荒是冀其含容。  
求人薦剡，曰幸為先容；求人筆削，曰懇賜郢斲。  
借重鼎言，邀人議事；乞移玉趾，浼人親行。  
多蒙推轂，謝人引進之辭；望為領袖，託人倡首之說。  
鄉評推為月旦，良友穆若金蘭。  
逢人說項，志在表揚；名下無虛，方能好古。  
黨惡為非曰朋奸，盡財以博曰孤注。  
徒了事曰但求塞責，戒明察曰不必苛求。  
方命是逆人之言，執拗是任己之性。  
曰覬覦，曰睥睨，總謂私心窺探；  
曰倥傯，曰旁午，皆言人事紛紜。  
小過必察，比之吹毛求疵；乘患相攻，甚於落阱下石。  
慾心難厭如溪壑，財物易去如漏卮。  
頓開茅塞，感人之教益；深蒙藥石，謝人之箴規。  
清修芳躅，皆懿行之可師；確論美談，悉嘉言之可頌。  
謹飭謂之忍默，息怒謂之霽威。  
包公寡色笑，人比黃河之清；阮子鮮許可，誰蒙青眼之顧。  
仇深曰切齒，交好曰知心，大笑曰解頤，微哂曰莞爾。  
撫掌則聞言絕倒，掩口則對客胡盧。  
向隅則一人獨悲，哄堂則三院皆笑。  
上座延賓，謂之虛左；官僚共署，謂之同寅。  
失信曰爽約，又曰食言；背誓曰寒盟，又曰反汗。  
銘心鏤骨，佩德難忘；結草銜環，知恩必報。  
自惹其災，有如解衣抱烈火；幸免其害，何異漏網就深淵。  
兩不相入，謂之枘鑿；兩不相投，謂之冰炭。  
彼此不值曰齟齬，進退維谷曰趑趄。  
落落乃不合之辭，區區亦自謙之語。  
竣者作事已畢之謂，釀者斂財會飲之名。  
贊襄謂之玉成，分裂謂之瓦解。

事有低昂曰軒輊，力相上下曰頡頏。  
平空起事曰作俑，仍前踵弊曰效尤。  
不辭勞苦曰拮据，不暇修飾曰鞅掌。  
手足並行曰匍匐，俯首沉吟曰低徊。  
明珠投暗，大屈才能；入室操戈，自相殘害；  
求教於愚者，是謂問道於盲，枉道以干人，是謂銜玉求售。  
智謀之士，所見略同；仁人之言，其利甚溥。  
班門弄斧，不知分量；岑樓齊末，不識高卑。  
勢延莫測，比之滋蔓難圖；包藏禍心，謂其情形叵測。  
道旁作舍，議論多而無成；一國三公，權柄分而靡適。  
遇合奇緣，曰三生有幸；事多逆境，曰一事無成。  
酒色是耽，如以雙斧伐孤樹；才力不及，如以寸膠理黃河。  
兼聽則明，偏聽則暗，魏徵之對太宗；  
衆怒難犯，專欲難成，子產以諷子孔。  
欲逞所長，不覺心煩技癢；絕無所好，等於槁木死灰。  
座上有南客，切須謹言；往來無白丁，乃為取友。  
知遇之來，漸入佳境；倨傲之甚，旁若無人。  
借事寬役曰告假，用財囑託曰夤緣。  
事有大利，曰奇貨可居；事宜鑒前，曰覆車可戒。  
事分彼此，曰左袒；  
事持兩可，曰摸稜；敵甚易摧，曰發蒙振落；  
志在必勝，曰破釜沉舟。  
曲突徙薪無恩澤，不念隄防之預；焦頭爛額為上客，徒知拯救之勞。  
竊盜曰梁上君子，強梗曰化外頑民。  
竹頭木屑，皆為有用之物；牛溲馬勃，可備藥籠之資。  
五經掃地，自褻斯文；一木撐天，可消逆志。  
題鳳書午，譏諂之隱詞；破麥剖梨，會合之奇夢。  
毛遂片言九鼎，君歎其賢；季布一諾千金，人服其信。  
志士盡忠報國，大儒清白傳家。下強上弱，曰尾大不掉；  
此權彼操，曰太阿倒持。  
為人幹辦曰代庖，為人設謀曰借箸。  
見事極真，明若觀火，對敵易勝，勢若摧枯。  
生平可對人言，溫公自信之語；運用存乎一心，武穆論兵之譏。  
不修邊幅，謂人之坦率；不立崖岸，謂人之和易。

蕞爾么麼，言其甚小；鹵莽滅裂，言其不精；

誤處皆緣不學，習慣乃成自然。

過於欲速曰躐等，過於禮貌曰足恭。

鄉原偽學之稱，巨擘出羣之譽。孟浪多由輕薄，暇豫每事精詳。

為善者流芳百世，為惡者遺臭萬年。過多曰稔惡，罪滿曰貫盈。

冶容固可誨淫，慢藏亦能誨盜。

管中窺豹，所見無多；坐井觀天，其識未廣。

無勢可乘，英雄無用武之地；有道則見，君子展濟世之才。

稱人利達，曰捷足先得；慰士遲滯，曰大器晚成。

不知合變，徒讀父書；自作聰明，徒執己見。

淺識謂之膚見，俗語謂之俚言。明哲不昧先幾，俊傑能識時務。

愚者豈無一得，武人不識一丁。

戒輕敵曰勿謂秦無人，戒輕言曰恐屬垣有耳。

助桀為虐，謂同惡之相濟；

得隴望蜀，謂求利之無厭。須知器滿必傾，每見物極則反。

嬉戲名為好弄，嘲笑即是詼諧。

讒口交訐，市中有虎；羣奸煽惑，聚蚊成雷。

萋斐成錦，喻姦徒之釀禍；含沙射影，言鬼蜮之害人。

鍼砭所以治病，鳩毒必致殺人。

陰柔害物，笑裏藏刀；詭譎陷人，腹中有劍。

拔去一釘，謂除一害；又生一秦，是增一仇。

從來淑慝殊途，惟在後人法戒；斯世清濁異品，全賴吾輩激揚。

### 年齒（壽誕類附）

不凡之子，必異其生；大德之人，必得其壽。

生申初度，賀人壽誕之稱，遐算修齡，祝人壽考之謂。

洗三日湯餅之會，試周曰啐盤之期。

男誕曰懸弧令旦，女誕曰設悅良辰。

賀人生子，嵩嶽降神；自謙生女，緩急非益。

曰夢熊，曰弄璋，生男之兆；曰夢虺，曰弄瓦，生女之徵。

姜嫄履巨跡而娠，簡狄吞黿卵而孕。

鄭姬芳蘭叶吉夢，桓公英物試啼聲。

麟吐玉書，天啓尼山聖瑞；燕投懷內，夢徵唐室人豪。

李老君八十年而降，道號猶龍；漢太子十四月而生，門名堯母。

晚年得子，老蚌生珠；皓首登科，龍頭有屬。

賀男壽曰南極星輝，賀女壽曰中天婺彩。

松筠節操，羨風霜之耐久；桑榆暮景，慮歲月之無多。

矍鑠人稱強健，老朽自歎衰頹。

黃髮兒齒，眉壽之徵；

潦倒龍鍾，暮年之狀，日月其邁，徒自傷悲；

青春幾何，問人壽算。

行年五十，當知四十九年之非；在世百歲，那有三萬六千之樂。

故有上中下壽之分，更有耄耄期頤之號。

自就傅而舞勺舞象，固可畏之後生；

由杖鄉而杖國杖朝，尤當敬其老者。

### 制作

上古之世，政尚結繩；蒼頡挺生，制為文字。

河馬負圖，羲畫八卦；洛龜呈瑞，禹列九疇。

刻漏挈壺所司，甲子大撓所造。算數作於隸首，律呂制自伶倫。

甲冑舟車，俱軒轅之創始；權衡度量，悉黃帝之立規。

章亥紀步數以定極，伯鯨築城郭以衛民。

太昊造網罟以佃漁，少昊作弧矢以戰伐。

製耒耜，興陶冶，皆由炎帝；造琴瑟，作杵臼，乃自羲皇。

冠裳之制，至有熊而大備；蠶桑之利，由元妃而始興。

神農嘗百草，醫藥有方；后稷藝五穀，粒食攸賴。

鑽木取火，而烹飪初興；構木為巢，而宮室始創。

夏王鑄鼎，以象九州；漢帝建寺，以崇佛教。

指南車剏自姬周，羅盤是其遺制；渾天儀肇於炎漢，曆家始有所宗。

秦始皇築萬里長城，魏文帝敘九品官秩。

蕭相國造千秋律令，叔孫通定百職朝儀。

大篆小篆，各異其名；圍棋象棋，各別其用。

詩賦遴才，李唐之盛典；文章取士，趙宋之成規。

經書印自馮道，通鑑編自溫公。雁塔載於佛經，梨園著於唐史。

恬筆倫紙，固文房寶玩；和弓垂矢，亦武庫良材。

凡古昔之前型，為今時之利用。

### 文史

名士才儲八斗，鴻儒學富五車。

三墳五典，古聖之真傳；七緯九經，先民之祕要。

尚書皆虞夏商周之政事，周易乃羲文姬孔之精微。



二戴俱刪禮記，故曰戴禮；二毛皆註詩經，故曰毛詩。  
孔聖修春秋，因獲麒麟而絕筆；太公論韜略，悉假虎豹以名篇。  
縹緗黃卷，總謂經書；雁帛魚書，通稱簡札。  
錦心繡口，李供奉之詞章；鐵畫銀鈎，王右軍之字法。  
雕蟲謙藝學之卑，倚馬誇文思之捷。  
別來三日，便當刮目相看；面壁九年，方能有此神悟。  
五鳳譽其精奇，七步稱其敏速。  
詩之工者，壓倒元白；才之高者，媲美班揚。  
晁大夫以多智而號智囊，王仁裕以能詩而稱詩窖。  
自古詩人推李杜，至今字學仰鍾王。  
陽春白雪，難和難賡；萬選青錢，屢試屢中。  
文賦之雄，可驚神而泣鬼；音詞之妙，每遏雲而繞梁。  
涉獵不精，乃好博之弊；呶唔不輟，是勤讀之功。  
以賂勾文，謂之潤筆；因書得粟，謂之舌耕。  
文不加點，機杼自成一家；字無空設，詞意俱從百鍊。  
襪線之才甚短，記問之學必膚。曳白乃應試無文，殺青亦風流罪過。  
裁詩之苦，費其推敲；曠學之弊，在乎作輟。  
文章浮薄，何殊月露風雲；典籍儲藏，皆在蘭臺石室。  
祖龍無道，焚書坑儒；唐帝右文，開科取士。  
依樣葫蘆，正謂行文之勦襲；潦草塞責，不求下語之精詳。  
異端左道，邪說橫流；肄業藏修，讀書攻苦。  
構文曰飛翰操觚，請業曰執經問難。  
求文曰乞如椽筆，譽美曰是大方家。  
共羨佳章，洛陽紙貴；喜於答問，明鏡不疲。  
藏書稱為鄴架，嗜學號為書淫。  
樂天七月，便識之無；長吉七歲，作高軒過。  
開卷有益，賢君之要語；  
不學無術，權相之為人。  
劉向校書芸閣，丙夜燃藜；孫康執卷茅簷，隆冬映雪。  
李白夢筆生花，文藻大進；揚子夢口吐鳳，詞賦愈奇。  
李守素號為人物志，虞世南呼為行秘書。  
韓公文望尊隆，泰山北斗，程子涵養潤粹，良玉精金。  
含英咀華，咳唾隨風生珠玉；包今統古，賦詩擲地作金聲。  
抄書至數十篋，無非向學之勤；徙居載三十車，皆云稽古之力。

是以慕丁顛之義訓，聚書必興；更宜守杜暹之良規，鬻書不孝。

## 藝術

醫士業擅岐黃，稱為國手；地師技精青烏，號曰堪輿。

盧醫扁鵲，古之神醫；王墨鄭虔，古之名畫。

郭景純得青囊秘術，孫思邈傳龍府仙方。

善卜乃君平詹尹之流，善相為唐舉子卿之亞。

推算謂之風角，繪畫謂之丹青。大風鑑相士之稱，大工師匠人之號。

王良造父，馭駕最精；東方淳于，滑稽無匹。

稱卜筮者，世之鬼谷，稱記怪者，鬼之董狐。

稱諏日之人曰太史，稱書算之士曰掌文。善博者喝雉呼盧。善射者穿楊貫虱。

樗蒲之戲，乃言雙陸；橘中之樂，是謂奕棋。

陳平作傀儡以解圍，孔明造牛馬以運米。

僧繇點龍睛而破壁，公輸削木鳶而高飛。

雖奇技似無益於人，而百藝期有濟於用。

## 貧富

命之修短有數，人之富貴在天。君子安貧，達人知命。

貫朽粟陳。稱羨多財之謂；紫標黃榜，封記府庫之名。

貪愛財貨，謂之錢愚；喜置田產，謂之地癖。

守錢虜譏不能散，落魄子歎其無依。

貧無立錐，富連阡陌。室如懸磬，言其空匱；家無儋石，言其赤貧。

絕糧曰在陳，多財曰錢癖。富足曰殷實，偃蹇曰數奇。

濟急如決水以活鮒魚，乞糧則登山而呼庚癸。

家徒壁立，司馬之貧；屢屨為炊，百里之厄。

鵠面菜色，窮民無告之形；易子析骸，軍士乏糧之慘。

餓死留君臣之義，千古夷齊；貲財敵王公之富，一時陶倚。

殺妓侑酒，豪橫非常；食費萬錢，奢華太過。

二月賣絲，五月糶穀，洵為剜肉醫瘡；

三年餘一，九年餘三，庶遇凶荒有備。

貧士腸習藜藿，富人口厭珍饈。

蠟代薪，飴沃釜，何其侈也；甑生塵，釜生魚，不亦廉乎。

捉襟肘見，納履踵決，貧者士之常；

數米而炊，秤薪而爨，吝則實可鄙。

總之，飽德之士，不願膏粱；聞譽既施，奚須文繡。

## 訟獄

人惟不平則鳴，世以無訟為貴。

上果哀矜，喜見桁楊雨潤；下無冤枉，欣看肺石風清。

誰謂囹圄為福堂？須知畫地可立獄。

構訟則雀角相爭，訴冤則覆盆得雪。

獄門畫狴犴之形，以其能守；聽訟在棘木之下，貴乎不冤。

鄉亭有岸，朝廷有獄，下之人誰敢作奸犯科：

死不可生，刑不可贖，上之人自當原情定罪。

夏之獄名鈞臺，商之獄名羑里。桎梏所以械繫，縲紲所以拘攣。

兩爭不釋，鷸蚌相持；累及無辜，池魚被害。

下車泣罪，夏王深痛其民；入甕承招，唐吏自作之孽。

紛爭謂之健訟，訐告謂之株連。排解謂之釋紛，裁冤謂之嫁禍。

徒配有城旦之名，流戍即充軍之謂；

三尺乃朝廷之法，三木亦罪犯之刑。

古之五刑：墨，劓，剕，宮，大辟；

清之律例：笞，杖，徒，流，死罪。

削木為吏，上古之淳風安在；縱囚歸省，唐宗之盛德可嘉。

花落庭閒，草生獄靜，何公治民之簡；

吏立冰上，人行鏡中，盧君折獄之清。

雖曰治亂之藥石，刑罰為重；要知興平之梁肉，德教為先。

## 凶喪

福壽康寧，人所同欲；死亡疾病，世不能無。

問疾曰玉體違和，自謙曰適沾賤恙。

偶為造化小兒所苦，豈是實沈臺駘為祟。

病在膏肓曰弗瘳，喜其勿藥曰無恙。

臥病為采薪之憂，腹疾為河魚之患。

瘡不病君子，病君子乃為瘡耳；卜所以決疑，既不疑又何卜哉？

謝安夢雞，悟太歲之在酉；楚王吞蛭，羨厚德之及人。

屬續易簣，言人將死；鬼錄物故，謂人已亡。

親死曰丁憂，又曰丁艱；居喪曰守制，又曰讀禮。

在牀為尸，在棺為柩；報孝為訃，慰孝為唁。

寢苫枕塊，哀父母之傾逝；節哀順變，勸孝子之惜身。

曰崩、曰薨、曰卒，尊卑各異其稱；

曰死、曰夭、曰殤，修短各因其分。

孤子哀子，居喪自痛之詞；失怙失恃，父母俱亡之謂。

父死曰考，考者成也；母死曰妣。妣者媿也。

自泣血稽顙之外，又有大祥小祥之殊；

自斬衰齊衰之下，又有大功小功之別。

三月之服為總麻，三年將滿為禫服。

王父歿則嫡孫杖期，長子亡則嫡孫承重。

死者之器曰明器，孝子之杖曰哀杖。

財物助喪謂之賻，車馬助喪謂之贈。

以衣斂身謂之祔，以玉實口謂之瑯。

送喪曰執紼，舉柩曰駕輶。卜地曰牛眠，封土曰馬鬣。

墓石原名翁仲，丹旒今號銘旌。輓歌始自田橫，墓誌創於傅奕。

生墳曰壽藏，死墓曰佳城；安葬曰瘞玉，弔奠曰束芻。

窀穸夜臺，告窆之謂；禘禘烝嘗，致祭之名。

飲栢捲而口澤如存，讀父書而手澤未泯。

高子恙悲親泣血，卜子夏哭子喪明。

王哀痛父，門人廢詩；王修哭母，里人輟社。

樹靜而風不息，皋魚增感，椎牛不若雞豚，曾子興思。

故為人子者，當知木本水源；念爾祖者，更宜慎終追遠。



## 16【幼學瓊林卷四】

### 釋道（鬼神附）

如來為佛家之祖；老君為道教之宗。

鷲嶺祇園，皆云佛國；交梨火棗總是仙丹。

沙門稱釋，始於晉之道安；中國有佛，肇於漢之明帝。

彭祖八百遐齡，旌陽一家昇舉。

波羅猶云彼岸，紫府即是仙宮。

曰上方，曰梵剎，俱為選佛之場；曰紺宇，曰珠宮，悉是遊仙之境。

伊蒲饌可以齋僧，青精飯可以延壽。

香積廚，僧家所饌；玉麟脯，仙子所餐。

履葦渡江，咒蓮生鉢，佛氏玄機；嚙酒滅火，吐飯成蜂，仙家妙用。

吳猛揮扇，畫江成路；麻姑撒米，遍地丹砂。

導引胎息，道士之修持；飛錫坐禪，僧人之行止。

僧家禮拜曰和南，道家禮拜曰稽首。

曰圓寂，曰荼毘，悲緇流之已故；曰仙遊，曰尸解，悼羽士之云亡。

女巫男覲，自古攸分；男僧女尼，從來有別。  
羽客黃冠，皆稱道士；上人德士，並美高僧。  
檀越檀那，僧家之稱施主；燒丹煉汞，道士之學神仙。  
和尚自謙，為空桑子；道士誦經，為步虛聲。  
菩者，普也；薩者，濟也；故有菩薩之號。  
水行惟龍，陸行惟象，故有龍象之稱。  
儒謂之世，釋謂之劫，道謂之塵，言俗緣之未脫；  
儒云致一，釋云三昧，道云貞一，知奧義之無窮。  
達摩隻履西歸，王令雙鳧下降。  
凝神辟穀，仙家服氣鍊形；不生不滅，釋氏明心見性。  
談經入妙，可使巖石點頭，天花飛墜；  
鍊丹既成，能令龍虎降伏，雞犬上升。  
藏世界於一粟，佛力何其大歟！貯乾坤於一壺，道法何其玄也！  
無鬼論作于阮瞻，搜查記撰于干寶。  
顏淵，子夏，死為地下修文；韓相，寇公，歿作閻浮王者。  
至若水神曰天吳，旱鬼曰旱魃。  
魑魅魍魎，山川之祟；神荼鬱壘，守禦之神。  
仕途偃蹇，路鬼不免揶揄；心地光明，吉神自為呵護。

## 身體

百體惟血肉之軀，五官有貴賤之別。  
帝堯眉分八采，大舜目有重瞳，神禹之耳三漏，成湯之臂四肘。  
周文王龍顏而虎眉，漢高祖斗胸而隆準。  
倉帝之胸四乳，孔聖之頂若圩。  
姬公反握，作相於周；重耳駢脅，興霸於晉。  
此皆古聖之英姿，洵是不凡之貴品。  
至若髮膚不敢毀傷，守身為大；待人須當巽順，唾面自乾。  
讒言誹謗，金可鑠而骨可銷；虐政誅求，敲其膚而吸其髓。  
受人牽制曰掣肘，不知羞愧曰厚顏，  
共話衷曲曰談心，擅生是非曰鼓舌。  
怒髮沖冠，藺生之英氣勃勃；炙手可熱，崔氏之貴勢炎炎。  
民肥君瘦，唐宗盛德可嘉。口蜜腹刀，李相奸邪最著。  
趙子龍一身是膽，周靈王生而有髭。  
注醋囚鼻，酷吏肆威；加足帝腹，客星犯座。  
久不屈茲膝，強鎮自爾寒心；不為米折腰，高士幡然歸隱。

纖指有如春筍，媚眼正似秋波。

肩聳玉樓，目澄銀海；淚垂玉筍，額表珠庭。

歇擔謂之息肩。不服謂之強項。

丁謂為人拂鬚，何其諂也；彭樂截腸決戰，不亦勇乎？

剜肉醫瘡，權濟目前之厄；傷胸捫足；計安衆士之心。

張子房躡足附耳，黃眉翁洗髓伐毛。

契丹避黑面大王，東坡頌鐵肝御史。

土木形骸，容無藻飾；心腸鐵石，性本堅剛。

會晤曰得挹芝眉，邀請曰敢攀玉趾。

侏儒，誚人短小；魁梧，譽人英奇；龍章鳳姿，廊廟之彥；

獐頭鼠目，草野之夫。

恐懼則畏首畏尾，感佩則刻骨銘心。

貌醜曰不颺，貌美曰冠玉，耳聾曰重聽，足跛曰蹠跚。

期期艾艾，口訥之稱；捷捷幡幡，譖言之謂。

可羨者小心翼翼，可鄙者讒口囂囂。腰細謂之柳腰，身小謂之雞肋。

笑人缺齒，狗竇胡為大開；謂人疑心，首鼠從茲債事。

胸中冰炭，言人事之參差；皮裏陽秋，謂一心之褒貶。

脣亡齒寒，相依表裏；足上首下，倒置尊卑。

所為得意，果然吐氣揚眉；待人以誠，恍若推心置腹。

忙迫則方寸已亂，沈醉則玉山將頽。睡曰黑甜，臥曰息偃。

童蒙乳臭，謂年少之無知；折臂折肱，謂醫家之老練。

西子捧心而愈媚，楊妃露乳而增妍。肉眼不識英賢，青睛自然聰慧。

脅肩無非媚態，諂笑何異奴顏。

義士丹心，期於報國；婦人長舌，實為厲階。

事之遂心曰如願，事之可愧曰腆顏，

人之多言者曰饒舌，物之堪食者曰可口。

澤及枯骨，頌其仁慈；包藏禍心，戒其奸慝。

賢君療臣之病，親翦其鬚；忠臣罵賊不屈，被斷其舌。

不較橫逆，曰置之度外；洞悉情形，曰已在目中。

口有雌黃，王夷甫善談玄理；眼分青白，阮嗣宗厚待嘉賓。

擲果盈車，因丰姿之可愛；投石滿載，為醜陋之堪憎。

事之可怪者，婦女生鬚；世所駭聞者，丈夫孕子。

燃眉之急，求人之相助；噬臍何及，悔事之無成。

肥瘠漠不相關，秦人之視越；頭皮這回斷送，楊婦之送夫。

無功食祿，謂之尸位素餐；譎劣無能，謂之行屍走肉。  
一息尚存，此志不容少懈；十手所指，吾心安可自欺。

### 宮室

洪荒之世，野處穴居，以避毒害。有巢以後，上棟下宇，以奠民生。  
竹苞松茂，洵制度之得宜；鳥革翬飛，亦創建之盡善。

前殿謂之紫宸，禁門謂之青瑣；宰相職居黃閣，百官奏對丹墀；  
木天署，學士所居；紫薇閣，中書所蒞。

金馬玉堂，翰林清貴；柏臺烏府，御史威嚴。

布政稱為藩府，按察係是臬司。

安仁之令河陽，人稱花縣；子賤之治單父，世號琴堂。

朱門潭府，仕宦之家；白屋衡門，隱逸之宅。

喜氣遙臨，門闌藹瑞；高車過訪，蓬華生輝。

書言肯構肯堂，禮稱美輪美奐。土木方興曰經始，剏造已畢曰落成。

樓高可以摘星，室小僅堪容膝。

寇公庭外，只可栽花；李相廳前，僅容旋馬。

稱人曰燕賀，自謙曰蝸居。民間曰閭閻，貴家曰閥閱。

朝廷曰魏闕，書館曰芸窗。館驛曰郵亭，客邸曰逆旅。

成均辟雍，皆國學之號；黌宮庠序，乃鄉學之名。

規制崇隆，四香分閣；文章妙麗，五鳳名樓。

善忘者比之徙宅忘妻；不謹者比之開門揖盜。

何樓多市偽之物，壟斷即專利之人。

華門圭竇，貧士之居；甕牖繩樞，窶人之室。

必若寇萊公，真是北門鎖鑰；倘非檀道濟，誰為萬里長城。

### 器用

凡一人之所需，必百工斯為備；雖則各適其用，而亦每異其名。

管城子，中書君，筆號不一；石虛中，即墨侯，硯名亦殊。

墨為松使者，紙號楮先生；銀光玉版，俱是紙名；

九子隄廩，皆為墨號；

金管，銀管，斑管，筆牀自分三品；

活眼，淚眼，死眼，硯石可值千金。

朋友相資，謂之筆硯同事，師生相繼，謂之衣鉢真傳。

篤志業儒，磨穿鐵硯，棄文就武，安用毛錐。

劍有干將莫邪之名，扇有仁風便面之號。

小舟名曰舴艋，巨艦號曰艨艟。金根是皇后之車，菱花是婦人之鏡。

鑿落原為酒器，參差乃是簫名。

刻舟求劍，固而不通；膠柱鼓瑟，物而不化。

斗筲言其器小，棟梁謂是大材。鉛刀無一割之利，強弓有六石之名。

杖以鳩形，因其不噎；鑰同魚目，取其常醒。

兜鍪係是頭盔，叵羅乃為飲具，短劍稱為匕首，氍毹即是氍毹。

鼠鬚草，風字硯，供王右軍之書。鷓鴣杓，鸚鵡杯，飲李太白之酒。

琴名綠綺焦桐，弓號烏號繁弱。香爐謂之寶鴨，蠟臺謂之燭奴。

龍涎雞舌，香之美名；鷓首鴨頭；船之別號。

壽光是妝臺無塵之鏡，長明是梵堂不滅之燈。

桔槔即田家水車，襜褕乃農夫雨具。

夜可擊，晝可炊，軍中刁斗；雲漢熱，北風寒，室裏畫圖。

勉人發憤，猛着祖鞭；求人恕罪，幸開湯網。

拔幟立幟，淮陰之計甚奇；得弓失弓，楚王所見未大。

董安于佩弦以自勉，西門豹佩韋以自寬。

孟敏墮甑不顧，楚妃守符而亡。溫嶠然犀，照見水族；

秦皇懸鏡，洞矚邪心。

車載斗量，庸流不可勝數；南金東箭，奇材實是堪誇。

傳檄而定，極言敵之可敗；迎刃而解，甚言事之易成。

是故以銅為鑑，僅可以整衣冠；必也以古為鑑，斯可以知興廢。

## 衣飾

冠為元服，衣是身章。曰冕曰弁，皆冠之號；曰舄曰屨，俱履之名。

士人初冠有三加，上公命服有九錫。

簪纓黼黻，仕宮之榮；逢掖章甫，貧儒之飾。

布衣即白丁之謂，青衿乃士子之稱。

葛屨履霜，諂儉嗇之過甚；綠衣黃裏，譏貴賤之失倫。

上服曰衣，下服曰裳。衣前曰襟，衣後曰裾。

華服曰綺紈，敝衣曰藍縷，兒衣曰襁褓，童飾曰弁髦。

不序尊卑，如以冠苴履；不歸鄉里，如衣繡夜行。

狐裘三十年，儉推晏子；錦帳五十里，富羨石崇。

春申君珠履三千，牛丞相金釵十二。

千金之裘，非一狐之腋；羅綺之輩，豈養蠶之人。

貴者重裊疊褥。貧者短褐不完。

公孫布被十年，子夏鶉衣百結。

京洛化緇衣，騷人琢句；山門留玉帶，學士參禪。



鷓鴣裘白鶴氅，名士風流，忍辱鎧，無垢衣，空門寂寞。  
三河領袖，誇裴駿之超羣；南州冠冕，譽龐統之邁衆。  
聖主制衣裳，以命有德；賢君藏敝袴，以待有功。  
晉侯衣不重裘，唐宗服經三浣。  
衣履不敝，不肯更為，世稱其儉；衣不經新，何由得故，人服其廉。  
姜氏可風，兄弟每宵同大被；王章未遇，夫妻相對泣牛衣。  
羊叔子緩帶輕裘，江東儒將；陶淵明葛巾野服，陸地神仙。  
故曰服之不衷，身之災也；亦云敝而無憾，志獨超歟。

## 飲食

甘臙腥膿，無非腐腸之藥物；羹藜含糗，難語太牢之滋味。  
盛饌曰珍羞，御膳曰玉食。  
美酒曰青州從事，惡酒曰平原督郵。  
雲液香醪，皆為酒號；龍團雀舌，俱是茶名。  
待客禮衰，曰醴酒不設；款賓意薄，曰脫粟相留；  
竹葉青，真珠紅，總為旨酒；鴨頭綠，鵝兒黃，悉是醇醪。  
日給三升，東臯子之愛酒；風生七椀，玉川子之嗜茶。  
茶曰先春，又曰瑞草；米曰白粲，又曰長腰。  
待客驚雷莢，供佛紫茸香，緇流清況；  
呼為釣詩鉤，亦號掃愁帚，騷客閒情。  
太羹元酒。亦可薦馨香；塵飯塗羹，奚能充飢餓。  
酒係杜康所造，腐乃淮南所為。魚號為水梭花，雞呼為穿籬菜。  
羔酒呼烏，田家自勞；含哺鼓腹，盛世民風。  
貪食之人曰徒舖啜；不敬之食曰嗟來食。  
多食不厭，是為饕餮之徒；見食垂涎，似有欲炙之色。  
謂人賜食曰飽德，謂人醒酒曰解醒。  
半菽不飽，言飲食之艱；每飯不忘，言思念之切。  
謝人曰擾兵廚，自謙曰設魯酒。  
白飯青芻，接待僕馬之厚；炊金爨玉，款留賓客之豐。  
貧家娛客，何妨抹月披風；冬月邀賓，亦可敲冰煮茗。  
宰肉甚均，陳平見重；輟羹示盡，邱嫂心憎。  
晉人為吏部而盜酒，逸興太豪；良將愛士卒投醪，戰氣自倍。  
懲羹吹虀，謂人鑒前警後；酒囊飯袋，謂人少學多餐。  
隱逸之士，漱石而枕流；沈湎之夫，藉糟而枕麴。  
昏庸如桀紂，胡為乎酒池肉林；苦學若希文，正不妨斷虀畫粥。

## 珍寶

山澤之精英，每洩為至寶；乾坤之瑞氣，恆結為奇珍。

故玉足以庇嘉穀，珠足以禦火災。

魚目豈可混珠，砒砒奚能亂玉。黃金生於麗水，白銀出自朱提。

曰孔方，曰家兄，俱為錢號。曰青蚨，曰鵝眼，亦是錢名。

可貴者，明月夜光之珠；可珍者，璠瑜琬琰之玉。

宋人以燕石為玉，什襲而藏；楚王以璞玉為石，兩刖其足。

魏侯之珠，光照十二乘；和氏之璧，價重十五城。

鮫人泣淚成珠，宋人削玉為楮。賢乃國家之寶，儒為席上之珍。

賢主聘士，束帛加璧；真儒抱道，懷瑾握瑜。

雍伯種玉，而得美婦；太公釣璜，而遇明君。

剖腹藏珠，因貪財而殞命；纏頭用錦，乃助舞以添嬌。

孟嘗廉潔，合蒲還珠；相如勇忠，秦庭完璧。

釵作燕飛，漢宮之異事；錢成蝶舞，唐庫之奇聞。

多錢固有神通，營財乃為鬼笑。

以此致彼，謂之拋磚引玉；以賤失貴，謂之買櫝還珠。

賢否莫辨，謂之玉石俱焚；貪吝無厭，謂之錙銖必算。

崔烈買官，人特嫌其銅臭；蘇秦拜相，嫂亦畏其金多。

天雨錢以助熊衰之葬；天雨金，以濟仲儒之貧。

楊公以養廉而卻金，唐帝以懲貪而賜絹。

雖曰匹夫不可懷璧，然而人生誰不需財。

牀頭金盡，遂致壯士無顏；囊內錢空，未免阮囊羞澀。

## 花木（蔬菜穀實類附）

植物非一，有萬卉之稱；穀種甚多，有百穀之號。

如茨如梁，謂禾稼之蕃；惟夭惟喬，謂草木之茂。

蓮花比之君子，海棠號曰神仙。

國色天香，詠牡丹之富貴；冰肌玉骨，賦梅萼之清奇。

蘭為王者之香，菊有隱逸之趣，竹稱君子，松號大夫。

萱艸可以宜男，屈軼自能指佞；

篔簹乃竹之類，木犀亦桂之名，明日黃花，過時之物；

歲寒松柏，勁節之稱。

樗櫟無用之材，榘楠勝任之木。玉版，筍之異號；蹲鴟，芋之別名。

瓜田李下，事避嫌疑；秋菊春桃，時來遲蚤。

南枝先，北枝後，庾嶺梅舒；朔而生，望而落，堯階蓂茁。

苾芻背陰向陽，比僧人之有德；木槿朝開暮落，喻榮華之不長。  
芒刺在背，言人恐懼不安；薰蕕異器，謂人賢否有別。  
桃李雖無言，而下自成蹊；苦李生道旁，則為人所棄。  
老夫娶婦，枯楊生稊；國家進賢，拔茅連茹。  
蒲柳未秋而先槁，薑桂愈老而益辛。  
王者之師，勢如竹破；七雄之國，地若瓜分。  
苻堅疑，草木皆為敵兵，索靖歎，銅駝會在荊棘。  
王家手植三槐，竇氏人稱五桂。  
鉏麇觸槐，不忍賊民之主；越王嘗蓼，必欲報吳之讎。  
歐陽母畫荻教子，誰不稱賢；廉將軍負荊請罪，善能悔過。  
彌子以餘桃啖君，商君欲徙木立信。  
賣李鑽核，王戎之鄙吝；翦桐封弟，天子無戲言。  
齊以二桃殺三士，唐謂蓮花似六郎。啖蔗漸入佳境，蒸梨便失本真。  
煮豆燃萁，比兄之戕弟；砍竹遮筍，棄舊而憐新。  
元素致江南之柑，吳剛伐月中之桂。  
濟友法堯夫之助麥，敬君效野人之獻芹。  
冒雨翦韭，款友之情甚殷；踏雪尋梅，自娛之興最雅。  
商王能修君德，不畏祥桑；萊公有惠民生，再生枯竹。  
蟠桃之開花結子，每三千年；大椿之為春為秋，亦八千歲。  
去稂莠，正所以植嘉禾；沃枝葉，則不如培根本。  
故世路之榛蕪當避，而人心之茅塞須開。

### 鳥獸（蟲魚類附）

龍為鱗蟲之長，虎乃諸獸之王。  
麟鳳龜龍，謂之四靈；犬豕與雞，謂之三物。  
驊騮騶駼，皆馬之號；太牢大武，乃牛之稱；  
羊曰柔毛，又曰長髯主簿；豕云剛鬣，又云烏喙將軍。  
鵝名舒雁，鴨號家鳧；雞有五德，鳳備九苞；  
家豹烏圓，貓之美譽；韓獹楚獳，犬之別名。  
麒麟騶虞，俱為好仁之獸；螟螣蝻賊，皆是害稻之蟲；  
無腸公子，螃蟹之名；綠衣使者，鸚鵡之號。  
狐假虎威，謂借勢而為惡。養虎貽患，謂留禍以累身；  
猶豫，喻人之多疑；狼狽，比人之相倚。  
勝負未分，不知鹿死誰手；基業易主，正如燕入他家。  
雁到南方，先至為主，後至為賓；雉名陳寶，得雄則王，得雌則霸。

刻鵠類鶩，為學而未成；畫虎類犬，弄巧而反拙。  
美惡不稱，謂之狗尾續貂，貪謀不足，謂之巴蛇吞象。  
前門拒虎，後門進狼，言禍之繼至；  
不入虎穴，焉得虎子，言事之必成。  
趨利，如羣蟻之附羶；愛子，如老牛之舐犢。  
無中生有，何異蛇之添足；進退兩難，有似羝之觸藩。  
杯中蛇影，自起猜疑；失馬塞翁，難分禍福。  
龍駒誇陸士龍之異，鳳雛稱龐士元之奇。  
王猛捫蝨而談世務，寧戚飯牛而取上卿。  
楚王式蛙怒，以其敢死；丙吉問牛喘，恐其失時。  
以數人而制於虎，比事之難；走韓盧而搏蹇兔，喻事之易。  
有勢莫能為，雖鞭之長，不及馬腹；  
制小安用大，割雞之事，焉用牛刀。  
食母之鳥曰梟，食父之獸曰獍。  
鵲鳩以喻弟昆，鳳凰以比夫婦。腰纏騎鶴，謂富貴而登仙；  
瞎馬臨池，謂逼人之險語。  
黔驢之技止此，鼯鼠之技易窮。強兼併者曰鯨吞，為小賊者曰狗盜。  
隋珠彈雀，譬得少而失多；投鼠忌器，恐為甲而傷乙。  
事多曰蝟務，利微曰蠅頭。心惑曰狐疑，色喜曰雀躍。  
愛屋及烏，謂因此而惜彼；輕雞愛鶩，謂舍此而圖他。  
唆惡而使為非，教猱升木；受恩而不知報，得魚忘筌。  
倚勢害人，真似城狐社鼠，空存無用，何殊陶犬瓦雞。  
勢不能敵，猶螳臂之當車；人而速死，若蜉蝣之在世。  
以小而欲制大，越雞奚能伏鵠卵；以賤而反輕貴，鸞鳩何必笑大鵬。  
跖犬吠堯，固曰吠非其主；鵲巢鳩占，居然安享其成。  
緣木求魚，極言其難得；按圖索驥，又恐其失真。  
惡人藉勢，如虎之負嵎；窮人無歸，如魚之失水。  
九尾狐譏其太奸，獨眼龍誇其有勇。  
指鹿為馬，趙丞相之欺君；叱石成羊，黃初平之得道。  
卞莊勇能擒兩虎，高駢射可貫雙鷗。  
鷓鴣巢林，不過一枝；鼯鼠飲河，不過滿腹。  
人之所棄，有如狐雛腐鼠；人之所仰，比於起鳳騰蛟。  
魚游釜中，偷生不久；燕巢幕上，棲止不安。  
妄自稱奇，譬如遼東之豕；所見甚小，譬之井底之蛙。

出人頭地，鶴立雞羣；非偶相從，雉求牡匹。  
天上石麟，誇小兒之邁衆；人中騏驥，比名士之超凡。  
怡堂燕雀，不知後災；甕裏醢雞，安能廣見。  
馬牛而襟裾，謂人之無禮義；沐猴而冠帶，謂人之不恢宏。  
羊質虎皮，言其有名無實；守株待兔，言其抱拙無能。  
鮒魚待西江水，比人之甚窘；蛟龍非池中物，比人之有為。  
執牛耳，尊人主盟；附驥尾，望人汲引。  
鴻雁哀鳴，悲下民之失所；狡兔三窟，譏貪夫之巧營。  
風馬牛勢不相干，常山蛇首尾相應。  
百足蟲死而不僵，千歲龜死而留骨。  
大丈夫寧為雞口，毋為牛後，士君子豈甘雌伏，定要雄飛。  
毋佞促如轅下駒，毋委靡如牛馬走。  
人有禮義，庶免相鼠之刺；徒能言語，何異禽獸之心。

〰〰〰〰〰〰

## 【E三教經典】

### 01【孝經】

#### 開宗明義章 第一

仲尼居，曾子侍。子曰：「先王有至德要道，以順天下，民用和睦，上下無怨，汝知之乎？」曾子避席曰：「參不敏，何足以知之？」子曰：「夫孝，德之本也，教之所由生也。復坐，吾語汝。「身體髮膚，受之父母，不敢毀傷，孝之始也；立身行道，揚名於後世，以顯父母，孝之終也。

「夫孝，始於事親，中於事君，終於立身。《大雅》云：『無念爾祖？聿脩厥德！』」

#### 天子章 第二

子曰：「愛親者，不敢惡於人；敬親者，不敢慢於人。愛敬盡於事親，而德教加於百姓，刑於四海，蓋天子之孝也。《甫刑》云：『一人有慶，兆民賴之。』」

#### 諸侯章 第三

「在上不驕，高而不危；制節謹度，滿而不溢。高而不危，所以長守貴也；滿而不溢，所以長守富也。富貴不離其身，然後能保其社稷，而和其民人。蓋諸侯之孝也。《詩》云：『戰戰兢兢，如臨深淵，如履薄冰。』」

#### 卿大夫章 第四

「非先王之法服，不敢服；非先王之法言，不敢道；非先王之德行，不敢行。是故，非法不言，非道不行；口無擇言，身無擇行；言滿天下無口過，

行滿天下無怨惡。三者備矣，然後能守其宗廟，蓋卿大夫之孝也。《詩》云：『夙夜匪懈，以事一人。』」

### 士章 第五

「資於事父以事母，而愛同；資於事父以事君，而敬同。故母取其愛，而君取其敬，兼之者父也。故以孝事君，則忠；以敬事長，則順。忠順不失，以事其上，然後能保其祿位，而守其祭祀。蓋士之孝也。《詩》云：『夙興夜寐，無忝爾所生。』」

### 庶人章 第六

「用天之道，分地之利，謹身節用，以養父母，此庶人之孝也。故自天子至於庶人，孝無終始，而患不及者，未之有也。」

### 三才章 第七

曾子曰：「甚哉！孝之大也。」子曰：「夫孝，天之經也，地之義也，民之行也。天地之經，而民是則之。則天之明，因地之利，以順天下。是以其教不肅而成，其政不嚴而治。先王見教之可以化民也，是故先之以博愛，而民莫遺其親，陳之於德義，而民興行；先之以敬讓，而民不爭；導之以禮樂，而民和睦；示之以好惡，而民知禁。《詩》云：『赫赫師尹，民具爾瞻。』」

### 孝治章 第八

子曰：「昔者明王之以孝治天下也，不敢遺小國之臣，而況於公、侯、伯、子、男乎？故得萬國之歡心，以事其先王。治國者不敢侮於鰥寡，而況於士民乎？故得百姓之歡心，以事其先君。治家者不敢失於臣妾，而況於妻子乎？故得人之歡心，以事其親。夫然，故生則親安之，祭則鬼享之。是以天下和平，災害不生，禍亂不作。故明王之以孝治天下也如此。《詩》云：『有覺德行，四國順之。』」

### 聖治章 第九

曾子曰：「敢問聖人之德，無以加於孝乎？」子曰：「天地之性，人為貴；人之行，莫大於孝，孝莫大於嚴父，嚴父莫大於配天，則周公其人也。昔者，周公郊祀后稷以配天，宗祀文王於明堂以配上帝；是以四海之內，各以其職來祭。夫聖人之德，又何以加於孝乎？故親生之膝下，以養父母日嚴。聖人因嚴以教敬，因親以教愛。聖人之教，不肅而成，其政不嚴而治，其所因者，本也。父子之道，天性也，君臣之義也。父母生之，續莫大焉；君親臨之，厚莫重焉。故不愛其親而愛他人者，謂之悖德；不敬其親而敬他人者，謂之悖禮。以順則逆，民無則焉。不在於善，而皆在於凶德，雖得之，君子不貴也。君子則不然，言思可道，行思可樂，德義可尊，作事可法，容

止可觀，進退可度，以臨其民。是以其民畏而愛之，則而象之；故能成其德教，而行其政令。《詩》云：『淑人君子，其儀不忒。』」

### 紀孝行章 第十

子曰：「孝子之事親也，居則致其敬，養則致其樂，病則致其憂，喪則致其哀，祭則致其嚴。五者備矣，然後能事親。事親者，居上不驕，為下不亂，在醜不爭。居上而驕則亡，為下而亂則刑，在醜而爭則兵。三者不除，雖日用三牲之養，猶為不孝也。」

### 五刑章 第十一

子曰：「五刑之屬三千，而罪莫大於不孝。要君者無上，非聖人者無法，非孝者無親。此大亂之道也。」

### 廣要道章 第十二

子曰：「教民親愛，莫善於孝；教民禮順，莫善於弟；移風易俗，莫善於樂；安上治民，莫善於禮。禮者，敬而已矣。故敬其父則子悅；敬其兄則弟悅；敬其君則臣悅；敬一人而千萬人悅。所敬者寡，而悅者眾，此之謂要道也。」

### 廣至德章 第十三

子曰：「君子之教以孝也，非家至而日見之也。教以孝，所以敬天下之為人父者也；教以悌，所以敬天下之為人兄者也；教以臣，所以敬天下之為人君者也。《詩》云：『愷弟君子，民之父母。』非至德，其孰能順民如此其大者乎？」

### 廣揚名章 第十四

子曰：「君子之事親孝，故忠可移於君；事兄弟，故順可移於長；居家理，故治可移於官。是以行成於內，而名立於後世矣！」

### 諫諍章 第十五

曾子曰：「若夫慈愛、恭敬、安親、揚名，則聞命矣。敢問子從父之令，可謂孝乎？」子曰：「是何言與！是何言與！昔者天子有爭臣七人，雖無道，不失其天下；諸侯有爭臣五人，雖無道，不失其國；大夫有爭臣三人，雖無道，不失其家；士有爭友，則身不離於令名；父有爭子，則身不陷於不義。故當不義，則子不可以不爭於父，臣不可以不爭於君；故當不義則爭之。從父之令，又焉得為孝乎！」

### 感應章 第十六

子曰：「昔者明王事父孝，故事天明；事母孝，故事地察；長幼順，故上下治。天地明察，神明彰矣。故雖天子，必有尊也，言有父也；必有先也，言有兄也；宗廟致敬，不忘親也；修身慎行，恐辱先也。宗廟致敬，鬼神著

矣。孝弟之至，通於神明，光於四海，無所不通。《詩》云：『自西自東，自南自北，無思不服。』」

### 事君章 第十七

子曰：「君子之事上也，進思盡忠，退思補過，將順其美，匡救其惡，故上下能相親也。《詩》云：『心乎愛矣，遐不謂矣，中心藏之，何日忘之！』」

### 喪親章 第十八

子曰：「孝子之喪親也，哭不偯，禮無容，言不文，服美不安，聞樂不樂，食旨不甘，此哀戚之情也。三日而食，教民無以死傷生，毀不滅性，此聖人之政也。喪不過三年，示民有終也。為之棺、槨、衣、衾而舉之，陳其簠簋而哀戚之；擗踊哭泣，哀以送之；卜其宅兆，而安措之；為之宗廟，以鬼享之；春秋祭祀，以時思之。生事愛敬，死事哀戚，生民之本盡矣，死生之義備矣，孝子之事親終矣。」



## 02【心經】

觀自在菩薩，行深般若波羅蜜多時，照見五蘊皆空，度一切苦厄。舍利子，色不異空，空不異色；色即是空，空即是色。受、想、行、識，亦復如是。舍利子，是諸法空相，不生不滅，不垢不淨，不增不減，是故空中無色，無受、想、行、識；無眼、耳、鼻、舌、身、意；無色、聲、香、味、觸、法；無眼界，乃至無意識界；無無明，亦無無明盡；乃至無老死，亦無老死盡。無苦、集、滅、道，無智亦無得。以無所得故，菩提薩埵，依般若波羅蜜多故，心無罣礙，無罣礙故，無有恐怖，遠離顛倒夢想，究竟涅槃。三世諸佛，依般若波羅蜜多故，得阿耨多羅三藐三菩提。故知般若波羅蜜多，是大神咒，是大明咒，是無上咒，是無等等咒，能除一切苦，真實不虛。故說般若波羅蜜多咒，即說咒曰：「揭諦、揭諦，波羅揭諦，波羅僧揭諦，菩提薩婆訶。」

## 【清靜經】

老君曰。大道無形。生育天地。大道無情。運行日月。大道無名。長養萬物。吾不知其名。強名曰道。夫道者。有清有濁。有動有靜。天清地濁。天動地靜。男清女濁。男動女靜。降本流末。而生萬物。清者濁之源。動者靜之基。人能常清靜。天地悉皆歸。夫人神好清。而心擾之。人心好靜。而慾牽之。常能遣其慾而心自靜。澄其心。而神自清。自然六慾不生。三毒消滅。所以不能者。為心未澄慾未遣也。能遣之者。內觀其心。心無其心。外觀其形。形無其形。遠觀其物。物無其物。三者既無。唯見於空。觀空亦



空。空無所空。所空既無。無無亦無。無無既無。湛然常寂。寂無所寂。慾豈能生。慾既不生。即是真靜。真常應物。真常得性。常應常靜。常清靜矣。如此清靜。漸入真道。既入真道。名為得道。雖名得道。實無所得。為化眾生。名為得道。能悟之者。可傳聖道。

老君曰。上士無爭。下士好爭。上德不德。下德執德。執著之者。不明道德。眾生所以不得真道者。為有妄心。既有妄心。即驚其神。既驚其神。即著萬物。既著萬物。即生貪求。既生貪求。即是煩惱。煩惱妄想。憂苦身心。便遭濁辱。流浪生死。常沉苦海。永失真道。真常之道。悟者自得。得悟道者。常清靜矣。



### 03【濟公活佛救世真經】

南無大慈大悲救苦救難濟公活佛 三稱

濟世群生照三千 公正無私可達天

活用真經傳萬世 佛法無邊化大千

真經應運出	災消劫除大道尊	修身化世立功勳
八八聖賢紀	佛聖仙真發慈悲	德澤群生得光輝
東來紫氣展	普渡三曹開妙玄	應身下凡師天然
中土有緣份	繼往開來萬八春	白陽逢運道線存
青紅運已隱	陽光普照道德揚	萬邦咸仰運大同
家家佛光照	靈山如來靜觀招	吾師指點路一條
千經萬典有	未聞真經說因由	有緣明師會相求
開泰白陽運	佛今說破朦朧雲	善至於止離苦淪
二六時守一	五氣朝元一紀飛	蓮花座上會丹墀
尊者本羅漢	丈六金身照世間	濟人醒世皈依安
心明善男女	經文悟透莫遲疑	受師點化脫苦之
學致中庸並	心誠把經奉佛名	一切災殃化作塵
道大惟天大	至尊至貴點靈台	應運開泰萬象裁
善智慧朗朗	立身行道內外功	理正事明天下通
古今誰無錯	過勿憚改入善科	科程過後苦海逃
士農及工賈	志心常念福德高	閻家平安萬事和
經文雖淺近	不可視為頂上雲	奉行真經脫苦輪
心誠虔拜誦	消災解厄離苦障	逢凶化吉定禎祥
朝夕誠心唸	心明神清身不顛	萬病解却孽不纏
唸經心頭正	驅邪除穢事安寧	福祿乾元亨利貞

誦此活佛經 福慧雙增長 誦此活佛經 子孫得安康  
誦唸活佛經 功名利祿得平步 誦得真經文 永世化為吉  
若為父母誦 父母得長壽 若為亡化唸 亡靈得超生  
若為親友求病殃 病殃得安痊 全家老幼同聲唸 老幼保安康  
誦唸濟公真經 免災又消難 誦得濟公真經 覺悟第一先  
真經廣佈十方界 諸尊菩薩同讚曰  
濟公活佛大慈悲 為救九六眾原靈 了却人生死生路  
濟公活佛曰 家中有本真經 可保平安 不誦此經 奉上神桌  
確保爾却除邪魔永消滅 真誠誦此經 佈經說經典  
功德無量福無邊 老幼康安壽延年  
弟子 稽首頓首



## 04【桃園明聖經】

### 經序第一

漢，漢壽亭侯，略節桃園經，書於玉泉寺，夜夢與凡人。萬經千典有，帝經未舉行。著爾傳塵世，不可視為輕。太上老君三界靈，眾聖五嶽雷電神。五湖並四海，日月斗星辰，天下城隍聽號令，萬方土地各遵行。萬聖朝真均奏議，普天之下盡頒行。於是救苦大仙、太上真君、太白金星，公同註解，覆奏明章，行於四海。皇圖鞏固，萬民永賴。

### 原始第二

帝乃紫微宮裡朱衣神，協管文昌武曲星。祇因張仙無主轄，敕令隨帝為從神。檢點少男與少女，或損陰騭絕子孫。送生催生及難產，魅妖傷殘斑痘疹。如有焚香諷誦者，轉禍為祥顯聖靈。今有塑畫帝像者，側立張仙持彈弓。鑒知戰國侵陵亂，命帝臨凡救萬民。玉皇賜帝名和姓，子胥五轉做忠臣。臨潼解釋諸侯難，絕卻奸秦併國心。楚無道，酒荒淫，昭關過此難，吳越動刀兵。道帝一生為孝子，數世做忠臣。敕令帝管錢塘事，晝夜領潮行。漢室多奸黨，改姓下凡塵。春秋丈夫志，生長解梁城。指關為帝姓，下界又稱臣。幼而離鄉，壯而出仕。大丈夫以四海為家，何患乎帝無兄弟？入桃園，睹兩人奇異，請問英雄何處？雄赳赳朗曰桓侯，貌堂堂溫言劉主。出身投地今逢主，須待挽天河水來蕩滌。誠哉龍虎風雲會，宰牛馬，昭告天地，結義匡扶漢室。破黃巾，誅董卓，呂布斃。劫寨剿曹奸，賺入空營內。雁侶散徐州，攜后無存地。滅燭張遼謀，破壁聖帝義。降漢不降曹，忠臣不事二。封漢壽亭侯，印無漢重鑄。三日華筵，曹瞞美意。顏良文醜統兵圍，敢

對立功，可酬曹歸計。封金卻印三辭操，挈眷尋兄一點忠。千里尋兄添義氣，五關斬將有威風。離合英雄乾坤內，相逢兄弟古城中。智尚雖高無決勝，運籌固識少經綸。三謁茅廬，臥龍晏起，大夢誰先覺，平生相自知；草堂春睡足，窗外日遲遲。未出茅廬，三分已定。武侯原是廣慧星，即是前朝嚴子陵。此生諸葛相，再宋朱文公。輪迴三世相，永不下凡塵。鼎足三分嫌地窄，江山今換許多人。先主已在清虛府，聖帝今掌三天門。桓侯四川為土穀，每起忠良護國心；在宋易姓武穆將，在唐改諱曰張公；輪迴三轉皆忠烈，上帝封為護國神。小可兵戈不差聖，大難危邦再下塵。天下城隍皆將相，正直為神古至今；為人忠孝感天地，豈在持齋佛顯靈。飲食衣服休華美，隨著隨餐莫厭憎。禽獸一切皆性命，無故自食宰生靈；一切化生皆活命，何苦張弓捕網尋。草木花果休折採，嚴冬零落發陽春；萬物悉含天地化，依時生長與人靈。爾能遵守惜萬物，福有攸歸禍不侵。勿謂善小而不做，勿謂惡小而可行；天網恢恢分曲直，神靈赫赫定虧盈。孝悌忠信人之本，禮義廉恥人之根；爾能聽帝行善事，定有祥雲足下騰。帝受三天門掌握，萬神啟奏帝先聞。善者紀錄加官爵，惡者遭殃絕子孫。報應遲速時未到，昭彰早晚禍福臨。休道天高無耳目，虧心暗室有遊神。敬神如在須誠敬，不可狂言褻聖明。

### 力學第三

帝素覽春秋，幼觀孔孟，唯以孝弟為先，修身治國為本。異端蜂起，兵戈傷殘民命；十餘年甲不離身，刀無潔淨。夜無穩睡三更，日不飽餐一頓；東戰西征，百戰而江山纔定；白了鬚鬢星星，力倦馬羸刀鈍；費盡赤膽忠心，換得箇封侯金印。到如今，亂臣賊子，捕風捉影，奸貪讒佞；結黨欺良，言無一定；不思禮義廉恥，孝弟忠信。事每胡行，屢圖僥倖。篡君位，戮忠臣，好貨財，淫美色，殺人縱性。只顧爽心樂事，豈曉得後來報應？古今好事多磨，毋勉強苟求捷徑。如彩雲琉璃，鮮花明月；人不知機，如鋼刀快缺；妄動橫行，造下了些冤孽；遠則幾年，近則數月，報應無差，法難漏洩。如人未遭逢，各有時節，當思守命由天，安貧樂業；如百藝倉卒成功，其物焉能精潔；草木不能培植，難長許多枝葉；五穀少用耕鋤，苗雖秀而不實。文臣十載寒窗，方朝金闕；武將百戰臨危，始得公侯並列。帝乃日月精忠，乾坤大節；天崩帝崩，地裂帝裂。

### 道貌第四

又奉上帝加御敕，掌握凡間善惡人。萬國九州皆敬服，道帝忠義獨稱尊。塑形畫像乾坤內，如帝英雄有幾人？火龍燒赤兔，水獸鍊青鋒；臥蠶眉八字，丹鳳目雙睛；五龍鬚擺尾，一虎額搖身。精忠沖日月，義氣貫乾坤。韜

略期孫臏，機謀勝范增；鬚長義更長，面赤心尤赤。英雄氣蓋世，燭殘刀破壁；封庫印懸樑；爵祿辭不受。偃月刀，磨仍快，嘆兄弟不再；臥蠶眉，鎖未開，恨江山幾改。互古功名難比並，三天門下封元帥。稽首頓首，上帝敕令各部將帥。經傳下界，抄錄諷誦如在；人能遵行，繫玉腰金，官居千載；能全一事，崢嶸三代。欽承法旨，會集諸神施行。

### 節訓第五

著忠良，竭力匡衡，孝順無改；廉潔不亂心田，節義臨危不敗。忠孝廉節之章聽解。君使臣以禮，臣事君以忠。日用朝廷祿，當思補報功；報國臣之本，惜卒將之宏；不飾文臣過，不減武將功；紀錄文華殿，舉劾建章宮；丹心如赤日，位必至三公。秦檜世為犬，武穆四帥中。為人子，孝為先，孝順兩字緊相聯。勿使惱怒常使歡；暖衣飽食毋飢寒。病醫藥，必自煎，即須嚐過獻親前；夜不解衣朝不食，時時刻刻在身邊。爾能孝順爾子孝，點點滴滴看簷前。大舜孝，帝位傳，二十四孝極周全。在生不供奉，死後祭靈前；不孝子，惹災愆，虎哈蛇咬病相纏；官刑牢獄遭充配，水火之災實可憐；或是懸樑刀毒死，不孝之人苦萬千。速速改，莫遲延；世人孰無過，改之為聖賢。人無過，篤行全。廉生畏，潔生嚴；細檢點，避疑嫌。希賢希聖由天命，學禮學詩聽自然。卻周粟，隱山川，為人似玉無瑕玷，立志如同鐵石堅。守己祿，莫徇偏，損人利己子孫冤。廉者不受嗟來食，志士不飲盜之泉。辭俸原憲潔，畏金楊震廉；坐懷不亂柳下惠，閉戶無容魯仲連。鵠食怎如螯李美，瓜祭何勝菜羹甜？俸祿止堪供禮儀，舉家食費僅盤桓；百簣抬回失節物，滿箱裝裹昧心錢；笞杖徒流誰不怕，勸爾抬頭看上天。縱容男僕如狼虎，謀占軍民地與田；勢敗運衰參訐告，拔塚平房冤報冤；婦男窮極為娼盜，恨殺當初惡要錢。人之節，如竹又如月，廣大與高明，圓容更清潔。一生直不彎，挺挺欺霜雪；一勁參天秀，舞風弄明月，娥英泣竹林，點點斑皆血；即如蘇武杖，數有十二節；李陵污其奸，蘇武敬其烈；仲升使西域，三十六國卻。節義全，神聖悅，或掌天曹事，或補城隍缺；或生公與侯，富貴千年業。亂臣並賊子，每把忠良滅。一見虛歡喜，心口各相別；心藏丈八矛，意存三尺鐵；舌下有龍泉，殺人不見血；貪酷剋奸讒，自殞兒孫絕。帝未喫長齋，帝不信異說；地獄即城隍，三寶光日月；救濟急難人，就是解冤結。此四節，忠孝廉節，詳明甚切。後列二十四劫：

擎天頂地猛勇神，捧日舉月普照神，列宿張星明朗神，移星換斗剝量神  
騰雲駕霧飛度神，驅雷掣電威烈神，呼風喚雨擾攘神，綴露殞霜溥沸星  
飛沙走石截路神，翻江搗海五湖神，崩山頽嶺鐵甲神，凍水開冰結化星  
焚炎逐火流光星，開花結果嬌媚星，長禾秀穀益惠星，抽芽綻葉發育星

枯木涸澤摧竭神，走獸飛禽捕捉星，魚蝦蟹鼈踴躍星，飛跳諸蟲纏擾星  
作文制字文昌星，興兵佈陣武曲星，考正歲時測運星，造作工藝巧作神。眾  
星聽令，各回本部，變化發生，稽首神明，無極眾聖，不可思議功德。

## 經驗第六

值年值月將，值日值時神；夜差黑煞帥，日令皎潔兵；往來細鑒察，不得漏  
毫分。會同家宅神，著令司命君；如有虔誦男和女，速速報知聞。家宅供此  
經，妖魅化為塵；船舟奉此經，風波即刻平；行人佩此經，路途保安寧；書  
生看此經，不久步青雲；婦人誦此經，二女五男成。若為亡化念，亡化早超  
生；若為父母念，父母享遐齡；焚香高誦念，其福即來臨。日念三五遍，或  
誦百千聲；人能鈔印送，諸疾不相侵；諸神皆歡喜，宅舍並光明；或賜福與  
壽，或蔭兒與孫；凶事化為吉，福祿壽重增。

斗口天君，欽奉

漢室漢壽亭侯，關聖大帝敕令

大帝曰：「吾曾言，日在天上，心在人中。」心者萬事之根本；儒家五常，  
道釋三寶，皆從心上生來。仁莫大於忠孝，義莫大於廉節，二者五常之首。  
聖人參贊化育者，此而已；仙佛超神入化者，此而已。自有天地以來，這個  
無極太極之理，渾然包羅，古今長懸；諸帝王聖賢仙佛，萬經千典，只是明  
此理，成此事而已。帝係紫微垣中，火之正氣。火，離明象也，故主文昌；  
火，又烈性也，故主武曲。文主仁，仁首忠孝；武主義，義首廉節。惟是舉  
天下萬世皆為聖賢仙佛，此有晝無夜，有陽無陰，絕無之理也。自戰國以  
來，帝出世匡君救民，不得已以公善之心望世，此桃園經之所以現身說法  
也。奈何世之人，真性不密，邪僻用心，見帝平常之言，不曰聖人不出此驕  
矜語，則曰聖人不出此淺近語。嗚呼，是必欲帝重作五經，待世之智愚賢不  
肖，皆盡讀之乎？不獨此也，現在身列文儒，亦妄行指駁。帝因周子，凜凜  
持誦多年，只得註解明白；如再有擅行詆毀者，輕則令瘟火滅之，重則命將  
軍斬之，毋悔。明聖經，本係夢與玉泉寺僧，僧醒而傳述。首句漢漢，上一  
漢字，乃代名，即大漢也；漢壽亭，係地名也。其先囑咐人人誦此經者，是  
以效驗歆動人心也。中言精忠沖日月，義氣貫乾坤，即孟子所謂塞乎天地  
也。曰面赤鬚長者，即大學所謂心廣體胖，孟子所謂晬面盎背也。至投胎轉  
劫之說，儒者不言，不知釋道兩門，並非無據；試歷查古今，借尸還魂，靈  
殼轉寄，異物入胎，豈少也哉？帝言在列國，在漢，與在唐宋之言，實非誑  
也，諸君試對核之。再四章言「忠」，文武臣僚皆當敬體，則是三代以上之  
臣也，夔龍伊臯其人也。言「孝」，則曰不解衣不食，則侍膳寢門，文王其  
人也。滴水還源，孫又效子，則子孫保之，大舜其人也。說到二十四孝，古

今昭如日月，格天地，動鬼神，豈非確然可據者哉！「廉」在周禮，以六計為定，實從義字中生，故為愚昧者痛斥；而廉泉盜水，舉一二而已括之也。「節」如竹，竹有筠也；如月，月有度也。非筠則溷，非度則昏。古今大節不踰者，於義殆盡。後遣諸神鑒察，以使速應，帝亦大費婆心。以帝為驕，帝固不辭；以帝為淺，帝亦不辭；但願人人從此驕言淺言做去，一一果自信於心中，然後探元妙之理，入上聖之班，帝亦不怪，而且快然也。將此語著靈官傳世知之。為此述告周宰人等，一心體此，以心印心。「心在人中，日在天上」欽哉勿忽。



## 05【大學全】二選一

### （朱子本大學）

大學之道：在明明德，在新民，在止於至善。知止而后有定，定而后能靜，靜而后能安，安而后能慮，慮而后能得。物有本末，事有終始，知所先後，則近道矣。

古之欲明明德於天下者，先治其國；欲治其國者，先齊其家；欲齊其家者，先修其身；欲修其身者，先正其心；欲正其心者，先誠其意；欲誠其意者，先致其知；致知在格物。物格而后知至，知至而后意誠，意誠而后心正，心正而后身脩，身修而后家齊，家齊而后國治，國治而后天下平。

自天子以至於庶人，壹是皆以修身為本。其本亂而末治者否矣；其所厚者薄，而其所薄者厚，未之有也。

康誥曰：「克明德。」大甲曰：「顧諟天之明命。」帝典曰：「克明峻德。」皆自明也。

湯之盤銘曰：「苟日新，日日新，又日新。」康誥曰：「作新民。」詩曰：「周雖舊邦，其命維新。」是故君子無所不用其極。

詩云：「邦畿千里，惟民所止。」詩云：「緡蠻黃鳥，止于丘隅。」子曰：「於止，知其所止，可以人而不如鳥乎？」

詩云：「穆穆文王，於緝熙敬止！」為人君，止於仁；為人臣，止於敬；為人子，止於孝；為人父，止於慈；與國人交，止於信。

詩云：「瞻彼淇澳，葦竹猗猗；有斐君子，如切如磋，如琢如磨；瑟兮僩兮，赫兮喧兮；有斐君子，終不可諠兮。」如切如磋者，道學也；如琢如磨者，自脩也；瑟兮僩兮者，恂慄也；赫兮喧兮者，威儀也；有斐君子，終不可諠兮者，道盛德至善，民之不能忘也。詩云：「於戲！前王不忘。」君子賢其賢而親其親，小人樂其樂而利其利，此以沒世不忘也。

子曰：「聽訟，吾猶人也；必也，使無訟乎！」無情者不得盡其辭，大畏民志；此謂知本。

此謂知本，此謂知之至也。

（所謂致知在格物者，言欲致吾之知，在即物而窮其理也。蓋人心之靈莫不有知，而天下之物莫不有理，惟於理有未窮，故其知有不盡也。是以大學始教，必使學者即凡天下之物，莫不因其已知之理而益窮之，以求至乎其極。至於用力之久，而一旦豁然貫通焉，則眾物之表裏精粗無不到，而吾心之全體大用無不明矣。此謂物格，此謂知之至也。」）（此段為朱子竊取程子之意以補之也）

所謂「誠其意」者：毋自欺也，如惡惡臭，如好好色，此之謂自謙，故君子必慎其獨也。小人閒居為不善，無所不至，見君子而后厭然，揜其不善，而著其善；人之視己，如見其肺肝然，則何益矣？此謂誠於中，形於外。故君子必慎其獨也。

曾子曰：「十目所視，十手所指，其嚴乎！」富潤屋；德潤身；心廣體胖，故君子必誠其意。

所謂「脩身在正其心」者，身有所忿懣，則不得其正；有所恐懼，則不得其正；有所好樂，則不得其正；有所憂患，則不得其正。心不在焉：視而不見，聽而不聞，食而不知其味。此謂「脩身在正其心」。

所謂「齊其家在脩其身」者，人之其所親愛而辟焉，之其所賤惡而辟焉，之其所畏敬而辟焉，之其所哀矜而辟焉，之其所敖惰而辟焉。故好而知其惡，惡而知其美者，天下鮮矣。故諺有之曰：「人莫知其子之惡，莫知其苗之碩。」此謂身不脩，不可以齊其家。

所謂「治國必先齊其家」者，其家不可教，而能教人者，無之。故君子不出家，而成教於國。孝者，所以事君也；弟者，所以事長也；慈者，所以使眾也。康誥曰：「如保赤子。」心誠求之，雖不中，不遠矣。未有學養子而后嫁者也。

一家仁，一國興仁；一家讓，一國興讓，一人貪戾，一國作亂；其機如此。此謂一言僨事，一人定國。堯舜帥天下以仁，而民從之；桀紂帥天下以暴，而民從之。其所令反其所好，而民不從。是故君子有諸己，而后求諸人；無諸己，而后非諸人。所藏乎身不恕，而能喻諸人者，未之有也。故治國在齊其家。

詩云：「桃之夭夭，其葉蓁蓁，之子于歸，宜其家人。」宜其家人，而后可以教國人。詩云：「宜兄宜弟。」宜兄宜弟，而后可以教國人。詩云：「其

儀不忒，正是四國。」其為父子兄弟足法，而后民法之也。此謂治國在齊其家。

所謂「平天下在治其國」者，上老老而民興孝；上長長而民興弟；上恤孤而民不倍。是以君子有絜矩之道也。所惡於上，毋以使下；所惡於下，毋以事上；所惡於前，毋以先後；所惡於後，毋以從前；所惡於右，毋以交於左；所惡於左，毋以交於右；此之謂絜矩之道。詩云：「樂只君子，民之父母。」民之所好好之，民之所惡惡之，此之謂民之父母。詩云：「節彼南山，維石巖巖；赫赫師尹，民具爾瞻。」有國者不可以不慎，辟，則為天下僂矣！

詩云：「殷之未喪師，克配上帝；儀監于殷，峻命不易。」道得眾，則得國；失眾，則失國。是故君子先慎乎德；有德此有人，有人此有土，有土此有財，有財此有用。德者，本也；財者，末也；外本內末，爭民施奪。是故財聚則民散，財散則民聚。是故言悖而出者，亦悖而入；貨悖而入者，亦悖而出。康誥曰：「惟命不于常。」道善則得之，不善則失之矣。楚書曰：「楚國無以為寶，惟善以為寶。」舅犯曰：「亡人無以為寶，仁親以為寶。」

秦誓曰：「若有一个臣，斷斷兮，無他技；其心休休焉，其如有容焉。人之有技，若己有之；人之彥聖，其心好之；不啻若自其口出，實能容之，以能保我子孫黎民，尚亦有利哉！人之有技，媚嫉以惡之；人之彥聖，而違之俾不通；實不能容，以不能保我子孫黎民，亦曰殆哉！」唯仁人放流之，迸諸四夷，不與同中國。此謂「唯仁人為能愛人，能惡人。」見賢而不能舉，舉而不能先，命也；見不善而不能退，退而不能遠，過也。好人之所惡，惡人之所好，是謂拂人之性，菑必逮夫身。是故君子有大道，必忠信以得之，驕泰以失之。

生財有大道：生之者眾，食之者寡；為之者疾，用之者舒；則財恆足矣。仁者以財發身，不仁者以身發財。未有上好仁，而下不好義者也；未有好義，其事不終者也；未有府庫財，非其財者也。

孟獻子曰：「畜馬乘，不察於雞豚；伐冰之家，不畜牛羊；百乘之家，不畜聚斂之臣；與其有聚斂之臣，寧有盜臣。」此謂國不以利為利，以義為利也。長國家而務財用者，必自小人矣，彼為善之。小人之使為國家，菑害並至，雖有善者，亦無如之何矣。此謂「國不以利為利，以義為利」也。



## (古本大學)

- 1.大學之道：在明明德，在親民，在止於至善。知止而后有定，定而后能靜，靜而后能安，安而后能慮，慮而后能得。物有本末，事有終始，知所先後，則近道矣。

古之欲明明德於天下者，先治其國；欲治其國者，先齊其家；欲齊其家者，先脩其身；欲脩其身者，先正其心；欲正其心者，先誠其意；欲誠其意者，先致其知；致知在格物。物格而后知至，知至而后意誠，意誠而后心正，心正而后身脩，身脩而后家齊，家齊而后國治，國治而后天下平。自天子以至於庶人，壹是皆以脩身為本。其本亂而末治者否矣；其所厚者薄，而其所薄者厚，未之有也。

此謂知本，此謂知之至也。

- 2.所謂『誠其意』者，毋自欺也。如惡惡臭，如好好色，此之謂自謙。故君子必慎其獨也。小人閒居為不善，無所不至；見君子而后厭然，揜其不善而著其善；人之視己，如見其肺肝然，則何益矣？此謂誠於中形於外。故君子必慎其獨也。

曾子曰：「十目所視，十手所指，其嚴乎！」富潤屋，德潤身，心廣體胖，故君子必誠其意。

- 3.詩云：「瞻彼淇澳，葦竹猗猗；有斐君子，如切如磋，如琢如磨；瑟兮僩兮，赫兮喧兮；有斐君子，終不可諠兮。」如切如磋者，道學也；如琢如磨者，自脩也；瑟兮僩兮者，恂慄也；赫兮喧兮者，威儀也；有斐君子，終不可諠兮者，道盛德至善，民之不能忘也。詩云：「於戲！前王不忘。」君子賢其賢而親其親，小人樂其樂而利其利，此以沒世不忘也。

- 4.康誥曰：「克明德。」大甲曰：「顧諟天之明命。」帝典曰：「克明峻德。」皆自明也。

湯之盤銘曰：「苟日新，日日新，又日新。」康誥曰：「作新民。」詩云：「周雖舊邦，其命維新。」是故君子無所不用其極。詩云：「邦畿千里，惟民所止。」詩云：「緡蠻黃鳥，止于丘隅。」子曰：「於止，知其所止，可以人而不如鳥乎？」

詩云：「穆穆文王，於緝熙敬止。」為人君，止於仁；為人臣，止於敬；為人子，止於孝；為人父，止於慈；與國人交，止於信。

子曰：「聽訟，吾猶人也，必也使無訟乎！」無情者不得盡其辭，大畏民志；此謂知本。

- 5.所謂「脩身在正其心」者，身有所忿懣，則不得其正；有所恐懼，則不得其正；有所好樂，則不得其正；有所憂患，則不得其正。心不在焉，視而不見，聽而不聞，食而不知其味。此謂脩身在正其心。
- 6.所謂「齊其家在脩其身」者，人之其所親愛而辟焉，之其所賤惡而辟焉，之其所畏敬而辟焉，之其所哀矜而辟焉，之其所教惰而辟焉。故好而知其惡，惡而知其美者，天下鮮矣。故諺有之曰：「人莫知其子之惡，莫知其苗之碩。」此謂身不脩，不可以齊其家。
- 7.所謂「治國必先齊其家」者，其家不可教，而能教人者，無之。故君子不出家，而成教於國。孝者，所以事君也；弟者，所以事長也；慈者，所以使眾也。康誥曰：「如保赤子。」心誠求之，雖不中，不遠矣。未有學養子而后嫁者也。一家仁，一國興仁；一家讓，一國興讓；一人貪戾，一國作亂；其機如此。此謂一言僨事，一人定國。堯舜帥天下以仁，而民從之；桀紂帥天下以暴，而民從之。其所令反其所好，而民不從。是故君子有諸己，而后求諸人；無諸己而后非諸人。所藏乎身不恕，而能喻諸人者，未之有也。故治國在齊其家。詩云：「桃之夭夭，其葉蓁蓁，之子于歸，宜其家人。」宜其家人，而后可以教國人。詩云：「宜兄宜弟。」宜兄宜弟，而后可以教國人。詩云：「其儀不忒，正是四國。」其為父子兄弟足法，而后民法之也。此謂治國在齊其家。
- 8.所謂「平天下在治其國」者，上老老而民興孝；上長長而民興弟；上恤孤而民不倍。是以君子有絜矩之道也。所惡於上，毋以使下；所惡於下，毋以事上；所惡於前，毋以先後；所惡於後，毋以從前；所惡於右，毋以交於左；所惡於左，毋以交於右；此之謂絜矩之道。詩云：「樂只君子，民之父母。」民之所好好之，民之所惡惡之，此之謂民之父母。詩云：「節彼南山，維石巖巖，赫赫師尹，民具爾瞻。」有國者不可以不慎，辟則為天下僂矣！
- 9.詩云：「殷之未喪師，克配上帝；儀監于殷，峻命不易。」道得眾，則得國；失眾，則失國。是故君子先慎乎德，有德此有人，有人此有土，有土此有財，有財此有用。德者，本也；財者，末也。外本內末，爭民施奪。是故財聚則民散，財散則民聚。是故言悖而出者，亦悖而入；貨悖而入者，亦悖而出。康誥曰：「惟命不于常。」道善則得之，不善則失之矣。楚書曰：「楚國無以為寶，惟善以為寶。」舅犯曰：「亡人無以為寶，仁親以為寶。」
- 10.秦誓曰：「若有一个臣，斷斷兮，無他技；其心休休焉，其如有容焉。人之有技，若己有之；人之彥聖，其心好之；不啻若自其口出，實能容之，

以能保我子孫黎民，尚亦有利哉！人之有技，媚疾以惡之；人之彥聖，而違之俾不通；實不能容，以不能保我子孫黎民，亦曰殆哉！」唯仁人放流之，迸諸四夷，不與同中國。此謂「唯仁人為能愛人，能惡人。」見賢而不能舉，舉而不能先，命也；見不善而不能退，退而不能遠，過也。好人之所惡，惡人之所好，是謂拂人之性，菑必逮夫身。是故君子有大道，必忠信以得之，驕泰以失之。

11. 生財有大道：生之者眾，食之者寡；為之者疾，用之者舒；則財恆足矣。仁者以財發身，不仁者以身發財。未有上好仁，而下不好義者也；未有好義，其事不終者也；未有府庫財，非其財者也。孟獻子曰：「畜馬乘，不察於雞豚；伐冰之家，不畜牛羊；百乘之家，不畜聚斂之臣；與其有聚斂之臣，寧有盜臣。」此謂國不以利為利，以義為利也。長國家而務財用者，必自小人矣，彼為善之。小人之使為國家，菑害並至，雖有善者，亦無如之何矣。此謂「國不以利為利，以義為利」也。



## 06【中庸】

1. 天命之謂性，率性之謂道，脩道之謂教。道也者，不可須臾離也；可離，非道也。是故，君子戒慎乎其所不睹，恐懼乎其所不聞。莫見乎隱，莫顯乎微，故君子慎其獨也。喜怒哀樂之未發，謂之中；發而皆中節，謂之和。中也者，天下之大本也；和也者，天下之達道也。致中和，天地位焉，萬物育焉。
2. 仲尼曰：「君子中庸，小人反中庸。君子之中庸也，君子而時中；小人之反中庸也，小人而無忌憚也。」
3. 子曰：「中庸其至矣乎！民鮮能久矣。」
4. 子曰：「道之不行也，我知之矣：知者過之，愚者不及也。道之不明也，我知之矣：賢者過之，不肖者不及也。人莫不飲食也，鮮能知味也。」
5. 子曰：「道其不行矣夫！」
6. 子曰：「舜其大知也與！舜好問而好察邇言，隱惡而揚善。執其兩端，用其中於民，其斯以為舜乎！」
7. 子曰：「人皆曰『予知』，驅而納諸罟獲陷阱之中，而莫之知辟也。人皆曰『予知』；擇乎中庸而不能期月守也。」
8. 子曰：「回之為人也，擇乎中庸，得一善，則拳拳服膺而弗失之矣。」
9. 子曰：「天下國家可均也，爵祿可辭也，白刃可蹈也，中庸不可能也。」
10. 子路問「強」。子曰：「南方之強與？北方之強與？抑而強與？寬柔以教，不報無道，南方之強也，君子居之；衽金革，死而不厭，北方之強

也。而強者居之。故君子和而不流，強哉矯！中立而不倚，強哉矯！國有道，不變塞焉，強哉矯！國無道，至死不變，強哉矯！」

11. 子曰：「素隱行怪，後世有述焉，吾弗為之矣。君子遵道而行，半途而廢，吾弗能已矣。君子依乎中庸，遯世不見知而不悔，唯聖者能之。」
12. 君子之道，費而隱。夫婦之愚，可以與知焉；及其至也，雖聖人亦有所不知焉。夫婦之不肖，可以能行焉；及其至也，雖聖人亦有所不能焉。天地之大也，人猶有所憾，故君子語大，天下莫能載焉；語小，天下莫能破焉。《詩》云：『鳶飛戾天，魚躍于淵。』言其上下察也。君子之道，造端乎夫婦，及其至也，察乎天地。
13. 子曰：「道不遠人，人之為道而遠人，不可以為道。《詩》云：『伐柯，伐柯，其則不遠。』執柯以伐柯，睨而視之，猶以為遠。故君子以人治人，改而止。忠恕違道不遠，施諸己而不願，亦勿施於人。君子之道四，丘未能一焉：所求乎子以事父，未能也；所求乎臣以事君，未能也；所求乎弟以事兄，未能也；所求乎朋友先施之，未能也。庸德之行，庸言之謹；有所不足，不敢不勉；有餘不敢盡。言顧行，行顧言，君子胡不慥慥爾！」
14. 君子素其位而行，不願乎其外。素富貴，行乎富貴；素貧賤，行乎貧賤；素夷狄，行乎夷狄；素患難，行乎患難：君子無入而不自得焉！在上位不陵下，在下位不援上；正己而不求於人，則無怨；上不怨天；下不尤人。故君子居易以俟命，小人行險以徼幸。」子曰：「射有似乎君子，失諸正鵠，反求諸其身。」
15. 君子之道，辟如行遠必自邇，辟如登高必自卑。《詩》曰：『妻子好合，如鼓瑟琴；兄弟既翕，和樂且耽。宜爾室家，樂爾妻帑。』子曰：「父母其順矣乎！」
16. 子曰：「鬼神之為德，其盛矣乎！視之而弗見，聽之而弗聞，體物而不可遺。使天下之人，齊明盛服，以承祭祀，洋洋乎如在其上，如在其左右。《詩》曰：『神之格思，不可度思，矧可射思。』夫微之顯，誠之不可揜如此夫！」
17. 子曰：「舜其大孝也與！德為聖人，尊為天子，富有四海之內；宗廟饗之，子孫保之。故大德，必得其位，必得其祿，必得其名，必得其壽。故天之生物，必因其材而篤焉，故栽者培之，傾者覆之。《詩》曰：『嘉樂君子，憲憲令德，宜民宜人，受祿于天；保佑命之，自天申之。』故大德者必受命。」

18. 子曰：「無憂者，其惟文王乎！以王季為父，以武王為子；父作之，子述之。武王纘大王、王季、文王之緒。壹戎衣而有天下，身不失天下之顯名；尊為天子，富有四海之內；宗廟饗之，子孫保之。武王末受命，周公成文武之德，追王大王、王季，上祀先公以天子之禮。斯禮也，達乎諸侯、大夫及士、庶人。父為大夫，子為士；葬以大夫，祭以士。父為士，子為大夫，葬以士，祭以大夫。期之喪，達乎大夫；三年之喪，達乎天子；父母之喪，無貴賤，一也。」
19. 子曰：「武王、周公其達孝矣乎！夫孝者，善繼人之志，善述人之事者也。春秋、脩其祖廟，陳其宗器，設其裳衣，薦其時食。宗廟之禮，所以序昭穆也；序爵，所以辨貴賤也；序事，所以辨賢也；旅酬下為上，所以逮賤也；燕毛，所以序齒也。踐其位，行其禮，奏其樂；敬其所尊，愛其所親；事死如事生，事亡如事存，孝之至也。郊社之禮，所以事上帝也；宗廟之禮，所以祀乎其先也。明乎郊社之禮、禘嘗之義，治國其如示諸掌乎！」
20. 哀公問政。子曰：「文武之政，布在方策。其人存，則其政舉；其人亡，則其政息。人道敏政，地道敏樹。夫政也者，蒲盧也。故為政在人；取人以身，脩身以道，脩道以仁。仁者，人也，親親為大；義者，宜也，尊賢為大。親親之殺，尊賢之等，禮所生也。（在下位，不獲乎上，民不可得而治矣！）故君子不可以不脩身；思脩身，不可以不事親；思事親，不可以不知人；思知人，不可以不知天。天下之達道五，所以行之者三。曰：君臣也、父子也、夫婦也、昆弟也、朋友之交也，五者，天下之達道也；知、仁、勇三者，天下之達德也，所以行之者，一也。或生而知之，或學而知之，或困而知之，及其知之，一也。或安而行之，或利而行之，或勉強而行之，及其成功，一也。」子曰：「好學近乎知，力行近乎仁，知恥近乎勇。知斯三者，則知所以脩身；知所以脩身，則知所以治人；知所以治人，則知所以治天下國家矣。

凡為天下國家有九經，曰：脩身也，尊賢也，親親也，敬大臣也，體群臣也，子庶民也，來百工也，柔遠人也，懷諸侯也。脩身，則道立；尊賢，則不惑；親親，則諸父昆弟不怨；敬大臣，則不眩；體群臣，則士之報禮重；子庶民，則百姓勸；來百工，則財用足；柔遠人，則四方歸之；懷諸侯，則天下畏之。齊明盛服，非禮不動，所以脩身也；去讒遠色，賤貨而貴德，所以勸賢也；尊其位，重其祿，同其好惡，所以勸親親也；官盛任使，所以勸大臣也；忠信重祿，所以勸士也；時使薄斂，所以勸百姓也；日省月試，既稟稱事，所以勸百工也；送往迎來，嘉善而矜不能，所以柔

遠人也；繼絕世，舉廢國，治亂持危，朝聘以時，厚往而薄來，所以懷諸侯也。凡為天下國家有九經，所以行之者，一也。」

凡事豫則立，不豫則廢；言前定，則不跲；事前定，則不困；行前定，則不疚，道前定，則不窮。在下位，不獲乎上，民不可得而治矣；獲乎上有道，不信乎朋友，不獲乎上矣；信乎朋友有道，不順乎親，不信乎朋友矣；順乎親有道，反諸身不誠，不順乎親矣；誠身有道，不明乎善，不誠乎身矣。

誠者，天之道也；誠之者，人之道也。誠者，不勉而中，不思而得，從容中道，聖人也；誠之者，擇善而固執之者也。博學之，審問之，慎思之，明辨之，篤行之。有弗學，學之弗能弗措也；有弗問，問之弗知弗措也；有弗思，思之弗得弗措也；有弗辨，辨之弗明弗措也，有弗行，行之弗篤弗措也。人一能之，己百之，人十能之，己千之。果能此道矣，雖愚必明，雖柔必強。」

21. 自誠明，謂之性；自明誠，謂之教。誠則明矣，明則誠矣。
22. 唯天下至誠，為能盡其性；能盡其性，則能盡人之性；能盡人之性，則能盡物之性；能盡物之性，則可以贊天地之化育；可以贊天地之化育，則可以與天地參矣。
23. 其次致曲。曲能有誠，誠則形，形則著，著則明，明則動，動則變，變則化；唯天下至誠為能化。
24. 至誠之道，可以前知：國家將興，必有禎祥；國家將亡，必有妖孽；見乎蓍龜，動乎四體。禍福將至，善必先知之；不善必先知之。故至誠如神。
25. 誠者，自成也；而道，自道也。誠者，物之終始；不誠，無物。是故，君子誠之為貴。誠者，非自成己而已也，所以成物也。成己，仁也；成物，知也。性之德也，合外內之道也，故時措之宜也。
26. 故至誠無息，不息則久，久則徵，徵則悠遠，悠遠則博厚，博厚則高明。博厚所以載物也，高明所以覆物也，悠久所以成物也。博厚配地，高明配天，悠久無疆。如此者，不見而章，不動而變，無為而成。天地之道，可一言而盡也：「其為物不貳，則其生物不測。」天地之道：博也，厚也，高也，明也，悠也，久也。今夫天，斯昭昭之多，及其無窮也，日月星辰繫焉，萬物覆焉。今夫地，一撮土之多，及其廣厚，載華嶽而不重，振河海而不洩，萬物載焉。今夫山，一卷石之多，及其廣大，草木生之，禽獸居之，寶藏興焉。今夫水，一勺之多，及其不測，黿鼉蛟龍魚鼈生焉，貨財殖焉。詩云：「維天之命，於穆不已。」蓋曰

天之所以為天也。「於乎不顯？文王之德之純。」蓋曰文王之所以為文也，純亦不已。

27. 大哉！聖人之道！洋洋乎，發育萬物，峻極於天。優優大哉！禮儀三百，威儀三千，待其人而後行。故曰：「苟不至德，至道不凝焉。」故君子尊德性而道問學，致廣大而盡精微，極高明而道中庸。溫故而知新，敦厚以崇禮。是故，居上不驕，為下不倍，國有道，其言足以興；國無道，其默足以容。詩曰：「既明且哲，以保其身」，其此之謂與！
28. 子曰：「愚而好自用；賤而好自專；生乎今之世，反古之道；如此者，裁及其身者也。」非天子不議禮，不制度，不考文。今天下，車同軌，書同文，行同倫。雖有其位，苟無其德，不敢作禮樂焉；雖有其德，苟無其位，亦不敢作禮樂焉。子曰：「吾說夏禮，杞不足徵也；吾學殷禮，有宋存焉；吾學周禮，今用之，吾從周。」
29. 王天下有三重焉，其寡過矣乎！上焉者，雖善無徵，無徵不信，不信民弗從。下焉者，雖善不尊，不尊不信，不信民弗從。故君子之道本諸身，徵諸庶民，考諸三王而不繆，建諸天地而不悖，質諸鬼神而無疑，百世以俟聖人而不惑，質諸鬼神而無疑，知天也；百世以俟聖人而不惑，知人也。是故，君子動而世為天下道，行而世為天下法，言而世為天下則；遠之則有望，近之則不厭。詩曰：「在彼無惡，在此無射；庶幾夙夜，以永終譽。」君子未有不如此，而蚤有譽於天下者也。
30. 仲尼祖述堯舜，憲章文武；上律天時，下襲水土。辟如天地之無不持載，無不覆幬；辟如四時之錯行，如日月之代明。萬物並育而不相害，道並行而不相悖。小德川流，大德敦化。此天地之所以為大也。
31. 唯天下至聖，為能聰明睿知，足以有臨也；寬裕溫柔，足以有容也；發強剛毅，足以有執也；齊莊中正，足以有敬也；文理密察，足以有別也。溥博淵泉，而時出之。溥博如天，淵泉如淵。見而民莫不敬，言而民莫不信，行而民莫不說。是以聲名洋溢乎中國，施及蠻貊，舟車所至，人力所通，天之所覆，地之所載，日月所照，霜露所隊，凡有血氣者，莫不尊親，故曰配天。
32. 唯天下至誠，為能經綸天下之大經，立天下之大本，知天地之化育。夫焉有所倚？肫肫其仁，淵淵其淵，浩浩其天，苟不固聰明聖知達天德者，其孰能知之？
33. 詩曰：「衣錦尚絅。」惡其文之著也。故君子之道，闇然而日章；小人之道，的然而日亡。君子之道，淡而不厭，簡而文，溫而理；知遠之近，知風之自，知微之顯，可與入德矣。

詩云：「潛雖伏矣，亦孔之昭。」故君子內省不疚，無惡於志。君子之所不可及者，其唯人之所不見乎！

詩云：「相在爾室，尚不愧于屋漏。」故君子不動而敬，不言而信。

詩曰：「奏假無言，時靡有爭。」是故君子不賞而民勸，不怒而民威於鈇鉞。

詩曰：「不顯惟德！百辟其刑之。」是故君子篤恭而天下平。

詩云：「予懷明德，不大聲以色。」子曰：「聲色之於以化民，末也。」

詩曰：「德輶如毛。」毛猶有倫。「上天之載，無聲無臭。」至矣。



## 07【論語 1-2 篇】

### 學而第一

1. 子曰：「學而時習之，不亦說乎？有朋自遠方來，不亦樂乎？人不知而不慍，不亦君子乎？」
2. 有子曰：「其為人也孝弟，而好犯上者鮮矣。不好犯上，而好作亂者，未之有也。君子務本，本立而道生。孝弟也者，其為仁之本與！」
3. 子曰：「巧言令色，鮮矣仁。」
4. 曾子曰：「吾日三省吾身：為人謀，而不忠乎？與朋友交，而不信乎？傳，不習乎？」
5. 子曰：「道千乘之國，敬事而信，節用而愛人，使民以時。」
6. 子曰：「弟子入則孝，出則弟，謹而信，汎愛眾，而親仁。行有餘力，則以學文。」
7. 子夏曰：「賢賢易色，事父母能竭其力，事君能致其身，與朋友交，言而有信，雖曰未學，吾必謂之學矣。」
8. 子曰：「君子不重則不威，學則不固。主忠信，無友不如己者，過則勿憚改。」
9. 曾子曰：「慎終追遠，民德歸厚矣。」
10. 子禽問於子貢曰：「夫子至於是邦也，必聞其政，求之與？抑與之與？」  
子貢曰：「夫子溫、良、恭、儉、讓以得之。夫子之求之也，其諸異乎人之求之與！」
11. 子曰：「父在觀其志，父沒觀其行。三年無改於父之道，可謂孝矣。」
12. 有子曰：「禮之用，和為貴；先王之道，斯為美，小大由之。有所不行，知和而和，不以禮節之，亦不可行也。」
13. 有子曰：「信近於義，言可復也；恭近於禮，遠恥辱也。因不失其親，亦可宗也。」



14. 子曰：「君子食無求飽，居無求安，敏於事而慎於言，就有道而正焉：可謂好學也已。」
15. 子貢曰：「貧而無諂，富而無驕，何如？」子曰：「可也。未若貧而樂，富而好禮者也。」子貢曰：「詩云：『如切如磋，如琢如磨。』其斯之謂與？」子曰：「賜也，始可與言詩已矣！告諸往而知來者。」
16. 子曰：「不患人之不己知，患不知人也。」

## 為政第二

1. 子曰：「為政以德。譬如北辰，居其所，而眾星共之。」
2. 子曰：「詩三百，一言以蔽之，曰思無邪。」
3. 子曰：「道之以政，齊之以刑，民免而無恥；道之以德，齊之以禮，有恥且格。」
4. 子曰：「吾十有五而志於學；三十而立；四十而不惑；五十而知天命；六十而耳順；七十而從心所欲，不踰矩。」
5. 孟懿子問孝。子曰：「無違。」樊遲御，子告之曰：「孟孫問孝於我，我對曰，『無違。』」樊遲曰：「何謂也？」子曰：「生，事之以禮。死，葬之以禮，祭之以禮。」
6. 孟武伯問孝。子曰：「父母唯其疾之憂。」
7. 子游問孝。子曰：「今之孝者，是謂能養。至於犬馬，皆能有養；不敬，何以別乎？」
8. 子夏問孝。子曰：「色難。有事，弟子服其勞，有酒食，先生饌，曾是以為孝乎？」
9. 子曰：「吾與回言終日，不違如愚。退而省其私，亦足以發，回也，不愚！」
10. 子曰：「視其所以，觀其所由，察其所安，人焉廋哉！人焉廋哉！」
11. 子曰：「溫故而知新，可以為師矣。」
12. 子曰：「君子不器。」
13. 子貢問君子。子曰：「先行其言，而後從之。」
14. 子曰：「君子周而不比，小人比而不周。」
15. 子曰：「學而不思則罔，思而不學則殆。」
16. 子曰：「攻乎異端，斯害也已。」
17. 子曰：「由，誨女知之乎！知之為知之，不知為不知，是知也。」
18. 子張學干祿。子曰：「多聞闕疑，慎言其餘，則寡尤；多見闕殆，慎行其餘，則寡悔。言寡尤，行寡悔，祿在其中矣！」

19. 哀公問曰：「何為則民服？」孔子對曰：「舉直錯諸枉，則民服。舉枉錯諸直，則民不服。」
20. 季康子問：「使民敬忠以勸，如之何？」子曰：「臨之以莊，則敬。孝慈，則忠。舉善而教不能，則勸。」
21. 或謂孔子曰：「子奚不為政？」子曰：「書云孝乎！『惟孝友于兄弟。』施於有政，是亦為政，奚其為為政？」
22. 子曰：「人而無信，不知其可也。大車無輓，小車無軌，其何以行之哉？」
23. 子張問：「十世可知也？」子曰：「殷因於夏禮，所損益可知也。周因於殷禮，所損益可知也。其或繼周者，雖百世可知也。」
24. 子曰：「非其鬼而祭之，諂也。見義不為，無勇也。」



## 08【論語 3-4 篇】

### 八佾第三

1. 孔子謂季氏：「八佾舞於庭。是可忍也，孰不可忍也！」
2. 三家者以雍徹。子曰：「『相維辟公，天子穆穆。』奚取於三家之堂！」
3. 子曰：「人而不仁，如禮何？人而不仁，如樂何？」
4. 林放問禮之本。子曰：「大哉問！禮，與其奢也，寧儉。喪，與其易也，寧戚。」
5. 子曰：「夷狄之有君，不如諸夏之亡也。」
6. 季氏旅於泰山。子謂冉有曰：「女弗能救與？」對曰：「不能。」子曰：「嗚呼！曾謂泰山不如林放乎？」
7. 子曰：「君子無所爭，必也射乎！揖讓而升，下而飲。其爭也君子。」
8. 子夏問曰：「『巧笑倩兮，美目盼兮，素以為絢兮』，何謂也？」子曰：「繪事後素。」曰：「禮後乎？」子曰：「起予者商也！始可與言詩已矣。」
9. 子曰：「夏禮，吾能言之，杞不足徵也。殷禮，吾能言之，宋不足徵也。文獻不足故也。足，則吾能徵之矣。」
10. 子曰：「禘自既灌而往者，吾不欲觀之矣。」
11. 或問「禘」之說。子曰：「不知也。知其說者之於天下也，其如示諸斯乎？」指其掌。
12. 祭如在，祭神如神在。子曰：「吾不與祭，如不祭。」
13. 王孫賈問曰：「『與其媚於奧，寧媚於竈。』何謂也？」子曰：「不然。獲罪於天，吾所禱也。」

14. 子曰：「周監於二代，郁郁乎文哉！吾從周。」
15. 子入太廟，每事問。或曰：「孰謂鄒人之子知禮乎？入太廟，每事問。」子聞之曰：「是禮也！」
16. 子曰：「射不主皮，為力不同科，古之道也。」
17. 子貢欲去告朔之餼羊。子曰：「賜也！爾愛其羊，我愛其禮。」
18. 子曰：「事君盡禮，人以為諂也。」
19. 定公問：「君使臣，臣事君，如之何？」孔子對曰：「君使臣以禮，臣事君以忠。」
20. 子曰：「關雎，樂而不淫，哀而不傷。」
21. 哀公問社於宰我。宰我對曰：「夏后氏以松，殷人以柏，周人以栗，曰：『使民戰栗。』」子聞之，曰：「成事不說，遂事不諫，既往不咎。」
22. 子曰：「管仲之器小哉！」或曰：「管仲儉乎？」曰：「管氏有三歸，官事不攝，焉得儉？」「然則管仲知禮乎？」曰：「邦君樹塞門，管氏亦樹塞門。邦君為兩君之好，有反坫，管氏亦有反坫。管氏而知禮，孰不知禮？」
23. 子語魯大師樂，曰：「樂其可知也。始作，翕如也；從之，純如也，皦如也，繹如也。以成。」
24. 儀封人請見，曰：「君子之至於斯也，吾未嘗不得見也。」從者見之。出曰：「二三子何患於喪乎？天下之無道也久矣，天將以夫子為木鐸。」
25. 子謂韶，「盡美矣，又盡善也。」謂武，「盡美矣，未盡善也。」
26. 子曰：「居上不寬，為禮不敬，臨喪不哀，吾何以觀之哉？」

#### 里仁第四

1. 子曰：「里仁為美。擇不處仁，焉得知？」
2. 子曰：「不仁者，不可以久處約，不可以長處樂。仁者安仁，知者利仁。」
3. 子曰：「惟仁者，能好人，能惡人。」
4. 子曰：「苟志於仁矣，無惡也。」
5. 子曰：「富與貴，是人之所以欲也，不以其道得之，不處也。貧與賤，是人之所以惡也，不以其道得之，不去也。君子去仁，惡乎成名？君子無終食之間違仁，造次必於是，顛沛必於是。」
6. 子曰：「我未見好仁者，惡不仁者。好仁者，無以尚之；惡不仁者，其為仁矣，不使不仁者加乎其身。有能一日用其力於仁矣乎？我未見力不足者。蓋有之矣，我未之見也！」

7. 子曰：「人之過也，各於其黨。觀過，斯知仁矣。」
8. 子曰：「朝聞道，夕死可矣！」
9. 子曰：「士志於道，而恥惡衣惡食者，未足與議也！」
10. 子曰：「君子之於天下也，無適也，無莫也，義之與比。」
11. 子曰：「君子懷德，小人懷土。君子懷刑，小人懷惠。」
12. 子曰：「放於利而行，多怨。」
13. 子曰：「能以禮讓為國乎，何有？不能以禮讓為國，如禮何？」
14. 子曰：「不患無位，患所以立。不患莫己知，求為可知也。」
15. 子曰：「參乎！吾道一以貫之。」曾子曰：「唯。」子出。門人問曰：「何謂也？」曾子曰：「夫子之道，忠恕而已矣！」
16. 子曰：「君子喻於義，小人喻於利。」
17. 子曰：「見賢思齊焉，見不賢而內自省也。」
18. 子曰：「事父母幾諫，見志不從，又敬不違，勞而不怨。」
19. 子曰：「父母在，不遠遊。遊必有方。」
20. 子曰：「三年無改於父之道，可謂孝矣。」
21. 子曰：「父母之年，不可不知也：一則以喜，一則以懼。」
22. 子曰：「古者言之不出，恥躬之不逮也。」
23. 子曰：「以約失之者，鮮矣！」
24. 子曰：「君子欲訥於言，而敏於行。」
25. 子曰：「德不孤，必有鄰。」
26. 子游曰：「事君數，斯辱矣；朋友數，斯疏矣。」



## 09【論語 5-6 篇】

### 公冶長第五

1. 子謂公冶長，「可妻也，雖在縲紲之中，非其罪也。」以其子妻之。
2. 子謂南容，「邦有道，不廢；邦無道，免於刑戮。」以其兄之子妻之。
3. 子謂子賤，「君子哉若人！魯無君子者，斯焉取斯？」
4. 子貢問曰：「賜也何如？」子曰：「女器也。」曰：「何器也？」曰：「瑚璉也。」
5. 或曰：「雍也，仁而不佞。」子曰：「焉用佞？禦人以口給，屢憎於人。不知其仁，焉用佞？」
6. 子使漆雕開仕。對曰：「吾斯之未能信。」子說。
7. 子曰：「道不行，乘桴浮於海。從我者，其由與？」子路聞之喜。子曰：「由也，好勇過我，無所取材。」

8. 孟武伯問：「子路仁乎？」子曰：「不知也。」又問。子曰：「由也，千乘之國，可使治其賦也；不知其仁也。」「求也何如？」子曰：「求也，千室之邑，百乘之家，可使為之宰也；不知其仁也。」「赤也何如？」子曰：「赤也，束帶立於朝，可使與賓客言也；不知其仁也。」
9. 子謂子貢曰：「女與回也孰愈？」對曰：「賜也何敢望回！回也聞一以知十，賜也聞一以知二。」子曰：「弗如也，吾與女弗如也。」
10. 宰予晝寢。子曰：「朽木不可雕也，糞土之牆，不可朽也。於予與何誅！」子曰：「始吾於人也，聽其言而信其行。今吾於人也，聽其言而觀其行。於予與改是！」
11. 子曰：「吾未見剛者！」或對曰：「申枨。」子曰：「枨也慾，焉得剛？」
12. 子貢曰：「我不欲人之加諸我也，吾亦欲無加諸人。」子曰：「賜也，非爾所及也！」
13. 子貢曰：「夫子之文章，可得而聞也。夫子之言性與天道，不可得而聞也。」
14. 子路有聞，未之能行，唯恐有聞。
15. 子貢問曰：「孔文子何以謂之文也？」子曰：「敏而好學，不恥下問，是以謂之文也。」
16. 子謂子產，「有君子之道四焉：其行己也恭，其事上也敬，其養民也惠，其使民也義。」
17. 子曰：「晏平仲善與人交，久而敬之。」
18. 子曰：「藏文仲居蔡，山節藻梲。何如其知也！」
19. 子張問曰：「令尹子文，三仕為令尹，無喜色。三已之，無愠色。舊令尹之政，必以告新令尹。何如？」子曰：「忠矣。」曰：「仁矣乎？」曰：「未知，焉得仁？」「崔子弑齊君，陳文子有馬十乘，棄而違之，至於他邦，則曰：『猶吾大夫崔子也！』違之，之一邦，則又曰：『猶吾大夫崔子也！』違之。何如？」子曰：「清矣。」曰：「仁矣乎？」曰：「未知，焉得仁？」
20. 季文子三思而後行。子聞之，曰：「再，斯可矣！」
21. 子曰：「甯武子，邦有道，則知；邦無道，則愚。其知可及也，其愚不可及也。」
22. 子在陳曰：「歸與！歸與！吾黨之小子狂簡，斐然成章，不知所以裁之。」
23. 子曰：「伯夷、叔齊，不念舊惡，怨是用希。」

24. 子曰：「孰謂微生高直？或乞醯焉，乞諸其鄰而與之。」
25. 子曰：「巧言、令色、足恭，左丘明恥之，丘亦恥之。匿怨而友其人，左丘明恥之，丘亦恥之。」
26. 顏淵、季路侍。子曰：「盍各言爾志？」子路曰：「願車馬、衣（輕）裘，與朋友共，敝之而無憾。」顏淵曰：「願無伐善，無施勞。」子路曰：「願聞子之志！」子曰：「老者安之，朋友信之，少者懷之。」
27. 子曰：「已矣乎！吾未見能見其過，而內自訟者也。」
28. 子曰：「十室之邑，必有忠信如丘者焉，不如丘之好學也。」

### 雍也第六

1. 子曰：「雍也，可使南面。」仲弓問子桑伯子，子曰：「可也，簡。」仲弓曰：「居敬而行簡，以臨其民，不亦可乎？居簡而行簡，無乃大簡乎？」子曰：「雍之言然。」
2. 哀公問：「弟子孰為好學？」孔子對曰：「有顏回者好學，不遷怒，不貳過，不幸短命死矣！今也則亡，未聞好學者也。」
3. 子華使於齊，冉子為其母請粟。子曰：「與之釜。」請益。曰：「與之庾。」冉子與之粟五秉。子曰：「赤之適齊也，乘肥馬，衣輕裘，吾聞之也：君子周急不繼富。」原思為之宰，與之粟九百。辭。子曰：「毋！以與爾鄰里鄉黨乎！」
4. 子謂仲弓曰：「犁牛之子，騂且角，雖欲勿用，山川其舍諸？」
5. 子曰：「回也，其心三月不違仁。其餘，則日月至焉而已矣。」
6. 季康子問：「仲由可使從政也與？」子曰：「由也果，於從政乎何有？」曰：「賜也可使從政也與？」曰：「賜也達，於從政乎何有？」曰：「求也可使從政也與？」曰：「求也藝，於從政乎何有？」
7. 季氏使閔子騫為費宰。閔子騫曰：「善為我辭焉！如有復我者，則吾必在汶上矣。」
8. 伯牛有疾，子問之，自牖執其手曰：「亡之，命矣夫！斯人也，而有斯疾也！斯人也，而有斯疾也！」
9. 子曰：「賢哉回也！一簞食，一瓢飲，在陋巷，人不堪其憂，回也不改其樂。賢哉回也！」
10. 冉求曰：「非不說子之道，力不足也。」子曰：「力不足者，中道而廢，今女畫。」
11. 子謂子夏曰：「女為君子儒，無為小人儒。」
12. 子游為武城宰。子曰：「女得人焉爾乎？」曰：「有澹臺滅明者，行不由徑，非公事，未嘗至於偃之室也。」

13. 子曰：「孟之反不伐，奔而殿，將入門，策其馬，曰：『非敢後也，馬不進也！』」
14. 子曰：「不有祝鮀之佞，而有宋朝之美，難乎免於今之世矣。」
15. 子曰：「誰能出不由戶？何莫由斯道也！」
16. 子曰：「質勝文則野，文勝質則史。文質彬彬，然後君子。」
17. 子曰：「人之生也直，罔之生也幸而免。」
18. 子曰：「知之者不如好之者，好之者不如樂之者。」
19. 子曰：「中人以上，可以語上也。中人以下，不可以語上也。」
20. 樊遲問知。子曰：「務民之義，敬鬼神而遠之，可謂知矣。」問仁。曰：「仁者先難而後獲，可謂仁矣。」
21. 子曰：「知者樂水，仁者樂山。知者動，仁者靜。知者樂，仁者壽。」
22. 子曰：「齊一變，至於魯。魯一變，至於道。」
23. 子曰：「觚不觚，觚哉觚哉！」
24. 宰我問曰：「仁者，雖告之曰：『井有仁焉。』其從之也？」子曰：「何為其然也？君子可逝也，不可陷也；可欺也，不可罔也。」
25. 子曰：「君子博學於文，約之以禮，亦可以弗畔矣夫！」
26. 子見南子。子路不說。夫子矢之曰：「予所否者，天厭之！天厭之！」
27. 子曰：「中庸之為德也，其至矣乎！民鮮久矣！」
28. 子貢曰：「如有博施於民，而能濟眾，何如？可謂仁乎？」子曰：「何事於仁，必也聖乎！堯舜其猶病諸！夫仁者，己欲立而立人，己欲達而達人。能近取譬，可謂仁之方也已。」

## 10【論語 7-8 篇】

### 述而第七

1. 子曰：「述而不作，信而好古，竊比於我老彭。」
2. 子曰：「默而識之，學而不厭，誨人不倦，何有於我哉？」
3. 子曰：「德之不修，學之不講，聞義不能徙，不善不能改，是吾憂也。」
4. 子之燕居，申申如也，夭夭如也。」
5. 子曰：「甚矣吾衰也！久矣，吾不復夢見周公！」
6. 子曰：「志於道，據於德，依於仁，游於藝。」
7. 子曰：「自行束脩以上，吾未嘗無誨焉！」
8. 子曰：「不憤不啟。不悱不發。舉一隅不以三隅反，則不復也。」
9. 子食於有喪者之側，未嘗飽也。子於是日哭，則不歌。

10. 子謂顏淵曰：「用之則行，舍之則藏，唯我與爾有是夫！」子路曰：「子行三軍，則誰與？」子曰：「暴虎馮河，死而不悔者，吾不與也。必也臨事而懼，好謀而成者也！」
11. 子曰：「富而可求也，誰執鞭之士，吾亦為之；如不可求，從吾所好。」
12. 子之所慎：齊、戰、疾。
13. 子在齊聞韶，三月不知肉味。曰：「不圖為樂之至於斯也！」
14. 冉有曰：「夫子為衛君乎？」子貢曰：「諾，吾將問之。」入曰：「伯夷、叔齊，何人也？」曰：「古之賢人也。」曰：「怨乎？」曰：「求仁而得仁，又何怨？」出，曰：「夫子不為也。」
15. 子曰：「飯疏食飲水，曲肱而枕之，樂亦在其中矣。不義而富且貴，於我如浮雲。」
16. 子曰：「加我數年，五十以學易，可以無大過矣。」
17. 子所雅言：詩、書、執禮，皆雅言也。
18. 葉公問孔子於子路，子路不對。子曰：「女奚不曰：『其為人也，發憤忘食，樂以忘憂，不知老之將至』云爾！」
19. 子曰：「我非生而知之者，好古，敏以求之者也。」
20. 子不語：怪、力、亂、神。
21. 子曰：「三人行，必有我師焉。擇其善者而從之；其不善者而改之。」
22. 子曰：「天生德於予，桓魋其如予何？」
23. 子曰：「二三子以我為隱乎？吾無隱乎爾！吾無行而不與二三子者，是丘也。」
24. 子以四教：文、行、忠、信。
25. 子曰：「聖人，吾不得而見之矣！得見君子者，斯可矣。」子曰：「善人，吾不得而見之矣！得見有恆者，斯可矣。亡而為有，虛而為盈，約而為泰，難乎有恆矣！」
26. 子釣而不綱，弋不射宿。
27. 子曰：「蓋有不知而作之者，我無是也。多聞，擇其善者而從之，多見而識之，知之次也。」
28. 互鄉難與言。童子見，門人惑。子曰：「與其進也，不與其退也。唯何甚？人潔己以進，與其潔也，不保其往也！」
29. 子曰：「仁遠乎哉？我欲仁，斯仁至矣！」
30. 陳司敗問：「昭公知禮乎？」孔子曰：「知禮。」孔子退，揖巫馬期而進之曰：「吾聞君子不黨，君子亦黨乎？君取於吳為同姓，謂之吳孟



子。君而知禮，孰不知禮？」巫馬期以告。子曰：「丘也幸，苟有過，人必知之。」

31. 子與人歌而善，必使反之，而後和之。
32. 子曰：「文，莫吾猶人也。躬行君子，則吾未之有得！」
33. 子曰：「若聖與仁，則吾豈敢？抑為之不厭，誨人不倦，則可謂云爾已矣！」公西華曰：「正唯弟子不能學也！」
34. 子疾病，子路請禱。子曰：「有諸？」子路對曰：「有之。誄曰：『禱爾於上下神祇』」子曰：「丘之禱久矣！」
35. 子曰：「奢則不孫，儉則固；與其不孫也，寧固。」
36. 子曰：「君子坦蕩蕩，小人長戚戚。」
37. 子溫而厲，威而不猛，恭而安。

## 泰伯第八

1. 子曰：「泰伯其可謂至德也已矣，三以天下讓，民無得而稱焉。」
2. 子曰：「恭而無禮則勞，慎而無禮則蕙，勇而無禮則亂，直而無禮則絞。君子篤於親，則民興於仁；故舊不遺，則民不偷。」
3. 曾子有疾，召門弟子曰：「啟予足！啟予手！詩云：『戰戰兢兢，如臨深淵，如履薄冰。』而今而後，吾知免夫！小子！」
4. 曾子有疾，孟敬子問之。曾子言曰：「鳥之將死，其鳴也哀，人之將死，其言也善。君子所貴乎道者三：動容貌，斯遠暴慢矣；正顏色，斯近信矣；出辭氣，斯遠鄙倍矣；籩豆之事，則有司存。」
5. 曾子曰：「以能問於不能，以多問於寡，有若無，實若虛，犯而不校。昔者吾友，嘗從事於斯矣。」
6. 曾子曰：「可以託六尺之孤，可以寄百里之命，臨大節而不可奪也。君子人與？君子人也！」
7. 曾子曰：「士不可以不弘毅，任重而道遠。仁以為己任，不亦重乎！死而後已，不亦遠乎！」
8. 子曰：「興於詩，立於禮，成於樂。」
9. 子曰：「民可使由之，不可使知之。」
10. 子曰：「好勇疾貧，亂也。人而不仁，疾之已甚，亂也。」
11. 子曰：「如有周公之才之美，使驕且吝，其餘不足觀也已。」
12. 子曰：「三年學，不至於穀，不易得也。」
13. 子曰：「篤信好學，守死善道。危邦不入，亂邦不居。天下有道則見，無道則隱。邦有道，貧且賤焉，恥也；邦無道，富且貴焉，恥也。」

14. 子曰：「不在其位，不謀其政。」
15. 子曰：「師摯之始，闕雎之亂，洋洋乎，盈耳哉！」
16. 子曰：「狂而不直，侗而不愿，愴愴而不信，吾不知之矣！」
17. 子曰：「學如不及，猶恐失之！」
18. 子曰：「巍巍乎，舜禹之有天下也，而不與焉。」
19. 子曰：「大哉，堯之為君也！巍巍乎，唯天為大，唯堯則之！蕩蕩乎，民無能名焉！巍巍乎，其有成功也！煥乎，其有文章！」
20. 舜有臣五人，而天下治，武王曰：「予有亂臣十人。」孔子曰：「『才難』，不其然乎？唐虞之際，於斯為盛，有婦人焉，九人而已。三分天下有其二，以服事殷，周之德，其可謂至德也已矣！」
21. 子曰：「禹，吾無間然矣！菲飲食，而致孝乎鬼神；惡衣服，而致美乎黻冕；卑宮室，而盡力乎溝洫。禹，吾無間然矣！」



## 11【論語 9-10 篇】

### 子罕第九

1. 子罕言利，與命與仁。
2. 達巷黨人曰：「大哉孔子！博學而無所成名。」子聞之，謂門弟子曰：「吾何執？執御乎？執射乎？吾執御矣！」
3. 子曰：「麻冕，禮也，今也純，儉，吾從眾。拜下，禮也。今拜乎上，泰也。雖違眾，吾從下。」
4. 子絕四：毋意，毋必，毋固，毋我。
5. 子畏於匡。曰：「文王既沒，文不在茲乎？天之將喪斯文也，後死者，不得與於斯文也。天之未喪斯文也，匡人其如予何？」
6. 大宰問於子貢曰：「夫子聖者與？何其多能也？」子貢曰：「固天縱之將聖，又多能也。」子聞之曰：「大宰知我乎！吾少也賤，故多能鄙事。君子多乎哉？不多也！」宰曰：「子云：『吾不試，故藝。』」
7. 子曰：「吾有知乎哉？無知也。有鄙夫問於我，空空如也；我叩其兩端而竭焉。」
8. 子曰：「鳳鳥不至，河不出圖，吾已矣夫！」
9. 子見齊衰者，冕衣裳者，與瞽者，見之，雖少必作，過之必趨。」
10. 顏淵喟然歎曰：「仰之彌高，鑽之彌堅，瞻之在前，忽焉在後！夫子循循然善誘人：博我以文，約我以禮。欲罷不能，既竭吾才，如有所立卓爾，雖欲從之，末由也已！」

11. 子疾病，子路使門人為臣。病閒，曰：「久矣哉，由之行詐也！無臣而為有臣，吾誰欺？欺天乎？且予與其死於臣之手也，無寧死於二三子之手乎！且予縱不得大葬，予死於道路乎？」
12. 子貢曰：「有美玉於斯，韞匱而藏諸？求善賈而沽諸？」子曰：「沽之哉！沽之哉！我待賈者也！」
13. 子欲居九夷。或曰：「陋，如之何？」子曰：「君子居之，何陋之有？」
14. 子曰：「吾自衛反魯，然後樂正，雅頌各得其所。」
15. 子曰：「出則事公卿，入則事父兄，喪事不敢不勉，不為酒困，何有於我哉？」
16. 子在川上曰：「逝者如斯夫！不舍晝夜。」
17. 子曰：「吾未見好德如好色者也。」
18. 子曰：「譬如為山，未成一簣，止，吾止也！譬如平地，雖覆一簣，進，吾往也！」
19. 子曰：「語之而不惰者，其回也與！」
20. 子謂顏淵，曰：「惜乎！吾見其進也，未見其止也！」
21. 子曰：「苗而不秀者，有矣夫！秀而不實者，有矣夫！」
22. 子曰：「後生可畏，焉知來者之不如今也？四十五十而無聞焉，斯亦不足畏也已！」
23. 子曰：「法語之言，能無從乎！改之為貴。巽與之言，能無說乎？繹之為貴。說而不繹，從而不改，吾末如之何也已矣！」
24. 子曰：「主忠信，毋友不如己者，過則勿憚改。」
25. 子曰：「三軍可奪帥也，匹夫不可奪志也。」
26. 子曰：「衣敝緼袍，與衣狐貉者立，而不恥者，其由也與！不忤不求，何用不臧？」子路終身誦之。子曰：「是道也，何足以臧？」
27. 子曰：「歲寒，然後知松柏之後彫也。」
28. 子曰：「知者不惑，仁者不憂，勇者不懼。」
29. 子曰：「可與共學，未可與適道；可與適道，未可與立；可與立，未可與權。」
30. 「唐棣之華，偏其反而；豈不爾思？室是遠而。」子曰：「未之思也，夫何遠之有？」

## 鄉黨第十

1. 孔子於鄉黨，恂恂如也，似不能言者。其在宗廟朝廷，便便言，唯謹爾。
2. 朝與下大夫言，侃侃如也；與上大夫言，誾誾如也。君在，蹏蹏如也，與與如也。
3. 君召使擯，色勃如也。足躩如也，揖所與立，左右手，衣前後，襜如也。趨進，翼如也。賓退，必復命，曰：「賓不顧矣。」
4. 入公門，鞠躬如也，如不容。立不中門，行不履闕。過位，色勃如也，足躩如也，其言似不足者。攝齊升堂，鞠躬如也，屏氣似不息者。出降一等，逞顏色，怡怡如也，沒階趨，翼如也。復其位，蹏蹏如也。
5. 執圭，鞠躬如也，如不勝。上如揖，下如授，勃如戰色，足縮縮如有循。享禮，有容色。私覲，愉愉如也。
6. 君子不以紺緌飾，紅紫不以為褻服。當暑，袵絺綌，必表而出之。緇衣羔裘，素衣麕裘，黃衣狐裘。褻裘長，短右袂。必有寢衣，長一身有半。狐貉之厚以居。去喪，無所不佩。非帷裳，必殺之。羔裘玄冠，不以弔。吉月，必朝服而朝。
7. 齊，必有明衣，布。齊必變食。居必遷坐。
8. 食不厭精，膾不厭細，食饁而餲，魚餒而肉敗，不食。色惡不食，臭惡不食。失飪不食，不時不食，割不正不食，不得其醬不食。肉雖多，不使勝食氣。惟酒無量，不及亂。沽酒市脯不食。不撤薑食，不多食。祭于公，不宿肉。祭肉不出三日，出三日，不食之矣。食不語，寢不言。雖蔬食菜羹瓜祭。必齊如也。
9. 席不正不坐。
10. 鄉人飲酒，杖者出，斯出矣。鄉人儺，朝服而立於阼階。
11. 問人於他邦，再拜而送之。康子饋藥，拜而受之，曰：「丘未達，不敢嘗。」
12. 廋焚，子退朝，曰：「傷人乎？」不問馬。
13. 君賜食，必正席先嘗之。君賜腥，必熟而薦之。君賜生，必畜之。侍食於君，君祭，先飯。疾，君視之，東首，加朝服拖紳，君命召，不俟駕行矣。
14. 入大廟，每事問。
15. 朋友死，無所歸，曰：「於我殯。」朋友之饋，雖車馬，非祭肉，不拜。
16. 寢不尸，居不容。見齊衰者，雖狎必變。見冕者與瞽者，雖褻必以貌。凶服者式之，式負版者。有盛饌，必變色而作。迅雷、風烈，必變。
17. 升車，必正立，執綏。車中不內顧，不疾言，不親指。

18. 色斯舉矣，翔而後集。曰：「山梁雌雉，時哉時哉！」子路共之，三嗅而作。



## 12【論語 11-12 篇】

### 先進第十一

1. 子曰：「先進於禮樂，野人也。後進於禮樂，君子也。如用之，則吾從先進。」
2. 子曰：「從我於陳、蔡者，皆不及門也。」德行：顏淵、閔子騫、冉伯牛、仲弓。言語：宰我、子貢。政事：冉有、季路。文學：子游、子夏。
3. 子曰：「回也，非助我者也！於吾言，無所不說。」
4. 子曰：「孝哉閔子騫！人不聞於其父母昆弟之言。」
5. 南容三復白圭，孔子以其兄之子妻之。
6. 季康子問：「弟子孰為好學？」孔子對曰：「有顏回者好學，不幸短命死矣！今也則亡。」
7. 顏淵死，顏路請子之車以為之槨。子曰：「才不才，亦各言其子也。鯉也死，有棺而無槨。吾不徒行以為之槨，以吾從大夫之後，不可徒行也。」
8. 顏淵死，子曰：「噫！天喪予！天喪予！」
9. 顏淵死，子哭之慟。從者曰：「子慟矣！」曰：「有慟乎？非夫人之為慟而誰為？」
10. 顏淵死，門人欲厚葬之。子曰：「不可！」門人厚葬之。子曰：「回也，視予猶父也，予不得視猶子也。非我也，夫二三子也。」
11. 季路問事鬼神。子曰：「未能事人，焉能事鬼？」曰：「敢問死？」曰：「未知生，焉知死？」
12. 閔子侍側，閔閔如也；子路，行行如也；冉有、子貢，侃侃如也。子樂。「若由也，不得其死然。」
13. 魯人為長府。閔子騫曰：「仍舊貫，如之何？何必改作！」子曰：「夫人不言，言必有中。」
14. 子曰：「由之瑟，奚為於丘之門？」門人不敬子路。子曰：「由也升堂矣，未入於室也！」
15. 子貢問：「師與商也孰賢？」子曰：「師也過，商也不及。」曰：「然則師愈與？」子曰：「過猶不及。」
16. 季氏富於周公，而求也為之聚斂而附益之。子曰：「非吾徒也，小子鳴鼓而攻之可也！」
17. 柴也愚，參也魯，師也辟，由也嘑。

18. 子曰：「回也其庶乎！屢空。賜不受命而貨殖焉，億則屢中。」
19. 子張問善人之道。子曰：「不踐迹，亦不入於室。」
20. 子曰：「論篤是與，君子者乎？色莊者乎？」
21. 子路問：「聞斯行諸？」子曰：「有父兄在，如之何其聞斯行之！」冉有問：「聞斯行諸？」子曰：「聞斯行之！」公西華曰：「由也問『聞斯行諸』？子曰：『有父兄在。』求也問，『聞斯行諸』？子曰：『聞斯行之。』赤也惑，敢問？」子曰：「求也退，故進之；由也兼人，故退之。」
22. 子畏於匡，顏淵後。子曰：「吾以女為死矣！」曰：「子在，回何敢死！」
23. 季子然問：「仲由、冉求，可謂大臣與？」子曰：「吾以子為異之問，曾由與求之問。所謂大臣者，以道事君，不可則止。今由與求也，可謂具臣矣。」曰：「然則從之者與？」子曰：「弑父與君，亦不從也。」
24. 子路使子羔為費宰。子曰：「賊夫人之子！」子路曰：「有民人焉，有社稷焉，何必讀書，然後為學？」子曰：「是故惡夫佞者。」
25. 子路、曾皙、冉有、公西華侍坐。子曰：「以吾一日長乎爾，毋吾以也。居則曰：『不吾知也！』如或知爾，則何以哉？」
- 子路率爾而對曰：「千乘之國，攝乎大國之間，加之以師旅，因之以饑饉，由也為之，比及三年，可使有勇，且知方也。」夫子哂之。
- 「求，爾何如？」對曰：「方六七十，如五六十，求也為之，比及三年，可使足民；如其禮樂，以俟君子。」
- 「赤，爾何如？」對曰：「非曰能之，願學焉！宗廟之事，如會同，端章甫，願為小相焉。」
- 「點，爾何如？」鼓瑟希，鏗爾，舍瑟而作；對曰：「異乎三子者之撰。」子曰：「何傷乎？亦各言其志也。」曰：「莫春者，春服既成；冠者五六人，童子六七人。浴乎沂，風乎舞雩，詠而歸。」夫子喟然歎曰：「吾與點也！」
- 三子者出，曾皙後。曾皙曰：「夫三子者之言何如？」子曰：「亦各言其志也已矣！」曰：「夫子何哂由也？」曰：「為國以禮，其言不讓，是故哂之。」「唯求則非邦也與？」「安見方六七十，如五六十，而非邦也者？」「唯赤則非邦也與？」「宗廟會同，非諸侯而何？赤也為之小，孰能為之大！」

## 顏淵第十二

1. 顏淵問仁。子曰：「克己復禮為仁。一日克己復禮，天下歸仁焉。為仁由己，而由仁乎哉？」顏淵曰：「請問其目？」子曰：「非禮勿視，非禮勿聽，非禮勿言，非禮勿動。」顏淵曰：「回雖不敏，請事斯語矣！」
2. 仲弓問仁。子曰：「出門如見大賓，使民如承大祭。己所不欲，勿施於人。在邦無怨，在家無怨。」仲弓曰：「雍雖不敏，請事斯語矣！」
3. 司馬牛問仁。子曰：「仁者，其言也訥。」曰：「其言也訥，斯謂之仁已乎？」子曰：「為之難，言之得無訥乎？」
4. 司馬牛問君子。子曰：「君子不憂不懼。」曰：「不憂不懼，斯謂之君子已乎？」子曰：「內省不疚，夫何憂何懼！」
5. 司馬牛憂曰：「人皆有兄弟，我獨亡！」子夏曰：「商聞之矣：『死生有命，富貴在天』。君子敬而無失，與人恭而有禮，四海之內，皆兄弟也。君子何患乎無兄弟也？」
6. 子張問明。子曰：「浸潤之譖，膚受之愬，不行焉，可謂明也已矣。浸潤之譖，膚受之愬，不行焉，可謂遠也已矣。」
7. 子貢問政。子曰：「足食，足兵，民信之矣。」子貢曰：「必不得已而去，於斯三者何先？」曰：「去兵。」子貢曰：「必不得已而去，於斯二者何先？」曰：「去食。自古皆有死，民無信不立。」
8. 棘子成曰：「君子質而已矣，何以文為？」子貢曰：「惜乎，夫子之說君子也，駟不及舌！文猶質也，質猶文也。虎豹之鞞，猶犬羊之鞞？」
9. 哀公問於有若曰：「年饑，用不足，如之何？」有若對曰：「盍徹乎？」曰：「二，吾猶不足，如之何其徹也？」對曰：「百姓足，君孰與不足？百姓不足，君孰與足？」
10. 子張問崇德，辨惑。子曰：「主忠信，徙義，崇德也。愛之欲其生，惡之欲其死；既欲其生，又欲其死，是惑也！」（誠不以富，亦祇以異。）
11. 齊景公問政於孔子。孔子對曰：「君君，臣臣，父父，子子。」公曰：「善哉！信如君不君，臣不臣，父不父，子不子，雖有粟，吾得而食諸？」
12. 子曰：「片言可以折獄者，其由也與！」子路無宿諾。
13. 子曰：「聽訟，吾猶人也。必也使無訟乎！」
14. 子張問政。子曰：「居之無倦，行之以忠。」
15. 子曰：「博學於文，約之以禮，亦可以弗畔矣夫。」
16. 子曰：「君子成人之美，不成人之惡；小人反是。」
17. 季康子問政於孔子。孔子對曰：「政者正也，子帥以正，孰敢不正？」

18. 季康子患盜，問於孔子。孔子對曰：「苟子之不欲，雖賞之不竊！」
19. 季康子問政於孔子曰：「如殺無道，以就有道，何如？」孔子對曰：「子為政，焉用殺？子欲善，而民善矣！君子之德風，小人之德草；草上之風，必偃。」
20. 子張問：「士何如斯可謂之達矣？」子曰：「何哉？爾所謂達者！」子張對曰：「在邦必聞，在家必聞。」子曰：「是聞也，非達也。夫達也者：質直而好義，察言而觀色，慮以下人，在邦必達，在家必達。夫聞也者：色取仁而行違，居之不疑。在邦必聞，在家必聞。」
21. 樊遲從遊於舞雩之下，曰：「敢問崇德、脩慝、辨惑。」子曰：「善哉問！先事後得，非崇德與？攻其惡，無攻人之惡，非脩慝與？一朝之忿，忘其身以及其親，非惑與？」
22. 樊遲問仁。子曰：「愛人。」問知。子曰：「知人。」樊遲未達。子曰：「舉直錯諸枉，能使枉者直。」樊遲退，見子夏曰：「鄉也，吾見於夫子而問知。子曰：『舉直錯諸枉，能使枉者直。』何謂也？」子夏曰：「富哉言乎！舜有天下，選於眾，舉皋陶，不仁者遠矣；湯有天下，選於眾，舉伊尹，不仁者遠矣。」
23. 子貢問友。子曰：「忠告而善道之，不可則止，毋自辱焉。」
24. 曾子曰：「君子以文會友；以友輔仁。」



## 13【論語 13-14 篇】

### 子路第十三

1. 子路問「政」。子曰：「先之，勞之。」請益。曰：「無倦。」
2. 仲弓為季氏宰，問政。子曰：「先有司，赦小過，舉賢才。」曰：「焉知賢才而舉之？」曰：「舉爾所知，爾所不知，人其舍諸？」
3. 子路曰：「衛君待子而為政，子將奚先？」子曰：「必也正名乎！」子路曰：「有是哉？子之迂也。奚其正？」子曰：「野哉，由也！君子於其所不知，蓋闕如也。名不正，則言不順；言不順，則事不成；事不成，則禮樂不興；禮樂不興，則刑罰不中；刑罰不中，則民無所措手足。故君子名之必可言也，言之必可行也。君子於其言，無所苟而已矣！」
4. 樊遲請學稼，子曰：「吾不如老農。」請學為圃，曰：「吾不如老圃。」樊遲出，子曰：「小人哉，樊須也！上好禮，則民莫敢不敬；上好義，則民莫敢不服；上好信，則民莫敢不用情。夫如是，則四方之民，襁負其子而至矣，焉用稼？」



5. 子曰：「誦詩三百，授之以政，不達；使於四方，不能專對。雖多，亦奚以為？」
6. 子曰：「其身正，不令而行；其身不正，雖令不從。」
7. 子曰：「魯衛之政，兄弟也。」
8. 子謂衛公子荆，「善居室。始有，曰：『苟合矣。』少有，曰：『苟完矣。』富有，曰：『苟美矣。』」
9. 子適衛，冉有僕。子曰：「庶矣哉！」冉有曰：「既庶矣，又何加焉？」曰：「富之。」曰：「既富矣，又何加焉？」曰：「教之。」
10. 子曰：「苟有用我者，期月而已可也，三年有成。」
11. 子曰：「『善人為邦百年，亦可以勝殘去殺矣。』誠哉是言也！」
12. 子曰：「如有王者，必世而後仁。」
13. 子曰：「苟正其身矣，於從政乎何有？不能正其身，如正人何？」
14. 冉子退朝，子曰：「何晏也？」對曰：「有政。」子曰：「其事也！如有政，雖不吾以；吾其與聞之！」
15. 定公問：「一言而可以興邦，有諸？」孔子對曰：「言不可以若是其幾也！人之言曰：『為君難，為臣不易。』如知為君之難也，不幾乎一言而興邦乎？」曰：「一言而喪邦，有諸？」孔子對曰：「言不可以若是其幾也！人之言曰：『予無樂乎為君，唯其言而莫予違也。』如其善而莫之違也，不亦善乎？如不善而莫之違也，不幾乎一言而喪邦乎？」
16. 葉公問政。子曰：「近者說，遠者來。」
17. 子夏為莒父宰，問政。子曰：「無欲速，無見小利；欲速則不達；見小利則大事不成。」
18. 葉公語孔子曰：「吾黨有直躬者，其父攘羊而子證之。」孔子曰：「吾黨之直者異於是，父為子隱，子為父隱，直在其中矣。」
19. 樊遲問仁。子曰：「居處恭，執事敬，與人忠，雖之夷狄，不可棄也。」
20. 子貢問曰：「何如斯可謂之士矣？」子曰：「行己有恥，使於四方，不辱君命，可謂士矣。」曰：「敢問其次？」曰：「宗族稱孝焉，鄉黨稱弟焉。」曰：「敢問其次？」曰：「言必信，行必果；硜硜然，小人哉！抑亦可以為次矣。」曰：「今之從政者何如？」子曰：「噫！斗筲之人，何足算也！」
21. 子曰：「不得中行而與之，必也狂狷乎！狂者進取，狷者有所不為也。」
22. 子曰：「南人有言曰：『人而無恆，不可以作巫醫。』善夫！『不恆其德，或承之羞。』」子曰：「不占而已矣。」
23. 子曰：「君子和而不同，小人同而不和。」

24. 子貢問曰：「鄉人皆好之，何如？」子曰：「未可也。」「鄉人皆惡之，何如？」子曰：「未可也。不如鄉人之善者好之，其不善者惡之。」
25. 子曰：「君子易事而難說也；說之不以道，不說也；及其使人也，器之。小人難事而易說也。說之雖不以道，說也；及其使人也，求備焉。」
26. 子曰：「君子泰而不驕；小人驕而不泰。」
27. 子曰：「剛毅木訥，近仁。」
28. 子路問曰：「何如斯可謂之士矣？」子曰：「切切偲偲、怡怡如也，可謂士矣。朋友切切偲偲，兄弟怡怡。」
29. 子曰：「善人教民七年，亦可以即戎矣。」
30. 子曰：「以不教民戰，是謂棄之。」

#### 憲問第十四

1. 憲問恥。子曰：「邦有道穀，邦無道穀，恥也。」
2. 「克、伐、怨、欲，不行焉，可以為仁矣？」子曰：「可以為難矣，仁則吾不知也。」
3. 子曰：「士而懷居，不足以為士矣！」
4. 子曰：「邦有道，危言危行；邦無道，危行言孫。」
5. 子曰：「有德者必有言，有言者不必有德。仁者必有勇，勇者不必有仁。」
6. 南宮适問於孔子曰：「羿善射，奭盪舟，俱不得其死然。禹稷躬稼而有天下。」夫子不答。南宮适出，子曰：「君子哉若人！尚德哉若人！」
7. 子曰：「君子而不仁者有矣夫！未有小人而仁者也！」
8. 子曰：「愛之，能勿勞乎？忠焉，能勿誨乎？」
9. 子曰：「為命，裨諶草創之，世叔討論之，行人子羽脩飾之，東里子產潤色之。」
10. 或問「子產」。子曰：「惠人也。」問「子西」。曰：「彼哉彼哉！」問「管仲」。曰：「人也，奪伯氏駢邑三百，飯疏食，沒齒，無怨言。」
11. 子曰：「貧而無怨，難，富而無驕，易。」
12. 子曰：「孟公綽，為趙魏老則優，不可以為滕薛大夫。」
13. 子路問成人。子曰：「若臧武仲之知，公綽之不欲，卞莊子之勇，冉求之藝，文之以禮樂，亦可以為成人矣！」曰：「今之成人者，何必然？見利思義，見危授命，久要不忘平生之言，亦可以為成人矣！」
14. 子問「公叔文子」於公明賈，曰：「信乎？夫子不言不笑不取乎？」公明賈對曰：「以告者過也！夫子時然後言，人不厭其言；樂然後笑，人不厭其笑；義然後取，人不厭其取。」子曰：「其然！豈其然乎？」

15. 子曰：「臧武仲以防，求為後於魯，雖曰不要君，吾不信也。」
16. 子曰：「晉文公譎而不正，齊桓公正而不譎。」
17. 子路曰：「桓公殺公子糾，召忽死之，管仲不死。」曰：「未仁乎？」子曰：「桓公九合諸侯，不以兵車，管仲之力也。如其仁！如其仁！」
18. 子貢曰：「管仲非仁者與？桓公殺公子糾，不能死，又相之。」子曰：「管仲相桓公，霸諸侯，一匡天下，民到于今受其賜；微管仲，吾其披髮左衽矣！豈若匹夫匹婦之為諒也，自經於溝瀆，而莫之知也！」
19. 公叔文子之臣大夫僕，與文子同升諸公。子聞之曰：「可以為文矣！」
20. 子言衛靈公之無道也，康子曰：「夫如是，奚而不喪？」孔子曰：「仲叔圉治賓客，祝鮀治宗廟，王孫賈治軍旅。夫如是，奚其喪？」
21. 子曰：「其言之不怍，則為之也難！」
22. 陳成子弑簡公。孔子沐浴而朝，告於哀公曰：「陳恆弑其君，請討之。」公曰：「告夫三子。」孔子曰：「以吾從大夫之後，不敢不告也！君曰：『告夫三子』者！之三子告，不可。孔子曰：「以吾從大夫之後，不敢不告也！」
23. 子路問事君。子曰：「勿欺也，而犯之。」
24. 子曰：「君子上達，小人下達。」
25. 子曰：「古之學者為己，今之學者為人。」
26. 蘧伯玉使人於孔子，孔子與之坐而問焉。曰：「夫子何為？」對曰：「夫子欲寡其過而未能也。」使者出。子曰：「使乎！使乎！」
27. 子曰：「不在其位，不謀其政。」
28. 曾子：「君子思不出其位。」
29. 子曰：「君子恥其言而過其行。」
30. 子曰：「君子道者三，我無能焉：仁者不憂，知者不惑，勇者不懼。」子貢曰：「夫子自道也！」
31. 子貢方人。子曰：「賜也，賢乎哉？夫我則不暇！」
32. 子曰：「不患人之不己知，患其不能也。」
33. 子曰：「不逆詐，不億不信，抑亦先覺者，是賢乎？」
34. 微生畝謂孔子曰：「丘，何為是恂恂者與？無乃為佞乎？」孔子曰：「非敢為佞也，疾固也。」
35. 子曰：「驥不稱其力，稱其德也。」
36. 或曰：「以德報怨，何如？」子曰：「何以報德？以直報怨，以德報德。」

37. 子曰：「莫我知也夫！」子貢曰：「何為其莫知子也？」子曰：「不怨天，不尤人，下學而上達。知我者，其天乎！」
38. 公伯寮愬子路於季孫，子服景伯以告，曰：「夫子固有惑志於公伯寮，吾力猶能肆諸市朝。」子曰：「道之將行也與，命也；道之將廢也與，命也。公伯寮其如命何？」
39. 子曰：「賢者辟世，其次辟地，其次辟色，其次辟言。」
40. 子曰：「作者七人矣。」
41. 子路宿於石門。晨門曰：「奚自？」子路曰：「自孔氏。」曰：「是知其不可而為之者與？」
42. 子擊磬於衛。有荷蕢而過孔氏之門者，曰：「有心哉，擊磬乎！」既而曰：「鄙哉，硜硜乎！莫己知也，斯已而已矣！『深則厲，淺則揭。』」子曰：「果哉！末之難矣！」
43. 子張曰：「書云：『高宗諒陰，三年不言。』何謂也？」子曰：「何必高宗，古之人皆然。君薨，百官總己以聽於冢宰，三年。」
44. 子曰：「上好禮，則民易使也。」
45. 子路問「君子」。子曰：「脩己以敬。」曰：「如斯而已乎？」曰：「脩己以安人。」曰：「如斯而已乎？」曰：「脩己以安百姓。脩己以安百姓，堯舜其猶病諸。」
46. 原壤夷俟。子曰：「幼而不孫弟，長而無述焉，老而不死是為賊。」以杖叩其脛。
47. 闕黨，童子將命。或問之曰：「益者與？」子曰：「吾見其居於位也，見其與先生並行也，非求益者也，欲速成者也。」



## 14【論語 15-16 篇】

### 衛靈公第十五

1. 衛靈公問陳於孔子，孔子對曰：「俎豆之事，則嘗聞之矣；軍旅之事，未之學也。」明日遂行。在陳絕糧。從者病，莫能興。子路慍見曰：「君子亦有窮乎？」子曰：「君子固窮，小人窮斯濫矣。」
2. 子曰：「賜也，女以予為多學而識之者與？」對曰：「然，非與？」曰：「非也，予一以貫之。」
3. 子曰：「由，知德者鮮矣！」
4. 子曰：「無為而治者，其舜也與！夫何為哉？恭己正南面而已矣。」

5. 子張問行。子曰：「言忠信，行篤敬，雖蠻貊之邦行矣。言不忠信，行不篤敬，雖州里行乎哉？立，則見其參於前也；在輿，則見其倚於衡也。夫然後行。」子張書諸紳。
6. 子曰：「直哉史魚！邦有道，如矢；邦無道，如矢。君子哉蘧伯玉！邦有道，則仕；邦無道，則可卷而懷之。」
7. 子曰：「可與言，而不與之言，失人；不可與言，而與之言，失言。知者不失人，亦不失言。」
8. 子曰：「志士仁人，無求生以害仁，有殺身以成仁。」
9. 子貢問為仁。子曰：「工欲善其事，必先利其器。居是邦也，事其大夫之賢者，友其士之仁者。」
10. 顏淵問為邦。子曰：「行夏之時，乘殷之輅，服周之冕，樂則韶舞。放鄭聲，遠佞人。鄭聲淫，佞人殆。」
11. 子曰：「人無遠慮，必有近憂。」
12. 子曰：「已矣乎！吾未見好德如好色者也！」
13. 子曰：「臧文仲，其竊位者與！知柳下惠之賢，而不與立也。」
14. 子曰：「躬自厚，而薄責於人，則遠怨矣！」
15. 子曰：「不曰：『如之何，如之何』者，吾末如之何也已矣！」
16. 子曰：「群居終日，言不及義，好行小慧，難矣哉！」
17. 子曰：「君子義以為質，禮以行之，孫以出之，信以成之，君子哉！」
18. 子曰：「君子病無能焉，不病人之不己知也。」
19. 子曰：「君子疾沒世而名不稱焉。」
20. 子曰：「君子求諸己，小人求諸人。」
21. 子曰：「君子矜而不爭，群而不黨。」
22. 子曰：「君子不以言舉人，不以人廢言。」
23. 子貢問曰：「有一言而可以終身行之者乎？」子曰：「其恕乎！己所不欲，勿施於人。」
24. 子曰：「吾之於人也，誰毀誰譽？如有所譽者，其有所試矣。斯民也，三代之所以直道而行也。」
25. 子曰：「吾猶及史之闕文也，有馬者，借人乘之，今亡矣夫！」
26. 子曰：「巧言亂德，小不忍，則亂大謀。」
27. 子曰：「眾惡之，必察焉；眾好之，必察焉。」
28. 子曰：「人能弘道，非道弘人。」
29. 子曰：「過而不改，是謂過矣！」
30. 子曰：「吾嘗終日不食，終夜不寢，以思，無益，不如學也。」

31. 子曰：「君子謀道不謀食。耕也，餒在其中矣；學也，祿在其中矣。君子憂道不憂貧。」
32. 子曰：「知及之，仁不能守之，雖得之，必失之。知及之，仁能守之，不莊以涖之，則民不敬。知及之，仁能守之，莊以涖之，動之不以禮，未善也。」
33. 子曰：「君子不可小知，而可大受也。小人不可大受，而可小知也。」
34. 子曰：「民之於仁也，甚於水火。水火，吾見蹈而死者矣，未見蹈仁而死者也。」
35. 子曰：「當仁不讓於師。」
36. 子曰：「君子貞而不諒。」
37. 子曰：「事君敬其事而後其食。」
38. 子曰：「有教無類。」
39. 子曰：「道不同，不相為謀。」
40. 子曰：「辭，達而已矣！」
41. 師冕見。及階，子曰：「階也。」及席，子曰：「席也。」皆坐，子告之曰：「某在斯，某在斯。」師冕出，子張問曰：「與師言之道與？」子曰：「然，固相師之道也。」

## 季氏第十六

1. 季氏將伐顓臾。冉有季路見於孔子曰：「季氏將有事於顓臾。」孔子曰：「求！無乃爾是過與？夫顓臾，昔者先王以為東蒙主，且在邦域之中矣，是社稷之臣也，何以伐為？」冉有曰：「夫子欲之，吾二臣者，皆不欲也。」孔子曰：「求！周任有言曰：『陳力就列，不能者止。』危而不持，顛而不扶，則將焉用彼相矣？且爾言過矣！虎兕出於柙，龜玉毀於楨中，是誰之過與？」冉有曰：「今夫顓臾，固而近於費；今不取，後世必為子孫憂。」孔子曰：「求，君子疾夫舍曰欲之，而必為之辭。丘也，聞有國有家者，不患寡而患不均，不患貧而患不安。蓋均無貧，和無寡，安無傾。夫如是，故遠人不服，則修文德以來之。既來之，則安之。今由與求也，相夫子，遠人不服而不能來也，邦分崩離析，而不能守也；而謀動干戈於邦內。吾恐季孫之憂，不在顓臾，而在蕭牆之內也！」
2. 孔子曰：「天下有道，則禮樂征伐自天子出；天下無道，則禮樂征伐自諸侯出。自諸侯出，蓋十世希不失矣；自大夫出，五世希不失矣；陪臣執國命，三世希不失矣。天下有道，則政不在大夫。天下有道，則庶人不議。」

3. 孔子曰：「祿之去公室，五世矣，政逮於大夫，四世矣。故夫三桓之子孫，微矣。」
4. 孔子曰：「益者三友，損者三友：友直，友諒，友多聞，益矣；友便辟，友善柔，友便佞，損矣。」
5. 孔子曰：「益者三樂，損者三樂：樂節禮樂，樂道人之善，樂多賢友，益矣。樂驕樂，樂佚遊，樂宴樂，損矣。」
6. 孔子曰：「侍於君子有三愆：言未及之而言，謂之躁；言及之而不言，謂之隱；未見顏色而言，謂之瞽。」
7. 孔子曰：「君子有三戒：少之時，血氣未定，戒之在色；及其壯也，血氣方剛，戒之在鬥；及其老也，血氣既衰，戒之在得。」
8. 孔子曰：「君子有三畏：畏天命，畏大人，畏聖人之言。小人不知天命而不畏也，狎大人，侮聖人之言。」
9. 孔子曰：「生而知之者，上也；學而知之者，次也；困而學之，又其次也。困而不學，民斯為下矣！」
10. 孔子曰：「君子有九思：視思明，聽思聰，色思溫，貌思恭，言思忠，事思敬，疑思問，忿思難，見得思義。」
11. 孔子曰：「『見善如不及，見不善如探湯。』吾見其人矣，吾聞其語矣！『隱居以求其志，行義以達其道。』吾聞其語矣，未見其人也！」
12. 「齊景公有馬千駟，死之日，民無德而稱焉。伯夷、叔齊餓於首陽之下，民到于今稱之。（『誠不以富，亦祇以異。』）其斯之謂與？」
13. 陳亢問於伯魚曰：「子亦有異聞乎？」對曰：「未也。嘗獨立，鯉趨而過庭。曰：『學詩乎？』對曰：『未也。』『不學詩，無以言！』鯉退而學詩。他日，又獨立，鯉趨而過庭。曰：『學禮乎？』對曰：『未也。』『不學禮，無以立！』鯉退而學禮。聞斯二者。」陳亢退而喜曰：「問一得三，聞詩，聞禮，又聞君子之遠其子也。」
14. 邦君之妻，君稱之曰「夫人」，夫人自稱曰「小童」，邦人稱之曰「君夫人」，稱諸異邦曰「寡小君」。異邦人稱之，亦曰「君夫人」。



## 15【論語 17-18 篇】

### 陽貨第十七

1. 陽貨欲見孔子，孔子不見，歸孔子豚。孔子時其亡也，而往拜之。遇諸塗。謂孔子曰：「來，予與爾言。」曰：「懷其寶而迷其邦，可謂仁乎？」曰：「不可。」「好從事而亟失時，可謂知乎？」曰：「不可。」「日月逝矣，歲不我與！」孔子曰：「諾，吾將仕矣。」

2. 子曰：「性相近也，習相遠也。」
3. 子曰：「唯上知與下愚不移。」
4. 子之武城，聞弦歌之聲，夫子莞爾而笑曰：「割雞焉用牛刀？」子游對曰：「昔者，偃也聞諸夫子曰：『君子學道則愛人，小人學道則易使也。』」子曰：「二三子！偃之言是也，前言戲之耳！」
5. 公山弗擾以費畔，召，子欲往。子路不說，曰：「末之也已，何必公山氏之之也？」子曰：「夫召我者，而豈徒哉？如有用我者，吾其為東周乎！」
6. 子張問仁於孔子。孔子曰：「能行五者於天下，為仁矣。」「請問之？」曰：「恭、寬、信、敏、惠。恭則不侮，寬則得眾，信則人任焉，敏則有功，惠則足以使人。」
7. 佛肸召，子欲往。子路曰：「昔者由也聞諸夫子曰：『親於其身為不善者，君子不入也』。佛肸以中牟畔，子之往也如之何？」子曰：「然，有是言也。不曰堅乎？磨而不磷。不曰白乎？涅而不緇。吾豈匏瓜也哉？焉能繫而不食！」
8. 子曰：「由也，女聞六言六蔽矣乎？」對曰：「未也。」「居！吾語女：好仁不好學，其蔽也愚；好知不好學，其蔽也蕩；好信不好學，其蔽也賊；好直不好學，其蔽也絞；好勇不好學，其蔽也亂；好剛不好學，其蔽也狂。」
9. 子曰：「小子！何莫學夫詩？詩，可以興，可以觀，可以群，可以怨；邇之事父，遠之事君；多識於鳥、獸、草、木之名。」
10. 子謂伯魚曰：「女為周南、召南矣乎？人而不為周南、召南，其猶正牆面而立也與！」
11. 子曰：「禮云禮云，玉帛云乎哉？樂云樂云，鐘鼓云乎哉？」
12. 子曰：「色厲而內荏，譬諸小人，其猶穿窬之盜也與！」
13. 子曰：「鄉原，德之賊也！」
14. 子曰：「道聽而塗說，德之棄也！」
15. 子曰：「鄙夫！可與事君也與哉？其未得之也，患得之；既得之，患失之。苟患失之，無所不至矣！」
16. 子曰：「古者民有三疾，今也或是之亡也。古之狂也肆，今之狂也蕩；古之矜也廉，今之矜也忿戾；古之愚也直，今之愚也詐而已矣。」
17. 子曰：「巧言令色，鮮矣仁。」
18. 子曰：「惡紫之奪朱也，惡鄭聲之亂雅樂也，惡利口之覆邦家者。」



19. 子曰：「予欲無言！」子貢曰：「子如不言，則小子何述焉？」子曰：「天何言哉？四時行焉，百物生焉，天何言哉？」
20. 孺悲欲見孔子，孔子辭以疾。將命者出戶，取瑟而歌，使之聞之。
21. 宰我問：「三年之喪，期已久矣！君子三年不為禮，禮必壞；三年不為樂，樂必崩。舊穀既沒，新穀既升；鑽燧改火，期可已矣。」子曰：「食夫稻，衣夫錦，於女安乎？」曰：「安！」「女安，則為之！夫君子之居喪，食旨不甘，聞樂不樂，居處不安，故不為也。今女安，則為之！」宰我出。子曰：「予之不仁也，子生三年，然後免於父母之懷。夫三年之喪，天下之通喪也。予也，有三年之愛於其父母乎？」
22. 子曰：「飽食終日，無所用心，難矣哉！不有博弈者乎？為之，猶賢乎已！」
23. 子路曰：「君子尚勇乎？」子曰：「君子義以為上。君子有勇而無義為亂，小人有勇而無義為盜。」
24. 子貢曰：「君子亦有惡乎？」子曰：「有惡，惡稱人之惡者，惡居下流而訕上者，惡勇而無禮者，惡果敢而窒者。」曰：「賜也亦有惡乎？」「惡徼以為知者，惡不孫以為勇者，惡訐以為直者。」
25. 子曰：「唯女子與小人為難養也！近之則不孫，遠之則怨。」
26. 子曰：「年四十而見惡焉，其終也已！」

## 微子第十八

1. 微子去之，箕子為之奴，比干諫而死。孔子曰：「殷有三仁焉！」
2. 柳下惠為士師，三黜。人曰：「子未可以去乎？」曰：「直道而事人，焉往而不三黜？枉道而事人，何必去父母之邦？」
3. 齊景公待孔子，曰：「若季氏則吾不能，以季、孟之間待之。」曰：「吾老矣。不能用也。」孔子行。
4. 齊人歸女樂，季桓子受之，三日不朝。孔子行。
5. 楚狂接輿，歌而過孔子，曰：「鳳兮！鳳兮！何德之衰？往者不可諫，來者猶可追。已而！已而！今之從政者殆而！」孔子下，欲與之言。趨而辟之，不得與之言。
6. 長沮桀溺耦而耕。孔子過之，使子路問津焉。長沮曰：「夫執輿者為誰？」子路曰：「為孔丘。」曰：「是魯孔丘與？」曰：「是也。」曰：「是知津矣！」問於桀溺，桀溺曰：「子為誰？」曰：「為仲由。」曰：「是魯孔丘之徒與？」對曰：「然。」曰：「滔滔者，天下皆是也，而誰以易之？且而與其從辟人之士也，豈若從辟世之士哉？」耜而不輟。子路

行以告，夫子憮然曰：「鳥獸不可與同群！吾非斯人之徒與而誰與？天下有道，丘不與易也。」

7. 子路從而後，遇丈人，以杖荷蓑。子路問曰：「子見夫子乎？」丈人曰：「四體不勤，五穀不分，孰為夫子？」植其杖而芸。子路拱而立。止子路宿，殺雞為黍而食之，見其二子焉。明日，子路行以告。子曰：「隱者也。」使子路反見之。至，則行矣。子路曰：「不仕無義。長幼之節，不可廢也；君臣之義，如之何其廢之？欲潔其身，而亂大倫。君子之仕也，行其義也。道之不行，已知之矣！」
8. 逸民：伯夷、叔齊、虞仲、夷逸、朱張、柳下惠、少連。子曰：「不降其志，不辱其身，伯夷、叔齊與！」謂柳下惠、少連：「降志辱身矣；言中倫，行中慮。其斯而已矣！」謂虞仲、夷逸：「隱居放言，身中清，廢中權。」「我則異於是，無可無不可。」
9. 大師摯適齊，亞飯干適楚，三飯繚適蔡，四飯缺適秦，鼓方叔入於河，播鼗武入於漢，少師陽、擊磬襄入於海。
10. 周公謂魯公曰：「君子不施其親，不使大臣怨乎不以。故舊無大故，則不棄也。無求備於一人。」
11. 周有八士：伯達、伯适、仲突、仲忽、叔夜、叔夏、季隨、季騶。



## 16【論語 19-20 篇】

### 子張第十九

1. 子張曰：「士見危致命，見得思義，祭思敬，喪思哀，其可已矣。」
2. 子張曰：「執德不弘，信道不篤，焉能為有？焉能為亡？」
3. 子夏之門人，問交於子張。子張曰：「子夏云何？」對曰：「子夏曰：『可者與之，其不可者拒之。』」子張曰：「異乎吾所聞：『君子尊賢而容眾，嘉善而矜不能。』我之大賢與，於人何所不容？我之不賢與，人將拒我，如之何其拒人也？」
4. 子夏曰：「雖小道，必有可觀者焉，致遠恐泥，是以君子不為也。」
5. 子夏曰：「日知其所亡，月無忘其所能，可謂好學也已矣！」
6. 子夏曰：「博學而篤志，切問而近思，仁在其中矣。」
7. 子夏曰：「百工居肆以成其事，君子學以致其道。」
8. 子夏曰：「小人之過也必文。」
9. 子夏曰：「君子有三變：望之儼然，即之也溫，聽其言也厲。」
10. 子夏曰：「君子信而後勞其民；未信，則以為厲己也。信而後諫；未信，則以為謗己也。」

11. 子夏曰：「大德不踰閑，小德出入可也。」
12. 子游曰：「子夏之門人小子，當洒掃應對進退則可矣，抑末也；本之則無，如之何？」子夏聞之曰：「噫！言游過矣！君子之道，孰先傳焉？孰後倦焉？譬諸草木，區以別矣。君子之道，焉可誣也？有始有卒者，其惟聖人乎！」
13. 子夏曰：「仕而優則學，學而優則仕。」
14. 子游曰：「喪致乎哀而止。」
15. 子游曰：「吾友張也，為難能也，然而未仁。」
16. 曾子曰：「堂堂乎張也！難與並為仁矣。」
17. 曾子曰：「吾聞諸夫子：『人未有自致者也，必也親喪乎？』」
18. 曾子曰：「吾聞諸夫子：『孟莊子之孝也，其他可能也，其不改父之臣與父之政，是難能也。』」
19. 孟氏使陽膚為士師，問於曾子。曾子曰：「上失其道，民散久矣！如得其情，則哀矜而勿喜。」
20. 子貢曰：「紂之不善，不如是之甚也。是以君子惡居下流，天下之惡皆歸焉。」
21. 子貢曰：「君子之過也，如日月之食焉。過也，人皆見之；更也，人皆仰之。」
22. 衛公孫朝問於子貢曰：「仲尼焉學？」子貢曰：「文武之道，未墜於地，在人。賢者識其大者，不賢者識其小者，莫不有文武之道焉。夫子焉不學，而亦何常師之有？」
23. 叔孫武叔語大夫於朝曰：「子貢賢於仲尼。」子服景伯以告子貢。子貢曰：「譬之宮牆：賜之牆也及肩，窺見室家之好；夫子之牆數仞，不得其門而入，不見宗廟之美，百官之富。得其門者或寡矣！夫子之云，不亦宜乎？」
24. 叔孫武叔毀仲尼。子貢曰：「無以為也！仲尼不可毀也。他人之賢者，丘陵也，猶可踰也；仲尼，日月也，無得而踰焉。人雖欲自絕，其何傷於日月乎？多見其不知量也！」
25. 陳子禽謂子貢曰：「子為恭也，仲尼豈賢於子乎？」子貢曰：「君子一言以為知，一言以為不知，言不可不慎也！夫子之不可及也，猶天之不可階而升也。夫子之得邦家者，所謂『立之斯立，道之斯行，綏之斯來，動之斯和。其生也榮，其死也哀。』如之何其可及也？」

## 堯曰第二十

1. 堯曰：「咨！爾舜！天之曆數在爾躬，允執其中！四海困窮，天祿永終。」舜亦以命禹。曰：「予小子履，敢用玄牡，敢昭告于皇皇后帝：有罪不敢赦，帝臣不蔽，簡在帝心！朕躬有罪，無以萬方；萬方有罪，罪在朕躬。」「周有大賚，善人是富。」「雖有周親，不如仁人；百姓有過，在予一人。」謹權量，審法度，脩廢官，四方之政行焉。興滅國，繼絕世，舉逸民，天下之民歸心焉。所重民：食、喪、祭。寬則得眾，信則民任焉。敏則有功，公則說。」
2. 子張問於孔子曰：「何如斯可以從政矣？」子曰：「尊五美，屏四惡，斯可以從政矣。」子張曰：「何謂五美？」子曰：「君子惠而不費，勞而不怨，欲而不貪，泰而不驕，威而不猛。」子張曰：「何謂惠而不費？」子曰：「因民之所利而利之，斯不亦惠而不費乎？擇可勞而勞之，又誰怨？欲仁而得仁，又焉貪？君子無眾寡，無小大，無敢慢，斯不亦泰而不驕乎？君子正其衣冠，尊其瞻視，儼然人望而畏之，斯不亦威而不猛乎？」子張曰：「何謂四惡？」子曰：「不教而殺謂之虐；不戒視成謂之暴；慢令致期謂之賊；猶之與人也，出納之吝，謂之有司。」
3. 子曰：「不知命，無以為君子也；不知禮，無以立也；不知言，無以知人也。」



## 17【孟子梁惠王第一章句上】凡七章

1. 孟子見梁惠王。王曰：「叟，不遠千里而來，亦將有以利吾國乎？」孟子對曰：「王何必曰利？亦有仁義而已矣。」王曰：『何以利吾國？』大夫曰：『何以利吾家？』士庶人曰：『何以利吾身？』上下交征利，而國危矣！萬乘之國，弑其君者，必千乘之家；千乘之國，弑其君者，必百乘之家。萬取千焉，千取百焉，不為不多矣；苟為後義而先利，不奪不饜。」「未有仁而遺其親者也，未有義而後其君者也。」王亦曰：仁義而已矣，何必曰利？」
2. 孟子見梁惠王。王立於沼上，顧鴻雁麋鹿，曰：「賢者亦樂此乎？」孟子對曰：「賢者而後樂此，不賢者雖有此，不樂也。」「詩云：『經始靈臺，經之營之；庶民攻之，不日成之；經始勿亟，庶民子來。王在靈囿，麋鹿攸伏，鹿鹿濯濯，白鳥鶴鶴。王在靈沼，於物魚躍。』文王以民力為臺為沼，而民歡樂之，謂其臺曰靈臺，謂其沼曰靈沼，樂其有麋鹿魚鼈。古之人與民偕樂、故能樂也。」「湯誓曰：『時日害喪，予及女偕亡！』民欲與之偕亡，雖有臺池鳥獸，豈能獨樂哉！」

3. 梁惠王曰：「寡人之於國也，盡心焉耳矣！河內凶，則移其民於河東，移其粟於河內；河東凶亦然。察鄰國之政，無如寡人之用心者；鄰國之民不加少，寡人之民不加多，何也？」

孟子對曰：「王好戰，請以戰喻。填然鼓之，兵刃既接，棄甲曳兵而走，或百步而後止，或五十步而後止；以五十步笑百步，則何如？」

曰：「不可。直不百步耳，是亦走也！」

曰：「王如知此，則無望民之多於鄰國也。不違農時，穀不可勝食也；數罟不入洿池，魚鼈不可勝食也；斧斤以時入山林，材木不可勝用也；穀與魚鼈不可勝食，材木不可勝用，是使民養生喪死無憾也；養生喪死無憾，王道之始也。」「五畝之宅，樹之以桑，五十者可以衣帛矣；雞豚狗彘之畜，無失其時，七十者可以食肉矣；百畝之田，勿奪其時，數口之家可以無飢矣；謹庠序之教，申之以孝悌之義，頒白者不負戴於道路矣。七十者衣帛食肉，黎民不飢不寒，然而不王者，未之有也！」「狗彘食人食而不知檢，塗有餓莩而不知發，人死則曰：『非我也，歲也。』是何異於刺人而殺之，曰：『非我也，兵也！』王無罪歲，斯天下之民至焉。」

4. 梁惠王曰：「寡人願安承教。」孟子對曰：「殺人以梃與刃，有以異乎？」曰：「無以異也。」「以刃與政有以異乎？」曰：「無以異也。」曰：「庖有肥肉，廄有肥馬，民有飢色，野有餓莩，此率獸而食人也。獸相食，且人惡之。為民父母行政，不免於率獸而食人，惡在其為民父母也！」「仲尼曰：『始作俑者，其無後乎！』為其象人而用之也，如之何其使斯民飢而死也。」

5. 梁惠王曰：「晉國，天下莫強焉，叟之所知也。及寡人之身，東敗於齊，長子死焉；西喪地於秦七百里；南辱於楚，寡人恥之，願比死者一洒之，如之何則可？」

孟子對曰：「地方百里而可以王。王如施仁政於民，省刑罰，薄稅斂，深耕易耨；壯者以暇日修其孝悌忠信，入以事其父兄，出以事其長上，可使制梃，以撻秦楚之堅甲利兵矣！彼奪其民時，使不得耕耨，以養其父母，父母凍餓，兄弟妻子離散。彼陷溺其民，王往而征之，夫誰與王敵？故曰：『仁者無敵。』王請勿疑。」

6. 孟子見梁襄王。出，語人曰：「望之不似人君，就之而不見所畏焉。卒然問曰：『天下惡乎定？』吾對曰：『定于一。』『孰能一之？』對曰：『不嗜殺人者能一之。』『孰能與之？』對曰：『天下莫不與也。王知夫苗乎？七八月之間旱，則苗槁矣。天油然作雲，沛然下雨，則苗浡然興之矣。其如是，孰能禦之！今夫天下之人牧，未有不嗜殺人者也。如有不嗜

殺人者，則天下之民，皆引領而望之矣。誠如是也，民歸之，由水之就下，沛然誰能禦之？」

7. 齊宣王問曰：「齊桓、晉文之事，可得聞乎？」孟子對曰：「仲尼之徒，無道桓、文之事者，是以後世無傳焉，臣未之聞也。無以，則王乎？」曰：「德何如，則可以王矣？」曰：「保民而王，莫之能禦也。」曰：「若寡人者，可以保民乎哉？」曰：「可。」曰：「何由知吾可也？」曰：「臣聞之胡齧曰：『王坐於堂上，有牽牛而過堂下者，王見之曰：『牛何之？』對曰：『將以釁鐘。』王曰：『舍之，吾不忍其觳觫，若無罪而就死地。』對曰：『然則廢釁鐘與？』曰：『何可廢也？以羊易之。』』不識有諸？」曰：「有之。」曰：「是心足以王矣。百姓皆以王為愛也，臣固知王之不忍也。」王曰：「然，誠有百姓者，齊國雖褊小，吾何愛一牛？即不忍其觳觫，若無罪而就死地，故以羊易之也。」曰：「王無異於百姓之以王為愛也，以小易大，彼惡知之？王若隱其無罪而就死地，則牛羊何擇焉！」王笑曰：「是誠何心哉！我非愛其財而易之以羊也，宜乎百姓之謂我愛也。」曰：「無傷也，是乃仁術也，見牛未見羊也，君子之於禽獸也，見其生，不忍見其死；聞其聲，不忍食其肉：是以君子遠庖廚也。」王說曰：「詩云：『他人有心，予忖度之。』夫子之謂也。夫我乃行之，反而求之，不得吾心；夫子言之，於我心有戚戚焉；此心之所以合於王者，何也？」曰：「有復於王者曰：『吾力足以舉百鈞，而不足以舉一羽；明足以察秋毫之末，而不見輿薪。』則王許之乎？」曰：「否。」「今恩足以及禽獸，而功不至於百姓者，獨何與？然則一羽之不舉，為不用力焉；輿薪之不見，為不用明焉；百姓之不見保，為不用恩焉。故王之不王，不為也，非不能也。」曰：「不為者與不能者之形，何以異？」曰：「挾太山以超北海，語人曰：『我不能。』是誠不能也，為長者折枝，語人曰：『我不能。』是不為也，非不能也。故王之不王，非挾太山以超北海之類也；王之不王，是折枝之類也。老吾老以及人之老；幼吾幼以及人之幼；天下可運於掌。詩云：『刑于寡妻，至于兄弟，以御于家邦。』言舉斯心加諸彼而已。故推恩足以保四海，不推恩無以保妻子；古之人所以大過人者，無他焉，善推其所為而已矣。今恩足以及禽獸，而功不至於百姓者，獨何與？」曰：「權，然後知輕重；度，然後知長短，物皆然，心為甚。王請度之。」曰：「抑王興甲兵，危士臣，構怨於諸侯，然後快於心與？」王曰：「否。吾何快於是？將以求吾所大欲也。」曰：「王之所大欲，可得聞與？」王笑而不言。曰：「為肥甘不足於口與？輕煖不足於體與？抑為采色不足視於目與？聲音不足聽於耳與？便嬖

不足使令於前與？王之諸臣，皆足以供之。而王豈為是哉？」曰：「否。吾不為是也。」曰：「然則王之所大欲，可知已。欲辟土地，朝秦楚，蒞中國，而撫四夷也。以若所為，求若所欲，猶緣木而求魚也。」王曰：「若是其甚與？」曰：「殆有甚焉。緣木求魚，雖不得魚，無後災。以若所為，求若所欲，盡心力而為之，後必有災。」曰：「可得聞與？」曰：「鄒人與楚人戰，則王以為孰勝？」曰：「楚人勝。」曰：「然則小固不可以敵大，寡固不可以敵眾，弱固不可以敵彊。海內之地，方千里者九，齊集有其一；以一服八，何以異於鄒敵楚哉！蓋亦反其本矣。」「今王發政施仁，使天下仕者皆欲立於王之朝，耕者皆欲耕於王之野，商賈皆欲藏於王之市，行旅皆欲出於王之塗；天下之欲疾其君者，皆欲赴愬於王。其若是，孰能禦之！」王曰：「吾惛不能進於是矣。願夫子輔吾志，明以教我。我雖不敏，請嘗試之。」曰：「無恆產而有恆心者，惟士為能。若民則無恆產，因無恆心。苟無恆心，放辟邪侈，無不為已。及陷於罪，然後從而刑之，是罔民也。焉有仁人在位，罔民而可為也！是故，明君制民之產，必使仰足以事父母，俯足以畜妻子；樂歲終身飽，凶年免於死亡。然後驅而之善，故民之從之也輕。今也制民之產，仰不足以事父母，俯不足以畜妻子；樂歲終身苦，凶年不免於死亡。此惟救死而恐不贍，奚暇治禮義哉！」「王欲行之，則盍反其本矣。」「五畝之宅，樹之以桑，五十者可以衣帛矣。雞豚狗彘之畜，無失其時，七十者可以食肉矣。百畝之田，勿奪其時。八口之家可以無飢矣。謹庠序之教，申之以孝悌之義，頒白者不負戴於道路矣。老者衣帛食肉，黎民不飢不寒；然而不王者，未之有也！」



## 18【孟子梁惠王第一章句下】凡十六章

1. 莊暴見孟子曰：「暴見於王，王語暴以好樂，暴未有以對也。曰：『好樂』，何如？」孟子曰：「王之好樂甚，則齊國其庶幾乎！」

他日，見於王曰：「王嘗語莊子以好樂，有諸？」王變乎色曰：「寡人非能好先王之樂也，直好世俗之樂耳。」曰：「王之好樂甚，則齊其庶幾乎！今之樂，猶古之樂也。」曰：「可得聞與？」曰：「獨樂樂，與人樂樂，孰樂？」曰：「不若與人。」曰：「與少樂樂，與眾樂樂，孰樂？」曰：「不若與眾。」「臣請為王言樂。今王鼓樂於此，百姓聞王鐘鼓之聲，管籥之音，舉疾首蹙頰而相告曰：『吾王之好鼓樂，夫何使我至於此極也！父子不相見，兄弟妻子離散。』今王田獵於此，百姓聞王車馬之音，見羽旄之美，舉疾首蹙頰而相告曰：『吾王之好田獵，夫

何使我至於此極也！父子不相見，兄弟妻子離散。」此無他，不與民同樂也。今王鼓樂於此，百姓聞王鐘鼓之聲，管籥之音，舉欣欣然有喜色而相告曰：『吾王庶幾無疾病與？何以能鼓樂也？』今王田獵於此，百姓聞王車馬之音，見羽旄之美，舉欣欣然有喜色而相告曰：『吾王庶幾無疾病與？何以能田獵也？』此無他，與民同樂也。今王與百姓同樂，則王矣。」

2. 齊宣王問曰：「文王之囿，方七十里，有諸？」孟子對曰：「於傳有之。」曰：「若是其大乎？」曰：「民猶以為小也。」曰：「寡人之囿，方四十里，民猶以為大，何也？」曰：「文王之囿，方七十里，芻蕘者往焉，雉兔者往焉，與民同之；民以為小，不亦宜乎！臣始至於境，問國之大禁，然後敢入。臣聞郊關之內，有囿方四十里，殺其麋鹿者，如殺人之罪，則是方四十里，為阱於國中，民以為大，不亦宜乎！」

3. 齊宣王問曰：「交鄰國，有道乎？」孟子對曰：「有。惟仁者為能以大事小。是故，湯事葛，文王事昆夷。惟智者為能以小事大，故大王事獯鬻，句踐事吳。以大事小者，樂天者也；以小事大者，畏天者也。樂天者保天下，畏天者保其國。詩云：『畏天之威，于時保之。』」王曰：「大哉言矣，寡人有疾，寡人好勇。」對曰：「王請無好小勇。夫撫劍疾視曰：『彼惡敢當我哉！』此匹夫之勇，敵一人者也。王請大之。詩云：『王赫斯怒，爰整其旅；以遏徂莒，以篤周祜，以對于天下。』此文王之勇也。文王一怒而安天下之民。書曰：『天降下民，作之君，作之師。惟曰：其助上帝，寵之四方；有罪無罪，惟我在。天下曷敢有越厥志？』一人衡行於天下，武王恥之；此武王之勇也。而武王亦一怒而安天下之民。今王亦一怒而安天下之民，民惟恐王之不好勇也。」

4. 齊宣王見孟子於雪宮。王曰：「賢者亦有此樂乎？」孟子對曰：「有。人不得，則非其上矣。不得而非其上者，非也；為民上而不與民同樂者，亦非也。樂民之樂者，民亦樂其樂，憂民之憂者，民亦憂其憂。樂以天下，憂以天下；然而不王者，未之有也。」

昔者齊景公問於晏子曰：『吾欲觀於轉附朝儻，遵海而南，放於琅邪；吾何修而可以比於先王觀也？』晏子對曰：『善哉問也！天子適諸侯曰巡狩。巡狩者，巡所守也。諸侯朝於天子曰述職；述職者，述所職也，無非事者。春省耕而補不足，秋省斂而助不給。夏諺曰：『吾王不遊，吾何以休？吾王不豫，吾何以助？一遊一豫，為諸侯度。』今也不然。師行而糧食；飢者弗食，勞者弗息；暋暋胥讒，民乃作慝，方命虐民，飲食若流；流連荒亡，為諸侯憂。從流下而忘反謂之流；從流上而忘反，謂之連；從



獸無厭，謂之荒；樂酒無厭，謂之亡。先王無流連之樂，荒亡之行。惟君所行也。』景公說，大戒於國，出舍於郊，於是始興發補不足。召太師曰：『為我作君臣相說之樂。』蓋徵招、角招是也。其詩曰：『畜君何尤！』畜君者，好君也。」

5. 齊宣王問曰：「人皆謂我毀明堂；毀諸？已乎？」孟子對曰：「夫明堂者，王者之堂也。王欲行王政，則勿毀之矣。」

王曰：「王政可得聞與？」對曰：「昔者文王之治岐也，耕者九一，仕者世祿，關市譏而不征，澤梁無禁，罪人不孥。老而無妻曰鰥，老而無夫曰寡，老而無子曰獨，幼而無父曰孤，此四者，天下之窮民而無告者。文王發政施仁，必先斯四者。詩云：『哿矣富人，哀此滯獨。』」王曰：「善哉言乎！」曰：「王如善之，則何為不行？」王曰：「寡人有疾，寡人好貨。」對曰：「昔者公劉好貨。詩云：『乃積乃倉，乃裹餼糧。于橐于囊，思戢用光；弓矢斯張，干戈戚揚，爰方啟行。』故居者有積倉，行者有裹糧也，然後可以爰方啟行。王如好貨，與百姓同之，於王何有！」王曰：「寡人有疾，寡人好色。」對曰：「昔者大王好色，愛厥妃。詩云：『古公亶父，來朝走馬；率西水滸，至於岐下；爰及姜女，聿來胥宇。』當是時也，內無怨女，外無曠夫；王如好色，與百姓同之，於王何有！」

6. 孟子謂齊宣王曰：「王之臣，有託其妻子於其友，而之楚遊者。比其反也，則凍餒其妻子，則如之何？」王曰：「棄之。」曰：「士師不能治士，則如之何？」王曰：「已之。」曰：「四境之內不治，則如之何？」王顧左右而言他。

7. 孟子見齊宣王曰：「所謂故國者，非謂有喬木之謂也，有世臣之謂也，王無親臣矣。昔者所進，今日不知其亡也。」王曰：「吾何以識其不才而舍之？」曰：「國君進賢，如不得已，將使卑踰尊，疏踰戚，可不慎與？左右皆曰賢，未可也。諸大夫皆曰賢，未可也。國人皆曰賢，然後察之。見賢焉，然後用之。左右皆曰不可，勿聽。諸大夫皆曰不可，勿聽；國人皆曰不可，然後察之。見不可焉，然後去之。左右皆曰可殺，勿聽。諸大夫皆曰可殺，勿聽。國人皆曰可殺，然後察之。見可殺焉，然後殺之。故曰：『國人殺之也。』如此，然後可以為民父母。」

8. 齊宣王問曰：「湯放桀，武王伐紂，有諸？」孟子對曰：「於傳有之。」曰：「臣弑其君，可乎？」曰：「賊仁者謂之賊，賊義者謂之殘；殘賊之人，謂之一夫。聞誅一夫紂矣，未聞弑君也。」

9. 孟子見齊宣王曰：「為巨室，則必使工師求大木。工師得大木，則王喜，以為能勝其任也。匠人斲而小之，則王怒，以為不勝其任矣。夫人，

幼而學之，壯而欲行之，王曰：『姑舍女所學而從我。』則何如？今有璞玉於此，雖萬鎰，必使玉人雕琢之。至於治國家，則曰：『姑舍女所學而從我。』則何以異於教玉人雕琢玉哉！」

10. 齊人伐燕，勝之。宣王問曰：「或謂寡人勿取，或謂寡人取之。以萬乘之國，伐萬乘之國，五旬而舉之，人力不至於此；不取必有天殃，取之何如？」孟子對曰：「取之而燕民悅，則取之。古之人有行之者，武王是也。取之而燕民不悅，則勿取。古之人有行之者，文王是也。以萬乘之國，伐萬乘之國，簞食壺漿以迎王師，豈有他哉，避水火也；如水益深，如火益熱，亦運而已矣。」

11. 齊人伐燕，取之。諸侯將謀救燕。宣王曰：「諸侯多謀伐寡人者，何以待之？」孟子對曰：「臣聞七十里為政於天下者，湯是也。未聞以千里畏人者也。書曰：『湯一征，自葛始，天下信之，東面而征西夷怨，南面而征北狄怨，曰：『奚為後我？』』民望之，若大旱之望雲霓也；歸市者不止，耕者不變；誅其君而弔其民，若時雨降，民大悅。書曰：『徯我后，後來其蘇。』」 「今燕虐其民，王往而征之，民以為將拯己於水火之中也，簞食壺漿以迎王師。若殺其父兄，係累其子弟，毀其宗廟，遷其重器，如之何其可也！天下固畏齊之彊也，今又倍地，而不行仁政，是動天下之兵也。王速出令：反其旄倪，止其重器；謀於燕眾，置君而後去之；則猶可及止也。」

12. 鄒與魯鬪。穆公問曰：「吾有司死者三十三人，而民莫之死也，誅之則不可勝誅，不誅則疾視其長上之死而不救。如之何則可也？」孟子對曰：「凶年饑歲，君之民，老弱轉乎溝壑，壯者散而之四方者，幾千人矣。而君之倉廩實，府庫充，有司莫以告，是上慢而殘下也。曾子曰：『戒之戒之，出乎爾者，反乎爾者也。』夫民今而後得反之也，君無尤焉。君行仁政，斯民親其上，死其長矣。」

13. 滕文公問曰：「滕，小國也，間於齊楚，事齊乎？事楚乎？」孟子對曰：「是謀非吾所能及也。無已，則有一焉。鑿斯池也，築斯城也，與民守之，效死而民弗去，則是可為也。」

14. 滕文公問曰：「齊人將築薛，吾甚恐，如之何則可？」孟子對曰：「昔者大王居邠，狄人侵之，去之岐山之下居焉。非擇而取之，不得已也。苟為善，後世子孫必有王者矣。君子創業垂統，為可繼也。若夫成功，則天也。君如彼何哉！彊為善而已矣。」

15. 滕文公問曰：「滕，小國也，竭力以事大國則不得免焉，如之何則可？」孟子對曰：「昔者大王居邠，狄人侵之，事之以皮幣，不得免焉；

事之以犬馬，不得免焉；事之以珠玉，不得免焉。乃屬其耆老而告之曰：『狄人之所欲者，吾土地也。吾聞之也：君子不以其所以養人者害人。二三子何患乎無君！我將去之。』去邠，踰梁山，邑于岐山之下居焉。邠人曰：『仁人也，不可失也。』從之者如歸市。或曰：『世守也，非身之所能為也，效死勿去。』君請擇於斯二者。」

16. 魯平公將出，嬖人臧倉者請曰：「他日君出，則必命有司所之；今乘輿已駕矣，有司未不知所之，敢請。」公曰：「將見孟子。」曰：「何哉君所為輕身以先於匹夫者！以為賢乎？禮義由賢者出，而孟子之後喪踰前喪，君無見焉。」公曰：「諾。」樂正子入見，曰：「君奚為不見孟軻也？」曰：「或告寡人曰：『孟子之後喪踰前喪』，是以不往見也。」曰：「何哉？君所謂踰者。前以士，後以大夫；前以三鼎，而後以五鼎與？」曰：「否。謂棺槨衣衾之美也。」曰：「非所謂踰也，貧富不同也。」樂正子見孟子曰：「克告於君，君為來見也，嬖人有臧倉者沮君，君是以不果來也。」曰：「行或使之，止或尼之，行止，非人所能也。吾之不遇魯侯，天也。臧氏之子，焉能使予不遇哉！」



## 19【孟子公孫丑第二章句上】凡九章

1. 公孫丑問曰：「夫子當路於齊，管仲、晏子之功，可復許乎？」孟子曰：「子，誠齊人也，知管仲、晏子而已矣！或問乎曾西曰：『吾子與子路孰賢？』曾西蹴然曰：『吾先子之所畏也。』曰：『然則吾子與管仲孰賢？』曾西艱然不悅，曰：『爾何曾比予於管仲！管仲得君，如彼其專也，行乎國政，如彼其久也，功烈，如彼其卑也。爾何曾比予於是！』」曰：「管仲，曾西之所不為也，而子為我願之乎？」曰：「管仲以其君霸，晏子以其君顯；管仲、晏子猶不足為與？」曰：「以齊王由反手也。」曰：「若是，則弟子之惑滋甚！且以文王之德，百年而後崩，猶未洽於天下。武王、周公繼之，然後大行。今言王若易然，則文王不足法與？」曰：「文王何可當也！由湯至於武丁，賢聖之君六七作；天下歸殷久矣，久則難變也。武丁朝諸侯有天下，猶運之掌也。紂之去武丁，未久也；其故家遺俗，流風善政，猶有存者；又有微子、微仲、王子比干、箕子、膠鬲，皆賢人也，相與輔相之；故久而後失之也。尺地莫非其有也，一民莫非其臣也。然而文王猶方百里起，是以難也。齊人有言曰：『雖有智慧，不如乘勢；雖有鎡基，不如待時。』今時則易然也。夏后殷周之盛，地未有過千里者也。而齊有其地矣。雞鳴狗吠相聞，而達乎四境。而齊有其民矣。地不改辟矣，民不改聚矣；行仁政而王，莫之能禦也！且王

者之不作，未有疏於此時者也；民之憔悴於虐政，未有甚於此時者也。飢者易為食，渴者易為飲。孔子曰：『德之流行，速於置郵而傳命。』當今之時，萬乘之國行仁政，民之悅之，猶解倒懸也。故事半古之人，功必倍之，惟此時為然。」

2. 公孫丑問曰：「夫子加齊之卿相，得行道焉，雖由此霸王不異矣。如此，則動心否乎？」孟子曰：「否。我四十不動心。」曰：「若是，則夫子過孟賁遠矣？」曰：「是不難，告子先我不動心。」曰：「不動心有道乎？」曰：「有。北宮黝之養勇也，不膚撓，不目逃，思以一毫挫於人，若撻之於市朝，不受於褐寬博，亦不受於萬乘之君。視刺萬乘之君，若刺褐夫，無嚴諸侯，惡聲至，必反之。孟施舍之所養勇也，曰：『視不勝猶勝也。量敵而後進，慮勝而後會，是畏三軍者也。舍豈能為必勝哉，能無懼而已矣！』孟施舍似曾子，北宮黝似子夏。夫二子之勇，未知其孰賢。然而孟施舍守約也。昔者曾子謂子襄曰：『子好勇乎？吾嘗聞大勇於夫子矣。自反而不縮，雖褐寬博，吾不懼焉。自反而縮，雖千萬人吾往矣。』孟施舍之守氣，又不如曾子之守約也。」曰：「敢問夫子之不動心，與告子之不動心，可得聞與？」「告子曰：『不得於言，勿求於心；不得於心，勿求於氣。』不得於心，勿求於氣，可；不得於言，勿求於心，不可。夫志，氣之帥也。氣，體之充也。夫志至焉，氣次焉。故曰：『持其志，無暴其氣。』」「既曰：『志至焉，氣次焉。』又曰：『持其志，無暴其氣』者，何也？」曰：「志壹則動氣，氣壹則動志也。今夫蹶者趨者，是氣也，而反動其心。」「敢問夫子惡乎長？」曰：「我知言，我善養吾浩然之氣。」「敢問何謂浩然之氣？」曰：「難言也。其為氣也，至大至剛，以直養而無害，則塞於天地之間。其為氣也，配義與道，無是餒也。是集義所生者，非義襲而取之也。行有不慊於心，則餒矣。我故曰，告子未嘗知義，以其外之也。必有事焉而勿正，心勿忘，勿助長也。無若宋人然。宋人有閔其苗之不長而揠之者。芒芒然歸，謂其人曰：『今日病矣，予助苗長矣。』其子趨而往視之，苗則槁矣。天下之不助苗長者寡矣。以為無益而舍之者，不耘苗者也。助之長者，揠苗者也。非徒無益，而又害之。」

「何謂知言？」曰：「詖辭知其所蔽，淫辭知其所陷，邪辭知其所離，遁辭知其所窮。生於其心，害於其政；發於其政，害於其事。聖人復起，必從吾言矣。」「宰我、子貢，善為說辭；冉牛、閔子、顏淵，善言德行；孔子兼之，曰：『我於辭命則不能也。』然則夫子既聖矣乎？」曰：「惡，是何言也！昔者子貢問於孔子曰：『夫子聖矣乎？』孔子曰：『聖則吾不

能。我學不厭而教不倦也。』子貢曰：『學不厭，智也，教不倦，仁也。仁且智，夫子既聖矣。』夫聖，孔子不居，是何言也！」「昔者竊聞之，子夏、子游、子張，皆有聖人之一體；冉牛、閔子、顏淵，則具體而微。敢問所安？」曰：「姑舍是。」曰：「伯夷伊尹何如？」曰：「不同道。非其君不事，非其民不使，治則進，亂則退，伯夷也。何事非君，何使非民，治亦進，亂亦進，伊尹也。可以仕則仕，可以止則止，可以久則久，可以速則速，孔子也。皆古聖人也。吾未能有行焉，乃所願，則學孔子也。」

「伯夷、伊尹於孔子，若是班乎？」曰：「否。自有生民以來，未有孔子也。」曰：「然則有同與？」曰：「有。得百里之地而君之，皆能以朝諸侯有天下。行一不義，殺一不辜，而得天下，皆不為也，是則同。」曰：「敢問其所以異？」曰：「宰我、子貢、有若，智足以知聖人，汙不至阿其所好。宰我曰：『以予觀於夫子，賢於堯、舜遠矣。』子貢曰：『見其禮而知其政，聞其樂而知其德，由百世之後，等百世之王，莫之能違也。自生民以來，未有夫子也。』有若曰：『豈惟民哉！麒麟之於走獸，鳳凰之於飛鳥，泰山之於丘垤，河海之於行潦，類也。聖人之於民，亦類也。出於其類，拔乎其萃。自生民以來，未有盛於孔子也。』」

3. 孟子曰：「以力假仁者霸，霸必有大國。以德行仁者王，王不待大。湯以七十里，文王以百里。以力服人者，非心服也，力不贍也。以德服人者，中心悅而誠服也，如七十子之服孔子也，詩云：『自西自東，自南自北，無思不服。』此之謂也。」
4. 孟子曰：「仁則榮，不仁則辱。今惡辱而居不仁，是猶惡溼而居下也。如惡之，莫如貴德而尊士。賢者在位，能者在職，國家閒暇。及是時，明其政刑，雖大國必畏之矣。詩云：『迨天之未陰雨、徹彼桑土，綢繆牖戶。今此下民，或敢侮予！』孔子曰：『為此詩者，其知道乎！』能治其國家，誰敢侮之！今國家閒暇，及是時，般樂怠敖，是自求禍也。禍福無不自己求之者。詩云：『永言配命，自求多福。』太甲曰：『天作孽，猶可違；自作孽，不可活。』此之謂也。」
5. 孟子曰：「尊賢使能，俊傑在位，則天下之士，皆悅而願立於其朝矣。市廛而不征，法而不廛，則天下之商，皆悅而願藏於其市矣。關譏而不征，則天下之旅，皆悅而願出於其路矣。耕者助而不稅，則天下之農，皆悅而願耕於其野矣。廛無夫里之布，則天下之民，皆悅而願為之氓矣。信能行此五者，則鄰國之民，仰之若父母矣。率其子弟，攻其父母，自生民以

來，未有能濟者也。如此，則無敵於天下。無敵於天下者，天吏也。然而不王者，未之有也。」

6. 孟子曰：「人皆有不忍人之心。先王有不忍人之心，斯有不忍人之政矣。以不忍人之心，行不忍人之政，治天下可運之掌上。所以謂人皆有不忍人之心者，今人乍見孺子將入於井，皆有怵惕惻隱之心，非所以內交於孺子之父母也，非所以要譽於鄉黨朋友也，非惡其聲而然也。由是觀之，無惻隱之心，非人也；無羞惡之心，非人也；無辭讓之心，非人也；無是非之心，非人也。惻隱之心，仁之端也；羞惡之心，義之端也；辭讓之心，禮之端也；是非之心，智之端也。人之有是四端也，猶其有四體也。有是四端而自謂不能者，自賊者也；謂其君不能者，賊其君者也。凡有四端於我者，知皆擴而充之矣。若火之始然，泉之始達。苟能充之，足以保四海；苟不充之，不足以事父母。」
7. 孟子曰：「矢人豈不仁於函人哉！矢人唯恐不傷人，函人唯恐傷人。巫匠亦然。故術不可不慎也。孔子曰：『里仁為美，擇不處仁，焉得智！』夫仁，天之尊爵也，人之安宅也，莫之禦而不仁，是不智也。不仁不智，無禮無義，人役也。人役而恥為役，由弓人而恥為弓。矢人而恥為矢也。如恥之，莫如為仁。仁者如射，射者正己而後發，發而不中，不怨勝己者，反求諸己而已矣。」
8. 孟子曰：「子路人告之以有過則喜，禹聞善言則拜。大舜有大焉，善與人同，舍己從人，樂取於人以為善；自耕稼陶漁以至為帝，無非取於人者。取諸人以為善，是與人為善者也。故君子莫大乎與人為善。」
9. 孟子曰：「伯夷非其君不事，非其友不友，不立於惡人之朝，不與惡人言；立於惡人之朝，與惡人言，如以朝衣朝冠，坐於塗炭。推惡惡之心，思與鄉人立，其冠不正，望望然去之，若將浼焉。是故，諸侯雖有善其辭命而至者，不受也；不受也者，是亦不屑就已。柳下惠不羞汙君，不卑小官；進不隱賢，必以其道，遺佚而不怨，阨窮而不憫。故曰：『爾為爾，我為我；雖袒裼裸裎於我側，爾焉能浼我哉！』故由由然與之偕而不自失焉。援而止之而止；援而止之而止者，是亦不屑去已。」孟子曰：「伯夷隘，柳下惠不恭，隘與不恭，君子不由也。」



## 20【孟子公孫丑第二章句下】凡十四章

1. 孟子曰：「天時不如地利，地利不如人和。三里之城，七里之郭，環而攻之而不勝；夫環而攻之，必有得天時者矣；然而不勝者，是天時不如地利

也。城非不高也，池非不深也，兵革非不堅利也，米粟非不多也；委而去之，是地利不如人和也。故曰：域民不以封疆之界，固國不以山谿之險，威天下不以兵革之利；得道者多助，失道者寡助。寡助之至，親戚畔之；多助之至，天下順之。以天下之所順，攻親戚之所畔；故君子有不戰，戰必勝矣。」

2. 孟子將朝王。王使人來曰：「寡人如就見者也，有寒疾，不可以風。朝將視朝，不識可使寡人得見乎？」對曰：「不幸而有疾，不能造朝。」明日，出弔於東郭氏。公孫丑曰：「昔者辭以病，今日弔，或者不可乎？」曰：「昔者疾，今日愈，如之何不弔？」王使人問疾，醫來。孟仲子對曰：「昔者有王命，有采薪之憂，不能造朝。今病小愈，趨造於朝，我不識能至否乎？」使數人要於路，曰：「請必無歸，而造於朝。」不得已而之景丑氏宿焉。

景子曰：「內則父子，外則君臣，人之大倫也。父子主恩，君臣主敬；丑見王之敬子也，未見所以敬王也。」曰：「惡，是何言也！齊人無以仁義與王言者，豈以仁義為不美也？其心曰：『是何足與言仁義也。』云爾，則不敬莫大乎是。我非堯舜之道，不敢以陳於王前。故齊人莫如我敬王也。」景子曰：「否，非此之謂也。禮曰：『父召無諾，君命召不俟駕。』固將朝也，聞王命而遂不果，宜與夫禮若不相似然。」曰：「豈謂是與？曾子曰：『晉楚之富，不可及也；彼以其富，我以吾仁；彼以其爵，我以吾義；吾何慊乎哉！』夫豈不義而曾子言之，是或一道也。天下有達尊三：爵一，齒一，德一。朝廷莫如爵，鄉黨莫如齒，輔世長民莫如德。惡得有一，以慢其二哉！故將大有為之君，必有所不召之臣；欲有謀焉，則就之。其尊德樂道，不如是，不足與有為也。故湯之於伊尹，學焉而後臣之；故不勞而王。桓公之於管仲，學焉而後臣之；故不勞而霸。今天下，地醜德齊，莫能相尚；無他，好臣其所教，而不好臣其所受教。湯之於伊尹，桓公之於管仲，則不敢召。管仲且猶不可召，而況不為管仲者乎！」

3. 陳臻問曰：「前日於齊，王餽兼金一百而不受；於宋，餽七十鎰而受；於薛，餽五十鎰而受。前日之不受是，則今日之受非也。今日之受是，則前日之不受非也。夫子必居一於此矣。」孟子曰：「皆是也。當在宋也，予將有遠行，行者必以贖，辭曰：『餽贖』，予何為不受？當在薛也。予有戒心；辭曰：『聞戒，故為兵餽之。』予何為不受？若於齊，則未有處也。無處而餽之，是貨之也。焉有君子而可以貨取乎？」

4. 孟子之平陸，謂其大夫曰：「子之持戟之士，一日而三失伍，則去之否乎？」曰：「不待三。」「然則子之失伍也亦多矣。凶年饑歲，子之民，老羸轉於溝壑，壯者散而之四方者，幾千人矣。」曰：「此非距心之所得為也。」曰：「今有受人之牛羊而為之牧之者，則必為之求牧與芻矣。求牧與芻而不得，則反諸其人乎？抑亦立而視其死與？」曰：「此則距心之罪也。」

他日，見於王曰：「王之為都者，臣知五人焉。知其罪者，惟孔距心。」為王誦之。王曰：「此則寡人之罪也。」

5. 孟子謂蚺鼃曰：「子之辭靈丘而請士師，似也；為其可以言也。今既數月矣，未可以言與？」蚺鼃諫於王而不用，致為臣而去。齊人曰：「所以為蚺鼃則善矣，所以自為，則吾不知也。」公都子以告。

曰：「吾聞之也，有官守者，不得其職則去；有言責者，不得其言則去。我無官守，我無言責也，則吾進退，豈不綽綽然有餘裕哉！」

6. 孟子為卿於齊，出弔於滕，王使蓋大夫王驩為輔行。王驩朝暮見，反齊、滕之路，未嘗與之言行事也。公孫丑曰：「齊卿之位，不為小矣；齊滕之路，不為近矣，反之而未嘗與言行事，何也？」曰：「夫既或治之，予何言哉？」

7. 孟子自齊葬於魯，反於齊，止於嬴。充虞請曰：「前日不知虞之不肖；使虞敦匠事。嚴虞不敢請；今願竊有請也，木若以美然。」

曰：「古者棺槨無度，中古棺七寸，槨稱之；自天子達於庶人；非直為觀美也，然後盡於人心。不得不可以為悅，無財不可以為悅，得之為有財，古之人皆用之，吾何為獨不然？且比化者，無使土親膚，於人心獨無悅乎？吾聞之也：君子不以天下儉其親。」

8. 沈同以其私問曰：「燕可伐與。」孟子曰：「可。子噲不得與人燕，子之不得受燕於子噲。有仕於此，而子悅之，不告於王，而私與之吾子之祿爵。夫士也，亦無王命，而私受之於子，則可乎？何以異於是！」

齊人伐燕。或問曰：「勸齊伐燕，有諸？」

曰：「未也。沈同問：『燕可伐與？』吾應之曰：『可。』彼然而伐之也。彼如曰：『孰可以伐之？』則將應之曰：『為天吏則可以伐之。』今有殺人者，或問之曰：『人可殺與？』則將應之曰：『可。』彼如曰：『孰可以殺之？』則將應之曰：『為士師則可以殺之。』今以燕伐燕，何為勸之哉！」

9. 燕人畔。王曰：「吾甚慚於孟子。」陳賈曰：「王無患焉。王自以為與周公孰仁且智？」王曰：「惡，是何言也！」曰：「周公使管叔監殷，管叔



以殷畔。知而使之，是不仁也；不知而使之，是不智也。仁、智，周公未之盡也；而況於王乎？賈請見而解之。」見孟子，問曰：「周公，何人也？」曰：「古聖人也。」曰：「使管叔監殷，管叔以殷畔也，有諸？」曰：「然。」曰：「周公知其將畔而使之與？」曰：「不知也。」「然則聖人且有過與？」曰：「周公弟也，管叔兄也；周公之過，不亦宜乎？且古之君子，過則改之，今之君子，過則順之。古之君子，其過也，如日月之食，民皆見之，及其更也，民皆仰之。今之君子，豈徒順之，又從為之辭。」

10. 孟子致為臣而歸。王就見孟子曰：「前日願見而不可得，得侍同朝，甚喜。今又棄寡人而歸，不識可以繼此而得見乎？」對曰：「不敢請耳，固所願也。」

他日，王謂時子曰：「我欲中國而授孟子室，養弟子以萬鍾，使諸大夫國人，皆有所矜式。子盍為我言之。」

時子因陳子而以告孟子。陳子以時子之言告孟子。孟子曰：「然。夫時子惡知其不可也？如使予欲富，辭十萬而受萬，是為欲富乎？季孫曰：『異哉，子叔疑！使己為政，不用，則亦已矣；又使其子弟為卿。人亦孰不欲富貴？而獨於富貴之中，有私龍斷焉。』古之為市者，以其所有，易其所無者，有司者治之耳。有賤丈夫焉，必求龍斷而登之，以左右望而罔市利。人皆以為賤，故從而征之。征商，自此賤丈夫始矣。」

11. 孟子去齊，宿於晝。有欲為王留行者，坐而言，不應，隱几而臥。客不悅曰：「弟子齊宿而後敢言，夫子臥而不聽，請勿復敢見矣。」曰：

「坐！我明語子。昔者魯繆公無人乎子思之側，則不能安子思；泄柳、申詳，無人乎繆公之側，則不能安其身。子為長者慮，而不及子思；子絕長者乎？長者絕子乎？」

12. 孟子去齊，尹士語人曰：「不識王之不可以為湯、武，則是不明也；識其不可，然且至，則是干澤也。千里而見王，不遇故去，三宿而後出晝，是何濡滯也！士則茲不悅。」

高子以告。曰：「夫尹士惡知予哉！千里而見王，是予所欲也；不遇故去，豈予所欲哉？予不得已也！予三宿而出晝，於予心猶以為速；王庶幾改之；王如改諸，則必反予。夫出晝而王不予追也，予然後浩然有歸志。予雖然，豈舍王哉！王由足用為善；王如用予，則豈徒齊民安，天下之民舉安。王庶幾改之，予日望之。予豈若是小丈夫然哉？諫於其君而不受，則怒，悻悻然見於其面；去則窮日之力而後宿哉！」尹士聞之曰：「士誠小人也。」

13. 孟子去齊，充虞路問曰：「夫子若有不豫色然。前日虞聞諸夫子曰：

『君子不怨天，不尤人。』」

曰：「彼一時，此一時也。五百年必有王者興，其間必有名世者。由周而來，七百有餘歲矣，以其數則過矣，以其時考之則可矣。夫天未欲平治天下也，如欲平治天下，當今之世，舍我其誰也？吾何為不豫哉！」

14. 孟子去齊，居休。公孫丑問曰：「仕而不受祿，古之道乎？」

曰：「非也。於崇，吾得見王。退而有去志；不欲變，故不受也。繼而有師命，不可以請，久於齊，非我志也。」



## 21【孟子滕文公第三章句上】凡五章

1. 滕文公為世子，將之楚，過宋而見孟子。孟子道性善，言必稱堯、舜。世子自楚反，復見孟子。

孟子曰：「世子疑吾言乎？夫道一而已矣！成覿謂齊景公曰：『彼，丈夫也；我，丈夫也，吾何畏彼哉！』顏淵曰：『舜何人也？予何人也？有為者亦若是！』公明儀曰：『文王我師也，周公豈欺我哉！』今滕絕長補短，將五十里也，猶可以為善國。書曰：『若藥不瞑眩，厥疾不瘳。』」

2. 滕定公薨。世子謂然友曰：「昔者孟子嘗與我言於宋，於心終不忘。今也不幸至於大故，吾欲使子問於孟子，然後行事。」然友之鄒，問於孟子。孟子曰：「不亦善乎！親喪，固所自盡也。曾子曰：『生，事之以禮；死，葬之以禮，祭之以禮，可謂孝矣。』諸侯之禮，吾未之學也。雖然，吾嘗聞之矣：三年之喪，齊疏之服，飪粥之食，自天子達於庶人，三代共之。」然友反命，定為三年之喪。父兄百官皆不欲，曰：「吾宗國魯先君莫之行，吾先君亦莫之行也。至於子之身而反之，不可。且志曰：『喪祭從先祖。』曰：『吾有所受之也。』」然友曰：「吾他日未嘗學問，好馳馬試劍。今也父兄百官不我足也，恐其不能盡於大事。子為我問孟子。」然友復之鄒，問孟子。孟子曰：「然。不可以他求者也。孔子曰：『君薨，聽於冢宰；鬻粥，面深墨，即位而哭；百官有司，莫敢不哀，先之也。上有好者，下必有甚焉者矣。君子之德，風也，小人之德，草也；草尚之風，必偃。』是在世子。」然友反命。世子曰：「然。是誠在我。」五月居廬，未有命戒，百官族人：「可謂曰『知』。」及至葬，四方來觀之，顏色之戚，哭泣之哀，弔者大悅。

3. 滕文公問為國。孟子曰：「民事不可緩也。詩云：『晝爾于茅，宵爾索

絢；亟其乘屋，其始播百穀。』民之為道也，有恆產者有恆心，無恆產者無恆心；苟無恆心，放辟邪侈，無不為己。及陷乎罪，然後從而刑之，是罔民也。焉有仁人在位，罔民而可為也？是故賢君必恭儉禮下，取於民有制。陽虎曰：『為富不仁矣，為仁不富矣。』夏后氏五十而貢，殷人七十而助，周人百畝而徹，其實皆什一也。徹者，徹也；助者，藉也。龍子曰：『治地莫善於助，莫不善於貢。』貢者，校數歲之中以為常。樂歲粒米狼戾，多取之而不為虐，則寡取之；凶年糞其田而不足，則必取盈焉。為民父母，使民矜矜然，將終歲勤動，不得以養其父母，又稱貸而益之，使老稚轉乎溝壑，惡在其為民父母也？夫世祿，滕固行之矣。詩云：『雨我公田，遂及我私。』惟助為有公田。由此觀之，雖周亦助也。

設為庠序學校以教之，庠者養也，校者教也，序者射也。夏曰校，殷曰序，周曰庠，學則三代共之，皆所以明人倫也。人倫明於上，小民親於下。有王者起，必來取法，是為王者師也。詩云：『周雖舊邦，其命維新。』文王之謂也。子力行之，亦以新子之國。」使畢戰問井地。孟子曰：「子之君將行仁政，選擇而使子，子必勉之。夫仁政必自經界始，經界不正，井地不均，穀祿不平。是故暴君汙吏，必慢其經界。經界既正，分田制祿，可坐而定也。夫滕，壤地褊小，將為君子焉，將為野人焉；無君子莫治野人，無野人莫養君子。請野九一而助，國中什一使自賦。卿以下，必有圭田；圭田五十畝。餘夫二十五畝。死徙無出鄉，鄉田同井。出入相友，守望相助，疾病相扶持，則百姓親睦。方里而井，井九百畝；其中為公田，八家皆私百畝，同養公田。公事畢，然後敢治私事，所以別野人也。此其大略也，若夫潤澤之，則在君與子矣。」

4. 有為神農之言者許行，自楚之滕，踵門而告文公曰：「遠方之人，聞君行仁政，願受一廛而為氓。」文公與之處。其徒數十人，皆衣褐，捆屨織席以為食。陳良之徒陳相，與其弟辛，負耒耜而自宋之滕，曰：「聞君行聖人之政，是亦聖人也，願為聖人氓。」陳相見許行而大悅，盡棄其學而學焉。陳相見孟子，道許行之言曰：「滕君則誠賢君也。雖然，未聞道也。賢者與民並耕而食，饗飧而治。今也滕有倉廩府庫，則是厲民而以自養也，惡得賢！」孟子曰：「許子必種粟而後食乎？」曰：「然。」「許子必織布而後衣乎？」曰：「否，許子衣褐。」「許子冠乎？」曰：「冠。」曰：「奚冠？」曰：「冠素。」曰：「自織之與？」曰：「否，以粟易之。」曰：「許子奚為不自織？」曰：「害於耕。」曰：「許子以釜甑爨，以鐵耕乎？」曰：「然。」「自為之

與？」曰：「否，以粟易之。」「以粟易械器者，不為厲陶冶；陶冶亦以其械器易粟者，豈為厲農夫哉！且許子何不為陶冶，舍皆取諸其宮中而用之？何為紛紛然與百工交易，何許子之不憚煩？」曰：「百工之事，固不可耕且為也。」「然則治天下獨可耕且為與？有大人之事，有小人之事。且一人之身，而百工之所為備。如必自為而後用之，是率天下而路也。故曰：或勞心，或勞力；勞心者治人，勞力者治於人；治於人者食人，治人者食於人，天下之通義也。」

「當堯之時，天下猶未平；洪水橫流，氾濫於天下；草木暢茂，禽獸繁殖，五穀不登；禽獸逼人，獸蹄鳥跡之道，交於中國。堯獨憂之，舉舜而敷治焉。舜使益掌火，益烈山澤而焚之，禽獸逃匿。禹疏九河，瀕濟、漯，而注諸海；決汝、漢，排淮、泗，而注之江。然後中國可得而食也。當是時也，禹八年於外，三過其門而不入，雖欲耕，得乎？后稷教民稼穡，樹藝五穀，五穀熟而民人育。人之有道也；飽食、煖衣、逸居而無教，則近於禽獸；聖人有憂之，使契為司徒，教以人倫：父子有親，君臣有義，夫婦有別，長幼有序，朋友有信。放勳曰：『勞之，來之，匡之，直之，輔之，翼之，使自得之，又從而振德之。』聖人之憂民如此，而暇耕乎？堯以不得舜為己憂，舜以不得禹、皋陶為己憂。夫以百畝之不易為己憂者，農夫也。」「分人以財謂之惠，教人以善謂之忠，為天下得人者謂之仁。是故以天下與人易，為天下得人難。孔子曰：『大哉，堯之為君，惟天為大，惟堯則之，蕩蕩乎！民無能名焉。君哉，舜也，巍巍乎！有天下而不與焉。』堯、舜之治天下，豈無所用其心哉，亦不用於耕耳。吾聞用夏變夷者，未聞變於夷者也。陳良、楚產也；悅周公、仲尼之道，北學於中國；北方之學者，未能或之先也，彼所謂豪傑之士也。子之兄弟，事之數十年；師死，而遂倍之。昔者孔子沒，三年之外，門人治任將歸：入揖於子貢，相嚮而哭，皆失聲，然後歸。子貢反，築室於場；獨居三年，然後歸。他日，子夏、子張、子游，以有若似聖人，欲以所事孔子事之，彊曾子。曾子曰：『不可。江、漢以濯之，秋陽以暴之，皜皜乎不可尚已！』」「今也南蠻馱舌之人，非先王之道，子倍子之師而學之，亦異於曾子矣。吾聞出於幽谷，遷於喬木者，未聞下喬木，而入於幽谷者。魯頌曰：『戎狄是膺，荊舒是懲。』周公方且膺之；子是之學，亦為不善變矣。從許子之道，則市賈不貳，國中無偽；雖使五尺之童適市，莫之或欺；布帛長短同，則賈相若；麻縷絲絮輕重同，則賈相若；五穀多寡同，則賈相若；屨大小同，則賈相若。」曰：「夫物之不齊，物之情也。或相倍蓰，或相什

百，或相千萬。子比而同之。是亂天下也。巨屨小屨同賈，人豈為之哉？從許子之道，相率而為偽者也，惡能治國家？」

5. 墨者夷之，因徐辟而求見孟子。孟子曰：「吾固願見，今吾尚病。病癒，我且往見，夷子不來。」他日，又求見孟子。孟子曰：「吾今則可以見矣。不直，則道不見，我且直之。吾聞夷子、墨者，墨之治喪也，以薄為其道也，夷子思以易天下，豈以為非是而不貴也？然而夷子葬其親厚，則是以所賤事親也！」徐子以告夷子。夷子曰：「儒者之道，古之人『若保赤子』，此言何謂也？之則以為愛無差等，施由親始。」徐子以告孟子，孟子曰：「夫夷子信以為：人之親其兄之子，為若親其鄰之赤子乎？彼有取爾也。赤子匍匐將入井，非赤子之罪也。且天之生物也，使之一本；而夷子二本故也。蓋上世嘗有不葬其親者，其親死，則舉而委之於壑。他日過之，狐狸食之，蠅蚋姑嘬之；其顛有泚，睨而不視。夫泚也，非為人泚，中心達於面目。蓋歸反藁裡而掩之。掩之誠是也，則孝子仁人之掩其親，亦必有道矣。」徐子以告夷子。夷子憮然為閒，曰：「命之矣！」



## 22【孟子滕文公第三章句下】凡十章

1. 陳代曰：「不見諸侯，宜若小然。今一見之，大則以王，小則以霸。且志曰：『枉尺而直尋』，宜若可為也。」孟子曰：「昔齊景公田，招虞人以旌，不至，將殺之。『志士不忘在溝壑，勇士不忘喪其元。』孔子奚取焉？取非其招不往也。如不待其招而往，何哉？且夫枉尺而直尋者，以利言也。如以利，則枉尋直尺而利，亦可為與？」「昔者趙簡子，使王良與嬖奚乘，終日而不獲一禽。嬖奚反命曰：『天下之賤工也。』或以告王良。良曰：『請復之。』彊而後可。一朝而獲十禽。嬖奚反命曰：『天下之良工也。』簡子曰：『我使掌與女乘。』謂王良，良不可，曰：『吾為之範我馳驅，終日不獲一；為之詭遇，一朝而獲十。詩云：『不失其馳，舍矢如破。』我不貫與小人乘，請辭。』」御者且羞與射者比；比而得禽獸，雖若丘陵，弗為也。如枉道而從彼，何也？且子過矣：枉己者，未有能直人者也。」
2. 景春曰：「公孫衍、張儀，豈不誠大丈夫哉？一怒而諸侯懼，安居而天下熄。」孟子曰：「是焉得為大丈夫乎！子未學禮乎？丈夫之冠也，父命之；女子之嫁也，母命之。往送之門，戒之曰：『往之女家，必敬必戒，無違夫子。』以順為正者，妾婦之道也。居天下之廣居，立天下之正位，

行天下之大道。得志與民由之；不得志獨行其道。富貴不能淫，貧賤不能移，威武不能屈，此之謂大丈夫。」

3. 周霄問曰：「古之君子仕乎？」孟子曰：「仕。傳曰：『孔子三月無君，則皇皇如也，出疆必載質。』公明儀曰：『古之人三月無君則弔。』」「三月無君則弔，不以急乎？」曰：「士之失位也，猶諸侯之失國家也，禮曰：『諸侯耕助，以供粢盛，夫人蠶繅，以為衣服。犧牲不成，粢盛不潔，衣服不備，不敢以祭。惟士無田，則亦不祭。』牲殺、器皿，衣服不備，不敢以祭，則不敢以宴；亦不足弔乎？」「出疆必載質，何也？」曰：「士之仕也，猶農夫之耕也；農夫豈為出疆舍其耒耜哉！」曰：「晉國，亦仕國也，未嘗聞仕如此其急；仕如此其急也，君子之難仕，何也？」曰：「丈夫生而願為之有室，女子生而願為之有家；父母之心，人皆有之；不待父母之命、媒妁之言，鑽穴隙相窺，踰牆相從，則父母國人皆賤之。古之人未嘗不欲仕也，又惡不由其道。不由其道而往者，與鑽穴隙之類也。」

4. 彭更問曰：「後車數十乘，從者數百人，以傳食於諸侯，不以泰乎？」孟子曰：「非其道，則一簞食不可受於人；如其道，則舜受堯之天下，不以為泰。子以為泰乎？」曰：「否，士無事而食，不可也。」曰：「子不通功易事，以羨補不足，則農有餘粟，女有餘布。子如通之，則梓匠輪輿，皆得食於子。於此有人焉：入則孝，出則悌，守先王之道，以待後之學者，而不得食於子。子何尊梓匠輪輿，而輕為仁義者哉！」曰：「梓匠輪輿，其志將以求食也。君子之為道也，其志亦將以求食與？」曰：「子何以其志為哉！其有功於子，可食而食之矣。且子食志乎？食功乎？」曰：「食志。」曰：「有人於此，毀瓦畫墁，其志將以求食也，則子食之乎？」曰：「否。」曰：「然則子非食志也，食功也。」

5. 萬章問曰：「宋，小國也，今將行王政；齊、楚惡而伐之，則如之何？」孟子曰：「湯居亳，與葛為鄰。葛伯放而不祀，湯使人問之曰：『何為不祀？』曰：『無以供犧牲也。』湯使遺之牛羊。葛伯食之，又不以祀。湯又使人問之曰：『何為不祀？』曰：『無以供粢盛也。』湯使亳眾，往為之耕，老弱饋食，葛伯率其民，要其有酒食黍稻者，奪之，不授者，殺之；有童子以黍肉餉，殺而奪之。書曰：『葛伯仇餉。』此之謂也。」「為其殺是童子而征之，四海之內皆曰：『非富天下也，為匹夫匹婦復讎也。』

湯始征，自葛載，十一征而無敵於天下。東面而征，西夷怨，南面而征，北狄怨，曰：『奚為後我？』民之望之，若大旱之望雨也。歸市者弗止，

芸者不變；誅其君，弔其民，如時雨降，民大悅。書曰：『徯我后，后來其無罰。』『有攸不惟臣，東征，綏厥士女，匪厥玄黃，紹我周王見休，惟臣附于大邑周。』其君子實玄黃于匪，以迎其君子，其小人簞食壺漿，以迎其小人。救民於水火之中，取其殘而已矣。太誓曰：『我武惟揚，侵于之疆，則取于殘，殺伐用張，于湯有光。』不行王政云爾。苟行王政，四海之內，皆舉首而望之，欲以為君；齊、楚雖大，何畏焉。」

6. 孟子謂戴不勝曰：「子欲子之王之善與？我明告子：有楚大夫於此，欲其子之齊語也；則使齊人傳諸？使楚人傳諸？」曰：「使齊人傳之。」曰：「一齊人傳之，眾楚人咻之；雖日撻而求其齊也，不可得矣。引而置之莊、嶽之間，數年，雖日撻而求其楚，亦不可得矣。子謂薛居州，善士也，使之居於王所。在於王所者，長幼卑尊皆薛居州也，王誰與為不善？在王所者，長幼卑尊皆非薛居州也，王誰與為善？一薛居州，獨如宋王何？」

7. 公孫丑問曰：「不見諸侯，何義？」孟子曰：「古者不為臣不見。段干木踰垣而必辟之，泄柳閉門而不內，是皆已甚；迫，斯可以見矣。陽貨欲見孔子，而惡無禮；大夫有賜於士，不得受於其家，則往拜其門；陽貨矚孔子之亡也，而饋孔子蒸豚；孔子亦矚其亡也，而往拜之。當是時，陽貨先，豈得不見？曾子曰：『脅肩諂笑，病于夏畦。』子路曰：『未同而言，觀其色赧赧然，非由之所知也。』由是觀之，則君子之所養，可知已矣。」

8. 戴盈之曰：「什一，去關市之征，今茲未能，請輕之，以待來年然後已，何如？」孟子曰：「今有人日攘其鄰之雞者，或告之曰：『是非君子之道。』曰：『請損之，月攘一雞，以待來年然後已。』如知其非義，斯速已矣，何待來年？」

9. 公都子曰：「外人皆稱夫子好辯，敢問何也？」孟子曰：「予豈好辯哉？予不得已也。天下之生久矣，一治一亂。當堯之時，水逆行，氾濫於中國；蛇龍居之，民無所定；下者為巢，上者為營窟。書曰：『洚水警余。』洚水者，洪水也。使禹治之。禹掘地而注之海，驅蛇龍而放之菹；水由地中行，江、淮、河、漢是也。險阻既遠，鳥獸之害人者消，然後人得平土而居之。堯、舜既沒，聖人之道衰，暴君代作，壞宮室以為汙池，民無所安息。棄田以為園囿，使民不得衣食，邪說暴行又作。園囿、汙池、沛澤多而禽獸至。及紂之身，天下又大亂。周公相武王，誅紂，伐奄，三年討其君，驅飛廉於海隅而戮之；滅國者五十；驅虎豹犀象而遠之；天下大悅。書曰：『丕顯哉，文王謨，丕承哉，武王烈。佑啟我後

人，咸以正無缺。』世衰道微，邪說暴行有作。臣弑其君者有之，子弑其父者有之。孔子懼，作春秋。春秋，天子之事也。是故，孔子曰：『知我者，其惟春秋乎！罪我者，其惟春秋乎！』聖王不作，諸侯放恣。處士橫議，楊朱、墨翟之言盈天下。天下之言，不歸楊則歸墨。楊氏為我，是無君也；墨氏兼愛，是無父也。無父無君，是禽獸也。公明儀曰：『庖有肥肉，廄有肥馬，民有飢色，野有餓莩，此率獸而食人也。』楊、墨之道不息，孔子之道不著，是邪說誣民，充塞仁義也。仁義充塞，則率獸食人。人將相食，吾為此懼，閑先聖之道，距楊、墨，放淫辭，邪說者不得作。作於其心，害於其事；作於其事，害於其政；聖人復起，不易吾言矣。」

「昔者禹抑洪水，而天下平；周公兼夷狄，驅猛獸，而百姓寧；孔子成春秋，而亂臣賊子懼。詩云：『戎狄是膺，荊舒是懲，則莫我敢承。』無父無君，是周公所膺也。我亦欲正人心，息邪說，距跛行，放淫辭，以承三聖者。豈好辯哉？予不得已也。能言距楊、墨者，聖人之徒也。」

10. 匡章曰：「陳仲子，豈不誠廉士哉？居於陵、三日不食，耳無聞，目無見也。井上有李，蠶食實者過半矣，匍匐往，將食之，三咽，然後耳有聞，目有見。」孟子曰：「於齊國之士，吾必以仲子為巨擘焉。雖然，仲子惡能廉。充仲子之操，則蚓而後可者也。夫蚓，上食槁壤，下飲黃泉；仲子所居之室，伯夷之所築與？抑亦盜跖之所築與？所食之粟，伯夷之所樹與？抑亦盜跖之所樹與？是未可知也。」曰：「是何傷哉！彼身織屨，妻辟纊，以易之也。」曰：「仲子，齊之世家也。兄戴，蓋祿萬鍾，以兄之祿為不義之祿，而不食也，以兄之室為不義之室，而不居也。辟兄離母，處於於陵。他日歸，則有饋其兄生鵝者。己頻顛曰：『惡用是駝駝者為哉！』他日，其母殺是鵝也，與之食之，其兄自外至，曰：『是駝駝之肉也！』出而哇之。以母則不食，以妻則食之；以兄之室則弗居，以於陵則居之。是尚為能充其類也乎？若仲子者，蚓而後充其操者也！」[ㄟㄟㄟㄟㄟㄟ](#)

## 23【孟子離婁第四章句上】凡二十八章

1. 孟子曰：「離婁之明，公輸子之巧，不以規矩，不能成方員。師曠之聰，不以六律，不能正五音。堯、舜之道，不以仁政，不能平治天下。今有仁心仁聞，而民不被其澤，不可法於後世者，不行先王之道也。故曰：『徒善不足以為政。徒法不能以自行。』詩云：『不愆不忘，率由舊章。』遵先王之法而過者，未之有也。聖人既竭目力焉，繼之以規矩準繩；以為方員平直，不可勝用也；既竭耳力焉，繼之以六律，正五音，不可勝用也；既竭心思焉，繼之以不忍人之政，而仁覆天下矣。故曰：『為高必因丘



陵，為下必因川澤。』為政不因先王之道，可謂智乎？是以惟仁者，宜在高位，不仁而在高位，是播其惡於眾也。上無道揆也，下無法守也。朝不信道，工不信度，君子犯義，小人犯刑；國之所存者，幸也。故曰：『城郭不完，兵甲不多，非國之災也。田野不辟，貨財不聚，非國之害也。上無禮，下無學，賊民興，喪無日矣。』詩曰：『天之方蹶，無然泄泄。』泄泄，猶沓沓也。事君無義，進退無禮，言則非先王之道者，猶沓沓也。故曰：『責難於君謂之恭，陳善閉邪謂之敬，吾君不能謂之賊。』」

2. 孟子曰：「規矩，方員之至也；聖人，人倫之至也。欲為君，盡君道；欲為臣，盡臣道。二者皆法堯、舜而已矣。不以舜之所以事堯事君，不敬其君者也。不以堯之所以治民治民，賊其民者也。孔子曰：『道二：仁與不仁而已矣。』暴其民甚，則身弑國亡；不甚，則身危國削。名之曰『幽、厲』，雖孝子慈孫，百世不能改也。詩云：『殷鑒不遠，在夏后之世。』此之謂也。」
3. 孟子曰：「三代之得天下也以仁，其失天下也以不仁。國之所以廢興存亡者亦然。天子不仁，不保四海；諸侯不仁，不保社稷；卿大夫不仁，不保宗廟；士庶人不仁，不保四體。今惡死亡而樂不仁，是猶惡醉而強酒。」
4. 孟子曰：「愛人不親反其仁，治人不治反其智，禮人不答反其敬。行有不得者，皆反求諸己；其身正，而天下歸之。詩云：『永言配命，自求多福。』」
5. 孟子曰：「人有恆言，皆曰：『天下國家。』天下之本在國，國之本在家，家之本在身。」
6. 孟子曰：「為政不難，不得罪於巨室，巨室之所慕，一國慕之；一國之所慕，天下慕之。故沛然德教溢乎四海。」
7. 孟子曰：「天下有道，小德役大德，小賢役大賢；天下無道，小役大，弱役強。斯二者，天也。順天者存，逆天者亡。齊景公曰：『既不能令，又不受命，是絕物也。』涕出而女於吳。今也小國師大國，而恥受命焉，是猶弟子而恥受命於先師也。如恥之，莫若師文王；師文王，大國五年，小國七年，必為政於天下矣。詩云：『商之孫子，其麗不億；上帝既命，侯于周服；侯服于周，天命靡常；殷士膚敏，裸將于京。』孔子曰：『仁，不可為眾也。』夫國君好仁，天下無敵。今也欲無敵於天下，而不以仁，是猶執熱而不以濯也。詩云：『誰能執熱，逝不以濯？』」
8. 孟子曰：「不仁者，可與言哉？安其危而利其菑，樂其所以亡者。不仁而可與言，則何亡國敗家之有？有孺子歌曰：『滄浪之水清兮，可以濯我纓；滄浪之水濁兮，可以濯我足。』孔子曰：『小子聽之：清斯濯纓，濁

斯濯足矣。自取之也。』夫人必自侮，然後人侮之；家必自毀，而後人毀之；國必自伐，而後人伐之。太甲曰：『天作孽，猶可違；自作孽，不可活。』此之謂也。」

9. 孟子曰：「桀、紂之失天下也，失其民也；失其民者，失其心也。得天下有道，得其民，斯得天下矣。得其民有道，得其心，斯得民矣。得其心有道，所欲與之聚之，所惡勿施爾也。民之歸仁也，猶水之就下，獸之走壙也。故為淵毆魚者，獺也；為叢毆爵者，鷩也；為湯、武毆民者，桀與紂也。今天下之君有好仁者，則諸侯皆為之毆矣。雖欲無王，不可得已。今之欲王者，猶七年之病求三年之艾也。苟為不畜，終身不得。苟不志於仁，終身憂辱，以陷於死亡。詩云：『其何能淑？載胥及溺。』此之謂也。」
10. 孟子曰：「自暴者，不可與有言也；自棄者，不可與有為也。言非禮義，謂之自暴也；吾身不能居仁由義，謂之自棄也。仁，人之安宅也；義，人之正路也。曠安宅而弗居，舍正路而不由，哀哉！」
11. 孟子曰：「道在爾而求諸遠，事在易而求諸難。人人親其親，長其長，而天下平。」
12. 孟子曰：「居下位而不獲於上，民不可得而治也。獲於上有道，不信於友，弗獲於上矣。信於友有道，事親弗悅，弗信於友矣。悅親有道，反身不誠，不悅於親矣。誠身有道，不明乎善，不誠其身矣。是故，誠者天之道也；思誠者人之道也。至誠而不動者，未之有也；不誠，未有能動者也。」
13. 孟子曰：「伯夷辟紂，居北海之濱，聞文王作，興曰：『盍歸乎來？吾聞西伯善養老者。』太公辟紂，居東海之濱，聞文王作，興曰：『盍歸乎來？吾聞西伯善養老者。』二老者，天下之大老也，而歸之，是天下之父歸之也。天下之父歸之，其子焉往？諸侯有行文王之政者，七年之內，必為政於天下矣。」
14. 孟子曰：「求也為季氏宰，無能改於其德，而賦粟倍他日。孔子曰：『求，非我徒也，小子鳴鼓而攻之，可也。』由此觀之，君不行仁政而富之，皆棄於孔子者也。況於為之強戰，爭地以戰，殺人盈野；爭城以戰，殺人盈城。此所謂率土地而食人肉，罪不容於死！故善戰者服上刑，連諸侯者次之，辟草萊、任土地者次之。」
15. 孟子曰：「存乎人者，莫良於眸子；眸子不能掩其惡。胸中正，則眸子瞭焉；胸中不正，則眸子眊焉。聽其言也，觀其眸子，人焉廋哉？」

16. 孟子曰：「恭者不侮人，儉者不奪人。侮奪人之君，惟恐不順焉，惡得為恭儉？恭儉豈可以聲音笑貌為哉？」
17. 淳于髡曰：「男女授受不親，禮與？」孟子曰：「禮也。」曰：「嫂溺則援之以手乎？」曰：「嫂溺不援，是豺狼也。男女授受不親，禮也；嫂溺援之以手者，權也。」曰：「今天下溺矣，夫子之不援，何也？」曰：「天下溺，援之以道，嫂溺，援之以手。子欲手援天下乎？」
18. 公孫丑曰：「君子之不教子，何也？」孟子曰：「勢不行也。教者必以正，以正不行，繼之以怒。繼之以怒，則反夷矣。夫子教我以正，夫子未出於正也，則是父子相夷也。父子相夷，則惡矣。古者易子而教之，父子之間不責善，責善則離，離則不祥莫大焉。」
19. 孟子曰：「事孰為大？事親為大。守孰為大？守身為大。不失其身而能事其親者，吾聞之矣。失其身而能事其親者，吾未之聞也。孰不為事？事親，事之本也。孰不為守？守身，守之本也。曾子養曾皙，必有酒肉；將徹，必請所與，問有餘，必曰：『有』。曾皙死，曾元養曾子，必有酒肉；將徹，必請所與，問有餘，曰：『亡矣。將以復進也。』此所謂養口體者也。若曾子，則可謂養志也。事親若曾子者，可也。」
20. 孟子曰：「人不足與適也，政不足(與)間也。惟大人為能格君心之非；君仁莫不仁，君義莫不義，君正莫不正；一正君而國定矣。」
21. 孟子曰：「有不虞之譽，有求全之毀。」
22. 孟子曰：「人之易其言也，無責耳矣。」
23. 孟子曰：「人之患，在好為人師。」
24. 樂正子從於子敖之齊。樂正子見孟子。孟子曰：「子亦來見我乎？」曰：「先生何為出此言也？」曰：「子來幾日矣？」曰：「昔者。」曰：「昔者，則我出此言也，不亦宜乎？」曰：「舍館未定。」曰：「子聞之也，舍館定，然後求見長者乎？」曰：「克有罪。」
25. 孟子謂樂正子曰：「子之從於子敖來，徒舖啜也。我不意子學古之道，而以舖啜也。」
26. 孟子曰：「不孝有三，無後為大。舜不告而娶，為無後也。君子以為猶告也。」
27. 孟子曰：「仁之實，事親是也。義之實，從兄是也。智之實，知斯二者弗去是也。禮之實，節文斯二者是也。樂之實，樂斯二者，樂則生矣。生則惡可已也；惡可已，則不知足之蹈之，手之舞之。」
28. 孟子曰：「天下大悅而將歸己，視天下悅而歸己，猶草芥也，惟舜為然。不得乎親，不可以為人；不順乎親，不可以為子。舜盡事親之道，而

瞽瞍底豫。瞽瞍底豫而天下化，瞽瞍底豫而天下之為父子者定，此之謂大孝。」

### ㄟㄟㄟㄟㄟㄟ

## 24【孟子離婁第四章句下】凡三十三章

1. 孟子曰：「舜生於諸馮，遷於負夏，卒於鳴條；東夷之人也。文王生於岐周，卒於畢郢，西夷之人也。地之相去也，千有餘里；世之相後也，千有餘歲；得志行乎中國，若合符節。先聖後聖，其揆一也。」
2. 子產聽鄭國之政，以其乘輿濟人於溱洧。孟子曰：「惠而不知為政。歲十一月徒杠成，十二月輿梁成，民未病涉也。君子平其政，行辟人可也，焉得人人而濟之。故為政者，每人而悅之，日亦不足矣。」
3. 孟子告齊宣王曰：「君之視臣如手足，則臣視君如腹心；君之視臣如犬馬，則臣視君如國人；君之視臣如土芥，則臣視君如寇讎。」王曰：「禮為舊君有服，何如斯可為服矣？」曰：「諫行言聽，膏澤下於民；有故而去，則君使人導之出疆。又先於其所往，去三年不反，然後收其田里，此之謂三有禮焉，如此則為之服矣。今也為臣，諫則不行，言則不聽，膏澤不下於民，有故而去，則君搏執之，又極之於其所往。去之日，遂收其田里，此之謂寇讎，寇讎何服之有！」
4. 孟子曰：「無罪而殺士，則大夫可以去；無罪而戮民，則士可以徙。」
5. 孟子曰：「君仁莫不仁，君義莫不義。」
6. 孟子曰：「非禮之禮，非義之義，大人弗為。」
7. 孟子曰：「中也養不中，才也養不才，故人樂有賢父兄也。如中也棄不中，才也棄不才，則賢不肖之相去，其間不能以寸。」
8. 孟子曰：「人有不為也，而後可以有為。」
9. 孟子曰：「言人之不善，當如後患何！」
10. 孟子曰：「仲尼不為己甚者。」
11. 孟子曰：「大人者，言不必信，行不必果，惟義所在。」
12. 孟子曰：「大人者，不失其赤子之心者也。」
13. 孟子曰：「養生者不足以當大事，惟送死可以當大事。」
14. 孟子曰：「君子深造之以道，欲其自得之也。自得之，則居之安。居之安，則資之深。資之深，則取之左右逢其原。故君子欲其自得之也。」
15. 孟子曰：「博學而詳說之，將以反說約也。」
16. 孟子曰：「以善服人者，未有能服人者也。以善養人，然後能服天下。天下不心服而王者，未之有也。」
17. 孟子曰：「言無實不祥。不祥之實，蔽賢者當之。」

18. 徐子曰：「仲尼亟稱於水曰：『水哉！水哉！』何取於水也？」孟子曰：「原泉混混，不舍晝夜，盈科而後進，放乎四海，有本者如是，是之取爾。苟為無本，七八月之間雨集，溝澮皆盈，其涸也，可立而待也！故聲聞過情，君子恥之。」
19. 孟子曰：「人之所以異於禽獸者幾希，庶民去之，君子存之。舜明於庶物，察於人倫，由仁義行，非行仁義也。」
20. 孟子曰：「禹惡旨酒，而好善言。湯執中，立賢無方。文王視民如傷，望道而未之見。武王不泄邇，不忘遠。周公思兼三王，以施四事，其有不合者，仰而思之，夜以繼日，幸而得之，坐以待旦。」
21. 孟子曰：「王者之跡熄而詩亡，詩亡然後春秋作。晉之乘，楚之檮杌，魯之春秋，一也。其事則齊桓、晉文，其文則史。孔子曰：『其義則丘竊取之矣。』」
22. 孟子曰：「君子之澤，五世而斬；小人之澤，五世而斬。予未得為孔子徒也，予私淑諸人也。」
23. 孟子曰：「可以取，可以無取；取傷廉。可以與，可以無與；與傷惠。可以死，可以無死；死傷勇。」
24. 逢蒙學射於羿，盡羿之道，思天下惟羿為愈己，於是殺羿。孟子曰：「是亦羿有罪焉。公明儀曰：『宜若無罪焉。』曰：薄乎云爾，惡得無罪！鄭人使子濯孺子侵衛，衛使庾公之斯追之。子濯孺子曰：『今日我疾作，不可以執弓，吾死矣夫！』問其僕曰：『追我者誰也？』其僕曰：『庾公之斯也。』曰：『吾生矣！』其僕曰：『庾公之斯，衛之善射者也。夫子曰『吾生』，何謂也？』曰：『庾公之斯學射於尹公之他，尹公之他學射於我。夫尹公之他，端人也，其取友必端矣。』庾公之斯至，曰：『夫子何為不執弓？』曰：『今日我疾作，不可以執弓。』曰：『小人學射於尹公之他，尹公之他學射於夫子。我不忍以夫子之道，反害夫子。雖然，今日之事，君事也，我不敢廢。』抽矢扣輪，去其金，發乘矢而後反。」
25. 孟子曰：「西子蒙不潔，則人皆掩鼻而過之。雖有惡人，齊戒沐浴，則可以祀上帝。」
26. 孟子曰：「天下之言性也，則故而已矣。故者，以利為本。所惡於智者，為其鑿也。如智者若禹之行水也，則無惡於智矣，禹之行水也，行其所無事也。如智者亦行其所無事，則智亦大矣。天之高也，星辰之遠也，苟求其故，千歲之日至，可坐而致也。」

27. 公行子有子之喪，右師往弔。入門，有進而與右師言者，有就右師之位而與右師言者。孟子不與右師言。右師不悅，曰：「諸君子皆與驩言，孟子獨不與驩言，是簡驩也。」孟子聞之，曰：「禮，朝廷不歷位而相與言，不踰階而相揖也。我欲行禮，子敖以我為簡，不亦異乎！」

28. 孟子曰：「君子所以異於人者，以其存心也。君子以仁存心，以禮存心。仁者愛人，有禮者敬人。愛人者，人恆愛之；敬人者，人恆敬之。有人於此，其待我以橫逆，則君子必自反也，我必不仁也，必無禮也，此物奚宜至哉！」「其自反而仁矣，自反而有禮矣，其橫逆由是也，君子必自反也，我必不忠。自反而忠矣，其橫逆由是也，君子曰：『此亦妄人也已矣！如此則與禽獸奚擇哉！於禽獸又何難焉！』」「是故，君子有終身之憂，無一朝之患也。乃若所憂則有之。舜，人也，我亦人也，舜為法於天下可傳於後世，我由未免為鄉人也，是則可憂也。憂之如何？如舜而已矣！若夫君子所患則亡矣，非仁無為也，非禮無行也。如有一朝之患，則君子不患矣。」

29. 禹稷當平世，三過其門而不入，孔子賢之。顏子當亂世，居於陋巷，一簞食，一瓢飲，人不堪其憂，顏子不改樂，孔子賢之。孟子曰：「禹稷顏回同道。禹思天下有溺者，由己溺之也；稷思天下有飢者，由己飢之也；是以如是其急也。禹稷顏子，易地則皆然。今有同室之人鬥者，救之，雖被髮纓冠而救之，可也。鄉鄰有鬥者，被髮纓冠而往救之，則惑也，雖閉戶可也。」

30. 公都子曰：「匡章，通國皆稱不孝焉，夫子與之遊，又從而禮貌之，敢問何也？」孟子曰：「世俗所謂不孝者五，惰其四肢，不顧父母之養，一不孝也；博弈好飲酒，不顧父母之養，二不孝也；好貨財，私妻子，不顧父母之養，三不孝也。從耳目之欲，以為父母戮，四不孝也；好勇鬥狠，以危父母，五不孝也。章子有一於是乎？」「夫章子，子父責善，而不相遇也。責善，朋友之道也。父子責善，賊恩之大者。夫章子，豈不欲有夫妻子母之屬哉，為得罪於父，不得近，出妻屏子，終身不養焉。其設心，以為不若是，是則罪之大者。是則章子已矣！」

31. 曾子居武城，有越寇。或曰：「寇至，盍去諸？」曰：「無寓人於我室，毀傷其薪木。」寇退，則曰：「脩我牆屋，我將反。」寇退，曾子反。左右曰：「待先生如此其忠且敬也！寇至則先去以為民望，寇退則反，殆於不可！」沈猶行曰：「是非汝所知也！昔沈猶有負芻之禍，從先生者七十人，未有與焉。」子思居於衛，有齊寇。或曰：「寇至，盍去

諸？」子思曰：「如伋去，君誰與守。」孟子曰：「曾子、子思同道。曾子，師也，父兄也；子思，臣也，微也。曾子、子思，易地則皆然。」

32. 儲子曰：「王使人問夫子，果有以異於人乎？」孟子曰：「何以異於人哉？堯舜與人同耳。」

33. 「齊人有一妻一妾而處室者。其良人出，則必饜酒肉而後反。其妻問所與飲食者，則盡富貴也。其妻告其妾曰：『良人出，則必饜酒肉而後反，問其與飲食者，盡富貴也，而未嘗有顯者來。吾將問良人之所之也。』蚤起，施從良人之所之，徧國中無與立談者，卒之東郭墻間之祭者，乞其餘，不足，又顧而之他，此其為饜足之道也。其妻歸，告其妾曰：『良人者，所仰望而終身也。今若此！』與其妾訕其良人，而相泣於中庭。而良人未之知也，施施從外來，驕其妻妾。由君子觀之，則人之所以求富貴利達者，其妻妾不羞也，而不相泣者，幾希矣！」



## 25【孟子萬章第五章句上】凡九章

1. 萬章問曰：「舜往于田，號泣于旻天。何為其號泣也？」孟子曰：「怨慕也。」萬章曰：「父母愛之，喜而不忘；父母惡之，勞而不怨。然則舜怨乎？」曰：「長息問於公明高曰：『舜往于田，則吾既得聞命矣。號泣于旻天，于父母，則吾不知也。』公明高曰：『是非爾所知也。』夫公明高以孝子之心，為不若是愬；我竭力耕田，共為子職而已矣。父母之不我愛，於我何哉！」「帝使其子九男二女，百官牛羊倉廩備，以事舜於畎畝之中，天下之士多就之者，帝將胥天下而遷之焉；為不順於父母，如窮人無所歸。天下之士悅之，人之所欲也，而不足以解憂。好色，人之所欲，妻帝之二女，而不足以解憂。富，人之所欲，富有天下，而不足以解憂。貴，人之所欲，貴為天子，而不足以解憂。人悅之，好色富貴，無足以解憂者；惟順於父母，可以解憂。人少則慕父母，知好色則慕少艾，有妻子則慕妻子，仕則慕君，不得於君則熱中。大孝終身慕父母，五十而慕者，予於大舜見之矣。」

2. 萬章問曰：「詩云：『娶妻如之何？必告父母。』信斯言也，宜莫如舜；舜之不告而娶，何也？」孟子曰：「告則不得娶，男女居室，人之大倫也。如告，則廢人之大倫，以懟父母，是以不告也。」萬章曰：「舜之不告而娶，則吾既得聞命矣。帝之妻舜而不告，何也？」曰：「帝亦知告焉，則不得妻也。」萬章曰：「父母使舜完廩，捐階，瞽瞍焚廩，使浚井，出，從而揜之。象曰：『謨蓋都君，咸我績；牛羊父母，食廩父母，」

干戈朕，琴朕，張朕；二嫂使治朕棲。」象往入舜宮，舜在床琴，象曰：『鬱陶，思君爾！』忸怩。舜曰：『惟茲臣庶，汝其于予治。』不識舜不知象之將殺己與？」曰：「奚而不知也！象憂亦憂，象喜亦喜。」曰：「然則舜偽喜者與？」曰：「否。昔者有饋生魚於鄭子產，子產使校人畜之池，校人烹之，反命曰：『始舍之，圉圉焉，少則洋洋焉，攸然而逝。』子產曰：『得其所哉！得其所哉！』校人出，曰：『孰謂子產智，予既烹而食之，曰：得其所哉！得其所哉！』故君子可欺以其方，難罔以非其道。彼以愛兄之道來，故誠信而喜之，奚偽焉！」

3. 萬章問曰：「象日以殺舜為事，立為天子，則放之，何也？」孟子曰：「封之也。或曰放焉。」萬章曰：「舜流共工于幽州，放驩兜于崇山，殺三苗于三危，殛鯀于羽山，四罪而天下咸服，誅不仁也。象至不仁，封之有庠，有庠之人奚罪焉？仁人固如是乎，在他人則誅之，在弟則封之。」曰：「仁人之於弟也，不藏怒焉，不宿怨焉，親愛之而已矣。親之欲其貴也，愛之欲其富也；封之有庠，富貴之也，身為天子，弟為匹夫，可謂親愛之乎？」「敢問『或曰放』者，何謂也？」曰：「象不得有為於其國，天子使吏治其國，而納其貢稅焉，故謂之放，豈得暴彼民哉！雖然，欲常常而見之，故源源而來。不及貢，以政接於有庠，此之謂也。」
4. 咸丘蒙問曰：「語云：『盛德之士，君不得而臣，父不得而子。舜南面而立，堯帥諸侯北面而朝之，瞽瞍亦北面而朝之；舜見瞽瞍，其容有蹙。』孔子曰：『於斯時也，天下殆哉，岌岌乎！』不識此語，誠然乎哉？」孟子曰：「否。此非君子之言，齊東野人之語也。堯老而舜攝也。堯典曰：『二十有八載，放勳乃徂落，百姓如喪考妣，三年，四海遏密八音。』孔子曰：『天無二日，民無二王。』舜既為天子矣，又帥天下諸侯以為堯三年喪，是二天子矣！」咸丘蒙曰：「舜之不臣堯，則吾既得聞命矣。詩云：『普天之下，莫非王土；率土之濱，莫非王臣。』而舜既為天子矣，敢問瞽瞍之非臣如何？」曰：「是詩也，非是之謂也，勞於王事，而不得養父母也。曰：『此莫非王事，我獨賢勞也。』故說詩者，不以文害辭，不以辭害志；以意逆志，是為得之。如以辭而已矣，雲漢之詩曰：『周餘黎民，靡有孑遺。』信斯言也，是周無遺民也。」「孝子之至，莫大乎尊親；尊親之至，莫大乎以天下養。為天子父，尊之至也；以天下養，養之至也。詩曰：『永言孝思，孝思維則。』此之謂也。書曰：『祇載見瞽瞍，夔夔齊栗，瞽瞍亦允若。』是為父不得而子也。」
5. 萬章曰：「堯以天下與舜，有諸？」孟子曰：「否。天子不能以天下與人。」「然則舜有天下也，孰與之？」曰：「天與之。」「天與之者，諄



諄然命之乎？」曰：「否。天不言，以行與事示之而已矣。」曰：「以行與事示之者，如之何？」曰：「天子能薦人於天，不能使天與之天下，諸侯能薦人於天子，不能使天子與之諸侯；大夫能薦人於諸侯，不能使諸侯與之大夫。昔者堯薦舜於天而天受之，暴之於民而民受之。故曰：『天不言，以行與事示之而已矣。』」曰：「敢問：『薦之於天而天受之，暴之於民而民受之』，如何？」曰：「使之主祭，而百神享之，是天受之，使之主事而事治，百姓安之，是民受之也。天與之，人與之。故曰，天子不能以天下與人。舜相堯二十有八載，非人之所能為也，天也。堯崩，三年之喪畢，舜避堯之子於南河之南。天下諸侯朝覲者，不之堯之子而之舜，訟獄者，不之堯之子而之舜；謳歌者，不謳歌堯之子而謳歌舜。故曰天也。夫然後，之中國，踐天子位焉。而居堯之宮，逼堯之子，是篡也，非天與也。太誓曰：『天視自我民視，天聽自我民聽。』此之謂也。」

6. 萬章問曰：「人有言，至於禹而德衰，不傳於賢而傳於子，有諸？」孟子曰：「否，不然也。天與賢則與賢，天與子則與子。昔者舜薦禹於天，十有七年；舜崩，三年之喪畢，禹避舜之子於陽城，天下之民從之，若堯崩之後，不從堯之子而從舜也。禹薦益於天。七年；禹崩，三年之喪畢，益避禹之子於箕山之陰。朝覲訟獄者，不之益而之啟，曰：『吾君之子也。』謳歌者，不謳歌益而謳歌啟，曰：『吾君之子也。』丹朱之不肖，舜之子亦不肖；舜之相堯，禹之相舜也，歷年多，施澤於民久。啟賢，能敬承繼禹之道，益之相禹也，歷年少，施澤於民未久。舜、禹、益相去久遠，其子之賢不肖，皆天也，非人之所能為也，莫之為而為者，天也；莫之致而至者，命也。」「匹夫而有天下者，德必若舜禹，而又有天子薦之者。故仲尼不有天下。繼世以有天下，天之所廢，必若桀紂者也。故益、伊尹、周公不有天下。伊尹相湯以王於天下，湯崩，太丁未立，外丙二年，仲壬四年；太甲顛覆湯之典刑，伊尹放之於桐三年，太甲悔過，自怨自艾，於桐處仁遷義，三年，以聽伊尹之訓己也，復歸于亳。周公之不有天下，猶益之於夏，伊尹之於殷也。孔子曰：『唐虞禪，夏后殷周繼，其義一也。』」

7. 萬章問曰：「人有言，伊尹以割烹要湯，有諸？」孟子曰：「否，不然。伊尹耕於有莘之野，而樂堯、舜之道焉。非其義也，非其道也，祿之以天下，弗顧也。繫馬千駟，弗視也。非其義也，非其道也，一介不以與人，一介不以取諸人。」「湯使人以幣聘之，囂囂然曰：『我何以湯之聘幣為哉！我豈若處畎畝之中，由是以樂堯舜之道哉！』湯三使往聘之，既而幡然改曰：『與我處畎畝之中，由是以樂堯舜之道，吾豈若使是君為堯舜之

君哉！吾豈若使是民為堯舜之民哉！吾豈若於吾身親見之哉！天之生此民也，使先知覺後知，使先覺覺後覺也。予，天民之先覺者也，予將以斯道覺斯民也，非予覺之而誰也！」「思天下之民，匹夫匹婦有不被堯舜之澤者，若已推而內之溝中，其自任以天下之重如此！故就湯而說之，以伐夏救民。」「吾未聞枉己而正人者也，況辱己以正天下者乎！聖人之行不同也，或遠或近，或去或不去，歸潔其身而已矣。吾聞其以堯舜之道要湯，未聞以割烹也。」「伊訓曰：『天誅造攻自牧宮，朕載自亳。』」

8. 萬章問曰：「或謂孔子於衛主癰疽，於齊主侍人瘠環，有諸乎？」孟子曰：「否，不然也，好事者為之也。」「於衛主顏雝由。彌子之妻，與子路之妻，兄弟也。彌子謂子路曰：『孔子主我，衛卿可得也。』子路以告，孔子曰：『有命。』孔子進以禮，退以義，得之不得曰『有命』。而主癰疽與侍人瘠環，是無義無命也。」孔子不悅於魯衛，遭宋桓司馬，將要而殺之，微服而過宋。是時孔子當阨，主司城貞子，為陳侯周臣。」「吾聞，觀近臣以其所為主，觀遠臣以其所主，若孔子主癰疽與侍人瘠環，何以為孔子！」

9. 萬章問曰：「或曰：『百里奚自鬻於秦養牲者，五羊之皮，食牛以要秦穆公，信乎？』孟子曰：「否，不然，好事者為之也。」「百里奚，虞人也。晉人以垂棘之璧，與屈產之乘，假道於虞以伐虢。宮之奇諫，百里奚不諫。」「知虞公之不可諫而去之秦，年已七十矣，曾不知以食牛干秦穆公之為汙也，可謂智乎？不可諫而不諫，可謂不智乎？知虞公之將亡而先去之，不可謂不智也。時舉於秦，知穆公之可與有行也，而相之，可謂不智乎？相秦而顯其君於天下，可傳於後世，不賢而能之乎？自鬻以成其君，鄉黨自好者不為，而謂賢者為之乎？」



## 26【孟子萬章第五章句下】凡九章

1. 孟子曰：「伯夷，目不視惡色，耳不聽惡聲；非其君不事，非其民不使；治則進，亂則退；橫政之所出，橫民之所止，不忍居也，思與鄉人處，如以朝衣朝冠坐於塗炭也。當紂之時，居北海之濱，以待天下之清也。故聞伯夷之風者，頑夫廉，懦夫有立志。伊尹曰：『何事非君，何使非民？』治亦進，亂亦進。曰：『天之生斯民也，使先知覺後知，使先覺覺後覺。予，天民之先覺者也，予將以此道覺此民也。』思天下之民，匹夫匹婦，有不與被堯、舜之澤者，若已推而內之溝中，其自任以天下之重也。柳下惠不羞汙君，不辭小官；進不隱賢，必以其道。遺佚而不怨，阨窮而不憫；與鄉人處，由由然不忍去也。『爾為爾，我為

我，雖袒裼裸裎於我側，爾焉能浼我哉！」故聞柳下惠之風者，鄙夫寬，薄夫敦。孔子之去齊，接淅而行，去魯，曰：『遲遲吾行也。』去父母國之道也。可以速而速，可以久而久，可以處而處，可以仕而仕，孔子也。」

孟子曰：「伯夷，聖之清者也。伊尹，聖之任者也。柳下惠，聖之和者也。孔子，聖之時者也。孔子之謂集大成，集大成也者，金聲而玉振之也。金聲也者，始條理也。玉振之也者，終條理也。始條理者，智之事也。終條理者，聖之事也。智，譬則巧也。聖，譬則力也。由射於百步之外也。其至，爾力也；其中，非爾力也。」

2. 北宮錡問曰：「周室班爵祿也，如之何？」孟子曰：「其詳不可得聞也。諸侯惡其害己也，而皆去其籍。然而軻也，嘗聞其略也。天子一位，公一位，侯一位，伯一位，子、男同一位，凡五等也。君一位，卿一位，大夫一位，上士一位，中士一位，下士一位，凡六等。天子之制，地方千里；公侯皆方百里，伯七十里，子、男五十里，凡四等。不能五十里，不達於天子，附於諸侯曰附庸。天子之卿受地視侯，大夫受地視伯，元士受地視子、男。大國地方百里，君十卿祿，卿祿四大夫，大夫倍上士，上士倍中士，中士倍下士，下士與庶人在官者同祿，祿足以代其耕也。」「次國地方七十里，君十卿祿，卿祿三大夫，大夫倍上士，上士倍中士，中士倍下士，下士與庶人在官者同祿，祿足以代其耕也。小國地方五十里，君十卿祿，卿祿二大夫，大夫倍上士，上士倍中士，中士倍下士，下士與庶人在官者同祿，祿足以代其耕也。耕者之所獲，一夫百畝，百畝之糞，上農夫食九人，上次食八人，中食七人，中次食六人，下食五人，庶人在官者，其祿以是為差。」

3. 萬章問曰：「敢問友。」孟子曰：「不挾長，不挾貴，不挾兄弟而友。友也者，友其德也，不可以有挾也。孟獻子，百乘之家也，有友五人焉：樂正裘、牧仲，其三人則予忘之矣。獻子之與此五人者友也，無獻子之家者也。此五人者，亦有獻子之家，則不與之友矣。非惟百乘之家為然也，雖小國之君亦有之。費惠公曰：『吾於子思，則師之矣，吾於顏般，則友之矣。王順、長息，則事我者也。』非惟小國之君為然也，雖大國之君亦有之。晉平公之於亥唐也，入云則入，坐云則坐，食云則食，雖疏食菜羹，未嘗不飽，蓋不敢不飽也。然終於此而已矣。弗與共天位也，弗與治天職也，弗與食天祿也。士之尊賢者也，非王公之尊賢也。舜尚見帝，帝館甥于貳室，亦饗舜，迭為賓主。是天子而友匹夫也。用下敬上，謂之貴貴；用上敬下，謂之尊賢。貴貴尊賢，其義一也。」

4. 萬章問曰：「敢問交際，何心也？」孟子曰：「恭也。」曰：「卻之，卻之為不恭，何哉？」曰：「尊者賜之，曰：『其所取之者，義乎？不義乎？』而後受之；以是為不恭，故弗卻也。」曰：「請無以辭卻之，以心卻之，曰：『其取諸民之不義也。』而以他辭無受，不可乎？」曰：「其交也以道，其接也以禮，斯孔子受之矣。」萬章曰：「今有禦人於國門之外者，其交也以道，其餽也以禮，斯可受禦與？」曰：「不可。康誥曰：『殺越人于貨，閔不畏死，凡民罔不讞。』是不待教而誅者也。殷受夏，周受殷，所不辭也，於今為烈，如之何其受之！」曰：「今之諸侯取之於民也，猶禦也；苟善其禮際矣，斯君子受之？敢問何說也？」曰：「子以為有王者作，將比今之諸侯而誅之乎？其教之不改而後誅之乎？夫謂非其有而取之者，盜也，充類至義之盡也。孔子之仕於魯也，魯人獵較，孔子亦獵較；獵較猶可，而況受其賜乎？」曰：「然則孔子之仕也，非事道與？」曰：「事道也。」「事道奚獵較也？」曰：「孔子先簿正祭器，不以四方之食供簿正。」曰：「奚不去也？」曰：「為之兆也。兆足以行矣，而不行，而後去，是以未嘗有所終三年淹也。孔子有見行可之仕，有際可之仕，有公養之仕；於季桓子，見行可之仕也，於衛靈公，際可之仕也，於衛孝公公養之仕也。」

5. 孟子曰：「仕非為貧也，而有時乎為貧；娶妻非為養也，而有時乎為養。為貧者，辭尊居卑，辭富居貧。辭尊居卑，辭富居貧，惡乎宜乎？抱關擊柝。孔子嘗為委吏矣，曰：『會計當而已矣；』嘗為乘田矣，曰：『牛羊茁壯長而已矣。』位卑而言高，罪也。立乎人之本朝而道不行，恥也。」

6. 萬章曰：「士之不託諸侯，何也？」孟子曰：「不敢也。諸侯失國而後託於諸侯，禮也。士之託於諸侯，非禮也。」萬章曰：「君餽之粟，則受之乎？」曰：「受之。」「受之，何義也？」曰：「君之於氓也，固周之。」曰：「周之則受，賜之則不受，何也？」曰：「不敢也。」曰：「敢問其不敢何也？」曰：「抱關擊柝者，皆有常職以食於上，無常職而賜於上者，以為不恭也。」曰：「君餽之，則受之，不識可常繼乎？」曰：「繆公之於子思也，亟問，亟餽鼎肉，子思不悅；於卒也，標使者出諸大門之外，北面稽首再拜而不受，曰：『今而後，知君之犬馬畜伋！』蓋自是，臺無餽也。悅賢不能舉，又不能養也，可謂悅賢乎？」曰：「敢問國君欲養君子，如何斯可謂養矣？」曰：「以君命將之，再拜稽首而受，其後廩人繼粟，庖人繼肉，不以君命將之。子思以為鼎肉，使己僕僕爾亟拜也，非養君子之道也。堯之於舜也，使其子九男事之，二女

女焉，百官牛羊倉廩備，以養舜於畎畝之中。後舉而加諸上位。故曰：『王公之尊賢者也。』」

7. 萬章曰：「敢問不見諸侯，何義也？」孟子曰：「在國曰市井之臣，在野曰草莽之臣，皆謂庶人。庶人不傳質為臣，不敢見於諸侯，禮也。」萬章曰：「庶人，召之役，則往役；君欲見之，召之，則不往見之，何也？」曰：「往役，義也；往見，不義也。且君之欲見之也，何為也哉？」曰：「為其多聞也，為其賢也。」曰：「為其多聞也，則天子不召師，而況諸侯乎？為其賢也，則吾未聞欲見賢而召之也。繆公亟見於子思曰：『古千乘之國以友士，何如？』子思不悅曰：『古之人有言曰事之云乎？豈曰友之云乎？』子思之不悅也，豈不曰：『以位，則子君也，我臣也，何敢與君友也？以德，則子事我者也，奚可以與我友？』千乘之君，求與之友而不可得也，而況可召與？齊景公田，招虞人以旌，不至，將殺之。『志士不忘在溝壑，勇士不忘喪其元』，孔子奚取焉？取非其招不往也。」曰：「敢問招虞人何以？」曰：「以皮冠。庶人以旃，士以旂，大夫以旌。以大夫之招招虞人，虞人死不敢往；以士之招招庶人，庶人豈敢往哉？況乎以不賢人之招招賢人乎！欲見賢人而不以其道，猶欲其入而閉之門也。夫義，路也；禮，門也。惟君子能由是路，出入是門也。詩云：『周道如底，其直如矢；君子所履，小人所視。』」萬章曰：「孔子，君命召，不俟駕而行。然則孔子非與？」曰：「孔子當任有官職，而以其官召之也。」

8. 孟子謂萬章曰：「一鄉之善士，斯友一鄉之善士；一國之善士，斯友一國之善士；天下之善士，斯友天下之善士。以友天下之善士為未足，又尚論古之人。頌其詩，讀其書，不知其人，可乎？是以論其世也。是尚友也。」

9. 齊宣王問卿。孟子曰：「王何卿之問也？」王曰：「卿不同乎？」曰：「不同。有貴戚之卿，有異姓之卿。」王曰：「請問貴戚之卿？」曰：「君有大過則諫；反覆之而不聽，則易位。」王勃然變乎色。曰：「王勿異也。王問臣，臣不敢不以正對。」王色定，然後請問「異姓之卿」曰：「君有過則諫；反覆之而不聽，則去。」

## 27【孟子告子第六章句上】凡二十章

1. 告子曰：「性，猶杞柳也；義，猶柤棬也。以人性為仁義，猶以杞柳為柤棬。」孟子曰：「子能順杞柳之性而以為柤棬乎？將戕賊杞柳而後以為柤棬也？如將戕賊杞柳而以為柤棬，則亦將戕賊人以為仁義與？率天下之人而禍仁義者，必子之言夫！」
2. 告子曰：「性猶湍水也，決諸東方則東流，決諸西方則西流。人性之無分於善不善也，猶水之無分於東西也。」孟子曰：「水信無分於東西，無分於上下乎？人性之善也，猶水之就下也。人無有不善，水無有不下。今夫水，搏而躍之，可使過顙；激而行之，可使在山。是豈水之性哉？其勢則然也。人之可使為不善，其性亦猶是也。」
3. 告子曰：「生之謂性。」孟子曰：「生之謂性也，猶白之謂白與？」曰：「然。」「白羽之白也，猶白雪之白；白雪之白，猶白玉之白與？」曰：「然。」「然則犬之性，猶牛之性；牛之性，猶人之性與？」
4. 告子曰：「食色，性也。仁，內也，非外也；義，外也，非內也。」孟子曰：「何以謂仁內義外也？」曰：「彼長而我長之，非有長於我也，猶彼白而我白之，從其白於外也，故謂之外也。」曰：「異於白馬之白也，無以異於白人之白也；不識長馬之長也，無以異於長人之長與？且謂長者義乎？長之者義乎？」曰：「吾弟則愛之，秦人之弟則不愛也，是以我為悅者也，故謂之內。長楚人之長，亦長吾之長，是以長為悅者也，故謂之外也。」曰：「耆秦人之炙，無以異於耆吾炙。夫物則亦有然者也，然則耆炙亦有外與？」
5. 孟季子問公都子曰：「何以謂義內也？」曰：「行吾敬，故謂之內也。」「鄉人長於伯兄一歲，則誰敬？」曰：「敬兄。」「酌則誰先？」曰：「先酌鄉人。」「所敬在此，所長在彼，果在外，非由內也。」公都子不能答，以告孟子。孟子曰：「敬叔父乎？敬弟乎？彼將曰敬叔父。曰，弟為尸，則誰敬？彼將曰敬弟。子曰：『惡在其敬叔父也？』彼將曰在位故也。子亦曰：『在位故也。庸敬在兄，斯須之敬在鄉人。』」季子聞之曰：「敬叔父則敬，敬弟則敬，果在外，非由內也。」公都子曰：「冬日則飲湯，夏日則飲水，然則飲食亦在外也？」
6. 公都子曰：「告子曰：性無善無不善也。或曰：性可以為善，可以為不善，是故文武興，則民好善，幽厲興，則民好暴。或曰：有性善，有性不善，是故以堯為君而有象，以瞽瞍為父而有舜，以紂為兄之子，且以為君，而有微子啟、王子比干。今曰性善，然則彼皆非與？」孟子曰：「乃若其情，則可以為善矣，乃所謂善也。若夫為不善，非才之罪也。惻隱之

心，人皆有之；羞惡之心，人皆有之；恭敬之心，人皆有之；是非之心，人皆有之。惻隱之心，仁也；羞惡之心，義也；恭敬之心，禮也；是非之心，智也。仁義禮智，非由外鑠我也，我固有之也，弗思耳矣。故曰：求則得之，舍則失之。或相倍蓰而無算者，不能盡其才者也。」「詩曰：『天生蒸民，有物有則。民之秉夷，好是懿德。』孔子曰：『為此詩者，其知道乎！故有物必有則，民之秉夷也，故好是懿德。』」

7. 孟子曰：「富歲子弟多賴，凶歲子弟多暴，非天之降才爾殊也，其所以陷溺其心者然也。」

「今夫麩麥，播種而耰之，其地同，樹之時又同，淖然而生，至於日至之時，皆熟矣。雖有不同，則地有肥磽，雨露之養，人事之不齊也。故凡同類者，舉相似也，何獨至於人而疑之？聖人與我同類者。故龍子曰：『不知足而為屨，我知其不為蕘也。』屨之相似，天下之足同也。口之於味，有同者也。易牙先得我口之所耆者也。如使口之於味也，其性與人殊，若犬馬之與我不同類也，則天下何耆，皆從易牙之於味也。至於味，天下期於易牙，是天下之口相似也。」「惟耳亦然。至於聲，天下期於師曠，是天下之耳相似也。惟目亦然。至於子都，天下莫不知其姣也。不知子都之姣者，無目者也。故曰：口之於味也，有同耆焉；耳之於聲也，有同聽焉；目之於色也，有同美焉。至於心，獨無所同然乎？心之所同然者何也？謂理也，義也。聖人先得我心之所同然耳。故理義之悅我心，猶芻豢之悅我口。」

8. 孟子曰：「牛山之木嘗美矣，以其郊於大國也，斧斤伐之，可以為美乎？是其日夜之所息，雨露之所潤，非無萌孽之生焉，牛羊又從而牧之，是以若彼濯濯也。人見其濯濯也，以為未嘗有材焉，此豈山之性也哉？」「雖存乎人者，豈無仁義之心哉？其所以放其良心者，亦猶斧斤之於木也，旦旦而伐之，可以為美乎？其日夜之所息，平旦之氣，其好惡與人相近也者幾希，則其旦晝之所為，有梏亡之矣。梏之反覆，則其夜氣不足以存；夜氣不足以存，則其違禽獸不遠矣。人見其禽獸也，而以為未嘗有才焉者，是豈人之情也哉？」故苟得其養，無物不長；苟失其養，無物不消。孔子曰：『操則存，舍則亡；出入無時，莫知其鄉。』惟心之謂與？」

9. 孟子曰：「無或乎王之不智也，雖有天下易生之物也，一日暴之，十日寒之。未有能生者也。吾見，亦罕矣；吾退，而寒之者至矣。吾如有萌焉何哉！」「今夫弈之為數，小數也；不專心致志，則不得也。弈秋，通國之善弈者也。使弈秋誨二人弈，其一人專心致志，惟弈秋之為聽。一人雖聽

之，一心以為有鴻鵠將至，思援弓繳而射之，雖與之俱學，弗若之矣。為是其智弗若與？曰：非然也。」

10. 孟子曰：「魚，我所欲也；熊掌，亦我所欲也，二者不可得兼，舍魚而取熊掌者也。生，亦我所欲也；義，亦我所欲也，二者不可得兼，舍生而取義者也。生亦我所欲，所欲有甚於生者，故不為苟得也；死亦我所惡，所惡有甚於死者，故患有所不辟也。如使人之所欲莫甚於生，則凡可以得生者，何不用也？使人之所惡莫甚於死者，則凡可以辟患者，何不為也？由是則生而有不用也，由是則可以辟患而有不為也。是故所欲有甚於生者，所惡有甚於死者，非獨賢者有是心也，人皆有之，賢者能勿喪耳。一簞食，一豆羹，得之則生，弗得則死。噉爾而與之，行道之人弗受；蹴爾而與之，乞人不屑也。萬鍾則不辨禮義而受之。萬鍾於我何加焉？為宮室之美、妻妾之奉、所識窮乏者得我與？鄉為身死而不受，今為宮室之美為之；鄉為身死而不受，今為妻妾之奉為之；鄉為身死而不受，今為所識窮乏者得我而為之，是亦不可以已乎？此之謂失其本心。」

11. 孟子曰：「仁，人心也；義，人路也。舍其路而弗由，放其心而不知求，哀哉！人有雞犬放，則知求之；有放心，而不知求。學問之道無他，求其放心而已矣。」

12. 孟子曰：「今有無名之指，屈而不信，非疾痛害事也，如有能信之者，則不遠秦楚之路，為指之不若人也。指不若人，則知惡之；心不若人，則不知惡，此之謂不知類也。」

13. 孟子曰：「拱把之桐梓，人苟欲生之，皆知所以養之者。至於身，而不知所以養之者，豈愛身不若桐梓哉？弗思甚也。」

14. 孟子曰：「人之於身也，兼所愛。兼所愛，則兼所養也。無尺寸之膚不愛焉，則無尺寸之膚不養也。所以考其善不善者，豈有他哉？於己取之而已矣。體有貴賤，有小大。無以小害大，無以賤害貴。養其小者為小人，養其大者為大人。今有場師，舍其梧檟，養其槲棘，則為賤場師焉。養其一指而失其肩背而不知也，則為狼疾人也。飲食之人，則人賤之矣，為其養小以失大也。飲食之人無有失也，則口腹豈適為尺寸之膚哉？」

15. 公都子問曰：「鈞是人也，或為大人，或為小人，何也？」孟子曰：「從其大體為大人，從其小體為小人。」曰：「鈞是人也，或從其大體，或從其小體，何也？」曰：「耳目之官不思，而蔽於物，物交物，則引之而已矣。心之官則思，思則得之，不思則不得也。此天之所與我者，先立乎其大者，則其小者不能奪也。此為大人而已矣。」



16. 孟子曰：「有天爵者，有人爵者。仁義忠信，樂善不倦，此天爵也；公卿大夫，此人爵也。古之人修其天爵，而人爵從之。今之人修其天爵，以要人爵；既得人爵，而棄其天爵，則惑之甚者也，終亦必亡而已矣。」
17. 孟子曰：「欲貴者，人之同心也。人人有貴於己者，弗思耳。人之所貴者，非良貴也。趙孟之所貴，趙孟能賤之。詩云：『既醉以酒，既飽以德。』言飽乎仁義也，所以不願人之膏粱之味也；令聞廣譽施於身，所以不願人之文繡也。」
18. 孟子曰：「仁之勝不仁也，猶水勝火。今之為仁者，猶以一杯水，救一車薪之火也；不熄，則謂之水不勝火，此又與於不仁之甚者也。亦終必亡而已矣。」
19. 孟子曰：「五穀者，種之美者也；苟為不熟，不如萁稗。夫仁亦在乎熟之而已矣。」
20. 孟子曰：「羿之教人射，必志於彀，學者亦必志於彀。大匠誨人，必以規矩，學者亦必以規矩。」



## 28【孟子告子第六章句下】凡十六章

1. 任人有問屋廬子曰：「禮與食孰重？」曰：「禮重。」「色與禮孰重？」曰：「禮重。」曰：「以禮食，則飢而死；不以禮食，則得食，必以禮乎？親迎，則不得妻；不親迎，則得妻，必親迎乎？」屋廬子不能對，明日之鄒，以告孟子。孟子曰：「於答是也何有？不揣其本而齊其末，方寸之木可使高於岑樓。金重於羽者，豈謂一鈞金與一輿羽之謂哉？取食之重者，與禮之輕者而比之，奚翅食重？取色之重者，與禮之輕者而比之，奚翅色重？往應之曰：『紆兄之臂而奪之食，則得食；不紆，則不得食，則將紆之乎？踰東家牆而摟其處子，則得妻；不摟，則不得妻，則將摟之乎？』」
2. 曹交問曰：「人皆可以為堯舜，有諸？」孟子曰：「然。」「交聞文王十尺，湯九尺，今交九尺四寸以長，食粟而已，如何則可？」曰：「奚有於是？亦為之而已矣。有人於此，力不能勝一匹雞，則為無力人矣；今日舉百鈞，則為有力人矣。然則舉烏獲之任，是亦為烏獲而已矣。夫人豈以不勝為患哉？弗為耳。徐行後長者謂之弟，疾行先長者謂之不弟。夫徐行者，豈人所不能哉？所不為也。堯舜之道，孝弟而已矣。子服堯之服，誦堯之言，行堯之行，是堯而已矣。子服桀之服，誦桀之言，行桀之行，是桀而已矣。」曰：「交得見於鄒君，可以假館，願留而受業於門。」曰：「夫道，若大路然，豈難知哉？人病不求耳。子歸而求之，有餘師。」

3. 公孫丑問曰：「高子曰：『小弁，小人之詩也。』」孟子曰：「何以言之？」曰：「怨。」曰：「固哉，高叟之為詩也！有人於此，越人關弓而射之，則已談笑而道之，無他，疏之也。其兄關弓而射之，則已垂涕泣而道之，無他，戚之也。小弁之怨，親親也。親親，仁也。固矣夫，高叟之為詩也！」曰：「凱風何以不怨？」曰：「凱風，親之過小者也；小弁，親之過大者也。親之過大而不怨，是愈疏也；親之過小而怨，是不可磯也。愈疏，不孝也；不可磯，亦不孝也。孔子曰：『舜其至孝矣，五十而慕。』」
4. 宋慳將之楚，孟子遇於石丘。曰：「先生將何之？」曰：「吾聞秦楚構兵，我將見楚王說而罷之。楚王不悅，我將見秦王說而罷之，二王我將有所遇焉。」曰：「軻也請無問其詳，願聞其指。說之將何如？」曰：「我將言其不利也。」曰：「先生之志則大矣，先生之號則不可。」「先生以利說秦楚之王，秦楚之王悅於利，以罷三軍之師，是三軍之士樂罷而悅於利也。為人臣者懷利以事其君，為人子者懷利以事其父，為人弟者懷利以事其兄。是君臣、父子、兄弟，終去仁義，懷利以相接，然而不亡者，未之有也。」「先生以仁義說秦楚之王，秦楚之王悅於仁義，而罷三軍之師，是三軍之士樂罷而悅於仁義也。為人臣者懷仁義以事其君，為人子者懷仁義以事其父，為人弟者懷仁義以事其兄，是君臣、父子、兄弟去利懷仁義以相接也。然而不王者，未之有也。何必曰利？」
5. 孟子居鄒，季任為任處守，以幣交，受之而不報。處於平陸，儲子為相，以幣交，受之而不報。他日由鄒之任，見季子；由平陸之齊，不見儲子。屋廬子喜曰：「連得聞矣。」問曰：「夫子之任見季子之齊，不見儲子，為其為相與？」曰：「非也。書曰：『享多儀，儀不及物，曰不享，惟不役志于享。』為其不成享也。」屋廬子悅。或問之。屋廬子曰：「季子不得之鄒，儲子得之平陸。」
6. 淳于髡曰：「先名實者，為人也；後名實者，自為也。夫子在三卿之中，名實未加於上下而去之，仁者固如是乎？」孟子曰：「居下位，不以賢事不肖者，伯夷也；五就湯，五就桀者，伊尹也；不惡汙君，不辭小官者，柳下惠也。三子者不同道，其趨一也。一者何也？曰：仁也。君子亦仁而已矣，何必同？」曰：「魯繆公之時，公儀子為政，子柳、子思為臣，魯之削也滋甚。若是乎賢者之無益於國也！」曰：「虞不用百里奚而亡，秦穆公用之而霸。不用賢則亡，削何可得與？」曰：「昔者王豹處於淇，而河西善謳；綿駒處於高唐，而齊右善歌；華周、杞梁之妻善哭其夫，而變國俗。有諸內必形諸外。為其事而無其功者，髡未嘗覩之也。是故無賢者

也，有則髡必識之。」曰：「孔子為魯司寇，不用；從而祭，燔肉不至，不稅冕而行。不知者以為為肉也，其知者以為為無禮也。乃孔子則欲以微罪行，不欲為苟去。君子之所為，眾人固不識也。」

7. 孟子曰：「五霸者，三王之罪人也；今之諸侯，五霸之罪人也；今之大夫，今之諸侯之罪人也。」「天子適諸侯曰巡狩，諸侯朝於天子曰述職。春省耕而補不足，秋省斂而助不給。入其疆，土地辟，田野治，養老尊賢，俊傑在位，則有慶，慶以地。入其疆，土地荒蕪，遺老失賢，掎克在位，則有讓。一不朝，則貶其爵；再不朝，則削其地；三不朝，則六師移之。是故天子討而不伐，諸侯伐而不討。五霸者，摟諸侯以伐諸侯者也，故曰：五霸者，三王之罪人也。」「五霸，桓公為盛。葵丘之會諸侯，束牲、載書而不歃血。初命曰：『誅不孝，無易樹子，無以妾為妻。』再命曰：『尊賢育才，以彰有德。』三命曰：『敬老慈幼，無忘賓旅。』四命曰：『士無世官，官事無攝，取士必得，無專殺大夫。』五命曰：『無曲防，無遏糴，無有封而不告。』曰：『凡我同盟之人，既盟之後，言歸于好。』今之諸侯，皆犯此五禁，故曰：今之諸侯，五霸之罪人也。」「長君之惡其罪小，逢君之惡其罪大。今之大夫，皆逢君之惡，故曰：今之大夫，今之諸侯之罪人也。」

8. 魯欲使慎子為將軍。孟子曰：「不教民而用之，謂之殃民。殃民者，不容於堯舜之世。一戰勝齊，遂有南陽，然且不可。」慎子勃然不悅曰：「此則滑釐所不識也。」曰：「吾明告子。天子之地方千里，不千里，不足以待諸侯。諸侯之地方百里，不百里，不足以守宗廟之典籍。周公之封於魯，為方百里也，地非不足，而儉於百里。太公之封於齊也，亦為方百里也，地非不足也，而儉於百里。今魯方百里者五，子以為有王者作，則魯在所損乎？在所益乎？徒取諸彼以與此，然且仁者不為，況於殺人以求之乎？君子之事君也，務引其君以當道，志於仁而已。」

9. 孟子曰：「今之事君者曰：『我能為君辟土地，充府庫。』今之所謂良臣，古之所謂民賊也。君不鄉道，不志於仁，而求富之，是富桀也。『我能為君約與國，戰必克。』今之所謂良臣，古之所謂民賊也。君不鄉道，不志於仁，而求為之強戰，是輔桀也。由今之道，無變今之俗，雖與之天下，不能一朝居也。」

10. 白圭曰：「吾欲二十而取一，何如？」孟子曰：「子之道，貉道也。萬室之國，一人陶，則可乎？」曰：「不可，器不足用也。」曰：「夫貉，五穀不生，惟黍生之。無城郭、宮室、宗廟、祭祀之禮，無諸侯幣帛饗飧，無百官有司，故二十取一而足也。今居中國，去人倫，無君子，如之

何其可也？陶以寡，且不可以為國，況無君子乎？欲輕之於堯舜之道者，大貉小貉也；欲重之於堯舜之道者，大桀小桀也。」

11. 白圭曰：「丹之治水也愈於禹。」孟子曰：「子過矣。禹之治水，水之道也。是故禹以四海為壑，今吾子以鄰國為壑。水逆行，謂之洚水。洚水者，洪水也，仁人之所惡也。吾子過矣。」

12. 孟子曰：「君子不亮，惡乎執？」

13. 魯欲使樂正子為政。孟子曰：「吾聞之，喜而不寐。」公孫丑曰：「樂正子強乎？」曰：「否。」「有知慮乎？」曰：「否。」「多聞識乎？」曰：「否。」「然則奚為喜而不寐？」曰：「其為人也好善。」「好善足乎？」曰：「好善優於天下，而況魯國乎？夫苟好善，則四海之內，皆將輕千里而來，告之以善。夫苟不好善，則人將曰：『訑訑，予既已知之矣。』訑訑之聲音顏色，距人於千里之外。士止於千里之外，則讒諂面諛之人至矣。與讒諂面諛之人居，國欲治，可得乎？」

14. 陳子曰：「古之君子，何如則仕？」孟子曰：「所就三，所去三。」

「迎之致敬以有禮，言將行其言也，則就之；禮貌未衰，言弗行也，則去之。其次，雖未行其言也，迎之致敬以有禮，則就之；禮貌衰，則去之。其下，朝不食，夕不食，飢餓不能出門戶。君聞之曰：『吾大者不能行其道，又不能從其言也，使飢餓於我土地，吾恥之。』周之，亦可受也，免死而已矣。」

15. 孟子曰：「舜發於畎畝之中，傅說舉於版築之間，膠鬲舉於魚鹽之中，管夷吾舉於士，孫叔敖舉於海，百里奚舉於市。故天將降大任於是人也，必先苦其心志，勞其筋骨，餓其體膚，空乏其身，行拂亂其所為，所以動心忍性，曾益其所不能。人恆過，然後能改；困於心，衡於慮，而後作；徵於色，發於聲，而後喻。入則無法家拂士，出則無敵國外患者，國恆亡。然後知生於憂患而死於安樂也。」

16. 孟子曰：「教亦多術矣，予不屑之教誨也者，是亦教誨之而已矣。」



## 29【孟子盡心第七章句上】凡四十六章

1. 孟子曰：「盡其心者，知其性也。知其性，則知天矣。存其心，養其性，所以事天也。夭壽不貳，修身以俟之，所以立命也。」

2. 孟子曰：「莫非命也，順受其正。是故知命者，不立乎巖牆之下。盡其道而死者，正命也；桎梏死者，非正命也。」

3. 孟子曰：「求則得之，舍則失之，是求有益於得也，求在我者也。求之有道，得之有命，是求無益於得也，求在外者也。」

4. 孟子曰：「萬物皆備於我矣。反身而誠，樂莫大焉。強恕而行，求仁莫近焉。」
5. 孟子曰：「行之而不著焉，習矣而不察焉，終身由之而不知其道者，眾也。」
6. 孟子曰：「人不可以無恥。無恥之恥，無恥矣。」
7. 孟子曰：「恥之於人大矣。為機變之巧者，無所用恥焉。不恥不若人，何若人有？」
8. 孟子曰：「古之賢王，好善而忘勢；古之賢士，何獨不然？樂其道而忘人之勢。故王公不致敬盡禮，則不得亟見之；見且由不得亟，而況得而臣之乎？」
9. 孟子謂宋句踐曰：「子好遊乎？吾語子遊：人知之亦囂囂，人不知亦囂囂。」曰：「何如斯可以囂囂矣？」曰：「尊德樂義，則可以囂囂矣。故士窮不失義，達不離道。窮不失義，故士得己焉；達不離道，故民不失望焉。古之人，得志，澤加於民；不得志，脩身見於世。窮則獨善其身，達則兼善天下。」
10. 孟子曰：「待文王而後興者，凡民也。若夫豪傑之士，雖無文王猶興。」
11. 孟子曰：「附之以韓、魏之家，如其自視欲然，則過人遠矣。」
12. 孟子曰：「以佚道使民，雖勞不怨；以生道殺民，雖死不怨殺者。」
13. 孟子曰：「霸者之民，驩虞如也；王者之民，皞皞如也。殺之而不怨，利之而不庸，民日遷善而不知為之者。夫君子所過者化，所存者神，上下與天地同流，豈曰小補之哉？」
14. 孟子曰：「仁言，不如仁聲之入人深也；善政，不如善教之得民也。善政，民畏之；善教，民愛之；善政，得民財；善教，得民心。」
15. 孟子曰：「人之所不學而能者，其良能也；所不慮而知者，其良知也。孩提之童，無不知愛其親者；及其長也，無不知敬其兄也。親親，仁也；敬長，義也。無他，達之天下也。」
16. 孟子曰：「舜之居深山之中，與木石居，與鹿豕遊，其所以異於深山之野人者幾希。及其聞一善言，見一善行，若決江河，沛然莫之能禦也。」
17. 孟子曰：「無為其所不為，無欲其所不欲，如此而已矣。」
18. 孟子曰：「人之有德慧術知者，恆存乎疢疾。獨孤臣孽子，其操心也危，其慮患也深，故達。」

19. 孟子曰：「有事君人者，事是君，則為容悅者也。有安社稷臣者，以安社稷為悅者也。有天民者，達可行於天下，而後行之者也。有大人者，正己而物正者也。」
20. 孟子曰：「君子有三樂，而王天下不與存焉。父母俱存，兄弟無故，一樂也；仰不愧於天，俯不忤於人，二樂也；得天下英才而教育之，三樂也。君子有三樂，而王天下不與存焉。」
21. 孟子曰：「廣土眾民，君子欲之，所樂不存焉。中天下而立，定四海之民，君子樂之，所性不存焉。君子所性，雖大行不加焉，雖窮居不損焉，分定故也。君子所性，仁義禮智根於心。其生色也，睟然見於面，盎於背，施於四體，四體不言而喻。」
22. 孟子曰：「伯夷辟紂，居北海之濱，聞文王作，興曰：『盍歸乎來！吾聞西伯善養老者。』太公辟紂，居東海之濱，聞文王作，興曰：『盍歸乎來！吾聞西伯善養老者。』天下有善養老，則仁人以為己歸矣。五畝之宅，樹牆下以桑，匹婦蠶之，則老者足以衣帛矣。五母雞，二母彘，無失其時，老者足以無失肉矣。百畝之田，匹夫耕之，八口之家，足以無飢矣。所謂西伯善養老者，制其田里，教之樹畜，導其妻子，使養其老。五十非帛不煖，七十非肉不飽。不煖不飽，謂之凍餒。文王之民，無凍餒之老者，此之謂也。」
23. 孟子曰：「易其田疇，薄其稅斂，民可使富也。食之以時，用之以禮，財不可勝用也。民非水火不生活，昏暮叩人之門戶，求水火，無弗與者，至足矣。聖人治天下，使有菽粟如水火。菽粟如水火，而民焉有不仁者乎！」
24. 孟子曰：「孔子登東山而小魯，登泰山而小天下。故觀於海者難為水，遊於聖人之門者難為言。觀水有術，必觀其瀾。日月有明，容光必照焉。流水之為物也，不盈科不行；君子之志於道也，不成章不達。」
25. 孟子曰：「雞鳴而起，孳孳為善者，舜之徒也。雞鳴而起，孳孳為利者，蹠之徒也。欲知舜與蹠之分，無他，利與善之間也。」
26. 孟子曰：「楊子取為我，拔一毛而利天下，不為也。墨子兼愛，摩頂放踵利天下，為之。子莫執中，執中為近之，執中無權，猶執一也。所惡執一者，為其賊道也，舉一而廢百也。」
27. 孟子曰：「飢者甘食，渴者甘飲，是未得飲食之正也，飢渴害之也。豈惟口腹有飢渴之害？人心亦皆有害。人能無以飢渴之害為心害，則不及人不為憂矣。」
28. 孟子曰：「柳下惠不以三公易其介。」

29. 孟子曰：「有為者辟若掘井，掘井九仞而不及泉，猶為棄井也。」
30. 孟子曰：「堯、舜，性之也；湯、武，身之也；五霸，假之也。久假而不歸，惡知其非有也。」
31. 公孫丑曰：「伊尹曰：『予不狎于不順。』放太甲于桐，民大悅。太甲賢。又反之，民大悅。賢者之為人臣也，其君不賢，則固可放與？」孟子曰：「有伊尹之志，則可；無伊尹之志，則篡也。」
32. 公孫丑曰：「詩曰『不素餐兮』，君子之不耕而食，何也？」孟子曰：「君子居是國也，其君用之，則安富尊榮；其子弟從之，則孝弟忠信。『不素餐兮』，孰大於是？」
33. 王子墊問曰：「士何事？」孟子曰：「尚志。」曰：「何謂尚志？」曰：「仁義而已矣。殺一無罪，非仁也；非其有而取之，非義也。居惡在？仁是也；路惡在？義是也。居仁由義，大人之事備矣。」
34. 孟子曰：「仲子，不義與之齊國而弗受，人皆信之，是舍簞食豆羹之義也。人莫大焉亡親戚、君臣、上下。以其小者，信其大者，奚可哉？」
35. 桃應問曰：「舜為天子，皋陶為士，瞽瞍殺人，則如之何？」孟子曰：「執之而已矣。」「然則舜不禁與？」曰：「夫舜，惡得而禁之？夫有所受之也。」「然則舜如之何？」曰：「舜視棄天下猶棄敝蹠也。竊負而逃，遵海濱而處，終身訢然，樂而忘天下。」
36. 孟子自范之齊，望見齊王之子。喟然歎曰：「居移氣，養移體，大哉居乎！夫非盡人之子與？」孟子曰：「王子宮室、車馬、衣服，多與人同，而王子若彼者，其居使之然也；況居天下之廣居者乎？魯君之宋，呼於埳澤之門。守者曰：『此非吾君也，何其聲之似我君也？』此無他，居相似也。」
37. 孟子曰：「食而弗愛，豕交之也；愛而不敬，獸畜之也。恭敬者，幣之未將者也。恭敬而無實，君子不可虛拘。」
38. 孟子曰：「形色，天性也；惟聖人，然後可以踐形。」
39. 齊宣王欲短喪。公孫丑曰：「為朞之喪，猶愈於已乎？」孟子曰：「是猶或紵其兄之臂，子謂之姑徐徐云爾，亦教之孝弟而已矣。」王子有其母死者，其傅為之請數月之喪。公孫丑曰：「若此者，何如也？」曰：「是欲終之而不可得也。雖加一日，愈於已。謂夫莫之禁而弗為者也。」
40. 孟子曰：「君子之所以教者五：有如時雨化之者，有成德者，有達財者，有答問者，有私淑艾者。此五者，君子之所以教也。」

41. 公孫丑曰：「道則高矣，美矣，宜若登天然，似不可及也。何不使彼為可幾及而日孳孳也？」孟子曰：「大匠不為拙工改廢繩墨，羿不為拙射變其彀率。君子引而不發，躍如也。中道而立，能者從之。」
42. 孟子曰：「天下有道，以道殉身；天下無道，以身殉道。未聞以道殉乎人者也。」
43. 公都子曰：「滕更之在門也，若在所禮；而不答，何也？」孟子曰：「挾貴而問，挾賢而問，挾長而問，挾有勳勞而問，挾故而問，皆所不答也。滕更有二焉。」
44. 孟子曰：「於不可已而已者，無所不已；於所厚者薄，無所不薄也。其進銳者，其退速。」
45. 孟子曰：「君子之於物也，愛之而弗仁；於民也，仁之而弗親。親親而仁民，仁民而愛物。」
46. 孟子曰：「知者無不知也，當務之為急；仁者無不愛也，急親賢之為務。堯、舜之知而不徧物，急先務也；堯、舜之仁不徧愛人，急親賢也。不能三年之喪，而總、小功之察；放飯流歎，而問無齒決，是之謂不知務。」



### 30【孟子盡心第七章句下】凡三十八章

1. 孟子曰：「不仁哉，梁惠王也！仁者以其所愛，及其所不愛；不仁者以其所不愛，及其所愛。」公孫丑曰：「何謂也？」「梁惠王以土地之故，糜爛其民而戰之，大敗；將復之，恐不能勝，故驅其所愛子弟以殉之。是之謂以其所不愛，及其所愛也。」
2. 孟子曰：「春秋無義戰。彼善於此，則有之矣。征者，上伐下也；敵國不相征也。」
3. 孟子曰：「盡信書，則不如無書。吾於武成，取二三策而已矣。仁人無敵於天下；以至仁伐至不仁，而何其血之流杵也？」
4. 孟子曰：「有人曰：『我善為陳，我善為戰。』大罪也。國君好仁，天下無敵焉。南面而征北狄怨，東面而征西夷怨。曰：『奚為後我？』武王之伐殷也，革車三百兩，虎賁三千人。王曰：『無畏！寧爾也，非敵百姓也。』若崩厥角稽首。征之為言正也，各欲正己也，焉用戰？」
5. 孟子曰：「梓匠輪輿，能與人規矩，不能使人巧。」
6. 孟子曰：「舜之飯糗茹草也，若將終身焉；及其為天子也，被袵衣，鼓琴，二女果，若固有之。」



7. 孟子曰：「吾今而後知殺人親之重也：殺人之父，人亦殺其父；殺人之兄，人亦殺其兄。然則非自殺之也，一閒耳。」
8. 孟子曰：「古之為關也，將以禦暴。今之為關也，將以為暴。」
9. 孟子曰：「身不行道，不行於妻子；使人不以道，不能行於妻子。」
10. 孟子曰：「周於利者，凶年不能殺；周於德者，邪世不能亂。」
11. 孟子曰：「好名之人，能讓千乘之國；苟非其人，簞食豆羹見於色。」
12. 孟子曰：「不信仁賢，則國空虛；無禮義，則上下亂；無政事，則財用不足。」
13. 孟子曰：「不仁而得國者，有之矣；不仁而得天下，未之有也。」
14. 孟子曰：「民為貴，社稷次之，君為輕。是故得乎丘民而為天子，得乎天子為諸侯，得乎諸侯為大夫。諸侯危社稷，則變置。犧牲既成，粢盛既潔，祭祀以時，然而旱乾水溢，則變置社稷。」
15. 孟子曰：「聖人，百世之師也，伯夷、柳下惠是也。故聞伯夷之風者，頑夫廉，懦夫有立志；聞柳下惠之風者，薄夫敦，鄙夫寬。奮乎百世之上。百世之下，聞者莫不興起也。非聖人而能若是乎？而況於親炙之者乎！」
16. 孟子曰：「仁也者，人也。合而言之，道也。」
17. 孟子曰：「孔子之去魯，曰：『遲遲吾行也。』去父母國之道也。去齊，接淅而行，去他國之道也。」
18. 孟子曰：「君子之危於陳、蔡之間，無上下之交也。」
19. 貉稽曰：「稽大不理於口。」孟子曰：「無傷也。士憎茲多口。詩云：『憂心悄悄，慍于群小。』孔子也。『肆不殄厥慍，亦不隕厥問。』文王也。」
20. 孟子曰：「賢者以其昭昭，使人昭昭；今以其昏昏，使人昭昭。」
21. 孟子謂高子曰：「山徑之蹊閒，介然用之而成路。為閒不用，則茅塞之矣。今茅塞子之心矣。」
22. 高子曰：「禹之聲，尚文王之聲。」孟子曰：「何以言之？」曰：「以追蠡。」曰：「是奚足哉？城門之軌，兩馬之力與？」
23. 齊饑。陳臻曰：「國人皆以夫子將復為發棠，殆不可復。」孟子曰：「是為馮婦也。晉人有馮婦者，善搏虎，卒為善士。則之野，有眾逐虎。虎負嵎，莫之敢撓。望見馮婦，趨而迎之。馮婦攘臂下車。眾皆悅之，其為士者笑之。」
24. 孟子曰：「口之於味也，目之於色也，耳之於聲也，鼻之於臭也，四肢之於安佚也，性也，有命焉，君子不謂性也。仁之於父子也，義之於君臣

也，禮之於賓主也，智之於賢者也，聖人之於天道也，命也，有性焉，君子不謂命也。」

25. 浩生不害問曰：「樂正子，何人也？」孟子曰：「善人也，信人也。」  
「何謂善？何謂信？」曰：「可欲之謂善，有諸己之謂信。充實之謂美，充實而有光輝之謂大，大而化之之謂聖，聖而不可知之之謂神。樂正子，二之中，四之下也。」
26. 孟子曰：「逃墨必歸於楊，逃楊必歸於儒。歸，斯受之而已矣。今之與楊、墨辯者，如追放豚，既入其苙，又從而招之。」
27. 孟子曰：「有布縷之征，粟米之征，力役之征。君子用其一，緩其二。用其二而民有殍，用其三而父子離。」
28. 孟子曰：「諸侯之寶三：土地，人民，政事。寶珠玉者，殃必及身。」
29. 盆成括仕於齊。孟子曰：「死矣盆成括！」盆成括見殺。門人問曰：「夫子何以知其將見殺？」曰：「其為人也小有才，未聞君子之大道也，則足以殺其軀而已矣！」
30. 孟子之滕，館於上宮。有業屨於牖上，館人求之弗得。或問之曰：「若是乎，從者之廋也！」曰：「子以是為竊屨來與？」曰：「殆非也。夫予之設科也，往者不追，來者不拒。苟以是心至，斯受之而已矣。」
31. 孟子曰：「人皆有所不忍，達之於其所忍，仁也；人皆有所不為，達之於其所為，義也。人能充無欲害人之心，而仁不可勝用也；人能充無穿窬之心，而義不可勝用也。人能充無受爾汝之實，無所往而不為義也。士未可以言而言，是以言餽之也；可以言而不言，是以不言餽之也，是皆穿窬之類也。」
32. 孟子曰：「言近而指遠者，善言也；守約而施博者，善道也。君子之言也，不下帶而道存焉。君子之守，脩其身而天下平。人病舍其田而芸人之田，所求於人者重，而所以自任者輕。」
33. 孟子曰：「堯、舜，性者也；湯、武，反之也。動容周旋中禮者，盛德之至也；哭死而哀，非為生者也；經德不回，非以干祿也；言語必信，非以正行也。君子行法，以俟命而已矣。」
34. 孟子曰：「說大人，則藐之，勿視其巍巍然。堂高數仞，榱題數尺，我得志弗為也；食前方丈，侍妾數百人，我得志弗為也；般樂飲酒，驅騁田獵，後車千乘，我得志弗為也。在彼者，皆我所不為也；在我者，皆古之制也，吾何畏彼哉？」
35. 孟子曰：「養心莫善於寡欲。其為人也寡欲，雖有不存焉者，寡矣；其為人也多欲，雖有存焉者，寡矣。」

36. 曾皙嗜羊棗，而曾子不忍食羊棗。公孫丑問曰：「膾炙與羊棗孰美？」孟子曰：「膾炙哉！」公孫丑曰：「然則曾子何為食膾炙而不食羊棗？」曰：「膾炙所同也，羊棗所獨也。諱名不諱姓，姓所同也，名所獨也。」
37. 萬章問曰：「孔子在陳曰：『盍歸乎來！吾黨之士狂簡，進取，不忘其初。』孔子在陳，何思魯之狂士？」孟子曰：「孔子不得中道而與之，必也狂狷乎！狂者進取，狷者有所不為也。孔子豈不欲中道哉？不可必得，故思其次也。」「敢問何如斯可謂狂矣？」曰：「如琴張、曾皙、牧皮者，孔子之所謂狂矣。」「何以謂之狂也？」曰：「其志嚶嚶然，曰『古之人，古之人』。夷考其行，而不掩焉者也。狂者又不可得，欲得不屑不潔之士而與之，是狷也，是又其次也。孔子曰：『過我門而不入我室，我不憾焉者，其惟鄉原乎！鄉原，德之賊也。』」曰：「何如斯可謂之鄉原矣？」曰：「『何以是嚶嚶也？言不顧行，行不顧言，則曰：古之人，古之人。行何為踽踽涼涼？生斯世也，為斯世也，善斯可矣。』闒然媚於世也者，是鄉原也。」萬章曰：「一鄉皆稱原人焉，無所往而不為原人，孔子以為德之賊，何哉？」曰：「非之無舉也，刺之無刺也；同乎流俗，合乎汙世；居之似忠信，行之似廉潔；眾皆悅之，自以為是，而不可與入堯、舜之道，故曰德之賊也。」「孔子曰：『惡似而非者：惡莠，恐其亂苗也；惡佞，恐其亂義也；惡利口，恐其亂信也；惡鄭聲，恐其亂樂也；惡紫，恐其亂朱也；惡鄉原，恐其亂德也。』君子反經而已矣。經正，則庶民興；庶民興，斯無邪慝矣。」
38. 孟子曰：「由堯、舜至於湯，五百有餘歲，若禹、皋陶，則見而知之；若湯，則聞而知之。由湯至於文王，五百有餘歲，若伊尹、萊朱則見而知之；若文王，則聞而知之。由文王至於孔子，五百有餘歲，若太公望、散宜生，則見而知之；若孔子，則聞而知之。由孔子而來至於今，百有餘歲，去聖人之世，若此其未遠也；近聖人之居，若此其甚也，然而無有乎爾！則亦無有乎爾！」



### 31【老子 1-15 章】

1. 道可道，非常道；名可名，非常名。無名天地之始；有名萬物之母。故常無欲以觀其妙；常有欲以觀其徼。此兩者，同出而異名，同謂之玄。玄之又玄，衆妙之門。
2. 天下皆知美之為美，斯惡已；皆知善之為善，斯不善已。故有無相生，難易相成，長短相較，高下相傾，音聲相和，前後相隨。是以聖人處無為

之事，行不言之教。萬物作焉而不辭，生而不有。為而不恃，功成而弗居。夫唯弗居，是以不去。

3. 不尚賢，使民不爭；不貴難得之貨，使民不為盜；不見可欲，使民心不亂。是以聖人之治，虛其心，實其腹，弱其志，強其骨。常使民無知無欲。使夫智者不敢為也。為無為，則無不治。
4. 道沖，而用之或不盈。淵兮似萬物之宗。挫其銳，解其紛，和其光，同其塵。湛兮似或存。吾不知誰之子，象帝之先。
5. 天地不仁，以萬物為芻狗；聖人不仁，以百姓為芻狗。天地之間，其猶橐籥乎！虛而不屈，動而愈出。多言數窮，不如守中。
6. 谷神不死，是謂玄牝。玄牝之門，是謂天地根。緜緜若存，用之不勤。
7. 天長地久。天地所以能長且久者，以其不自生，故能長生。是以聖人後其身而身先，外其身而身存。非以其無私邪？故能成其私。
8. 上善若水。水善利萬物而不爭，處眾人之所惡，故幾於道。居善地，心善淵，與善仁，言善信，正善治，事善能，動善時。夫唯不爭，故無尤。
9. 持而盈之，不如其已；揣而棖之，不可長保；金玉滿堂，莫之能守；富貴而驕，自遺其咎。功遂身退天之道。
10. 載營魄抱一，能無離乎？專氣致柔，能嬰兒乎？滌除玄覽，能無疵乎？愛民治國，能無知乎？天門開闔，能為雌乎？明白四達，能無為乎？生之畜之。生而不有，為而不恃，長而不宰，是謂玄德。
11. 三十輻，共一轂，當其無，有車之用；埏埴以為器，當其無，有器之用；鑿戶牖以為室，當其無，有室之用；故有之以為利，無之以為用。
12. 五色令人目盲；五音令人耳聾；五味令人口爽；馳騁畋獵，令人心發狂；難得之貨，令人行妨。是以聖人為腹不為目，故去彼取此。
13. 寵辱若驚，貴大患若身。何謂寵辱若驚？寵為下，得之若驚，失之若驚，是謂寵辱若驚。何謂貴大患若身？吾所以有大患者，為吾有身。及吾無身，吾有何患？故貴以身為天下，若可寄天下；愛以身為天下，若可託天下。
14. 視之不見名曰夷，聽之不聞名曰希，搏之不得名曰微。此三者不可致詰，故混而為一。其上不皦，其下不昧。繩繩不可名，復歸於無物。是謂無狀之狀，無物之象，是謂惚恍。迎之不見其首，隨之不見其後。執古之道，以御今之有。能知古始，是謂道紀。
15. 古之善為士者，微妙玄通，深不可識。夫唯不可識，故強為之容：豫焉若冬涉川；猶兮若畏四鄰，儼兮其若容，渙兮若冰之將釋，敦兮其若

樸，曠兮其若谷，混兮其若濁。孰能濁以靜之徐清？孰能安以久，動之徐生？保此道者不欲盈。夫唯不盈，故能蔽不新成。



### 32【老子 16-37 章】

16. 致虛極，守靜篤。萬物並作，吾以觀復。夫物芸芸，各復歸其根。歸根曰靜，是謂復命。復命曰常，知常曰明。不知常，妄作凶。知常容，容乃公，公乃王，王乃天，天乃道，道乃久。沒身不殆。
17. 太上，下知有之；其次，親而譽之；其次，畏之；其次，侮之。信不足焉，有不信焉。悠兮其貴言。功成，事遂，百姓皆謂：「我自然」。
18. 大道廢，有仁義；慧智出，有大偽；六親不和，有孝慈；國家昏亂，有忠臣。
19. 絕聖棄智，民利百倍；絕仁棄義，民復孝慈；絕巧棄利，盜賊無有。此三者，以為文不足。故令有所屬：見素抱樸，少私寡欲。
20. 絕學無憂。唯之與阿，相去幾何？善之與惡，相去若何？人之所畏，不可不畏。荒兮其未央哉！眾人熙熙，如享太牢，如春登臺；我獨泊兮其未兆，如嬰兒之未孩。儻儻兮若無所歸！眾人皆有餘，而我獨若遺。我愚人之心也哉，沌沌兮！俗人昭昭，我獨昏昏；俗人察察，我獨悶悶。澹兮其若海，颺兮若無止。眾人皆有以，而我獨頑似鄙。我獨異於人，而貴食母。
21. 孔德之容，惟道是從。道之為物，惟恍惟惚。惚兮恍兮，其中有象；恍兮惚兮，其中有物。窈兮冥兮，其中有精。其精甚真，其中有信。自古及今，其名不去，以閱眾甫。吾何以知眾甫之狀哉？以此。
22. 曲則全，枉則直，窪則盈，敝則新，少則得，多則惑。是以聖人抱一為天下式。不自見，故明；不自是，故彰；不自伐，故有功；不自矜，故長。夫唯不爭，故天下莫能與之爭。古之所謂曲則全者，豈虛言哉！誠全而歸之。
23. 希言自然，故飄風不終朝，驟雨不終日。孰為此者？天地。天地尚不能久，而況於人乎？故從事於道者，同於道；德者，同於德；失者，同於失。同於道者，道亦樂得之；同於德者，德亦樂得之；同於失者，失亦樂得之。信不足焉，有不信焉。
24. 企者不立，跨者不行。自見者不明，自是者不彰，自伐者無功，自矜者不長。其在道也，曰：餘食贅行。物或惡之，故有道者不處。
25. 有物混成，先天地生。寂兮寥兮，獨立不改，周行而不殆，可以為天下母。吾不知其名，字之曰道，強為之名曰大。大曰逝，逝曰遠，遠曰反。

故道大，天大，地大，王亦大。域中有四大，而王居其一焉。人法地，地法天，天法道，道法自然。

26. 重為輕根，靜為躁君。是以聖人終日行不離輜重。雖有榮觀，燕處超然。奈何萬乘之主，而以身輕天下？輕則失本，躁則失君。
27. 善行無轍迹，善言無瑕譏，善數不用籌策，善閉無關楗而不可開，善結無繩約而不可解。是以聖人常善救人，故無棄人；常善救物，故無棄物。是謂襲明。故善人者，不善人之師；不善人者，善人之資。不貴其師，不愛其資，雖智大迷。是謂要妙。
28. 知其雄，守其雌，為天下谿。為天下谿，常德不離，復歸於嬰兒。知其白，守其黑，為天下式。為天下式，常德不忒，復歸於無極。知其榮，守其辱，為天下谷。為天下谷，常德乃足，復歸於樸。樸散則為器，聖人用之，則為官長。故大制不割。
29. 將欲取天下而為之，吾見其不得已。天下神器，不可為也。為者敗之，執者失之。故物或行或隨，或歔或吹，或強或贏，或挫或隳。是以聖人去甚，去奢，去泰。
30. 以道佐人主者，不以兵強天下。其事好還。師之所處，荊棘生焉。大軍之後，必有凶年。善有果而已，不敢以取強。果而勿矜，果而勿伐，果而勿驕。果而不得已，果而勿強。物壯則老，是謂不道。不道早已。
31. 夫佳兵者不祥之器，物或惡之，故有道者不處。君子居則貴左，用兵則貴右。兵者不祥之器，非君子之器，不得已而用之，恬淡為上。勝而不美，而美之者，是樂殺人。夫樂殺人者，則不可以得志於天下矣。吉事尚左，凶事尚右。偏將軍居左，上將軍居右，言以喪禮處之。殺人之眾，以哀悲泣之，戰勝，以喪禮處之。
32. 道常無名，樸雖小，天下莫能臣也。侯王若能守之，萬物將自賓。天地相合，以降甘露，民莫之令而自均。始制有名，名亦既有，夫亦將知止，知止可以不殆。譬道之在天下，猶川谷之於江海。
33. 知人者智，自知者明。勝人者有力，自勝者強。知足者富，強行者有志。不失其所者久，死而不亡者壽。
34. 大道汜兮，其可左右。萬物恃之而生而不辭，功成不名有，衣養萬物而不為主。常無欲，可名於小；萬物歸焉而不為主，可名為大。以其終不自為大，故能成其大。
35. 執大象，天下往。往而不害，安平太。樂與餌，過客止。道之出口，淡乎其無味，視之不足見，聽之不足聞，用之不足既。

36. 將欲歛之，必固張之；將欲弱之，必固強之；將欲廢之，必固興之；將欲奪之，必固與之。是謂微明。柔弱勝剛強。魚不可脫於淵，國之利器不可以示人。

37. 道常無為而無不為。侯王若能守之，萬物將自化。化而欲作，吾將鎮之以無名之樸。無名之樸，夫亦將無欲。不欲以靜，天下將自定。



### 33【老子 38-60 章】

38. 上德不德，是以有德；下德不失德，是以無德。上德無為而無以為；下德為之而有以為。上仁為之而無以為，上義為之而有以為，上禮為之而莫之應，則攘臂而扔之。故失道而後德，失德而後仁，失仁而後義，失義而後禮。夫禮者，忠信之薄，而亂之首；前識者，道之華，而愚之始。是以大丈夫處其厚，不居其薄；處其實，不居其華。故去彼取此。

39. 昔之得一者：天得一以清，地得一以寧，神得一以靈，谷得一以盈，萬物得一以生，侯王得一以為天下貞。其致之。天無以清將恐裂，地無以寧將恐發，神無以靈將恐歇，谷無以盈將恐竭，萬物無以生將恐滅，侯王無以貴高將恐蹶。故貴以賤為本，高以下為基。是以侯王自謂孤、寡、不穀，此非以賤為本邪？非乎？故致數輿無輿。不欲琤琤如玉，珞珞如石。

40. 反者，道之動；弱者，道之用。天下萬物生於有，有生於無。

41. 上士聞道，勤而行之；中士聞道，若存若亡；下士聞道，大笑之。不笑不足以為道。故建言有之：明道若昧，進道若退，夷道若類，上德若谷，太白若辱，廣德若不足，建德若偷，質真若渝，大方無隅，大器晚成，大音希聲，大象無形，道隱無名。夫唯道，善貸且成。

42. 道生一，一生二，二生三，三生萬物。萬物負陰而抱陽，沖氣以為和。人之所惡，唯孤、寡、不穀，而王公以為稱。故物或損之而益，或益之而損。人之所教，我亦教之，強梁者不得其死，吾將以為教父。

43. 天下之至柔，馳騁天下之至堅。無有入無間。吾是以知無為之有益。不言之教，無為之益，天下希及之。

44. 名與身孰親？身與貨孰多？得與亡孰病？是故甚愛必大費，多藏必厚亡。知足不辱，知止不殆，可以長久。

45. 大成若缺，其用不弊；大盈若沖，其用不窮。大直若屈，大巧若拙，大辯若訥。躁勝寒，靜勝熱。清靜為天下正。

46. 天下有道，卻走馬以糞；天下無道，戎馬生於郊。禍莫大於不知足；咎莫大於欲得。故知足之足，常足矣。

47. 不出戶，知天下；不闚牖，見天道。其出彌遠，其知彌少。是以聖人不行而知，不見而名，不為而成。
48. 為學日益，為道日損。損之又損。以至於無為。無為而無不為。取天下常以無事，及其有事，不足以取天下。
49. 聖人無常心，以百姓心為心。善者吾善之，不善者吾亦善之，德善；信者吾信之，不信者吾亦信之，德信。聖人在天下，歛歛；為天下，渾其心。百姓皆注其耳目，聖人皆孩之。
50. 出生入死。生之徒十有三，死之徒十有三，人之生，動之死地，亦十有三。夫何故？以其生生之厚。蓋聞善攝生者，陸行不遇兇虎，入軍不被甲兵。兇無所投其角，虎無所措其爪，兵無所容其刃，夫何故？以其無死地。
51. 道生之，德畜之，物形之，勢成之。是以萬物莫不尊道而貴德。道之尊，德之貴，夫莫之命而常自然。故道生之，德畜之，長之育之，亭之毒之，養之覆之。生而不有，為而不恃，長而不宰。是謂玄德。
52. 天下有始，以為天下母。既得其母，以知其子；既知其子，復守其母，沒身不殆。塞其兌，閉其門，終身不勤；開其兌，濟其事，終身不救。見小曰明，守柔曰強。用其光，復歸其明；無遺身殃，是為習常。
53. 使我介然有知，行於大道，唯施是畏。大道甚夷，而民好徑。朝甚除，田甚蕪，倉甚虛；服文綵，帶利劍，厭飲食，財貨有餘，是謂盜夸。非道也哉！
54. 善建者不拔，善抱者不脫，子孫以祭祀不輟。修之於身，其德乃真；修之於家，其德乃餘；修之於鄉，其德乃長；修之於國，其德乃豐；修之於天下，其德乃普。故以身觀身，以家觀家，以鄉觀鄉，以國觀國，以天下觀天下。吾何以知天下然哉？以此。
55. 含德之厚，比於赤子。蜂蟻虺蛇不螫，猛獸不據，攫鳥不搏。骨弱筋柔而握固。未知牝牡之合而全作，精之至也。終日號而不嗷，和之至也。知和曰常，知常曰明，益生曰祥。心使氣曰強。物壯則老，謂之不道，不道早已。
56. 知者不言，言者不知。塞其兌，閉其門，挫其銳，解其紛，和其光，同其塵。是謂玄同。故不可得而親，不可得而疏；不可得而利，不可得而害；不可得而貴，不可得而賤。故為天下貴。
57. 以正治國，以奇用兵，以無事取天下。吾何以知其然哉？以此。天下多忌諱，而民彌貧；民多利器，國家滋昏；人多伎巧，奇物滋起；法令滋



彰，盜賊多有。故聖人云：我無為而民自化，我好靜而民自正，我無事而民自富，我無欲而民自樸。

58. 其政悶悶，其民淳淳；其政察察，其民缺缺。禍兮福之所倚，福兮禍之所伏。孰知其極？其無正。正復為奇，善復為妖。人之迷，其日固久。是以聖人方而不割，廉而不劌，直而不肆，光而不耀。

59. 治人事天，莫若嗇。夫唯嗇，是謂早服；早服謂之重積德；重積德則無不克；無不克則莫知其極；莫知其極，可以有國；有國之母，可以長久。是謂深根固柢，長生久視之道。

60. 治大國，若烹小鮮。以道蒞天下，其鬼不神；非其鬼不神，其神不傷人；非其神不傷人，聖人亦不傷人。夫兩不相傷，故德交歸焉。



### 34【老子 61-81 章】

61. 大國者下流，天下之交，天下之牝，牝常以靜勝牡，以靜為下。故大國以下小國，則取小國；小國以下大國，則取大國。故或下以取，或下而取。大國不過欲兼畜人，小國不過欲入事人。夫兩者各得其所欲，大者宜為下。

62. 道者萬物之奧。善人之寶，不善人之所保。美言可以市，尊行可以加人。人之不善，何棄之有？故立天子，置三公，雖有拱璧以先駟馬，不如坐進此道。古之所以貴此道者何？不曰：以求得，有罪以免邪？故為天下貴。

63. 為無為，事無事，味無味。大小多少，報怨以德。圖難於其易，為大於其細。天下難事，必作於易；天下大事，必作於細。是以聖人終不為大，故能成其大。夫輕諾必寡信，多易必多難。是以聖人猶難之，故終無難矣。

64. 其安易持，其未兆易謀。其脆易泮，其微易散。為之於未有，治之於未亂。合抱之木，生於毫末；九層之臺，起於累土；千里之行，始於足下。為者敗之，執者失之。是以聖人無為故無敗，無執故無失。民之從事，常於幾成而敗之。慎終如始，則無敗事。是以聖人欲不欲，不貴難得之貨；學不學，復眾人之所過。以輔萬物之自然，而不敢為。

65. 古之善為道者，非以明民，將以愚之。民之難治，以其智多。故以智治國，國之賊；不以智治國，國之福。知此兩者亦稽式。常知稽式，是謂玄德。玄德深矣遠矣；與物反矣！然後乃至大順。

66. 江海所以能為百谷王者，以其善下之，故能為百谷王。是以欲上民，必以言下之；欲先民，必以身後之。是以聖人處上而民不重；處前而民不害。是以天下樂推而不厭。以其不爭，故天下莫能與之爭。
67. 天下皆謂我道大，似不肖。夫唯大，故似不肖。若肖，久矣其細也夫。我有三寶，持而保之：一曰慈，二曰儉，三曰不敢為天下先。慈故能勇，儉故能廣，不敢為天下先，故能成器長。今舍慈且勇，舍儉且廣，舍後且先，死矣！夫慈，以戰則勝，以守則固。天將救之，以慈衛之。
68. 善為士者不武，善戰者不怒，善勝敵者不與，善用人者為之下。是謂不爭之德，是謂用人之力，是謂配天古之極。
69. 用兵有言：「吾不敢為主而為客，不敢進寸而退尺。」是謂行無行，攘無臂，扔無敵，執無兵。禍莫大於輕敵，輕敵幾喪吾寶。故抗兵相加，哀者勝矣。
70. 吾言甚易知，甚易行。天下莫能知，莫能行。言有宗，事有君。夫唯無知，是以不我知。知我者希，則我者貴。是以聖人被褐懷玉。
71. 知，不知，上；不知，知，病。夫唯病病，是以不病。聖人不病，以其病病，是以不病。
72. 民不畏威，則大威至。無狎其所居，無厭其所生。夫唯不厭，是以不厭。是以聖人自知不自見，自愛不自貴。故去彼取此。
73. 勇於敢則殺，勇於不敢則活。此兩者，或利或害，天之所惡，孰知其故？是以聖人猶難之。天之道，不爭而善勝，不言而善應，不召而自來，繹然而善謀。天網恢恢，疏而不失。
74. 民不畏死，奈何以死懼之？若使民常畏死，而為奇者，吾得執而殺之，孰敢？常有司殺者殺。夫代司殺者殺，是謂代大匠斲。夫代大匠斲者，希有不傷其手矣。
75. 民之饑，以其上食稅之多，是以饑。民之難治，以其上之有為，是以難治。民之輕死，以其上求生之厚，是以輕死。夫唯無以生為者，是賢於貴生。
76. 人之生也柔弱，其死也堅強。萬物草木之生也柔脆，其死也枯槁。故堅強者死之徒，柔弱生之徒。是以兵強則不勝，木強則共。強大處下，柔弱處上。
77. 天之道，其猶張弓與！高者抑之，下者舉之；有餘者損之，不足者補之。天之道，損有餘而補不足；人之道，則不然，損不足以奉有餘。孰能有餘以奉天下？唯有道者。是以聖人為而不恃，功成而不處，其不欲見賢。

78. 天下莫柔弱於水，而攻堅強者莫之能勝。以其無以易之。弱之勝強，柔之勝剛，天下莫不知，莫能行。是以聖人云：「受國之垢，是謂社稷主；受國不祥，是為天下王。」正言若反。
79. 和大怨，必有餘怨，安可以為善？是以聖人執左契，而不責於人。有德司契，無德司微。天道無親，常與善人。
80. 小國寡民。使有什伯之器而不用，使民重死而不遠徙。雖有舟輿，無所乘之；雖有甲兵，無所陳之。使民復結繩而用之。甘其食，美其服，安其居，樂其俗。鄰國相望，雞犬之聲相聞，民至老死不相往來。
81. 信言不美，美言不信。善者不辯，辯者不善。知者不博，博者不知。聖人不積，既以為人已愈有，既以與人已愈多。天之道，利而不害；聖人之道，為而不爭。

### 35【莊子逍遙遊第一】

1. 北冥有魚，其名為鯤。鯤之大，不知其幾千里也。化而為鳥，其名為鵬。鵬之背，不知其幾千里也；怒而飛，其翼若垂天之雲。是鳥也，海運則將徙於南冥。南冥者，天池也。齊諧者，志怪者也。諧之言曰：「鵬之徙於南冥也，水擊三千里，搏扶搖而上者九萬里，去以六月息者也。」野馬也，塵埃也，生物之以息相吹也。天之蒼蒼，其正色邪？其遠而無所至極邪？其視下也，亦若是則已矣。且夫水之積也不厚，則其負大舟也無力。覆杯水於坳堂之上，則芥為之舟；置杯焉則膠，水淺而舟大也。風之積也不厚，則其負大翼也無力。故九萬里，則風斯在下矣，而後乃今培風；背負青天而莫之天闕者，而後乃今將圖南。蜩與學鳩笑之曰：「我決起而飛，槍榆枋，時則不至而控於地而已矣，奚以之九萬里而南為？」適莽蒼者三飡而反，腹猶果然；適百里者，宿舂糧；適千里者，三月聚糧。之二蟲又何知！小知不及大知，小年不及大年。奚以知其然也？朝菌不知晦朔，蟪蛄不知春秋，此小年也。楚之南有冥靈者，以五百歲為春，五百歲為秋；上古有大椿者，以八千歲為春，八千歲為秋。而彭祖乃今以久特聞，眾人匹之，不亦悲乎！湯之問棘也是已。窮髮之北，有冥海者，天池也。有魚焉，其廣數千里，未有知其脩者，其名為鯢。有鳥焉，其名為鵬，背若太山，翼若垂天之雲，搏扶搖羊角而上者九萬里，絕雲氣，負青天，然後圖南，且適南冥也。斥鷃笑之曰：「彼且奚適也？我騰躍而上，不過數仞而下，翱翔蓬蒿之間，此亦飛之至也，而彼且奚適也？」此小大之辯也。故夫知效一官，行比一鄉，德合一君，而徵一國者，其自視也亦若此矣。而宋榮子猶然笑之。且舉世而譽之而不加勸，舉世而非之而不加沮，定乎內外之分，辯乎榮辱之境，斯已矣。彼其於世未數數然也。雖

然，猶有未樹也。夫列子御風而行，泠然善也，旬有五日而後反。彼於致福者，未數數然也。此雖免乎行，猶有所待者也。若夫乘天地之正，而御六氣之辯，以遊無窮者，彼且惡乎待哉！故曰：至人無己，神人無功，聖人無名。

2. 堯讓天下於許由，曰：「日月出矣，而燭火不息，其於光也，不亦難乎！時雨降矣，而猶浸灌，其於澤也，不亦勞乎！夫子立而天下治，而我猶尸之，吾自視缺然，請致天下。」許由曰：「子治天下，天下既已治也。而我猶代子，吾將為名乎？名者，實之賓也，吾將為賓乎？鷦鷯巢於深林，不過一枝；偃鼠飲河，不過滿腹。歸休乎君！予無所用天下為。庖人雖不治庖，尸祝不越樽俎而代之矣。」
3. 肩吾問於連叔曰：「吾聞言於接輿，大而無當，往而不反。吾驚怖其言，猶河漢而無極也，大有逕庭，不近人情焉。」連叔曰：「其言謂何哉？」曰：「藐姑射之山，有神人居焉，肌膚若冰雪，綽約若處子。不食五穀，吸風飲露。乘雲氣，御飛龍，而遊乎四海之外。其神凝，使物不疵癘而年穀熟。吾以是狂而不信也。」連叔曰：「然，瞽者無以與乎文章之觀，聾者無以與乎鐘鼓之聲。豈唯形骸有聾盲哉？夫知亦有之。是其言也，猶時女也。之人也，之德也，將旁礴萬物以為一世蕪乎亂，孰弊弊焉以天下為事！之人也，物莫之傷，大浸稽天而不溺，大旱金石流、土山焦而不熱。是其塵垢粃糠，將猶陶鑄堯舜者也，孰肯以物為事！」
4. 宋人資章甫而適諸越，越人斷髮文身，無所用之。堯治天下之民，平海內之政，往見四子藐姑射之山，汾水之陽，窅然喪其天下焉。」
5. 惠子謂莊子曰：「魏王貽我大瓠之種，我樹之成而實五石，以盛水漿，其堅不能自舉也。剖之以為瓢，則瓠落無所容。非不呶然大也，吾為其無用而掇之。」莊子曰：「夫子固拙於用大矣。宋人有善為不龜手之藥者，世世以泝澠統為事。客聞之，請買其方百金。聚族而謀曰：『我世世為泝澠統，不過數金；今一朝而鬻技百金，請與之。』客得之，以說吳王。越有難，吳王使之將。冬與越人水戰，大敗越人，裂地而封之。能不龜手，一也；或以封，或不免於泝澠統，則所用之異也。今子有五石之瓠，何不慮以為大樽而浮乎江湖，而憂其瓠落無所容？則夫子猶有蓬之心也夫！」
6. 惠子謂莊子曰：「吾有大樹，人謂之樗。其大本臃腫而不中繩墨，其小枝卷曲而不中規矩。立之塗，匠者不顧。今子之言，大而無用，眾所同去也。」莊子曰：「子獨不見狸狌乎？卑身而伏，以候敖者；東西跳梁，不辟高下；中於機辟，死於罔罟。今夫斄牛，其大若垂天之雲，此能為大矣，而不能執鼠。今子有大樹，患其無用，何不樹之於無何有之鄉，廣莫

之野，彷徨乎無為其側，逍遙乎寢臥其下？不夭斤斧，物無害者，無所可用，安所困苦哉！」



### 36【莊子齊物論第二】

1. 南郭子綦隱机而坐，仰天而噓，荅焉似喪其耦。顏成子游立侍乎前，曰：「何居乎？形固可使如槁木，而心固可使如死灰乎？今之隱机者，非昔之隱机者也。」子綦曰：「偃，不亦善乎，而問之也！今者吾喪我，女知之乎？女聞人籟而未聞地籟，女聞地籟而未聞天籟夫！」子游曰：「敢問其方。」子綦曰：「夫大塊噫氣，其名為風。是唯無作，作則萬竅怒呿。而獨不聞之蓼蓼乎？山林之畏佳，大木百圍之竅穴，似鼻，似口，似耳，似枅，似圈，似臼，似洼者，似污者；激者，謔者，叱者，吸者，叫者，譟者，突者，咬者，前者唱于而隨者唱喁。泠風則小和，飄風則大和，厲風濟則眾竅為虛。而獨不見之調調之刁刁乎？」子游曰：「地籟則眾竅是已，人籟則比竹是已。敢問天籟。」子綦曰：「夫吹萬不同，而使其自己也，咸其自取，怒者其誰邪！」
2. 大知閑閑，小知閒閒；大言炎炎，小言詹詹。其寐也魂交，其覺也形開，與接為構，日以心鬪。縵者，窖者，密者。小恐惴惴，大恐縵縵。其發若機括，其司是非之謂也；其留如詛盟，其守勝之謂也；其殺若秋冬，以言其日消也；其溺之所為之，不可使復之也；其厭也如緘，以言其老洩也；近死之心，莫使復陽也。喜怒哀樂，慮歎變熱，姚佚啟態；樂出虛，蒸成菌。日夜相代乎前，而莫知其所萌。已乎，已乎！旦暮得此，其所由以生乎！非彼無我，非我無所取。是亦近矣，而不知其所為使。若有真宰，而特不得其朕。可行已信，而不見其形，有情而無形。百骸，九竅，六藏，賅而存焉，吾誰與為親？汝皆說之乎？其有私焉？如是皆有為臣妾乎？其臣妾不足以相治乎？其遞相為君臣乎？其有真君存焉？如求得其情與不得，無益損乎其真。一受其成形，不亡以待盡。與物相刃相靡，其行盡如馳，而莫之能止，不亦悲乎！終身役役而不見其成功，荼然疲役而不知其所歸，可不哀邪！人謂之不死，奚益！其形化，其心與之然，可不謂大哀乎？人之生也，固若是芒乎？其我獨芒，而人亦有不芒者乎？夫隨其成心而師之，誰獨且無師乎？奚必知代而心自取者有之？愚者與有焉！未成乎心而有是非，是今日適越而昔至也。是以無有為有。無有為有，雖有神禹，且不能知，吾獨且奈何哉！
3. 夫言非吹也，言者有言，其所言者特未定也。果有言邪？其未嘗有言邪？其以為異於鷇音，亦有辯乎？其無辯乎？道惡乎隱而有真偽？言惡乎隱而

有是非？道惡乎往而不存？言惡乎存而不可？道隱於小成，言隱於榮華。故有儒墨之是非，以是其所非而非其所是。欲是其所非而非其所是，則莫若以明。物無非彼，物無非是；自彼則不見，自知則知之；故曰彼出於是，是亦因彼；彼是方生之說也。雖然，方生方死，方死方生；方可方不可，方不可方可；因是因非，因非因是。是以聖人不由，而照之於天，亦因是也。是亦彼也，彼亦是也。彼亦一是非，此亦一是非，果且有彼是乎哉？果且無彼是乎哉？彼是莫得其偶，謂之道樞。樞始得其環中，以應無窮。是亦一無窮，非亦一無窮也。故曰：莫若以明。

4. 以指喻指之非指，不若以非指喻指之非指也；以馬喻馬之非馬，不若以非馬喻馬之非馬也。天地一指也，萬物一馬也。可乎可，不可乎不可。道行之而成，物謂之而然。惡乎然？然於然。惡乎不然？不然於不然。物固有所然，物固有所可；無物不然，無物不可。故為是舉莛與楹，厲與西施，恢恠憭怪，道通為一。其分也，成也；其成也，毀也。凡物無成與毀，復通為一。唯達者知通為一，為是不用而寓諸庸。庸也者，用也；用也者，通也；通也者，得也。適得而幾矣。因是已。已而不知其然，謂之道。勞神明為一，而不知其同也，謂之朝三。何謂朝三？曰：『狙公賦芋，曰：「朝三而莫四。」眾狙皆怒。曰：「然則朝四而莫三。」眾狙皆悅。』名實未虧而喜怒為用，亦因是也。是以聖人和之以是非而休乎天鈞，是之謂兩行。
- 5 古之人，其知有所至矣。惡乎至？有以為未始有物者，至矣，盡矣，不可以加矣。其次以為有物矣，而未始有封也。其次以為有封焉，而未始有是非也。是非之彰也，道之所以虧也。道之所以虧，愛之所以成。果且有成與虧乎哉？果且無成與虧乎哉？有成與虧，故昭氏之鼓琴也；無成與虧，故昭氏之不鼓琴也。昭文之鼓琴也，師曠之枝策也，惠子之據梧也，三子之知，幾乎，皆其盛者也，故載之末年。唯其好之也，以異於彼，其好之也，欲以明之。彼非所明而明之，故以堅白之昧終。而其子又以文之綸終，終身無成。若是而可謂成乎？雖我亦成也。若是而不可謂成乎？物與我無成也。是故滑疑之耀，聖人之所圖也。為是不用而寓諸庸，此之謂以明。
6. 今且有言於此，不知其與是類乎？其與是不類乎？類與不類，相與為類，則與彼無以異矣。雖然，請嘗言之。有始也者，有未始有始也者，有未始有夫未始有始也者。有有也者，有無也者，有未始有無也者，有未始有夫未始有無也者。俄而有無矣，而未知有無之果孰有孰無也。今我則已有謂矣，而未知吾所謂之其果有謂乎，其果無謂乎？天下莫大於秋豪之末，而

大山為小；莫壽乎殤子，而彭祖為天。天地與我並生，而萬物與我為一。既已為一矣，且得有言乎？既已謂之一矣，且得無言乎？一與言為二，二與一為三。自此以往，巧歷不能得，而況其凡乎！故自無適有，以至於三，而況自有適有乎！無適焉，因是已。

7. 夫道未始有封，言未始有常，為是而有畛也。請言其畛：有左，有右，有倫，有義，有分，有辯，有競，有爭，此之謂八德。六合之外，聖人存而不論；六合之內，聖人論而不議。春秋經世，先王之志，聖人議而不辯。故分也者，有不分也；辯也者，有不辯也。曰：何也？聖人懷之，眾人辯之以相示也。故曰：辯也者，有不見也。夫大道不稱，大辯不言，大仁不仁，大廉不嗛，大勇不忮。道昭而不道，言辯而不及，仁常而不成，廉清而不信，勇忮而不成。五者園而幾向方矣，故知止其所不知，至矣。孰知不言之辯，不道之道？若有能知，此之謂天府。注焉而不滿，酌焉而不竭，而不知其所由來，此之謂葆光。故昔者堯問於舜曰：「我欲伐宗、膾、胥敖，南面而不釋然。其故何也？」舜曰：「夫三子者，猶存乎蓬艾之間。若不釋然，何哉？昔者十日並出，萬物皆照，而況德之進乎日者乎！」
8. 齧缺問乎王倪曰：「子知物之所同是乎？」曰：「吾惡乎知之！」「子知子之所不知邪？」曰：「吾惡乎知之！」「然則物無知邪？」曰：「吾惡乎知之！」雖然，嘗試言之。庸詎知吾所謂知之非不知邪？庸詎知吾所謂不知之非知邪？且吾嘗試問乎女：民濕寢則腰疾偏死，鱷然乎哉？木處則惴慄恟懼，猿猴然乎哉？三者孰知正處？民食芻豢，麋鹿食薦，螂且甘帶，鴟鴞耆鼠，四者孰知正味？猿獼狙以為雌，麋與鹿交，鱣與魚游。毛嬙麗姬，人之所美也；魚見之深入，鳥見之高飛，麋鹿見之決驟。四者孰知天下之正色哉？自我觀之，仁義之端，是非之塗，樊然殽亂，吾惡能知其辯！」齧缺曰：「子不知利害，則至人固不知利害乎？」王倪曰：「至人神矣！大澤焚而不能熱，河漢沍而不能寒，疾雷破山飄風振海而不能驚。若然者，乘雲氣，騎日月，而遊乎四海之外。死生無變於己，而況利害之端乎！」
9. 瞿鵠子問乎長梧子曰：「吾聞諸夫子，聖人不從事於務，不就利，不違害，不喜求，不緣道，無謂有謂，有謂無謂，而遊乎塵垢之外。夫子以為孟浪之言，而我以為妙道之行也。吾子以為奚若？」長梧子曰：「是黃帝之所聽熒也，而丘也何足以知之！且女亦大早計，見卵而求時夜，見彈而求鴉炙。予嘗為女妄言之，女以妄聽之。奚旁日月，挾宇宙？為其脗合，置其滑濔，以隸相尊。眾人役役，聖人愚菀，參萬歲而一成純。萬物盡

然，而以是相蘊。予惡乎知說生之非惑邪！予惡乎知惡死之非弱喪而不知歸者邪！麗之姬，艾封人之子也。晉國之始得之也，涕泣沾襟；及其至於王所，與王同筐床，食芻豢，而後悔其泣也。予惡乎知夫死者不悔其始之蘄生乎！夢飲酒者，旦而哭泣；夢哭泣者，旦而田獵。方其夢也，不知其夢也。夢之中又占其夢焉，覺而後知其夢也。且有大覺而後知此其大夢也，而愚者自以為覺，竊竊然知之。君乎，牧乎，固哉！丘也與女，皆夢也；予謂女夢，亦夢也。是其言也，其名為弔詭。萬世之後，而一遇大聖知其解者，是旦暮遇之也。既使我與若辯矣，若勝我，我不若勝，若果是也？我果非也邪？我勝若，若不吾勝，我果是也？而果非也邪？其或是也，其或非也邪？其俱是也，其俱非也邪？我與若不能相知也，則人固受其黜闇。吾誰使正之？使同乎若者正之，既與若同矣，惡能正之！使同乎我者正之？既同乎我矣，惡能正之！使異乎我與若者正之？既異乎我與若矣，惡能正之！使同乎我與若者正之？既同乎我與若矣，惡能正之！然則我與若與人俱不能相知也，而待彼也邪？何謂和之以天倪？曰：是不是，然不然。是若果是也，則是之異乎不是也亦無辯；然若果然也，則然之異乎不然也亦無辯。化聲之相待，若其不相待。和之以天倪，因之以曼衍，所以窮年也。忘年忘義，振於無竟，故寓諸無竟。」

10. 罔兩問景曰：「曩子行，今子止，曩子坐，今子起；何其無特操與？」景曰：「吾有待而然者邪？吾所待又有待而然者邪？吾待蛇蚺蜩翼邪？惡識所以然！惡識所以不然！」
11. 昔者莊周夢為胡蝶，栩栩然胡蝶也，自喻適志與！不知周也。俄然覺，則蘧蘧然周也。不知周之夢為胡蝶與，胡蝶之夢為周與？周與胡蝶，則必有分矣。此之謂物化。



### 37【莊子養生主第三】

1. 吾生也有涯，而知也無涯。以有涯隨無涯，殆已；已而為知者，殆而已矣。為善無近名，為惡無近刑。緣督以為經，可以保身，可以全生，可以養親，可以盡年。
2. 庖丁為文惠君解牛，手之所觸，肩之所倚，足之所履，膝之所踣，砉然騞然，奏刀騞然，莫不中音。合於桑林之舞，乃中經首之會。文惠君曰：「譔，善哉！技蓋至此乎？」庖丁釋刀對曰：「臣之所好者道也，進乎技矣。始臣之解牛之時，所見無非牛者。三年之後，未嘗見全牛也。方今之時，臣以神遇，而不以目視，官知止而神欲行。依乎天理，批大郤，導大窾，因其固然。技經肯綮之未嘗，而況大軀乎！良庖歲更刀，



割也；族庖月更刀，折也。今臣之刀十九年矣，所解數千牛矣，而刀刃若新發於硯。彼節者有閒，而刀刃者無厚，以無厚入有閒，恢恢乎其於游刃必有餘地矣，是以十九年而刀刃若新發於硯。雖然，每至於族，吾見其難為，怵然為戒，視為止，行為遲。動刀甚微，謦然已解，如土委地。提刀而立，為之四顧，為之躊躇滿志，善刀而藏之。」文惠君曰：「善哉！吾聞庖丁之言，得養生焉。」

3. 公文軒見右師而驚曰：「是何人也？惡乎介也？天與，其人與？」曰：「天也，非人也。天之生是使獨也，人之貌有與也。以是知其天也，非人也。」
4. 澤雉十步一啄，百步一飲，不蕪畜乎樊中。神雖王，不善也。
5. 老聃死，秦失弔之，三號而出。弟子曰：「非夫子之友邪？」曰：「然。」「然則弔焉若此，可乎？」曰：「然。始也吾以為其人也，而今非也。向吾入而弔焉，有老者哭之，如哭其子；少者哭之，如哭其母。彼其所以會之，必有不蕪言而言，不蕪哭而哭者。是遁天倍情，忘其所受，古者謂之遁天之刑。適來，夫子時也；適去，夫子順也。安時而處順，哀樂不能入也，古者謂是帝之縣解。」指窮於為薪，火傳也，不知其盡也。



### 38【莊子人閒世第四】

1. 顏回見仲尼，請行。曰：「奚之？」曰：「將之衛。」曰：「奚為焉？」曰：「回聞衛君，其年壯，其行獨，輕用其國，而不見其過，輕用民死，死者以國量乎澤若蕉。民其無如矣。回嘗聞之夫子曰：『治國去之，亂國就之。醫門多疾。』願以所聞思其則，庶幾其國有瘳乎！」仲尼曰：「謔！若殆往而刑耳！夫道不欲雜，雜則多，多則擾，擾則憂，憂而不救。古之至人，先存諸己，而後存諸人。所存於己者未定，何暇至於暴人之所行！且若亦知夫德之所蕩，而知之所為出乎哉？德蕩乎名，知出乎爭。名也者，相軋也；知也者，爭之器也。二者凶器，非所以盡行也。且德厚信矜，未達人氣；名聞不爭，未達人心。而彊以仁義繩墨之言術暴人之前者，是以人惡有其美也，命之曰菑人。菑人者，人必反菑之，若殆為人菑夫！且苟為悅賢而惡不肖，惡用而求有以異？若唯無詔，王公必將乘人而鬪其捷。而目將熒之，而色將平之，口將營之，容將形之，心且成之。是以火救火，以水救水，名之曰益多，順始無窮。若殆以不信厚言，必死於暴人之前矣。且昔者桀殺關龍逢，紂殺王子比干，是皆修其身以下僇拊人之民，以下拂其上者也，故其君因其修以擠之，是好名者也。且昔

者堯攻叢枝、胥敖，禹攻有扈，國為虛厲，身為刑戮，其用兵不止，其求實無已。是皆求名實者也，而獨不聞之乎？名實者，聖人之所不能勝也，而況若乎！雖然，若必有以也，嘗以語我來！」顏回曰：「端而虛，勉而一，則可乎？」曰：「惡！惡可？夫以陽為充孔揚，采色不定，常人之所不違，因案人之所感，以求容與其心。名之曰日漸之德不成，而況大德乎！將執而不化，外合而內不訾，其庸詎可乎！」「然則我內直而外曲，成而上比。內直者，與天為徒。與天為徒者，知天子之與己皆天之所子，而獨以己言蘄乎而人善之，蘄乎而人不善之邪？若然者，人謂之童子，是之謂與天為徒。外曲者，與人之為徒也。擎、蹠、曲拳，人臣之禮也，人皆為之，吾敢不為邪！為人之所為者，人亦無疵焉，是之謂與人為徒。成而上比者，與古為徒。其言雖教謫之實也。古之有也，非吾有也。若然者，雖直而不病，是之謂與古為徒。若是則可乎？」仲尼曰：「惡！惡可！太多政法而不諫，雖固亦無罪。雖然，止是耳矣，夫胡可以及化！猶師心者也。」顏回曰：「吾無以進矣，敢問其方。」仲尼曰：「齋，吾將語若！有而為之，其易邪？易之者，皞天不宜。」顏回曰：「回之家貧，唯不飲酒、不茹葷者數月矣。若此，則可以為齋乎？」曰：「是祭祀之齋，非心齋也。」回曰：「敢問心齋。」仲尼曰：「若一志，無聽之以耳而聽之以心，無聽之以心而聽之以氣。聽止於耳，心止於符。氣也者，虛而待物者也。唯道集虛。虛者，心齋也。」顏回曰：「回之未始得使，實自回也；得使之也，未始有回也；可謂虛乎？」夫子曰：「盡矣。吾語若！若能入遊其樊而無感其名，入則鳴，不入則止。無門無毒，一宅而寓於不得已，則幾矣。絕迹易，無行地難。為人使易以偽；為天使，難以偽。聞以有翼飛者矣，未聞以無翼飛者也；聞以有知知者矣，未聞以無知知者也。瞻彼闕者，虛室生白，吉祥止止。夫且不止，是之謂坐馳。夫徇耳目內通而外於心知，鬼神將來舍，而況人乎！是萬物之化也，禹舜之所紐也，伏戲几蘧之所行終，而況散焉者乎！」

2. 葉公子高將使於齊，問於仲尼曰：「王使諸梁也甚重，齊之待使者，蓋將甚敬而不急。匹夫猶未可動，而況諸侯乎！吾甚慄之。子嘗語諸梁也曰：『凡事若小若大，寡不道以懽成。事若不成，則必有人道之患；事若成，則必有陰陽之患。若成若不成而後無患者，唯有德者能之。』吾食也執粗而不臧，爨無欲清之人。今吾朝受命而夕飲冰，我其內熱與！吾未至乎事之情，而既有陰陽之患矣；事若不成，必有人道之患，是兩也。為人臣者不足以任之，子其有以語我來！」仲尼曰：「天下有大戒二：其一，命也；其一，義也。子之愛親，命也，不可解於心；臣之事君，義也，無適

而非君也，無所逃於天地之間，是之謂大戒。是以夫事其親者，不擇地而安之，孝之至也；夫事其君者，不擇事而安之，忠之盛也。自事其心者，哀樂不易施乎前，知其不可奈何而安之若命，德之至也。為人臣子者，固有所不得已。行事之情而忘其身，何暇至於悅生而惡死！夫子其行可矣！丘請復以所聞：凡交近則必相靡以信，遠則必忠之以言，言必或傳之。夫傳兩喜兩怒之言，天下之難者也。夫兩喜必多溢美之言，兩怒必多溢惡之言。凡溢之類妄，妄則其信之也莫，莫則傳言者殃。故法言曰：『傳其常情，無傳其溢言，則幾乎全。』且以巧鬪力者，始乎陽，常卒乎陰，大至則多奇巧；以禮飲酒者，始乎治，常卒乎亂，大至則多奇樂。凡事亦然。始乎諒，常卒乎鄙；其作始也簡，其將畢也必巨。言者，風波也；行者，實喪也。夫風波易以動，實喪易以危。故忿設無由，巧言偏辭。獸死不擇音，氣息蓊然，於是並生心厲。剋核太至，則必有不肖之心應之，而不知其然也。苟為不知其然也，孰知其所終！故法言曰：『無遷令，無勸成。過度益也。』遷令勸成殆事，美成在久，惡成不及改，可不慎與！且夫乘物以遊心，託不得已以養中，至矣。何作為報也！莫若為致命，此其難者。」

3. 顏闔將傳衛靈公太子，而問於蘧伯玉曰：「有人於此，其德天殺。與之為無方，則危吾國；與之為有方，則危吾身。其知適足以知人之過，而不知其所以過。若然者，吾奈之何？」蘧伯玉曰：「善哉問乎！戒之，慎之，正女身哉！形莫若就，心莫若和。雖然，之二者有患。就不欲入，和不欲出。形就而入，且為顛為滅，為崩為蹶。心和而出，且為聲為名，為妖為孽。彼且為嬰兒，亦與之為嬰兒；彼且為無町畦，亦與之為無町畦；彼且為無崖，亦與之為無崖。達之，入於無疵。汝不知夫螳螂乎？怒其臂以當車轍，不知其不勝任也，是其才之美者也。戒之，慎之！積伐而美者以犯之，幾矣！汝不知夫養虎者乎？不敢以生物與之，為其殺之之怒也；不敢以全物與之，為其決之之怒也；時其飢飽，達其怒心。虎之與人異類而媚養己者，順也；故其殺者，逆也。夫愛馬者，以筐盛矢，以娠盛溺。適有蚊虻僕緣，而拊之不時，則缺銜毀首碎胸。意有所至而愛有所亡。可不慎邪！」

4. 匠石之齊，至乎曲轅，見櫟社樹。其大蔽數千牛，絜之百圍，其高臨山十仞而後有枝，其可以為舟者旁十數。觀者如市，匠伯不顧，遂行不輟。弟子厭觀之，走及匠石，曰：「自吾執斧斤以隨夫子，未嘗見材如此其美也。先生不肯視，行不輟，何邪？」曰：「已矣，勿言之矣！散木也，以為舟則沈，以為棺槨則速腐；以為器則速毀，以為門戶則液樞，以為柱則

蠹。是不材之木也，無所可用，故能若是之壽。」匠石歸，櫟社見夢曰：「女將惡乎比予哉？若將比予於文木邪？夫柎梨橘柚果蓏之屬，實熟則剝，剝則辱，大枝折，小枝泄。此以其能苦其生者也，故不終其天年而中道夭，自掊擊於世俗者也。物莫不若是。且予求無所可用久矣，幾死，乃今得之，為予大用。使予也而有用，且得有此大也邪？且也，若與予也皆物也，奈何哉其相物也？而幾死之散人，又惡知散木！」匠石覺而診其夢。弟子曰：「趣取無用，則為社何邪？」曰：「密！若無言！彼亦直寄焉，以為不知己者詬厲也。不為社者，且幾有翦乎！且也，彼其所保與眾異，而以義譽之，不亦遠乎！」

5. 南伯子綦遊乎商之丘，見大木焉，有異：結駟千乘，隱將芘其所賴。子綦曰：「此何木也哉？此必有異材夫！」仰而視其細枝，則拳曲而不可以為棟梁；俯而視其大根，則軸解而不可以為棺槨；啜其葉，則口爛而為傷；嗅之，則使人狂醒三日而不已。子綦曰：「此果不材之木也，以至於此其大也。嗟乎神人，以此不材！」宋有荆氏者，宜楸柏桑。其拱把而上者，求狙猴之杙者斬之；三圍四圍，求高名之麗者斬之；七圍八圍，貴人富商之家求禪傍者斬之。故未終其天年，而中道夭於斧斤，此材之患也。故解之以牛之白顙者，與豚之亢鼻者，與人有痔病者，不可以適河。此皆巫祝以知之矣，所以為不祥也，此乃神人之所以為大祥也。
6. 支離疏者，頤隱於臍，肩高於頂，會撮指天，五管在上，兩髀為脅。挫鍼治解，足以餬口；鼓箎播精，足以食十人。上徵武士，則支離攘臂而遊於其間；上有大役，則支離以有常疾不受功；上與病者粟，則受三鍾與十束薪。夫支離其形者，猶足以養其身，終其天年，又況支離其德者乎！」
7. 孔子適楚，楚狂接輿遊其門曰：「鳳兮鳳兮，何如德之衰也！來世不可待，往世不可追也。天下有道，聖人成焉；天下無道，聖人生焉。方今之時，僅免刑焉。福輕乎羽，莫之知載；禍重乎地，莫之知避。已乎已乎，臨人以德！殆乎殆乎，畫地而趨！迷陽迷陽，無傷吾行！吾行卻曲，無傷吾足！」山木自寇也，膏火自煎也。桂可食，故伐之；漆可用，故割之。人皆知有用之用，而莫知無用之用也。



### 39【莊子德充符第五】

1. 魯有兀者王骀，從之遊者，與仲尼相若。常季問於仲尼曰：「王骀，兀者也，從之遊者與夫子中分魯。立不教，坐不議，虛而往，實而歸。固有不言之教，無形而心成者邪！是何人也？」仲尼曰：「夫子，聖人也。丘也直後而未往耳。丘將以為師，而況不若丘者乎！奚假魯國！丘將引天下而

與從之。」常季曰：「彼兀者也，而王先生，其與庸亦遠矣。若然者，其用心也獨若之何？」仲尼曰：「死生亦大矣，而不得與之變，雖天地覆墜，亦將不與之遺。審乎無假，而不與物遷，命物之化而守其宗也。」常季曰：「何謂也？」仲尼曰：「自其異者視之，肝膽楚越也；自其同者視之，萬物皆一也。夫若然者，且不知耳目之所宜，而游心乎德之和，物視其所一而不見其所喪，視喪其足猶遺土也。」常季曰：「彼為己，以其知得其心，以其心，得其常心，物何為最之哉？」仲尼曰：「人莫鑑於流水而鑑於止水，唯止能止眾止。受命於地，唯松柏獨也在，冬夏青青；受命於天，唯舜獨也正，幸能正生，以正眾生。夫保始之徵，不懼之實。勇士一人，雄入於九軍。將求名而能自要者，而猶若是，而況官天地、府萬物，直寓六骸、象耳目，一知之所知，而心未嘗死者乎！彼且擇日而登假，人則從是也。彼且何肯以物為事乎！」

2. 申徒嘉，兀者也，而與鄭子產同師於伯昏無人。子產謂申徒嘉曰：「我先出則子止，子先出則我止。」其明日，又與合堂同席而坐。子產謂申徒嘉曰：「我先出則子止，子先出則我止。今我將出，子可以止乎，其未邪？且子見執政而不違，子齊執政乎？」申徒嘉曰：「先生之門，固有執政焉如此哉？子而說子之執政而後人者也！聞之曰：『鑑明則塵垢不止，止則不明也。久與賢人處則無過。』今子之所取大者，先生也，而猶出言若是，不亦過乎！」子產曰：「子既若是矣，猶與堯爭善，計子之德，不足以自反邪？」申徒嘉曰：「自狀其過，以不當亡者眾；不狀其過，以不當存者寡。知不可奈何而安之若命，唯有德者能之。遊於羿之彀中，中央者，中地也；然而不中者，命也。人以其全足笑吾不全足者眾矣，我怫然而怒；而適先生之所，則廢然而反。不知先生之洗我以善邪？吾與夫子遊十九年矣，而未嘗知吾兀者也。今子與我遊於形骸之內，而子索我於形骸之外，不亦過乎！」子產蹴然改容更貌曰：「子無乃稱！」

3. 魯有兀者叔山無趾，踵見仲尼。仲尼曰：「子不謹，前既犯患若是矣。雖今來，何及矣！」無趾曰：「吾唯不知務而輕用吾身，吾是以亡足。今吾來也，猶有尊足者存，吾是以務全之也。夫天無不覆、地無不載，吾以夫子為天地，安知夫子之猶若是也！」孔子曰：「丘則陋矣。夫子胡不入乎，請講以所聞！」無趾出。孔子曰：「弟子勉之！夫無趾，兀者也，猶務學以復補前行之惡，而況全德之人乎！」無趾語老聃曰：「孔丘之於至人，其未邪？彼何賓賓以學子為？彼且蘄以諛詭幻怪之名聞，不知至人之以是為己桎梏邪？」老聃曰：「胡不直使彼以死生為一條，以可不可為一貫者，解其桎梏，其可乎？」無趾曰：「天刑之，安可解！」

4. 魯哀公問於仲尼曰：「衛有惡人焉，曰哀駘它。丈夫與之處者，思而不能去也。婦人見之，請於父母曰：『與為人妻，寧為夫子妾』者，十數而未止也。未嘗有聞其唱者也，常和人而已矣。無君人之位以濟乎人之死，無聚祿以望人之腹。又以惡駭天下，和而不唱，知不出乎四域，且而雌雄合乎前。是必有異乎人者也。寡人召而觀之，果以惡駭天下。與寡人處，不至以月數，而寡人有意乎其為人也；不至乎期年，而寡人信之。國無宰，寡人傳國焉。悶然而後應，汜而若辭。寡人醜乎？卒授之國。無幾何也，去寡人而行，寡人卹焉若有亡也，若無與樂是國也。是何人者也？」仲尼曰：「丘也嘗使於楚矣，適見炖子食於其死母者，少焉眴若，皆棄之而走。不見己焉爾，不得類焉爾。所愛其母者，非愛其形也，愛使其形者也。戰而死者，其人之葬也不以鬻資，刖者之屨，無為愛之，皆無其本矣。為天子之諸御，不爪翦，不穿耳；娶妻者止於外，不得復使。形全猶足以為爾，而況全德之人乎！今哀駘它未言而信，無功而親，使人授己國，唯恐其不受也，是必才全而德不形者也。」哀公曰：「何謂才全？」仲尼曰：「死生存亡，窮達貧富，賢與不肖毀譽，饑渴寒暑，是事之變，命之行也。日夜相代乎前，而知不能規乎其始者也。故不足以滑和，不可入於靈府。使之和豫，通而不失於兌；使日夜無卻，而與物為春，是接而生時於心者也。是之謂才全。」「何謂德不形？」曰：「平者，水停之盛也。其可以為法也，內保之而外不蕩也。德者，成和之修也。德不形者，物不能離也。」哀公異日以告閔子，曰：「始也，吾以南面而君天下，執民之紀而憂其死，吾自以為至通矣。今吾聞至人之言，恐吾無其實，輕用吾身，而亡其國。吾與孔丘，非君臣也，德友而已矣。」
5. 闔跂支離無脰說衛靈公，靈公說之；而視全人，其脰肩肩。甕盎大癭說齊桓公，桓公說之；而視全人，其脰肩肩。故德有所長而形有所忘，人不忘其所忘，而忘其所不忘，此謂誠忘。故聖人有所遊，而知為孽，約為膠，德為接，工為商。聖人不謀，惡用知？不斲，惡用膠？無喪，惡用德？不貨，惡用商？四者，天鬻也。天鬻者，天食也。既受食於天，又惡用人！有人之形，無人之情。有人之形，故羣於人；無人之情，故是非不得於身。眇乎小哉，所以屬於人也！警乎大哉，獨成其天！
6. 惠子謂莊子曰：「人故無情乎？」莊子曰：「然。」惠子曰：「人而無情，何以謂之人？」莊子曰：「道與之貌，天與之形，惡得不謂之人？」惠子曰：「既謂之人，惡得無情？」莊子曰：「是非吾所謂情也。吾所謂無情者，言人之不以好惡內傷其身，常因自然而不益生也。」惠子曰：「不益生，何以有其身？」莊子曰：「道與之貌，天與之形，無以好惡內

傷其身。今子外乎子之神，勞乎子之精，倚樹而吟，據槁梧而暝。天選子之形，子以堅白鳴！」



#### 40【莊子大宗師第六】

1. 知天之所為，知人之所為者，至矣。知天之所為者，天而生也；知人之所為者，以其知之所知，以養其知之所不知，終其天年而不中道夭者，是知之盛也。雖然，有患。夫知有所待而後當，其所待者特未定也。庸詎知吾所謂天之非人乎？所謂人之非天乎？且有真人而後有真知。何謂真人？古之真人，不逆寡，不雄成，不謨士。若然者，過而弗悔，當而不自得也。若然者，登高不慄，入水不濡，入火不熱。是知之能登假於道也若此。古之真人，其寢不夢，其覺無憂，其食不甘，其息深深。真人之息以踵，眾人之息以喉。屈服者，其嗑言若哇。其耆欲深者，其天機淺。古之真人，不知說生，不知惡死；其出不訢，其入不距；翛然而往，翛然而來而已矣。不忘其所始，不求其所終；受而喜之，忘而復之，是之謂不以心捐道。不以人助天。是之謂真人。若然者，其心志，其容寂，其顙顙，淒然似秋，煖然似春，喜怒通四時，與物有宜而莫知其極。故聖人之用兵也，亡國而不失人心；利澤施乎萬世，不為愛人。故樂通物，非聖人也；有親，非仁也；天時，非賢也；利害不通，非君子也；行名失己，非士也；亡身不真，非役人也。若狐不偕、務光、伯夷、叔齊、箕子、胥餘、紀他、申徒狄，是役人之役，適人之適，而不自適其適者也。古之真人，其狀義而不朋，若不足而不承；與乎其觚而不堅也，張乎其虛而不華也；邴邴乎其似喜乎！崔乎其不得已乎！濔濔乎進我色也，與乎止我德也；厲乎其似世乎！警乎其未可制也；連乎其似好閉也，悒乎忘其言也。以刑為體，以禮為翼，以知為時，以德為循。以刑為體者，綽乎其殺也；以禮為翼者，所以行於世也；以知為時者，不得已於事也；以德為循者，言其與有足者至於丘也，而人真以為勤行者也。故其好之也一，其弗好之也一。其一也一，其不一也一。其一與天為徒，其不一與人為徒。天與人不相勝也，是之謂真人。
2. 死生，命也，其有夜旦之常，天也。人之有所不得與，皆物之情也。彼特以天為父，而身猶愛之，而況其卓乎！人特以有君為愈乎己，而身猶死之，而況其真乎！泉涸，魚相與處於陸，相呴以溼，相濡以沫，不如相忘於江湖。與其譽堯而非桀也，不如兩忘而化其道。夫大塊載我以形，勞我以生，佚我以老，息我以死。故善吾生者，乃所以善吾死也。夫藏舟於壑，藏山於澤，謂之固矣。然而夜半有力者負之而走，昧者不知

也。藏大小有宜，猶有所遜。若夫藏天下於天下而不得所遜，是恆物之大情也。特犯人之形而猶喜之。若人之形者，萬化而未始有極也，其為樂可勝計邪！故聖人將遊於物之所不得遜而皆存。善夭善老，善始善終，人猶效之，又況萬物之所係，而一化之所待乎！夫道，有情有信，無為無形；可傳而不可受，可得而不可見；自本自根，未有天地，自古以固存；神鬼神帝，生天生地；在太極之先而不為高，在六極之下而不為深；先天地生而不為久，長於上古而不為老。狝韋氏得之，以挈天地；伏犧氏得之，以襲氣母；維斗得之，終古不忒；日月得之，終古不息；堪坏得之，以襲崑崙；馮夷得之，以遊大川；肩吾得之，以處大山；黃帝得之，以登雲天；顓頊得之，以處玄宮；禹強得之，立乎北極；西王母得之，坐乎少廣，莫知其始，莫知其終；彭祖得之，上及有虞，下及五伯；傅說得之，以相武丁，奄有天下，乘東維，騎箕尾，而比於列星。

3. 南伯子葵問乎女偶曰：「子之年長矣，而色若孺子，何也？」曰：「吾聞道矣。」南伯子葵曰：「道可得學邪？」曰：「惡！惡可！子非其人也。夫卜梁倚有聖人之才而無聖人之道，我有聖人之道而無聖人之才。吾欲以教之，庶幾其果為聖人乎！不然，以聖人之道告聖人之才，亦易矣。吾猶守而告之，參日而後能外天下；已外天下矣，吾又守之，七日而後能外物；已外物矣，吾又守之，九日而後能外生；已外生矣，而後能朝徹；朝徹，而後能見獨；見獨，而後能無古今；無古今，而後能入於不死不生。殺生者不死，生生者不生。其為物，無不將也，無不迎也；無不毀也，無不成也。其名為撻寧。撻寧也者，撻而後成者也。」南伯子葵曰：「子獨惡乎聞之！」曰：「聞諸副墨之子，副墨之子聞諸洛誦之孫，洛誦之孫聞之瞻明，瞻明聞之聶許，聶許聞之需役，需役聞之於謳，於謳聞之玄冥，玄冥聞之參寥，參寥聞之疑始。」
4. 子祀、子輿、子犁、子來四人相與語，曰：「孰能以無為首，以生為脊，以死為尻，孰知生死存亡之一體者，吾與之友矣。」四人相視而笑，莫逆於心，遂相與為友。俄而子輿有病，子祀往問之。曰：「偉哉夫造物者，將以予為此拘拘也！」曲僂發背，上有五管，頤隱於齊，肩高於頂，句贅指天。陰陽之氣有沴，其心閒而無事，跼蹐而鑑於井，曰：「嗟乎！夫造物者又將以予為此拘拘也！」子祀曰：「女惡之乎？」曰：「亡，予何惡！浸假而化予之左臂以為雞，予因以求時夜；浸假而化予之右臂以為彈，予因以求鴉炙；浸假而化予之尻以為輪，以神為馬，予因以乘之，豈更駕哉！且夫得者，時也，失者，順也；安時而處



順，哀樂不能入也。此古之所謂縣解也，而不能自解者，物有結之。且夫物不勝天久矣，吾又何惡焉！」俄而子來有病，喘喘然將死，其妻子環而泣之。子犁往問之，曰：「叱！避！無怛化！」倚其戶與之語曰：「偉哉造物！又將奚以汝為，將奚以汝適！以汝為鼠肝乎？以汝為蟲臂乎？」子來曰：「父母於子，東西南北，唯命之從。陰陽於人，不翅於父母；彼近吾死而我不聽，我則悍矣，彼何罪焉！夫大塊載我以形，勞我以生，佚我以老，息我以死。故善吾生者，乃所以善吾死也。今之大冶鑄金，金踊躍曰：『我且必為鏌鋌』，大冶必以為不祥之金。今一犯人之形，而曰『人耳人耳』，夫造化者必以為不祥之人。今一以天地為大鑪，以造化為大冶，惡乎往而不可哉！成然寐，遽然覺。」

5. 子桑戶、孟子反、子琴張三人相與友，曰：「孰能相與於無相與，相為於無相為？孰能登天遊霧，撓挑無極，相忘以生，無所終窮？」三人相視而笑，莫逆於心，遂相與友。莫然有閒，而子桑戶死，未葬。孔子聞之，使子貢往待事焉。或編曲，或鼓琴，相和而歌曰：「嗟來桑戶乎！嗟來桑戶乎！而已反其真，而我猶為人猗！」子貢趨而進曰：「敢問臨尸而歌，禮乎？」二人相視而笑曰：「是惡知禮意！」子貢反，以告孔子，曰：「彼何人者邪？修行無有，而外其形骸，臨尸而歌，顏色不變，無以命之。彼何人者邪？」孔子曰：「彼遊方之外者也，而丘，遊方之內者也。外內不相及，而丘使女往弔之，丘則陋矣。彼方且與造物者為人，而遊乎天地之一氣。彼以生為附贅縣疣，以死為決疢潰癰。夫若然者，又惡知死生先後之所在！假於異物，託於同體；忘其肝膽，遺其耳目；反覆終始，不知端倪；芒然彷徨乎塵垢之外，逍遙乎無為之業。彼又惡能憤憤然為世俗之禮，以觀眾人之耳目哉！」子貢曰：「然則夫子何方之依？」孔子曰：「丘，天之戮民也。雖然，吾與汝共之。」子貢曰：「敢問其方。」孔子曰：「魚相造乎水，人相造乎道。相造乎水者，穿池而養給；相造乎道者，無事而生定。故曰：魚相忘乎江湖，人相忘乎道術。」子貢曰：「敢問畸人。」曰：「畸人者，畸於人而侔於天。故曰：天之小人，人之君子；人之君子，天之小人也。」
6. 顏回問仲尼曰：「孟孫才，其母死，哭泣無涕，中心不感，居喪不哀。無是三者，以善喪蓋魯國。固有無其實而得其名者乎？回壹怪之。」仲尼曰：「夫孟孫氏盡之矣，進於知矣。唯簡之而不得，夫已有所簡矣。孟孫氏不知所以生，不知所以死；不知就先，不知就後；若化為物，以待其所不知之化已乎！且方將化，惡知不化哉？方將不化，惡知已化哉？吾特與汝，其夢未始覺者邪！且彼有駭形而無損心，有旦宅而無情死。」

孟孫氏特覺，人哭亦哭，是自其所以乃。且也相與吾之耳矣，庸詎知吾所謂吾之乎？且汝夢為鳥而厲乎天，夢為魚而沒於淵，不識今之言者，其覺者乎，其夢者乎？造適不及笑，獻笑不及排，安排而去化，乃入於寥天一。」

7. 意而子見許由。許由曰：「堯何以資汝？」意而子曰：「堯謂我：『汝必躬服仁義而明言是非。』」許由曰：「而奚為來軼？夫堯既已黥汝以仁義，而劓汝以是非矣，汝將何以遊夫遙蕩恣睢轉徙之途乎？」意而子曰：「雖然，吾願遊於其藩。」許由曰：「不然。夫盲者無以與乎眉目顏色之好，瞽者無以與乎青黃黼黻之觀。」意而子曰：「夫無莊之失其美，據梁之失其力，黃帝之亡其知，皆在鑪錘之間耳。庸詎知夫造物者之不息我黥而補我劓，使我乘成以隨先生邪？」許由曰：「噫！未可知也。我為汝言其大略。吾師乎！吾師乎！鑿萬物而不為義，澤及萬世而不為仁，長於上古而不為老，覆載天地刻雕眾形而不為巧。此所遊已。」
8. 顏回曰：「回益矣。」仲尼曰：「何謂也？」曰：「回忘仁義矣！」曰：「可矣，猶未也。」它日，復見，曰：「回益矣。」曰：「何謂也？」曰：「回忘禮樂矣。」曰：「可矣，猶未也。」它日，復見，曰：「回益矣。」曰：「何謂也？」曰：「回坐忘矣。」仲尼蹴然曰：「何謂坐忘？」顏回曰：「墮肢體，黜聰明，離形去知，同於大通，此謂坐忘。」仲尼曰：「同則無好也，化則無常也。而果其賢乎！丘也請從而後也。」
9. 子輿與子桑友，而霖雨十日。子輿曰：「子桑殆病矣！」裹飯而往食之。至子桑之門，則若歌若哭，鼓琴曰：「父邪！母邪！天乎！人乎！」有不任其聲而趨舉其詩焉。子輿入，曰：「子之歌詩，何故若是？」曰：「吾思夫使我至此極者，而弗得也。父母豈欲吾貧哉？天無私覆，地無私載，天地豈私貧我哉？求其為之者而不得也。然而至此極者，命也夫！」



#### 41【莊子應帝王第七】

1. 齧缺問於王倪，四問而四不知。齧缺因躍而大喜，行以告蒲衣子。蒲衣子曰：「而乃今知之乎？有虞氏不及泰氏。有虞氏，其猶藏仁以要人，亦得人矣，而未始出於非人。泰氏，其臥徐徐，其覺于于；一以己為馬，一以己為牛；其知情信，其德甚真，而未始入於非人。」

2. 肩吾見狂接輿。狂接輿曰：「日中始何以語女？」肩吾曰：「告我君人者，以己出經式義度，人孰敢不聽而化諸！」狂接輿曰：「是欺德也；其於治天下也，猶涉海鑿河而使蚊負山也。夫聖人之治也，治外乎？正而後行，確乎能其事者而已矣。且鳥高飛以避矰弋之害，鼯鼠深穴乎神丘之下以避熏鑿之患，而曾二蟲之無知！」
3. 天根遊於殷陽，至蓼水之上，適遭無名人而問焉，曰：「請問為天下。」無名人曰：「去！汝鄙人也，何問之不豫也！予方將與造物者為人，厭，則又乘夫莽眇之鳥，以出六極之外，而遊無何有之鄉，以處壙垠之野。汝又何帛以治天下感予之心為？」又復問。無名人曰：「汝遊心於淡，合氣於漠，順物自然而無容私焉，而天下治矣。」
4. 陽子居見老聃，曰：「有人於此，嚮疾強梁，物徹疏明，學道不勸。如是者，可比明王乎？」老聃曰：「是於聖人也，胥易技係，勞形怵心者也。且也虎豹之文來田，蝮狙之便、執殳之狗來藉。如是者，可比明王乎？」陽子居蹴然曰：「敢問明王之治。」老聃曰：「明王之治，功蓋天下，而似不自己，化貸萬物而民弗恃；有莫舉名，使物自喜；立乎不測，而遊於無有者也。」
5. 鄭有神巫曰季咸，知人之死生存亡，禍福壽夭，期以歲月旬日，若神。鄭人見之，皆棄而走。列子見之而心醉，歸，以告壺子，曰：「始吾以夫子之道為至矣，則又有至焉者矣。」壺子曰：「吾與汝既其文，未既其實，而固得道與？眾雌而無雄，而又奚卵焉！而以道與世亢，必信，夫故使人得而相女。嘗試與來，以予示之。」明日，列子與之見壺子。出而謂列子曰：「嘻！子之先生死矣！弗活矣！不以旬數矣！吾見怪焉，見濕灰焉。」列子入，泣涕沾襟以告壺子。壺子曰：「鄉吾示之以地文，萌乎不震不正。是殆見吾杜德機也。嘗又與來。」明日，又與之見壺子。出而謂列子曰：「幸矣！子之先生遇我也！有瘳矣，全然有生矣！吾見其杜權矣。」列子入，以告壺子。壺子曰：「鄉吾示之以天壤，名實不入，而機發於踵。是殆見吾善者機也。嘗又與來。」明日，又與之見壺子。出而謂列子曰：「子之先生不齊，吾無得而相焉。試齊，且復相之。」列子入，以告壺子。壺子曰：「吾鄉示之以太沖莫勝。是殆見吾衡氣機也。鮑桓之審為淵，止水之審為淵，流水之審為淵。淵有九名，此處三焉。嘗又與來。」明日，又與之見壺子。立未定，自失而走。壺子曰：「追之！」列子追之不及。反，以報壺子曰：「已滅矣，已失矣，吾弗及也。」壺子曰：「鄉吾示之以未始出吾宗。吾與之虛而委蛇，不知其誰何，因以為弟靡，因以為波隨，故逃也。」然後列子自以為未始學而歸，三年不出。為

其妻爨，食豕如食人。於事無與親，彫琢復朴，塊然獨以其形立。紛而封戎，一以是終。

6. 無為名尸，無為謀府；無為事任，無為知主。體盡無窮，而遊無朕；盡其所受乎天，而無見得，亦虛而已。至人之用心若鏡，不將不迎，應而不藏，故能勝物而不傷。
7. 南海之帝為儻，北海之帝為忽，中央之帝為渾沌。儻與忽時相與遇於渾沌之地，渾沌待之甚善。儻與忽謀報渾沌之德，曰：「人皆有七竅以視聽食息，此獨無有，嘗試鑿之。」日鑿一竅，七日而渾沌死。



## 42【莊子天下第三十三】

1. 天下之治方術者多矣，皆以其有為不可加矣。古之所謂道術者，果惡乎在？曰：「無乎不在。」曰：「神何由降？明何由出？」「聖有所生，王有所成，皆原於一。」不離於宗，謂之天人；不離於精，謂之神人；不離於真，謂之至人。以天為宗，以德為本，以道為門，兆於變化，謂之聖人。以仁為恩，以義為理，以禮為行，以樂為和，薰然慈仁，謂之君子。以法為分，以名為表，以參為驗，以稽為決，其數一二三四是也，百官以此相齒，以事為常，以衣食為主，蕃息畜藏，老弱孤寡為意，皆有以養，民之理也。古之人其備乎！配神明，醇天地，育萬物，和天下，澤及百姓，明於本數，係於末度，六通四辟，小大精粗，其運無乎不在。其明而在數度者，舊法世傳之史尚多有之。其在於《詩》、《書》、《禮》、《樂》者，鄒魯之士搢紳先生多能明之。《詩》以道志，《書》以道事，《禮》以道行，《樂》以道和，《易》以道陰陽，《春秋》以道名分。其數散於天下而設於中國者，百家之學時或稱而道之。天下大亂，賢聖不明，道德不一，天下多得一察焉以自好。譬如耳目鼻口，皆有所明，不能相通。猶百家眾技也，皆有所長，時有所用。雖然，不該不遍，一曲之士也。判天地之美，析萬物之理，察古人之全，寡能備於天地之美，稱神明之容。是故內聖外王之道，闇而不明，鬱而不發，天下之人各為其所欲焉以自為方。悲夫，百家往而不反，必不合矣！後世之學者，不幸不見天地之純，古人之大體，道術將為天下裂。
2. 不侈於後世，不靡於萬物，不暉於數度，以繩墨自矯而備世之急，古之道術有在於是者。墨翟禽滑釐聞其風而說之，為之大過，已之大順。作為《非樂》，命之曰《節用》，生不歌，死無服。墨子汜愛兼利而非鬥，其道不怒；又好學而博，不異，不與先王同。毀古之禮樂；黃帝有《咸池》，堯有《大章》，舜有《大韶》，禹有《大夏》，湯有《大濩》，文

王有辟雍之樂，武王周公作《武》。古之喪禮，貴賤有儀，上下有等，天子棺槨七重，諸侯五重，大夫三重，士再重。今墨子獨生不歌，死不服，桐棺三寸而無槨，以為法式。以此教人，恐不愛人；以此自行，固不愛己。未敗墨子道，雖然，歌而非歌，哭而非哭，樂而非樂，是果類乎？其生也勤，其死也薄，其道大艱；使人憂，使人悲，其行難為也，恐其不可以為聖人之道，反天下之心，天下不堪。墨子雖獨能任，奈天下何！離於天下，其去王也遠矣。墨子稱道曰：「昔者禹之湮洪水，決江河而通四夷九州也，名山三百，支川三千，小者無數。禹親自操橐耜而九雜天下之川；腓無胈，脛無毛，沐甚雨，櫛疾風，置萬國。禹大聖也，而形勞天下也如此。」使後世之墨者，多以裘褐為衣，以跣躄為服，日夜不休，以自苦為極，曰：「不能如此，非禹之道也，不足為墨。」相里勤之弟子五侯之徒，南方之墨者苦獲、已齒、鄧陵子之屬，俱誦《墨經》，而倍譎不同，相謂別墨；以堅白同異之辯相訾，以觭偶不侔之辭相應；以巨子為聖人，皆願為之尸，冀得為其後世，至今不決。墨翟禽滑釐之意則是，其行則非也。將使後世之墨者，必自苦以腓無胈脛無毛，相進而已矣。亂之上也，治之下也。雖然，墨子真天下之好也，將求之不得也，雖枯槁不舍也，才士也夫！

3. 不累於俗，不飾於物，不苟於人，不伎於眾，願天下之安寧以活民命，人我之養畢足而止，以此白心，古之道術有在於是者。宋鉏尹文聞其風而說之。作為華山之冠以自表，接萬物以別宥為始；語心之容，命之曰心之行，以駟合驩，以調海內，請欲置之以為主。見侮不辱，救民之鬥，禁攻寢兵，救世之戰。以此周行天下，上說下教，雖天下不取，強聒而不舍者也，故曰上下見厭而強見也。雖然，其為人太多，其自為太少；曰：「請欲固置五升之飯足矣，先生恐不得飽，弟子雖飢，不忘天下。」日夜不休，曰：「我必得活哉！」圖傲乎救世之士哉！曰：「君子不為苛察，不以身假物。」以為無益於天下者，明之不如已也，以禁攻寢兵為外，以情欲寡淺為內，其小大精粗，其行適至是而止。
4. 公而不黨，易而無私，決然無主，趣物而不兩，不顧於慮，不謀於知，於物無擇，與之俱往，古之道術有在於是者。彭蒙田駢慎到聞其風而說之，齊萬物以為首，曰：「天能覆之而不能載之，地能載之而不能覆之，大道能包之而不能辯之。」知萬物皆有所可，有所不可，故曰：「選則不徧，教則不至，道則無遺者矣。」是故慎到棄知去己而緣不得已，泠汰於物以為道理，曰：「知不知，將薄知而後鄰傷之者也。」譏駮無任而笑天下之尚賢也，縱脫無行而非天下之大聖，椎拍輓斷，與物宛轉，舍是與非，苟

可以免，不師知慮，不知前後，魏然而已矣。推而後行，曳而後往，若飄風之還，若羽之旋，若磨石之隧，全而無非，動靜無過，未嘗有罪。是何故？夫無知之物，無建己之患，無用知之累，動靜不離於理，是以終身無譽。故曰：「至於若無知之物而已，無用賢聖，夫塊不失道。」豪傑相與笑之曰：「慎到之道，非生人之行而至死人之理，適得怪焉。」田駢亦然，學於彭蒙，得不教焉，彭蒙之師曰：「古之道人，至於莫之是莫之非而已矣。其風窳然，惡可而言？」常反人，不見觀，而不免於鯁斷。其所謂道非道，而所言之躔不免於非。彭蒙田駢慎到不知道。雖然，概乎皆嘗有聞者也。

5. 以本為精，以物為粗，以有積為不足，淡然獨與神明居，古之道術有在於是者。關尹老聃聞其風而說之，建之以常無有，主之以太一，以濡弱謙下為表，以空虛不毀萬物為實。關尹曰：「在己無居，形物自著。其動若水，其靜若鏡，其應若響。芴乎若亡，寂乎若清，同焉者和，得焉者失。未嘗先人而常隨人。」老聃曰：「知其雄，守其雌，為天下谿；知其白，守其辱，為天下谷。」人皆取先，己獨取後，曰受天下之垢；人皆取實，己獨取虛，無藏也故有餘，歸然而有餘。其行身也，徐而不費，無為也而笑巧；人皆求福，己獨曲全，曰苟免於咎。以深為根，以約為紀，曰堅則毀矣，銳則拙矣。常寬容於物，不削於人，可謂至極。關尹老聃乎！古之博大真人哉！
6. 芴漠無形，變化無常，死與生與，天地竝與，神明往與！芒乎何之，忽乎何適，萬物畢羅，莫足以歸，古之道術有在於是者。莊周聞其風而說之，以謬悠之說，荒唐之言，無端崖之辭，時恣縱而不儻，不以觴見之也。以天下為沈濁，不可與莊語，以卮言為曼衍，以重言為真，以寓言為廣。獨與天地精神往來而不敖倪於萬物，不譴是非，以與世俗處。其書雖瓌瑋而連犴無傷也，其辭雖參差而詼詭可觀。彼其充實不可以已，上與造物者遊，而下與外死生無終始者為友。其於本也，宏大而辟，深閎而肆，其於宗也，可謂稠適而上遂矣。雖然，其應於化而解於物也，其理不竭其來不蛻，芒乎昧乎，未之盡者。
7. 惠施多方，其書五車，其道舛駁，其言也不中。麻物之意，曰：「至大無外，謂之大一；至小無內，謂之小一。無厚，不可積也，其大千里。天與地卑，山與澤平。日方中方睨，物方生方死。大同而與小同異，此之謂小同異；萬物畢同畢異，此之謂大同異。南方無窮而有窮，今日適越而昔來。連環可解也。我知天下之中央，燕之北越之南是也。汜愛萬物，天地一體也。」惠施以此為大，觀於天下而曉辯者，天下之辯者相與樂之。

「卵有毛。雞三足。郢有天下。犬可以為羊。馬有卵。丁子有尾。火不熱。山出口。輪不輾地。目不見。指不至，至不絕。龜長於蛇。矩不方，規不可以為圓。鑿不圍柄。飛鳥之景未嘗動也。鏃矢之疾而有不行不止之時。狗非犬。黃馬驪牛三。白狗黑。孤駒未嘗有母。一尺之捶，日取其半，萬世不竭。」辯者以此與惠施相應，終身無窮。桓團公孫龍辯者之徒，飾人之心，易人之意，能勝人之口，不能服人之心，辯者之囿也。惠施日以其知與人之辯，特與天下之辯者為怪，此其柢也。然惠施之口談，自以為最賢，曰天地其壯乎！施存雄而無術。南方有倚人焉曰黃繚，問天地所以不墜不陷，風雨雷霆之故。惠施不辭而應，不慮而對，徧為萬物說，說而不休，多而無已，猶以為寡，益之以怪。以反人為實而欲以勝人為名，是以與眾不適也。弱於德，強於物，其塗隩矣。由天地之道觀惠施之能，其猶一蚊一蟲之勞者也，其於物也何庸！夫充一尚可，曰愈貴道，幾矣！惠施不能以此自寧，散於萬物而不厭，卒以善辯為名，惜乎！惠施之才駘蕩而不得，逐萬物而不反，是窮響以聲，形與影競走也。悲夫！



#### 43【朱子易論】

易之為書，卦爻象象之義備，而天地萬物之情見。聖人之憂天下來世其至矣！先天下而開其物，後天下而成其務。是故極其數，以定天下之象；著其象，以定天下之吉凶。六十四卦、三百八十四爻，皆所以順性命之理，盡變化之道也。散之在理，則有萬殊；統之在道，則無二致。所以"易有太極，是生兩儀"。太極者，道也；兩儀者，陰陽也。陰陽，一道也；太極無極也。萬物之生，負陰而抱陽，莫不有太極，莫不有兩儀，絪縕交感，變化不窮。形一受其生，神一發其智，情偽出焉，萬緒起焉。

易所以定吉凶而生大業，故易者，陰陽之道也；卦者，陰陽之物也；爻者，陰陽之動也。卦雖不同，所同者奇耦；爻雖不同，所同者九六，是以六十四卦為其體，三百八十四爻互為其用，遠在六合之外，近在一身之中，暫於瞬息，微於動靜，莫不有卦之象焉，莫不有爻之義焉。

至哉易乎！其道至大而無不包，其用至神而無不存。時因未始有一，而卦未始有定象；事固未始有窮，而爻亦未始有定位。以一時而索卦，則拘於無變，非易也；以一事而明爻，則窒而不通，非易也；知所謂卦爻象象之義，而不知有卦爻象象之用，亦非易也。故得之於精神之運，心術之動；與天地合其德，與日月合其明，與四時合其序，與鬼神合其吉凶，然後可以謂之知易也。

雖然，易之有卦，易之已形者也；卦之有爻，卦之已見者也。已形已見者，可以言之；未形未見者，不可以名求；則所謂易者果何如哉？此學者所當知也。



#### 44【周易本義卦歌三種】

##### (一) 八卦取象歌

乾三連 坤六斷 震仰盂 艮覆碗  
離中虛 坎中滿 兌上缺 巽下斷

##### (二) 分宮卦象次序歌

乾為天 天風姤 天山遯 天地否  
風地觀 山地剝 火地晉 火天大有  
坎為水 水澤節 水雷屯 水火既濟  
澤火革 雷火豐 地火明夷 地水師  
艮為山 山火賁 山天大畜 山澤損  
火澤睽 天澤履 風澤中孚 風山漸  
震為雷 雷地豫 雷水解 雷風恆  
地風升 水風井 澤風大過 澤雷隨  
巽為風 風天小畜 風火家人 風雷益  
天雷無妄 火雷噬嗑 山雷頤 山風蠱  
離為火 火山旅 火風鼎 火水未濟  
山水蒙 風水渙 天水訟 天火同人  
坤為地 地雷復 地澤臨 地天泰  
雷天大壯 澤天夬 水天需 水地比  
兌為澤 澤水困 澤地萃 澤山咸  
水山蹇 地山謙 雷山小過 雷澤歸妹

##### (三) 上下經卦名次序歌

乾坤屯蒙需訟師 比小畜兮履泰否 同人大有謙豫隨  
蠱臨觀兮噬嗑賁 剝復無妄大畜頤 大過坎離三十備  
咸恆遯兮及大壯 晉與明夷家人睽 蹇解損益夬姤萃  
升困井革鼎震繼 艮漸歸妹豐旅巽 兌渙節兮中孚至  
小過既濟兼未濟 是為下經三十四





## 45【易經繫辭傳】

### 《繫辭上傳》

#### 第一章

天尊地卑，乾坤定矣；卑高以陳，貴賤位矣。動靜有常，剛柔斷矣；方以類聚，物以群分，吉凶生矣。在天成象，在地成形，變化見矣。是故剛柔相摩，八卦相盪，鼓之以雷霆，潤之以風雨，日月運行，一寒一暑。乾道成男，坤道成女；乾知大始，坤作成物。乾以易知，坤以簡能；易則易知，簡則易從；易知則有親，易從則有功；有親則可久，有功則可大；可久則賢人之德，可大則賢人之業。易簡而天下之理得矣。天下之理得，而成位乎其中矣。

#### 第二章

聖人設卦觀象，繫辭焉而明吉凶，剛柔相推而生變化。是故吉凶者，失得之象也；悔吝者，憂虞之象也；變化者，進退之象也；剛柔者，晝夜之象也；六爻之動，三極之道也。是故君子所居而安者，易之序也；所樂而玩者，爻之辭也，是故君子居則觀其象而玩其辭，動則觀其變而玩其占，是以自天祐之，吉无不利。

#### 第三章

象者，言乎象者也；爻者，言乎變者也；吉凶者，言乎其失得也；悔吝者，言乎其小疵也；无咎者，善補過也。是故列貴賤者存乎位，齊小大者存乎卦，辯吉凶者存乎辭，憂悔吝者存乎介，震无咎者存乎悔。是故卦有小大，辭有險易。辭也者，各指其所之。

#### 第四章

易與天地準，故能彌綸天地之道。仰以觀於天文，俯以察於地理，是故知幽明之故，原始反終，故知死生之說；精氣為物，遊魂為變，是故知鬼神之情狀；與天地相似，故不違；知周乎萬物而道濟天下，故不過；旁行而不流，樂天知命，故不憂；安土敦乎仁，故能愛。範圍天地之化而不過，曲成萬物而不遺，通乎晝夜之道而知，故神无方而易无體。

#### 第五章

一陰一陽之謂道。繼之者，善也；成之者，性也。仁者見之謂之仁，知者見之謂之知，百姓日用而不知，故君子之道鮮矣。顯諸仁，藏諸用，鼓萬物而不與聖人同憂，盛德大業至矣哉。富有之謂大業，日新之謂盛德，生生之謂易，成象之謂乾，效法之謂坤，極數知來之謂占，通變之謂事，陰陽不測之謂神。

## 第六章

夫易，廣矣，大矣！以言乎遠則不禦，以言乎邇則靜而正，以言乎天地之間則備矣。夫乾，其靜也專，其動也直，是以大生焉，夫坤，其靜也翕，其動也闢，是以廣生焉。廣大配天地，變通配四時，陰陽之義配日月，易簡之善配至德。

## 第七章

子曰：「易其至矣乎！夫易，聖人所以崇德而廣業也。知崇禮卑，崇效天，卑法地。天地設位，而易行乎其中矣。成性存存，道義之門。」

## 第八章

聖人有以見天下之赜，而擬諸其形容，象其物宜，是故謂之象。聖人有以見天下之動，而觀其會通，以行其典禮，繫辭焉以斷其吉凶，是故謂之爻。言天下之至赜而不可惡也，言天下之至動而不可亂也。擬之而後言，議之而後動，擬議以成其變化。

「鳴鶴在陰，其子和之；我有好爵，吾與爾靡之。」子曰：「君子居其室，出其言善，則千里之外應之，況其邇者乎？居其室，出其言不善，則千里之外違之，況其邇者乎？言出乎身，加乎民，行發乎邇，見乎遠。言行，君子之樞機，樞機之發，榮辱之主也。言行，君子之所以動天地也，可不慎乎？」

「同人，先號咷而後笑。」子曰：「君子之道，或出或處，或默或語，二人同心，其利斷金；同心之言，其臭如蘭。」

「初六，藉用白茅，无咎。」子曰：「苟錯諸地而可矣，藉之用茅，何咎之有？慎之至也。夫茅之為物薄，而用可重也。慎斯術也以往，其无所失矣。」

「勞謙，君子有終，吉。」子曰：「勞而不伐，有功而不德，厚之至也。語以其功下人者也。德言盛，禮言恭。謙也者，致恭以存其位者也。」

「亢龍有悔。」子曰，貴而无位，高而无民，賢人在下位而无輔，是以動而有悔也。」

「不出戶庭，无咎。」子曰：「亂之所生也，則言語以為階。君不密則失臣，臣不密則失身，幾事不密則害成，是以君子慎密而不出也。」

子曰：「作易者其知盜乎？易曰：『負且乘，致寇至』。負也者，小人之事也；乘也者，君子之器也。小人而乘君子之器，盜思奪之矣；上慢下暴，盜思伐之矣；慢藏誨盜，冶容誨淫，易曰：『負且乘，致寇至』，盜之招也。」

## 第九章

天一，地二，天三，地四，天五，地六，天七，地八，天九，地十。天數五，地數五，五位相得而各有合。天數二十有五，地數三十；凡天地之數五十有五，此所以成變化而行鬼神也。大衍之數五十，其用四十有九，分而為二以象兩，掛一以象三，揲之以四以象四時，歸奇於扚以象閏，五歲再閏，故再扚而後掛。乾之策，二百一十有六，坤之策，百四十有四，凡三百有六十，當期之日。二篇之策，萬有一千五百二十，當萬物之數也，是故四營而成易，十有八變而成卦，八卦而小成。引而伸之，觸類而長之，天下之能事畢矣。

顯道神德行，是故可與酬酢，可與祐神矣，子曰：「知變化之道者，其知神之所為乎？」

## 第十章

易有聖人之道四焉，以言者尚其辭，以動者尚其變，以制器者尚其象，以卜筮者尚其占。是以君子將有為也，將有行也，問焉而以言，其受命也如響，无有遠近幽深，遂知來物，非天下之至精，其孰能與於此？參伍以變，錯綜其數；通其變，遂成天地之文，極其數，遂定天下之象。非天下之至變，其孰能與於此？易无思也，无為也，寂然不動，感而遂通天下之故。非天下之至神，其孰能與於此？夫易，聖人之所以極深而研幾也。唯深也，故能通天下之志；唯幾也，故能成天下之務；唯神也，故不疾而速，不行而至。子曰：「易有聖人之道四焉」者，此之謂也。

## 第十一章

子曰：「夫易，何為者也？夫易，開物成務，冒天下之道，如斯而已者也。」是故聖人以通天下之志，以定天下之業，以斷天下之疑。是故著之德圓而神，卦之德方以知，六爻之義易以貢。聖人以此洗心，退藏於密，吉凶與民同患，神以知來，知以藏往，其孰能與於此哉？古之聰明睿知，神武而不殺者夫！

是以明於天之道，而察於民之故，是興神物以前民用；聖人以此齊戒，以神明其德夫！是故闔戶謂之坤，闢戶謂之乾，一闔一闢謂之變，往來不窮謂之通，見乃謂之象，形乃謂之器，制而用之謂之法，利用出入，民咸用之，謂之神。

是故易有太極，是生兩儀，兩儀生四象，四象生八卦，八卦定吉凶，吉凶生大業。是故法象莫大乎天地；變通莫大乎四時；縣象著明莫大乎日月；崇高莫大乎富貴；備物致用，立成器以為天下利，莫大乎聖人；探賾索隱，鈎深致遠，以定天下之吉凶，成天下之亹亹者，莫大乎蓍龜。是故天生神物，聖

人則之。天地變化，聖人效之。天垂象，見吉凶，聖人象之。河出圖，洛出書，聖人則之。易有四象，所以示也；繫辭焉，所以告也；定之以吉凶，所以斷也。

## 第十二章

易曰：「自天祐之，吉无不利。」子曰：「祐者，助也。天之所助者，順也；人之所助者，信也。履信思乎順，又以尚賢也。是以「自天祐之，吉无不利」也。

子曰：「書不盡言，言不盡意。」然則聖人之意，其不可見乎？子曰：「聖人立象以盡意，設卦以盡情偽，繫辭焉以盡其言，變而通之以盡利，鼓之舞之以盡神。」

乾坤其易之緼邪？乾坤成列，而易立乎其中矣。乾坤毀則无以見易，易不可見，則乾坤或幾乎息矣。是故形而上者謂之道，形而下者謂之器，化而裁之謂之變，推而行之謂之通，舉而錯之天下之民謂之事業。

是故夫象，聖人有以見天下之賾，而擬諸其形容，象其物宜，是故謂之象。聖人有以見天下之動，而觀其會通，以行其典禮，繫辭焉，以斷其吉凶，是故謂之爻。極天下之賾者存乎卦；鼓天下之動者存乎辭，化而裁之存乎變；推而行之存乎通；神而明之，存乎其人；默而成之，不言而信，存乎德行。

### 《繫辭下傳》

#### 第一章

八卦成列，象在其中矣；因而重之，爻在其中矣；剛柔相推，變在其中矣；繫辭焉而命之，動在其中矣。吉凶悔吝者，生乎動者也；剛柔者，立本者也；變通者，趣時者也。吉凶者，貞勝者也；天地之道，貞觀者也；日月之道，貞明者也；天下之動，貞夫一者也。

夫乾，確然示人易矣；夫坤，隤然示人簡矣。爻也者，效此者也，象也者，像此者也。爻象動乎內，吉凶見乎外。功業見乎變，聖人之情見乎辭。天地之大德曰生，聖人之大寶曰位。何以守位曰仁，何以聚人曰財。理財正辭，禁民為非曰義。

#### 第二章

古者包犧氏之王天下也，仰則觀象於天，俯則觀法於地，觀鳥獸之文，與地之宜，近取諸身，遠取諸物；於是始作八卦，以通神明之德，以類萬物之情。作結繩而為罔罟，以佃以漁，蓋取諸離。

包犧氏沒，神農氏作，斲木為耜，揉木為耒，耒耨之利，以教天下，蓋取諸益。日中為市，致天下之民，聚天下之貨，交易而退，各得其所，蓋取諸噬嗑。

神農氏沒，黃帝、堯、舜氏作，通其變，使民不倦，神而化之，使民宜之。易窮則變，變則通，通則久；是以自天祐之，吉无不利。黃帝、堯、舜垂衣裳而天下治，蓋取諸乾坤。剡木為舟，剡木為楫，舟楫之利，以濟不通，致遠以利天下，蓋取諸渙。服牛乘馬，引重致遠，以利天下，蓋取諸隨。重門擊柝，以待暴客，蓋取諸豫。斷木為杵，掘地為臼，臼杵之利，萬民以濟，蓋取諸小過。弦木為弧，剡木為矢，弧矢之利，以威天下，蓋取諸睽。

上古穴居而野處，後世聖人易之以宮室。上棟下宇，以待風雨，蓋取諸大壯。古之葬者，厚衣之以薪，葬之中野，不封不樹，喪期无數，後世聖人易之以棺槨，蓋取諸大過。上古結繩而治，後世聖人易之以書契，百官以治，萬民以察，蓋取諸夬。

### 第三章

是故易者，象也，象也者，像也。彖者，材也。爻也者，效天下之動者也。是故吉凶生而悔吝著也。

### 第四章

陽卦多陰，陰卦多陽，其故何也？陽卦奇，陰卦耦。其德行何也？陽一君而二民，君子之道也；陰二君而一民，小人之道也。

### 第五章

易曰：「憧憧往來，朋從爾思」。子曰：「天下何思何慮？天下同歸而殊塗，一致而百慮。天下何思何慮！日往則月來，月往則日來，日月相推而明生焉；寒往則暑來，暑往則寒來，寒暑相推而歲成焉。往者屈也，來者信也，屈信相感而利生焉。尺蠖之屈，以求信也；龍蛇之蟄，以存身也。精義入神，以致用也；利用安身，以崇德也。過此以往，未之或知也。窮神知化，德之盛也。」

易曰：「困于石，據于蒺藜，入于其宮，不見其妻，凶。」子曰：「非所困而困焉，名必辱；非所據而據焉，身必危。既辱且危，死期將至，妻其可得見耶？」

易曰：「公用射隼于高墉之上，獲之，无不利。」子曰：「隼者禽也；弓矢者，器也；射之者，人也。君子藏器于身，待時而動，何不利之有？動而不括，是以出而有獲，語成器而動者也。」

子曰：「小人不恥不仁，不畏不義，不見利不勸，不威不懲。小懲而大誡，此小人之福也。易曰「履校滅趾，无咎」，此之謂也。」

善不積，不足以成名，惡不積，不足以滅身。小人以小善為无益而弗為也，以小惡為无傷而弗去也，故惡積而不可掩，罪大而不可解。易曰：「何校滅耳，凶」。

子曰：「危者，安其位者也；亡者，保其存者也；亂者，有其治者也。是故君子安而不忘危，存而不忘亡，治而不忘亂，是以身安而國家可保也。易曰：「其亡其亡，繫于苞桑。」

子曰：「德薄而位尊，知小而謀大，力小而任重，鮮不及矣。易曰：「鼎折足，覆公餗，其形渥，凶。」言不勝其任也。」

子曰：「知幾其神乎！君子上交不諂，下交不瀆，其知幾乎！幾者，動之微，吉之先見者也。君子見幾而作，不俟終日。易曰：「介于石，不終日，貞吉。」介如石焉，寧用終日？斷可識矣。君子知微，知彰，知柔知剛，萬夫之望。」

子曰：「顏氏之子，其殆庶幾乎！有不善未嘗不知；知之，未嘗復行也。易曰：「不遠復，无祇悔，元吉。」

「天地絪縕，萬物化醇；男女構精，萬物化生。易曰：「三人行，則損一人；一人行，則得其友。」言致一也。」

子曰：「君子安其身而後動，易其心而後語，定其交而後求，君子修此三者，故全也。危以動，則民不與也；懼以語，則民不應也；无交而求，則民不與也。莫之與，則傷之者至矣。易曰：「莫益之，或擊之，立心勿恆，凶。」

## 第六章

子曰：「乾坤，其易之門邪！」乾，陽物也；坤，陰物也。陰陽合德，而剛柔有體，以體天地之撰，以通神明之德，其稱名也，雜而不越，於稽其類，其衰世之意邪！

夫易，彰往而察來，而微顯闡幽。開而當名辨物，正言斷辭，則備矣。其稱名也小，其取類也大，其旨遠，其辭文。其言曲而中，其事肆而隱。因貳以濟民行，以明失得之報。

## 第七章

易之興也，其於中古乎！作易者，其有憂患乎！

是故；履，德之基也；謙，德之柄也；復，德之本也；恆，德之固也；損，德之修也；益，德之裕也；困，德之辨也；井，德之地也；巽，德之制也。履，和而至；謙，尊而光；復，小而辨於物；恆，雜而不厭；損，先難而後易；益，長裕而不設；困，窮而通；井，居其所而遷；巽，稱而隱。

履以和行，謙以制禮，復以自知，恆以一德，損以遠害，益以興利，困以寡怨，井以辨義，巽以行權。

## 第八章

易之為書也，不可遠；為道也屢遷，變動不居，周流六虛，上下无常，剛柔相易，不可為典要，唯變所適。其出入以度，外內使知懼。又明於憂患與故，无有師保，如臨父母。初率其辭而揆其方，既有典常。苟非其人，道不虛行。

## 第九章

易之為書也，原始要終，以為質也。六爻相雜，唯其時物也。其初難知，其上易知，本末也。初辭擬之，卒成之終。若夫雜物撰德，辨是與非，則非其中爻不備。噫！亦要，存亡吉凶，則居可知矣。知者觀其象辭，則思過半矣。

二與四同功而異位，其善不同，二多譽，四多懼，近也。柔之為道，不利遠者，其要无咎，其用柔中也。

三與五同功而異位。三多凶，五多功，貴賤之等也。其柔危，其剛勝邪？

## 第十章

易之為書也，廣大悉備，有天道焉，有人道焉，有地道焉，兼三材而兩之，故六。六者非它也，三材之道也。

道有變動，故曰爻；爻有等，故曰物；物相雜，故曰文；文不當，故吉凶生焉。

## 第十一章

易之興也，其當殷之末世，周之盛德邪！當文王與紂之事邪！是故其辭危，危者使平，易者使傾，其道甚大，百物不廢。懼以終始，其要无咎。此之謂易之道也。

## 第十二章

夫乾，天下之至健也，德行恆易以知險；夫坤，天下之至順也，德行恆簡以知阻。能說諸心，能研諸（侯之）慮，定天下之吉凶，成天下之亹亹者。是故變化云為，吉事有祥，象事知器，占事知來。

天地設位，聖人成能，人謀鬼謀，百姓與能。八卦以象告，爻象以情言，剛柔雜居，而吉凶可見矣。變動以利言，吉凶以情遷，是故愛惡相攻而吉凶生，遠近相取而悔吝生，情偽相感而利害生。凡易之情，近而不相得，則凶，或害之，悔且吝。

將叛者其辭慙，中心疑者其辭枝，吉人之辭寡，躁人之辭多，誣善之人其辭游，失其守者其辭屈。

## 46【易經說卦傳】

### 《說卦傳》

#### 第一章

昔者聖人之作易也，幽贊於神明而生蓍。參天兩地而倚數，觀變於陰陽而立卦，發揮於剛柔而生爻，和順於道德而理於義，窮理盡性以至於命。

#### 第二章

昔者聖人之作易也，將以順性命之理。是以立天之道，曰陰與陽；立地之道，曰柔與剛；立人之道，曰仁與義；兼三才而兩之，故易六畫而成卦。分陰分陽，迭用柔剛，故易六位而成章。

#### 第三章

天地定位，山澤通氣，雷風相薄，水火不相射，八卦相錯。數往者順，知來者逆，是故易，逆數也。

#### 第四章

雷以動之，風以散之，雨以潤之，日以烜之，艮以止之，兌以說之，乾以君之，坤以藏之。

#### 第五章

帝出乎震，齊乎巽，相見乎離，致役乎坤，說言乎兌，戰乎乾，勞乎坎，成言乎艮。萬物出乎震，震，東方也。齊乎巽，巽，東南也；齊也者，言萬物之絜齊也。離也者，明也。萬物皆相見，南方之卦也；聖人南面而聽天下，嚮明而治，蓋取諸此也。坤也者，地也。萬物皆致養焉，故曰致役乎坤。兌，正秋也，萬物之所說也，故曰說言乎兌。戰乎乾，乾，西北之卦也，言陰陽相薄也。坎者，水也，正北方之卦也，勞卦也，萬物之所歸也，故曰勞乎坎。艮，東北之卦也，萬物之所成終而所成始也，故曰成言乎艮。

#### 第六章

神也者，妙萬物而為言者也。動萬物者莫疾乎雷，撓萬物者莫疾乎風，燥萬物者莫熯乎火，說萬物者莫說乎澤，潤萬物者莫潤乎水，終萬物始萬物者莫盛乎艮。故水火相逮，雷風不相悖，山澤通氣，然後能變化，既成萬物也。

#### 第七章

乾，健也；坤，順也；震，動也；巽，入也；坎，陷也；離，麗也；艮，止也；兌，說也。

#### 第八章

乾為馬，坤為牛，震為龍，巽為雞，坎為豕，離為雉，艮為狗，兌為羊。

#### 第九章

乾為首，坤為腹，震為足，巽為股，坎為耳，離為目，艮為手，兌為口。



## 第十章

乾，天也，故稱乎父；坤，地也，故稱乎母。震一索而得男，故謂之長男；巽一索而得女，故謂之長女；坎再索而得男，故謂之中男；離再索而得女，故謂之中女；艮三索而得男，故謂之少男；兌三索而得女，故謂之少女。

## 第十一章

乾為天，為圓，為君，為父，為玉，為金，為寒，為冰，為大赤，為良馬，為老馬，為瘠馬，為駁馬，為木果。

坤為地，為母，為布，為釜，為吝嗇，為均，為子母牛，為大輿，為文，為眾，為柄，其於地也為黑。

震為雷，為龍，為玄黃，為專，為大塗，為長子，為決躁，為蒼筤竹，為萑葦；其於馬也為善鳴，為馵足，為作足，為的顙；其於稼也為反生，其究為健，為蕃鮮。

巽為木，為風，為長女，為繩直，為工，為白，為長，為高，為進退，為不果，為臭；其於人也，為寡髮，為廣顙，為多白眼，為近利市三倍；其究為躁卦。

坎為水，為溝瀆，為隱伏，為矯輮，為弓輪；其於人也，為加憂，為心病，為耳痛；為血卦，為赤；其於馬也，為美脊，為亟心，為下首，為薄蹄，為曳；其於輿也為多眚；為通，為月，為盜。其於木也為堅多心。

離為火，為日，為電，為中女，為甲冑，為戈兵；其於人也為大腹，為乾卦，為鱉，為蟹，為蠃，為蚌，為龜；其於木也為科上槁。

艮為山，為徑路，為小石，為門闕，為果蓏，為閹寺，為指，為狗，為鼠，為黔喙之屬。其於木也，為堅多節。

兌為澤，為少女，為巫，為口舌，為毀折，為附決；其於地也，為剛鹵；為妾，為羊。



## 47【易經序卦傳】

### 《序卦傳》

#### 上篇

有天地，然後萬物生焉，盈天地之間者唯萬物，故受之以屯。屯者，盈也；屯者，物之始生也。物生必蒙，故受之以蒙。蒙者，蒙也，物之穉也。物穉不可不養也，故受之以需。需者飲食之道也；飲食必有訟，故受之以訟。訟必有眾起，故受之以師。師者，眾也；眾必有所比，故受之以比。比者，比也。比必有所畜，故受之以小畜。物畜然後有禮，故受之以履。履而泰，然後安，故受之以泰。

泰者，通也；物不可以終通，故受之以否。物不可以終否，故受之以同人。與人同者，物必歸焉，故受之以大有。有大者不可以盈，故受之以謙。有大而能謙，必豫，故受之以豫。豫必有隨，故受之以隨。以喜隨人者必有事，故受之以蠱。蠱者，事也；有事而後可大，故受之以臨。臨者，大也；物大然後可觀，故受之以觀。可觀而後有所合，故受之以噬嗑。嗑者，合也；物不可以苟合而已，故受之以賁。賁者，飾也；至飾然後亨，則盡矣，故受之以剝。剝者，剝也。物不可以終盡，剝窮上反下，故受之以復。復則不妄矣，故受之以无妄。有无妄，然後可畜，故受之以大畜。物畜然後可養，故受之以頤。頤者，養也。不養則不可動，故受之以大過。物不可以終過，故受之以坎。坎者，陷也。陷必有所麗，故受之以離。離者，麗也。

## 下篇

有天地，然後有萬物，有萬物，然後有男女，有男女，然後有夫婦，有夫婦，然後有父子，有父子，然後有君臣，有君臣，然後有上下，有上下，然後禮義有所錯。夫婦之道，不可以不久也，故受之以恆，恆者，久也；物不可以久居其所，故受之以遯。遯者，退也。物不可以終遯，故受之以大壯。物不可以終壯，故受之以晉。晉者，進也，進必有所傷，故受之以明夷。夷者，傷也；傷於外者必反其家，故受之以家人。家道窮必乖，故受之以睽。睽者，乖也；乖必有難，故受之以蹇。蹇者，難也；物不可以終難，故受之以解。解者，緩也。緩必有所失，故受之以損。損而不已必益，故受之以益。益而不已必決，故受之以夬。夬者，決也；決必有所遇，故受之以姤。姤者，遇也。物相遇而後聚，故受之以萃。萃者，聚也；聚而上者謂之升，故受之以升。升而不已必困，故受之以困。困乎上者必反下，故受之以井。井道不可不革，故受之以革。革物者莫若鼎，故受之以鼎。主器者莫若長子，故受之以震。震者，動也；物不可以終動，止之，故受之以艮。艮者，止也；物不可以終止，故受之以漸。漸者，進也。進必有所歸，故受之以歸妹。得其所歸者必大，故受之以豐。豐者，大也；窮大者必失其居，故受之以旅。旅而无所容，故受之以巽。巽者，入也；入而後說之，故受之以兌。兌者，說也；說而後散之，故受之以渙。渙者，離也；物不可以終離，故受之以節。節而信之，故受之以中孚。有其信者必行之，故受之以小過。有過物者必濟，故受之以既濟，物不可窮也，故受之以未濟終焉。

## 48【易經雜卦傳】

### 《雜卦傳》

乾剛坤柔，比樂師憂；臨觀之義，或與或求；屯見而不失其居，蒙雜而著；震，起也，艮，止也；損，益，盛衰之始也；大畜，時也，无妄，災也；萃聚，而升不來也；謙輕，而豫怠也；噬嗑食也，賁无色也；兌見而巽伏也；隨无故也，蠱則飭也；剝，爛也，復，反也；晉，晝也，明夷，誅也；井通而困相遇也；咸，速也，恆，久也；渙，離也，節，止也；解，緩也，蹇，難也；睽，外也，家人，內也；否，泰，反其類也；大壯則止，遯則退也；大有，眾也，同人，親也；革，去故也，鼎，取新也；小過，過也，中孚，信也；豐，多故也，親寡，旅也；離上，而坎下也；小畜，寡也，履，不處也；需，不進也，訟，不親也；大過，顛也；姤，遇也，柔遇剛也；漸，女歸待男行也；頤，養正也；既濟，定也；歸妹，女之終也；未濟，男之窮也；夬，決也，剛決柔也，君子道長，小人道憂也。



## 49【易經 1-10 卦】

### 周易 上經

#### 乾卦第一

乾。元亨，利貞。

初九，潛龍勿用。

九二，見龍在田，利見大人。

九三，君子終日乾乾，夕惕若；厲，无咎。

九四，或躍在淵，无咎。

九五，飛龍在天，利見大人。

上九，亢龍有悔。

用九，見群龍无首，吉。

《象》曰：大哉乾元，萬物資始，乃統天。雲行雨施，品物流形。大明終始，六位時成，時乘六龍以御天。乾道變化，各正性命，保合大和，乃利貞。首出庶物，萬國咸寧。

《象》曰：天行健，君子以自強不息。潛龍勿用，陽在下也。見龍在田，德施普也。終日乾乾，反復道也。或躍在淵，進无咎也，飛龍在天，大人造也。亢龍有悔，盈不可久也。用九，天德不可為首也。

文言曰：元者，善之長也；亨者，嘉之會也；利者，義之和也；貞者，事之幹也。君子體仁，足以長人；嘉會，足以合禮；利物，足以和義；貞固，足以幹事；君子行此四德者。故曰：「乾，元亨利貞。」

初九曰：「潛龍勿用」，何謂也？子曰：「龍德而隱者也。不易乎世，不成乎名，遯世无悶，不見是而无悶，樂則行之，憂則違之，確乎其不可拔，潛龍也。」

九二曰「見龍在田，利見大人」，何謂也？子曰：「龍德而正中者也。庸言之信，庸行之謹，閑邪存其誠，善世而不伐，德博而化。易曰：『見龍在田，利見大人』，君德也。」

九三曰「君子終日乾乾，夕惕若，厲無咎」，何謂也？子曰：「君子進德修業。忠信，所以進德也；修辭立其誠，所以居業也。知至至之，可與幾也，知終終之，可與存義也。是故居上位而不驕，在下位而不憂。故乾乾因其時而惕，雖危，无咎矣。」

九四曰「或躍在淵，无咎」，何謂也？子曰：「上下无常，非為邪也。進退无恆，非離群也。君子進德修業，欲及時也；故无咎。」

九五曰「飛龍在天，利見大人」，何謂也？子曰：「同聲相應，同氣相求。水流濕、火就燥，雲從龍、風從虎。聖人作，而萬物睹！本乎天者親上，本乎地者親下，則各從其類也。」

上九曰「亢龍有悔」，何謂也？子曰：「貴而无位，高而无民，賢人在下位而无輔，是以動而有悔也。」

潛龍勿用，下也；見龍在田，時舍也；終日乾乾，行事也；或躍在淵，自試也；飛龍在天，上治也；亢龍有悔，窮之災也；乾元用九，天下治也。

潛龍勿用，陽氣潛藏；見龍在田，天下文明；終日乾乾，與時偕行；或躍在淵，乾道乃革；飛龍在天，乃位乎天德；亢龍有悔，與時偕極；乾元用九，乃見天則。

乾元者，始而亨者也；利貞者，性情也。乾始，能以美利利天下，不言所利，大矣哉！大哉乾乎！剛健中正，純粹精也；六爻發揮，旁通情也；時乘六龍，以御天也；雲行雨施，天下平也。君子以成德為行，日可見之行也。潛之為言也，隱而未見，行而未成，是以君子弗用也。君子學以聚之，問以辯之，寬以居之，仁以行之。

易曰：「見龍在田，利見大人」，君德也。九三重剛而不中，上不在天，下不在田，故乾乾因其時而惕，雖危无咎矣。九四重剛而不中，上不在天，下不在田，中不在人，故或之。或之者，疑之也，故无咎。夫大人者，與天地合其德，與日月合其明，與四時合其序，與鬼神合其吉凶。先天而天弗違，後天而奉天時。天且弗違，而況於人乎？況於鬼神乎？

亢之為言也，知進而不知退，知存而不知亡，知得而不知喪。其唯聖人乎！知進退存亡，而不失其正者，其唯聖人乎！

## 坤卦第二

坤。元亨，利牝馬之貞。君子有攸往。先迷，後得，主利。西南得朋，東北喪朋。安貞，吉。

《象》曰：至哉坤元，萬物資生，乃順承天。坤厚載物，德合無疆，含弘光大，品物咸亨。牝馬地類，行地無疆。柔順利貞，君子攸行，先迷失道，後順得常。西南得朋，乃與類行，東北喪朋，乃終有慶，安貞之吉，應地無疆。

《象》曰：地勢坤，君子以厚德載物。

初六，履霜，堅冰至。

《象》曰：履霜堅冰，陰始凝也。馴致其道，至堅冰也。

六二，直方大，不習無不利。

《象》曰：六二之動，直以方也。不習無不利，地道光也。

六三，含章可貞，或從王事，無成有終。

《象》曰：含章可貞，以時發也；或從王事，知光大也。

六四，括囊，無咎無譽。

《象》曰：括囊無咎，慎不害也。

六五，黃裳，元吉。

《象》曰：黃裳元吉，文在中也。

上六，龍戰于野，其血玄黃。

《象》曰：龍戰于野，其道窮也。

用六，利永貞。

《象》曰：用六永貞，以大終也。

《文言》曰：坤至柔而動也剛，至靜而德方，後得主而有常，含萬物而化光。坤道其順乎，承天而時行。積善之家，必有餘慶；積不善之家，必有餘殃。臣弑其君，子弑其父，非一朝一夕之故，其所由來者漸矣，由辯之不早辯也。易曰，履霜堅冰至，蓋言順也。直，其正也；方，其義也。君子敬以直內，義以方外，敬義立而德不孤。直方大，不習無不利，則不疑其所行也。陰雖有美，含之以從王事，弗敢成也。地道也，妻道也，臣道也。地道無成，而代有終也，天地變化，草木蕃，天地閉，賢人隱。易曰：括囊，無咎無譽，蓋言謹也。君子黃中通理，正位居體，美在其中，而暢於四支，發於事業，美之至也。陰疑於陽必戰，為其嫌於無陽也，故稱龍焉；猶未離其類也，故稱血焉。夫玄黃者，天地之雜也，天玄而地黃。

### 屯卦第三

屯，元亨，利貞，勿用有攸往，利建侯。

《象》曰：屯，剛柔始交而難生，動乎險中，大亨貞。雷雨之動滿盈。天造草昧，宜建侯而不寧。

《象》曰：雲雷，屯；君子以經綸。

初九，磐桓，利居貞，利建侯。

《象》曰：雖磐桓，志行正也；以貴下賤，大得民也。

六二，屯如遭如，乘馬班如，匪寇，婚媾，女子貞不字，十年乃字。

《象》曰：六二之難，乘剛也；十年乃字，反常也。

六三，即鹿无虞，惟入于林中；君子幾，不如舍。往吝。

《象》曰：即鹿无虞，以從禽也；君子舍之，往吝，窮也。

六四，乘馬班如，求婚媾；往，吉，无不利。

《象》曰：求而往，明也。

九五，屯其膏。小，貞吉；大，貞凶。

《象》曰：屯其膏，施未光也。

上六，乘馬班如，泣血漣如。

《象》曰：泣血漣如，何可長也？

### 蒙卦第四

蒙。亨。匪我求童蒙，童蒙求我。初筮告，再三瀆，瀆則不告。利貞。

《象》曰：蒙，山下有險，險而止，蒙。蒙，亨，以亨行時中也；匪我求童蒙，童蒙求我，志應也；初筮告，以剛中也；再三瀆，瀆則不告，瀆蒙也。蒙以養正，聖功也。

《象》曰：山下出泉，蒙；君子以果行育德。

初六，發蒙，利用刑人，用說桎梏；以往，吝。

《象》曰：利用刑人，以正法也。

九二，包蒙，吉。納婦，吉；子克家。

《象》曰：子克家，剛柔接也。

六三，勿用取女。見金夫，不有躬，无攸利。

《象》曰：勿用取女，行不順也。

六四，困蒙，吝。

《象》曰：困蒙之吝，獨遠實也。

六五，童蒙，吉。

《象》曰：童蒙之吉，順以巽也。

上九，擊蒙，不利為寇，利禦寇。

《象》曰：利用禦寇，上下順也。

### 需卦第五

需。有孚，光亨，貞吉，利涉大川。

《象》曰：需，須也；險在前也，剛健而不陷，其義不困窮矣。需，有孚，光亨，貞吉，位乎天位，以正中也。利涉大川，往有功也。

《象》曰：雲上於天，需；君子以飲食宴樂。

初九，需于郊，利用恆，无咎。

《象》曰：需于郊，不犯難行也；利用恆，无咎，未失常也。

九二，需于沙，小有言，終吉。

《象》曰：需于沙，衍在中也；雖小有言，以吉終也。

九三，需于泥，致寇至。

《象》曰：需于泥，災在外也；自我致寇，敬慎不敗也。

六四，需于血，出自穴。

《象》曰：需于血，順以聽也。

九五，需于酒食，貞吉。

《象》曰：酒食貞吉，以中正也。

上六，入于穴，有不速之客三人來，敬之終吉。

《象》曰：不速之客來，敬之終吉；雖不當位，未大失也。

### 訟卦第六

訟，有孚窒，惕，中吉；終凶。利見大人，不利涉大川。

《象》曰：訟，上剛下險，險而健，訟。訟，有孚窒，惕，中吉，剛來而得中也；終凶，訟不可成也；利見大人，尚中正也；不利涉大川，入于淵也。

《象》曰：天與水違行，訟；君子以作事謀始。

初六，不永所事，小有言，終吉。

《象》曰：不永所事，訟不可長也；雖小有言，其辯明也。

九二，不克訟，歸而逋，其邑人三百戶，无眚。

《象》曰：不克訟，歸逋竄也；自下訟上，患至掇也。

六三，食舊德，貞厲，終吉；或從王事，无成。

《象》曰：食舊德，從上吉也。

九四，不克訟，復即命；渝，安貞，吉。

《象》曰：復即命，渝，安貞不失也。

九五，訟，元吉。

《象》曰：訟，元吉，以中正也。

上九，或錫鞶帶，終朝三褫之。

《象》曰：以訟受服，亦不足敬也。

## 師卦第七

師。貞，丈人吉，无咎。

《象》曰：師，眾也；貞，正也；能以眾正，可以王矣。剛中而應，行險而順，以此毒天下，而民從之，吉又何咎矣！

《象》曰：地中有水，師；君子以容民畜眾。

初六，師出以律。否臧凶。

《象》曰：師出以律，失律凶也。

九二，在師，中，吉，无咎，王三錫命。

《象》曰：在師中吉，承天寵也；王三錫命，懷萬邦也。

六三，師或輿尸，凶。

《象》曰：師或輿尸，大无功也。

六四，師左次，无咎。

《象》曰：左次无咎，未失常也。

六五，田有禽，利執言，无咎。長子帥師，弟子輿尸，貞凶。

《象》曰：長子帥師，以中行也；弟子輿尸，使不當也。

上六，大君有命，開國承家，小人勿用。

《象》曰：大君有命，以正功也；小人勿用，必亂邦也。

## 比卦第八

比。吉。原筮，元永貞，无咎。不寧方來，後夫凶。

《象》曰：比，吉也；比，輔也，下順從也。原筮元永貞，无咎，以剛中也。不寧方來，上下應也。後夫凶，其道窮也。

《象》曰：地上有水，比；先王以建萬國，親諸侯。

初六，有孚比之，无咎。有孚盈缶，終來有它吉。

《象》曰：比之初六，有它吉也。

六二，比之自內，貞吉。

《象》曰：比之自內，不自失也。

六三，比之匪人。

《象》曰：比之匪人，不亦傷乎？

六四，外比之，貞吉。

《象》曰：外比於賢，以從上也。

九五，顯比。王用三驅，失前禽，邑人不誠，吉。

《象》曰：顯比之吉，位正中也；舍逆取順，失前禽也；邑人不誠，上使中也。



上六，比之无首，凶。

《象》曰：比之无首，无所終也。

### 小畜卦第九

小畜。亨。密雲不雨，自我西郊。

《象》曰：小畜。柔得位而上下應之，曰小畜。健而巽，剛中而志行，乃亨。密雲不雨，尚往也；自我西郊，施未行也。

《象》曰：風行天上，小畜；君子以懿文德。

初九，復自道，何其咎？吉。

《象》曰：復自道，其義吉也。

九二，牽復，吉。

《象》曰：牽復在中，亦不自失也。

九三，輿說輻，夫妻反目。

《象》曰：夫妻反目，不能正室也。

六四，有孚，血去惕出，无咎。

《象》曰：有孚惕出，上合志也。

九五，有孚攣如，富以其鄰。

《象》曰：有孚攣如，不獨富也。

上九，既雨既處，尚德載；婦貞厲，月幾望；君子征凶。

《象》曰：既雨既處，德積載也；君子征凶，有所疑也。

### 履卦第十

履虎尾，不啞人，亨。

《象》曰：履，柔履剛也；說而應乎乾，是以履虎尾，不啞人，亨。剛中正，履帝位而不疚，光明也。

《象》曰：上天下澤，履；君子以辯上下，定民志。

初九，素履，往无咎。

《象》曰：素履之往，獨行願也。

九二，履道坦坦，幽人貞吉。

《象》曰：幽人貞吉，中不自亂也。

六三，眇能視，跛能履，履虎尾，啞人，凶。武人為于大君。

《象》曰：眇能視，不足以有明也。跛能履，不足以與行也。啞人之凶，位不當也。武人為于大君，志剛也。

九四，履虎尾，愬愬，終吉。

《象》曰：愬愬終吉，志行也。

九五，夬履，貞厲。

《象》曰：夬履貞厲，位正當也。

上九，視履考祥，其旋元吉。

《象》曰：元吉在上，大有慶也。



## 50【易經 11-20 卦】

### 泰卦第十一

泰。小往大來，吉亨。

《象》曰：泰，小往大來，吉亨。則是天地交而萬物通也，上下交而其志同也。內陽而外陰，內健而外順，內君子而外小人，君子道長，小人道消也。

《象》曰：天地交，泰，后以財成天地之道，輔相天地之宜，以左右民。

初九，拔茅茹，以其彙，征吉。

《象》曰：拔茅征吉，志在外也。

九二，包荒，用馮河；不遐遺，朋亡，得尚于中行。

《象》曰：包荒，得尚于中行，以光大也。

九三，无平不陂，无往不復；艱貞，无咎；勿恤其孚，于食有福。

《象》曰：无往不復，天地際也。

六四，翩翩不富以其鄰，不戒以孚。

《象》曰：翩翩不富，皆失實也。不戒以孚，中心願也。

六五，帝乙歸妹，以祉元吉。

《象》曰：以祉元吉，中以行願也。

上六，城復于隍，勿用師，自邑告命，貞吝。

《象》曰：城復于隍，其命亂也。

### 否卦第十二

否之匪人，不利君子貞，大往小來。

《象》曰：否之匪人，不利君子貞，大往小來。則是天地不交而萬物不通也，上下不交而天下无邦也，內陰而外陽，內柔而外剛，內小人而外君子，小人道長，君子道消也。

《象》曰：天地不交，否；君子以儉德辟難，不可榮以祿。

初六，拔茅茹，以其彙，貞吉，亨。

《象》曰：拔茅貞吉，志在君也。

六二，包承，小人吉，大人否，亨。

《象》曰：大人否亨，不亂群也。

六三，包羞。

《象》曰：包羞，位不當也。

九四，有命，无咎，疇離祉。

《象》曰：有命无咎，志行也。

九五，休否，大人吉。其亡其亡，繫于苞桑。

《象》曰：大人之吉，位正當也。

上九，傾否，先否後喜。

《象》曰：否終則傾，何可長也。

### 同人卦第十三

同人。于野，亨。利涉大川，利君子貞。

《象》曰：同人，柔得位得中而應乎乾，曰同人。同人曰：同人于野，亨，利涉大川，乾行也。文明以健，中正而應，君子正也，唯君子為能通天下之志。

《象》曰：天與火，同人；君子以類族辨物。

初九，同人于門，无咎。

《象》曰：出門同人，又誰咎也。

六二，同人于宗，吝。

《象》曰：同人于宗，吝道也。

九三，伏戎于莽，升其高陵，三歲不興。

《象》曰：伏戎于莽，敵剛也；三歲不興，安行也。

九四，乘其墉，弗克攻，吉。

《象》曰：乘其墉，義弗克也；其吉，則困而反則也。

九五，同人，先號咷而後笑，大師克相遇。

《象》曰：同人之先，以中直也；大師相遇，言相克也。

上九，同人于郊，无悔。

《象》曰：同人于郊，志未得也。

### 大有卦第十四

大有。元亨。

《象》曰：大有，柔得尊位，大中，而上下應之，曰大有。其德剛健而文明，應乎天而時行，是以元亨。

《象》曰：火在天上，大有；君子以遏惡揚善，順天休命。

初九，无交害，匪咎，艱則无咎。

《象》曰：大有初九，无交害也。

九二，大車以載，有攸往，无咎。

《象》曰：大車以載，積中不敗也。

九三，公用亨于天子，小人弗克。

《象》曰：公用亨于天子，小人害也。

九四，匪其彭，无咎。

《象》曰：匪其彭，无咎，明辨哲也。

六五，厥孚交如，威如，吉。

《象》曰：厥孚交如，信以發志也；威如之吉，易而无備也。

上九，自天祐之，吉无不利。

《象》曰：大有上吉，自天祐也。

### 謙卦第十五

謙。亨，君子有終。

《象》曰：謙亨。天道下濟而光明，地道卑而上行。天道虧盈而益謙，地道變盈而流謙，鬼神害盈而福謙，人道惡盈而好謙；謙尊而光，卑而不可踰，君子之終也。

《象》曰：地中有山，謙，君子以裒多益寡，稱物平施。

初六，謙謙君子，用涉大川，吉。

《象》曰：謙謙君子，卑以自牧也。

六二，鳴謙，貞吉。

《象》曰：鳴謙貞吉，中心得也。

九三，勞謙，君子有終，吉。

《象》曰：勞謙君子，萬民服也。

六四，无不利，撝謙。

《象》曰：无不利，撝謙，不違則也。

六五，不富以其鄰，利用侵伐，无不利。

《象》曰：利用侵伐，征不服也。

上六，鳴謙，利用行師，征邑國。

《象》曰：鳴謙，志未得也；可用行師，征邑國也。

### 豫卦第十六

豫。利建侯行師。

《象》曰：豫，剛應而志行，順以動，豫。豫，順以動，故天地如之，而況建侯行師乎？天地以順動，故日月不過而四時不忒；聖人以順動，則刑罰清而民服。豫之時義大矣哉！

《象》曰：雷出地奮，豫；先王以作樂崇德，殷薦之上帝，以配祖考。

初六，鳴豫，凶。

《象》曰：初六鳴豫，志窮凶也。

六二，介于石，不終日，貞吉。

《象》曰：不終日貞吉，以中正也。

六三，盱豫，悔；遲，有悔。

《象》曰：盱豫有悔，位不當也。

九四，由豫，大有得；勿疑，朋盍簪。

《象》曰：由豫，大有得，志大行也。

六五，貞疾，恆不死。

《象》曰：六五貞疾，乘剛也；恆不死，中未亡也。

上六，冥豫，成有渝，无咎。

《象》曰：冥豫在上，何可長也。

### 隨卦第十七

隨。元亨，利貞。无咎。

《象》曰：隨，剛來而下柔，動而說，隨。大亨貞，无咎，而天下隨時。隨時之義大矣哉！

《象》曰：澤中有雷，隨；君子以嚮晦入宴息。

初九，官有渝，貞吉；出門交有功。

《象》曰：官有渝，從正吉也；出門交有功，不失也。

六二，係小子，失丈夫。

《象》曰：係小子，弗兼與也。

六三，係丈夫，失小子。隨有求得，利居貞。

《象》曰：係丈夫，志舍下也。

九四，隨有獲，貞凶。有孚在道，以明，何咎？

《象》曰：隨有獲，其義凶也。有孚在道，明功也。

九五，孚于嘉，吉。

《象》曰：孚于嘉，吉，位正中也。

上六，拘係之，乃從；維之，王用亨于西山。

《象》曰：拘係之，上窮也。

### 蠱卦第十八

蠱。元亨，利涉大川。先甲三日，後甲三日。

《象》曰：蠱，剛上而柔下，巽而止，蠱。蠱，元亨而天下治也。利涉大川，往有事也。先甲三日，後甲三日，終則有始，天行也。

《象》曰：山下有風，蠱；君子以振民育德。

初六，幹父之蠱，有子，考无咎，厲，終吉。

《象》曰：幹父之蠱，意承考也。

九二，幹母之蠱，不可貞。

《象》曰：幹母之蠱，得中道也。

九三，幹父之蠱，小有悔，无大咎。

《象》曰：幹父之蠱，終无咎也。

六四，裕父之蠱，往，見吝。

《象》曰：裕父之蠱，往未得也。

六五，幹父之蠱，用譽。

《象》曰：幹父用譽，承以德也。

上九，不事王侯，高尚其事。

《象》曰：不事王侯，志可則也。

### 臨卦第十九

臨。元亨，利貞，至于八月有凶。

《象》曰：臨，剛浸而長，說而順，剛中而應，大亨以正，天之道也。至于八月有凶，消不久也。

《象》曰：澤上有地，臨；君子以教思无窮，容保民无疆。

初九，咸臨，貞吉。

《象》曰：咸臨貞吉，志行正也。

九二，咸臨，吉，无不利。

《象》曰：咸臨，吉无不利，未順命也。

六三，甘臨，无攸利。既憂之，无咎。

《象》曰：甘臨，位不當也；既憂之，咎不長也。

六四，至臨，无咎。

《象》曰：至臨无咎，位當也。

六五，知臨，大君之宜，吉。

《象》曰：大君之宜，行中之謂也。

上六，敦臨，吉，无咎。

《象》曰：敦臨之吉，志在內也。

### 觀卦第二十

觀。盥而不薦，有孚顒若。

《象》曰：大觀在上，順而巽，中正以觀天下。觀，盥而不薦，有孚顒若，下觀而化也。觀天之神道，而四時不忒；聖人以神道設教，而天下服矣。

《象》曰：風行地上，觀；先王以省方，觀民設教。

初六，童觀，小人无咎，君子吝。

《象》曰：初六童觀，小人道也。

六二，闚觀，利女貞。

《象》曰：闕觀女貞，亦可醜也。

六三，觀我生，進退。

《象》曰：觀我生進退，未失道也。

六四，觀國之光，利用賓于王。

《象》曰：觀國之光，尚賓也。

九五，觀我生，君子，无咎。

《象》曰：觀我生，觀民也。

上九，觀其生，君子，无咎。

《象》曰：觀其生，志未平也。



## 51【易經 21-30 卦】

### 噬嗑卦第二十一

噬嗑。亨，利用獄。

《象》曰：頤中有物，曰噬嗑。噬嗑而亨，剛柔分，動而明，雷電合而章。柔得中而上行，雖不當位，利用獄也。

《象》曰：雷電，噬嗑；先王以明罰勅法。

初九，履校滅趾，无咎。

《象》曰：履校滅趾，不行也。

六二，噬膚滅鼻，无咎。

《象》曰：噬膚滅鼻，乘剛也。

六三，噬腊肉，遇毒。小吝，无咎。

《象》曰：遇毒，位不當也。

九四，噬乾肺，得金矢，利艱貞，吉。

《象》曰：利艱貞，吉，未光也。

六五，噬乾肉，得黃金，貞厲，无咎。

《象》曰：貞厲，无咎，得當也。

上九，何校滅耳，凶。

《象》曰：何校滅耳，聰不明也。

### 賁卦第二十二

賁。亨，小利有攸往。

《象》曰：賁，亨，柔來而文剛，故亨；分剛上而文柔，故小利有攸往。（剛柔交錯），天文也；文明以止，人文也。觀乎天文，以察時變；觀乎人文，以化成天下。

《象》曰：山下有火，賁。君子以明庶政，无敢折獄。

初九，賁其趾，舍車而徒。

《象》曰：舍車而徒，義弗乘也。

六二，賁其須。

《象》曰：賁其須，與上興也。

九三，賁如，濡如，永貞吉。

《象》曰：永貞之吉，終莫之陵也。

六四，賁如，皤如，白馬翰如，匪寇，婚媾。

《象》曰：六四，當位疑也，匪寇婚媾，終无尤也。

六五，賁於丘園，束帛戔戔，吝，終吉。

《象》曰：六五之吉，有喜也。

上九，白賁，无咎。

《象》曰：白賁无咎，上得志也。

### 剝卦第二十三

剝。不利有攸往。

《象》曰：剝，剝也，柔變剛也。不利有攸往，小人長也。順而止之，觀象也。君子尚消息盈虛，天行也。

《象》曰：山附于地，剝；上以厚下安宅。

初六，剝床以足，蔑，貞凶。

《象》曰：剝床以足，以滅下也。

六二，剝床以辨，蔑，貞凶。

《象》曰：剝床以辨，未有與也。

六三，剝之，无咎。

《象》曰：剝之无咎，失上下也。

六四，剝床以膚，凶。

《象》曰：剝床以膚，切近災也。

六五，貫魚以宮人寵，无不利。

《象》曰：以宮人寵，終无尤也。

上九，碩果不食，君子得輿，小人剝廬。

《象》曰：君子得輿，民所載也，小人剝廬，終不可用也。

### 復卦第二十四

復。亨，出入无疾，朋來无咎。反復其道，七日來復，利有攸往。

《象》曰：復，亨，剛反，動而以順行，是以出入无疾，朋來无咎，反復其道，七日來復，天行也。利有攸往，剛長也。復，其見天地之心乎？

《象》曰：雷在地中，復；先王以至日閉關，商旅不行，后不省方。



初九，不遠復，无祇悔，元吉。

《象》曰：不遠之復，以修身也。

六二，休復，吉。

《象》曰：休復之吉，以下仁也。

六三，頻復，厲，无咎。

《象》曰：頻復之厲，義无咎也。

六四，中行，獨復。

《象》曰：中行獨復，以從道也。

六五，敦復，无悔。

《象》曰：敦復，无悔，中以自考也。

上六，迷復，凶，有災眚。用行師，終有大敗，以其國君凶。至於十年不克征。

《象》曰：迷復之凶，反君道也。

### 无妄卦第二十五

无妄。元亨，利貞；其匪正，有眚，不利有攸往。

《象》曰：无妄，剛自外來而為主於內，動而健，剛中而應，大亨以正，天之命也。其匪正有眚，不利有攸往，无妄之往，何之矣？天命不祐，行矣哉？

《象》曰：天下雷行，物與无妄；先王以茂對時，育萬物。

初九，无妄，往吉。

《象》曰：无妄之往，得志也。

六二，不耕穫，不菑畲，則利有攸往。

《象》曰：不耕穫，未富也。

六三，无妄之災，或繫之牛，行人之得，邑人之災。

《象》曰：行人得牛，邑人災也。

九四，可貞，无咎。

《象》曰：可貞无咎，固有之也。

九五，无妄之疾，勿藥，有喜。

《象》曰：无妄之藥，不可試也。

上九，无妄，行有眚，无攸利。

《象》曰：无妄之行，窮之災也。

### 大畜卦第二十六

大畜。利貞，不家食，吉，利涉大川。

《象》曰：大畜，剛健篤實輝光，日新其德，剛上而尚賢，能止健，大正也。不家食吉，養賢也。利涉大川，應乎天也。

《象》曰：天在山中，大畜。君子以多識前言往行，以畜其德。

初九，有厲，利已。

《象》曰：有厲利已，不犯災也。

九二，輿說輹。

《象》曰：輿說輹，中无尤也。

九三，良馬逐，利艱貞。曰閑輿衛，利有攸往。

《象》曰：利有攸往，上合志也。

六四，童牛之牯，元吉。

《象》曰：六四元吉，有喜也。

六五，豮豕之牙，吉。

《象》曰：六五之吉，有慶也。

上九，何天之衢，亨。

《象》曰：何天之衢，道大行也。

## 頤卦第二十七

頤。貞吉。觀頤，自求口實。

《象》曰：頤，貞吉，養正則吉也。觀頤，觀其所養也；自求口實，觀其自養也。天地養萬物，聖人養賢以及萬民。頤之時大矣哉！

《象》曰：山下有雷，頤；君子以慎言語，節飲食。

初九，舍爾靈龜，觀我朵頤，凶。

《象》曰：觀我朵頤，亦不足貴也。

六二，顛頤，拂經；于丘頤，征凶。

《象》曰：六二征凶，行失類也。

六三，拂頤，貞凶，十年勿用，无攸利。

《象》曰：十年勿用，道大悖也。

六四，顛頤，吉，虎視眈眈，其欲逐逐，无咎。

《象》曰：顛頤之吉，上施光也。

六五，拂經，居貞吉，不可涉大川。

《象》曰：居貞之吉，順以從上也。

上九，由頤，厲吉，利涉大川。

《象》曰：由頤厲吉，大有慶也。

## 大過卦第二十八

大過，棟橈，利有攸往，亨。

《象》曰：大過，大者過也；棟橈，本末弱也。剛過而中，巽而說行，利有攸往，乃亨。大過之時大矣哉！

《象》曰：澤滅木，大過；君子以獨立不懼，遯世无悶。

初六，藉用白茅，无咎。

《象》曰：藉用白茅，柔在下也。

九二，枯楊生稊，老夫得其女妻，无不利。

《象》曰：老夫女妻，過以相與也。

九三，棟橈，凶。

《象》曰：棟橈之凶，不可以有輔也。

九四，棟隆，吉；有它，吝。

《象》曰：棟隆之吉，不橈乎下也。

九五，枯楊生華，老婦得其士夫，无咎无譽。

《象》曰：枯楊生華，何可久也？老婦士夫，亦可醜也。

上六，過涉滅頂，凶，无咎。

《象》曰：過涉之凶，不可咎也。

## 坎卦第二十九

習坎。有孚，維心亨，行有尚。

《象》曰：習坎，重險也，水流而不盈，行險而不失其信。維心亨，乃以剛中也。行有尚，往有功也。天險，不可升也；地險，山川丘陵也，王公設險以守其國，險之時用大矣哉！

《象》曰：水洊至，習坎；君子以常德行，習教事。

初六，習坎，入于坎窞，凶。

《象》曰：習坎入坎，失道凶也。

九二，坎有險，求小得。

《象》曰：求小得，未出中也。

六三，來之坎坎，險且枕，入于坎窞，勿用。

《象》曰：來之坎坎，終无功也。

六四，樽酒，簋贰，用缶，納約自牖，終无咎。

《象》曰：樽酒簋贰，剛柔際也。

九五，坎不盈，祇既平，无咎。

《象》曰：坎不盈，中未大也。

上六，係用徽纆，寘于叢棘，三歲不得，凶。

《象》曰：上六失道，凶三歲也。

## 離卦第三十

離。利貞，亨，畜牝牛，吉。

《象》曰：離，麗也。日月麗乎天，百穀草木麗乎土，重明以麗乎正，乃化成天下。柔麗乎中正，故亨，是以畜牝牛吉也。

《象》曰：明兩作，離；大人以繼明照于四方。

初九，履錯然，敬之，无咎。

《象》曰：履錯之敬，以辟咎也。

六二，黃離，元吉。

《象》曰：黃離元吉，得中道也。

九三，日昃之離，不鼓缶而歌，則大耋之嗟，凶。

《象》曰：日昃之離，何可久也。

九四，突如其來如，焚如，死如，棄如。

《象》曰：突如其來如，无所容也。

六五，出涕沱若，戚嗟若，吉。

《象》曰：六五之吉，離王公也。

上九，王用出征，有嘉，折首，獲匪其醜，无咎。

《象》曰：王用出征，以正邦也。



## 52【易經 31-40 卦】

### 周易 下經

#### 咸卦第三十一

咸。亨，利貞。取女吉。

《象》曰：咸，感也。柔上而剛下，二氣感應以相與，止而說，男下女，是以亨利貞，取女吉也。天地感而萬物化生，聖人感人心而天下和平。觀其所感，而天地萬物之情可見矣。

《象》曰：山上有澤，咸；君子以虛受人。

初六，咸其拇。

《象》曰：咸其拇，志在外也。

六二，咸其腓，凶；居吉。

《象》曰：雖凶居吉，順不害也。

九三，咸其股，執其隨，往吝。

《象》曰：咸其股，亦不處也，志在隨人，所執下也。

九四，貞吉，悔亡；憧憧往來，朋從爾思。

《象》曰：貞吉悔亡，未感害也；憧憧往來，未光大也。

九五，咸其脢，无悔。

《象》曰：咸其脢，志末也。

上六，咸其輔頰舌。

《象》曰：咸其輔頰舌，滕口說也。

### 恆卦第三十二

恆。亨，无咎，利貞。利有攸往。

《象》曰：恆，久也，剛上而柔下，雷風相與，巽而動，剛柔皆應，恆。

恆，亨，无咎，利貞，久於其道也。天地之道，恆久而不已也，利有攸往，終則有始也。日月得天而能久照，四時變化而能久成，聖人久於其道，而天下化成。觀其所恆，而天地萬物之情可見矣。

《象》曰：雷風，恆；君子以立不易方。

初六，浚恆，貞凶，无攸利。

《象》曰：浚恆之凶，始求深也。

九二，悔亡。

《象》曰：九二悔亡，能久中也。

九三，不恆其德，或承之羞，貞吝。

《象》曰：不恆其德，无所容也。

九四，田无禽。

《象》曰：久非其位，安得禽也。

六五，恆其德，貞。婦人吉，夫子凶。

《象》曰：婦人貞吉，從一而終也；夫子制義，從婦凶也。

上六，振恆，凶。

《象》曰：振恆在上，大无功也。

### 遯卦第三十三

遯。亨，小利貞。

《象》曰：遯亨，遯而亨也。剛，當位而應，與時行也。小利貞，浸而長也。遯之時義大矣哉！

《象》曰：天下有山，遯；君子以遠小人，不惡而嚴。

初六，遯尾，厲，勿用有攸往。

《象》曰：遯尾之厲，不往，何災也。

六二，執之用黃牛之革，莫之勝說。

《象》曰：執用黃牛，固志也。

九三，係遯，有疾厲；畜臣妾，吉。

《象》曰：係遯之厲，有疾憊也；畜臣妾吉，不可大事也。

九四，好遯，君子吉，小人否。

《象》曰：君子好遯，小人否也。

九五，嘉遯，貞吉。

《象》曰：嘉遯貞吉，以正志也。

上九，肥遯，无不利。

《象》曰：肥遯无不利，无所疑也。

### 大壯卦第三十四

大壯。利貞。

《象》曰：大壯，大者壯也，剛以動，故壯；大壯利貞，大者正也。正大而天地之情可見矣。

《象》曰：雷在天上，大壯；君子以非禮弗履。

初九，壯于趾，征凶，有孚。

《象》曰：壯于趾，其孚窮也。

九二，貞吉。

《象》曰：九二貞吉，以中也。

九三，小人用壯，君子用罔，貞厲。羝羊觸藩，羸其角。

《象》曰：小人用壯，君子罔也。

九四，貞吉，悔亡，藩決不羸，壯于大輿之輹。

《象》曰：藩決不羸，尚往也。

六五，喪羊于易，无悔。

《象》曰：喪羊于易，位不當也。

上六，羝羊觸藩，不能退，不能遂，无攸利，艱則吉。

《象》曰：不能退，不能遂，不詳也；艱則吉，咎不長也。

### 晉卦第三十五

晉。康侯用錫馬蕃庶，晝日三接。

《象》曰：晉，進也。明出地上，順而麗乎大明，柔進而上行，是以康侯用錫馬蕃庶，晝日三接也。

《象》曰：明出地上，晉；君子以自昭明德。

初六，晉如摧如，貞吉。罔孚，裕，无咎。

《象》曰：晉如摧如，獨行正也；裕无咎，未受命也。

六二，晉如愁如，貞吉。受茲介福，于其王母。

《象》曰：受茲介福，以中正也。

六三，眾允，悔亡。

《象》曰：眾允之，志上行也。

九四，晉如鼫鼠，貞厲。

《象》曰：鼫鼠貞厲，位不當也。

六五，悔亡，失得勿恤。往，吉，无不利。

《象》曰：失得勿恤，往有慶也。

上九，晉其角，維用伐邑，厲，吉，无咎，貞吝。

《象》曰：維用伐邑，道未光也。

### 明夷卦第三十六

明夷。利艱貞。

《象》曰：明入地中，明夷。內文明而外柔順；以蒙大難，文王以之。利艱貞，晦其明也。內難而能正其志，箕子以之。

《象》曰：明入地中，明夷；君子以莅眾，用晦而明。

初九，明夷于飛，垂其翼；君子于行，三日不食；有攸往，主人有言。

《象》曰：君子于行，義不食也。

六二，明夷，夷于左股，用拯馬壯，吉。

《象》曰：六二之吉，順以則也。

九三，明夷于南狩，得其大首，不可疾貞。

《象》曰：南狩之志，乃大得也。

六四，入于左腹，獲明夷之心，于出門庭。

《象》曰：入于左腹，獲心意也。

六五，箕子之明夷，利貞。

《象》曰：箕子之貞，明不可息也。

上六，不明晦，初登于天，後入于地。

《象》曰：初登于天，照四國也；後入于地，失則也。

### 家人卦第三十七

家人。利女貞。

《象》曰：家人，女正位乎內，男正位乎外，男女正，天地之大義也。家人有嚴君焉，父母之謂也。父父，子子，兄兄，弟弟，夫夫，婦婦，而家道正，正家而天下定矣。

《象》曰：風自火出，家人；君子以言有物而行有恆。

初九，閑有家，悔亡。

《象》曰：閑有家，志未變也。

六二，无攸遂，在中饋，貞吉。

《象》曰：六二之吉，順以巽也。

九三，家人嗃嗃，悔厲，吉；婦子嘻嘻，終吝。

《象》曰：家人嗃嗃，未失也；婦子嘻嘻，失家節也。

六四，富家，大吉。

《象》曰：富家大吉，順在位也。

九五，王假有家，勿恤，吉。

《象》曰：王假有家，交相愛也。

上九，有孚，威如，終吉。

《象》曰：威如之吉，反身之謂也。

### 睽卦第三十八

睽。小事吉。

《象》曰：睽，火動而上，澤動而下，二女同居，其志不同行。說而麗乎明，柔進而上行，得中而應乎剛，是以小事吉。天地睽而其事同也，男女睽而其志通也，萬物睽而其事類也。睽之時用大矣哉！

《象》曰：上火下澤，睽；君子以同而異。

初九，悔亡，喪馬，勿逐，自復；見惡人，无咎。

《象》曰：見惡人，以辟咎也。

九二，遇主于巷，无咎。

《象》曰：遇主于巷，未失道也。

六三，見輿曳，其牛掣，其人天且劓，无初有終。

《象》曰：見輿曳，位不當也 无初有終，遇剛也。

九四，睽孤，遇元夫，交孚，厲，无咎。

《象》曰：交孚无咎，志行也。

六五，悔亡，厥宗噬膚；往，何咎？

《象》曰：厥宗噬膚，往有慶也。

上九，睽孤。見豕負塗，載鬼一車，先張之弧，後說之弧。匪寇婚媾，往，遇雨則吉。

《象》曰：遇雨之吉，群疑亡也。

### 蹇卦第三十九

蹇。利西南，不利東北，利見大人，貞吉。

《象》曰：蹇，難也，險在前也。見險而能止，知矣哉！蹇，利西南，往得中也；不利東北，其道窮也；利見大人，往有功也；當位貞吉，以正邦也。蹇之時用大矣哉！

《象》曰：山上有水，蹇；君子以反身修德。

初六，往蹇，來譽。

《象》曰：往蹇來譽，宜待也。



六二，王臣蹇蹇，匪躬之故。

《象》曰：王臣蹇蹇，終无尤也。

九三，往蹇，來反。

《象》曰：往蹇來反，內喜之也。

六四，往蹇，來連。

《象》曰：往蹇來連，當位實也。

九五，大蹇，朋來。

《象》曰：大蹇朋來，以中節也。

上六，往蹇，來碩，吉。利見大人。

《象》曰：往蹇來碩，志在內也；利見大人，以從貴也。

### 解卦第四十

解。利西南，无所往，其來復，吉。有攸往，夙吉。

《象》曰：解，險以動，動而免乎險，解。解，利西南，往得眾也；其來復吉，乃得中也；有攸往夙吉，往有功也。天地解而雷雨作，雷雨作而百果草木皆甲坼，解之時大矣哉！

《象》曰：雷雨作，解；君子以赦過宥罪。

初六，无咎。

《象》曰：剛柔之際，義无咎也。

九二，田獲三狐，得黃矢，貞吉。

《象》曰：九二貞吉，得中道也。

六三，負且乘，致寇至，貞吝。

《象》曰：負且乘，亦可醜也；自我致戎，又誰咎也？

九四，解而拇，朋至斯孚。

《象》曰：解而拇，未當位也。

六五，君子維有解，吉，有孚于小人。

《象》曰：君子有解，小人退也。

上六，公用射隼于高墉之上，獲之，无不利。

《象》曰：公用射隼，以解悖也。



## 53【易經 41-50 卦】

### 損卦第四十一

損。有孚，元吉，无咎，可貞。利有攸往，曷之用？二簋可用享。

《象》曰：損，損下益上，其道上行。損而有孚，元吉，无咎，可貞，利有攸往，曷之用，二簋可用享，二簋應有時，損剛益柔有時，損益盈虛，與時偕行。

《象》曰：山下有澤，損；君子以懲忿窒欲。

初九，已事遄往，无咎，酌損之。

《象》曰：已事遄往，尚合志也。

九二，利貞，征凶。弗損，益之。

《象》曰：九二利貞，中以為志也。

六三，三人行，則損一人；一人行，則得其友。

《象》曰：一人行，三則疑也。

六四，損其疾，使遄有喜，无咎。

《象》曰：損其疾，亦可喜也。

六五，或益之十朋之龜，弗克違，元吉。

《象》曰：六五元吉，自上祐也。

上九，弗損，益之，无咎，貞吉。利有攸往，得臣无家。

《象》曰：弗損，益之，大得志也。

### 益卦第四十二

益。利有攸往，利涉大川。

《象》曰：益，損上益下，民說无疆；自上下下，其道大光；利有攸往，中正有慶；利涉大川，木道乃行；益動而巽，日進无疆；天施地生，其益无方；凡益之道，與時偕行。

《象》曰：風雷，益；君子以見善則遷，有過則改。

初九，利用為大作，元吉，无咎。

《象》曰：元吉无咎，下不厚事也。

六二，或益之十朋之龜，弗克違，永貞吉。王用享于帝，吉。

《象》曰：或益之，自外來也。

六三，益之用凶事，无咎，有孚中行，告公用圭。

《象》曰：益用凶事，固有之也。

六四，中行，告公從，利用為依遷國。

《象》曰：告公從，以益志也。

九五，有孚惠心，勿問元吉，有孚惠我德。

《象》曰：有孚惠心，勿問之矣，惠我德，大得志也。

上九，莫益之，或擊之，立心勿恆，凶。

《象》曰：莫益之，偏辭也；或擊之，自外來也。

### 夬卦第四十三

夬。揚于王庭，孚號有厲，告自邑，不利即戎，利有攸往。

《象》曰：夬，決也，剛決柔也；健而說，決而和。揚于王庭，柔乘五剛也；孚號有厲，其危乃光也；告自邑，不利即戎，所尚乃窮也；利有攸往，剛長乃終也。

《象》曰：澤上於天，夬；君子以施祿及下，居德則忌。

初九，壯于前趾，往，不勝，為咎。

《象》曰：不勝而往，咎也。

九二，惕號，莫夜有戎，勿恤。

《象》曰：有戎勿恤，得中道也。

九三，壯于頄，有凶。君子夬夬，獨行遇雨，若濡有愠，无咎。

《象》曰：君子夬夬，終无咎也。

九四，臀无膚，其行次且，牽羊悔亡，聞言不信。

《象》曰：其行次且，位不當也，聞言不信，聰不明也。

九五，覓陸夬夬，中行无咎。

《象》曰：中行无咎，中未光也。

上六，无號，終有凶。

《象》曰：无號之凶，終不可長也。

### 姤卦第四十四

姤。女壯，勿用取女。

《象》曰：姤，遇也，柔遇剛也。勿用取女，不可與長也。天地相遇，品物咸章也；剛遇中正，天下大行也。姤之時義大矣哉。

《象》曰：天下有風，姤；后以施命誥四方。

初六，繫于金柅，貞吉。有攸往，見凶。羸豕孚蹢躅。

《象》曰：繫于金柅，柔道牽也。

九二，包有魚，无咎，不利賓。

《象》曰：包有魚，義不及賓也。

九三，臀无膚，其行次且，厲，无大咎。

《象》曰：其行次且，行未牽也。

九四，包无魚，起凶。

《象》曰：无魚之凶，遠民也。

九五，以杞包瓜，含章，有隕自天。

《象》曰：九五含章，中正也；有隕自天，志不舍命也。

上九，姤其角，吝，无咎。

《象》曰：姤其角，上窮吝也。

#### 萃卦第四十五

萃。亨。王假有廟，利見大人，亨，利貞。用大牲，吉。利有攸往。

《象》曰：萃，聚也。順以說，剛中而應，故聚也。王假有廟，致孝享也；利見大人亨，聚以正也。用大牲吉，利有攸往，順天命也。觀其所聚，而天地萬物之情可見矣。

《象》曰：澤上於地，萃；君子以除戎器，戒不虞。

初六，有孚不終，乃亂乃萃。若號，一握為笑，勿恤。往，无咎。

《象》曰：乃亂乃萃，其志亂也。

六二，引吉，无咎。孚乃利用禴。

《象》曰：引吉无咎，中未變也。

六三，萃如嗟如，无攸利。往，无咎，小吝。

《象》曰：往无咎，上巽也。

九四，大吉，无咎。

《象》曰：大吉无咎，位不當也。

九五，萃有位，无咎匪孚，元永貞，悔亡。

《象》曰：萃有位，志未光也。

上六，齎咨涕洟，无咎。

《象》曰：齎咨涕洟，未安上也。

#### 升卦第四十六

升。元亨，用見大人，勿恤。南征，吉。

《象》曰：柔以時升，巽而順，剛中而應，是以大亨。用見大人勿恤，有慶也。南征吉，志行也。

《象》曰：地中生木，升；君子以順德，積小以高大。

初六，允升，大吉。

《象》曰：允升大吉，上合志也。

九二，孚乃利用禴，无咎。

《象》曰：九二之孚，有喜也。

九三，升虛邑。

《象》曰：升虛邑，无所疑也。

六四，王用亨于岐山，吉，无咎。

《象》曰：王用亨于岐山，順事也。

六五，貞，吉，升階。

《象》曰：貞吉升階，大得志也。

上六，冥升，利于不息之貞。

《象》曰：冥升在上，消不富也。

#### 困卦第四十七

困。亨，貞，大人吉，无咎。有言不信。

《象》曰：困，剛揜也。險以說，困而不失其所亨，其唯君子乎？貞大人吉，以剛中也；有言不信，尚口乃窮也。

《象》曰：澤无水，困；君子以致命遂志。

初六，臀困于株木，入于幽谷，三歲不覿。

《象》曰：入于幽谷，幽不明也。

九二，困于酒食，朱紱方來。利用享祀，征凶，无咎。

《象》曰：困于酒食，中有慶也。

六三，困于石，據于蒺藜，入于其宮，不見其妻，凶。

《象》曰：據于蒺藜，乘剛也；入于其宮，不見其妻，不祥也。

九四，來徐徐，困于金車，吝，有終。

《象》曰：來徐徐，志在下也；雖不當位，有與也。

九五，劓刖，困于赤紱，乃徐有說，利用祭祀。

《象》曰：劓刖，志未得也；乃徐有說，以中直也；利用祭祀，受福也。

上六，困于葛藟，于臲臲；曰動悔，有悔，征吉。

《象》曰：困于葛藟，未當也，動悔有悔，吉行也。

#### 井卦第四十八

井。改邑不改井，无喪无得，往來井井。汔至，亦未繙井，羸其瓶，凶。

《象》曰：巽乎水而上水，井；井養而不窮也。改邑不改井，乃以剛中也；汔至亦未繙井，未有功也；羸其瓶，是以凶也。

《象》曰：木上有水，井；君子以勞民勸相。

初六，井泥不食；舊井无禽。

《象》曰：井泥不食，下也；舊井无禽，時舍也。

九二，井谷射鮒，甕敝漏。

《象》曰：井谷射鮒，无與也。

九三，井渫不食，為我心恻，可用汲。王明，並受其福。

《象》曰：井渫不食，行恻也；求王明，受福也。

六四，井甃，无咎。

《象》曰：井甃无咎，修井也。

九五，井冽，寒泉食。

《象》曰：寒泉之食，中正也。

上六，井收，勿幕；有孚，元吉。

《象》曰：元吉在上，大成也。

### 革卦第四十九

革。己日乃孚；元亨，利貞，悔亡。

《象》曰：革，水火相息，二女同居，其志不相得，曰革。己日乃孚。革而信之，文明以說，大亨以正；革而當，其悔乃亡。天地革而四時成，湯武革命，順乎天而應乎人。革之時大矣哉。

《象》曰：澤中有火，革；君子以治歷明時。

初九，鞶用黃牛之革。

《象》曰：鞶用黃牛，不可以有為也。

六二，己日乃革之，征吉，无咎。

《象》曰：己日革之，行有嘉也。

九三，征凶，貞厲；革言三就，有孚。

《象》曰：革言三就，又何之矣。

九四，悔亡，有孚；改命，吉。

《象》曰：改命之吉，信志也。

九五，大人虎變，未占，有孚。

《象》曰：大人虎變，其文炳也。

上六，君子豹變，小人革面，征凶；居貞，吉。

《象》曰：君子豹變，其文蔚也；小人革面，順以從君也。

### 鼎卦第五十

鼎。元吉，亨。

《象》曰：鼎，象也，以木巽火，亨飪也。聖人亨以享上帝，而大亨以養聖賢。巽而耳目聰明，柔進而上行，得中而應乎剛，是以元亨。

《象》曰：木上有火，鼎；君子以正位凝命。

初六，鼎顛趾，利出否，得妾以其子，无咎。

《象》曰：鼎顛趾，未悖也；利出否，以從貴也。

九二，鼎有實，我仇有疾，不我能即，吉。

《象》曰：鼎有實，慎所之也；我仇有疾，終无尤也。

九三，鼎耳革，其行塞，雉膏不食，方雨虧悔，終吉。

《象》曰：鼎耳革，失其義也。

九四，鼎折足，覆公餗，其形渥，凶。

《象》曰：覆公餗，信如何也？

六五，鼎黃耳，金鉉，利貞。

《象》曰：鼎黃耳，中以為實也。

上九，鼎玉鉉，大吉，无不利。

《象》曰：玉鉉在上，剛柔節也。



## 54【易經 51-64 卦】

### 震卦第五十一

震。亨。震來虩虩，笑言啞啞；震驚百里，不喪匕鬯。

《象》曰：震亨。震來虩虩，恐致福也；笑言啞啞，後有則也；震驚百里，驚遠而懼邇也；出可以守宗廟社稷，以為祭主也。

《象》曰：洊雷，震；君子以恐懼修省。

初九，震來虩虩，後笑言啞啞，吉。

《象》曰：震來虩虩，恐致福也；笑言啞啞，後有則也。

六二，震來厲，億喪貝，躋于九陵，勿逐，七日得。

《象》曰：震來厲，乘剛也。

六三，震蘇蘇，震行无眚。

《象》曰：震蘇蘇，位不當也。

九四，震遂泥。

《象》曰：震遂泥，未光也。

六五，震往來厲，億无喪有事。

《象》曰：震往來厲，危行也；其事在中，大无喪也。

上六，震索索，視矍矍，征凶。震不于其躬，于其鄰，无咎。婚媾有言。

《象》曰：震索索，中未得也；雖凶无咎，畏鄰戒也。

### 艮卦第五十二

艮其背，不獲其身；行其庭，不見其人；无咎。

《象》曰：艮，止也。時止則止，時行則行，動靜不失其時，其道光明。艮其止，止其所也；上下敵應，不相與也；是以不獲其身，行其庭不見其人，无咎也。

《象》曰：兼山，艮；君子以思不出其位。

初六，艮其趾，无咎；利永貞。

《象》曰：艮其趾，未失正也。

六二，艮其腓，不拯其隨，其心不快。

《象》曰：不拯其隨，未退聽也。

九三，艮其限，列其夤，厲薰心。

《象》曰：艮其限，危薰心也。

六四，艮其身，无咎。

《象》曰：艮其身，止諸躬也。

六五，艮其輔，言有序，悔亡。

《象》曰：艮其輔，以中正也。

上九，敦艮，吉。

《象》曰：敦艮之吉，以厚終也。

### 漸卦第五十三

漸。女歸，吉。利貞。

《象》曰：漸之進也，女歸吉也。進得位，往有功也；進以正，可以正邦也。其位，剛得中也。止而巽，動不窮也。

《象》曰：山上有木，漸；君子以居賢德善俗。

初六，鴻漸于干，小子厲，有言，无咎。

《象》曰：小子之厲，義无咎也。

六二，鴻漸于磐，飲食衎衎，吉。

《象》曰：飲食衎衎，不素飽也。

九三，鴻漸于陸，夫征不復，婦孕不育，凶。利禦寇。

《象》曰：夫征不復，離群醜也；婦孕不育，失其道也；利用禦寇，順相保也。

六四，鴻漸于木，或得其桷，无咎。

《象》曰：或得其桷，順以巽也。

九五，鴻漸于陵，婦三歲不孕，終莫之勝，吉。

《象》曰：終莫之勝吉，得所願也。

上九，鴻漸于陸，其羽可用為儀，吉。

《象》曰：其羽可用為儀吉，不可亂也。

### 歸妹卦第五十四

歸妹。征凶，无攸利。

《象》曰：歸妹，天地之大義也，天地不交而萬物不興。歸妹，人之終始也；說以動，所歸妹也；征凶，位不當也；无攸利，柔乘剛也。

《象》曰：澤上有雷，歸妹；君子以永終知敝。

初九，歸妹以娣，跛能履，征吉。

《象》曰：歸妹以娣，以恆也；跛能履吉，相承也。



九二，眇能視，利幽人之貞。

《象》曰：利幽人之貞，未變常也。

六三，歸妹以須，反歸以娣。

《象》曰：歸妹以須，未當也。

九四，歸妹愆期，遲歸有時。

《象》曰：愆期之志，有待而行也。

六五，帝乙歸妹，其君之袂，不如其娣之袂良，月幾望，吉。

《象》曰：帝乙歸妹，不如其娣之袂良也，其位在中，以貴行也。

上六，女承筐无實，士刲羊无血，无攸利。

《象》曰：上六无實，承虛筐也。

### 豐卦第五十五

豐。亨。王假之，勿憂；宜日中。

《象》曰：豐，大也。明以動，故豐；王假之，尚大也；勿憂宜日中，宜照天下也。日中則昃，月盈則食，天地盈虛，與時消息，而況於人乎？況於鬼神乎？

《象》曰：雷電皆至，豐；君子以折獄致刑。

初九，遇其配主，雖旬无咎，往有尚。

《象》曰：雖旬无咎，過旬災也。

六二，豐其蔀，日中見斗；往得疑疾，有孚發若，吉。

《象》曰：有孚發若，信以發志也。

九三，豐其沛，日中見沫，折其右肱，无咎。

《象》曰：豐其沛，不可大事也；折其右肱，終不可用也。

九四，豐其蔀，日中見斗，遇其夷主，吉。

《象》曰：豐其蔀，位不當也；日中見斗，幽不明也；遇其夷主，吉行也。

六五，來章，有慶譽，吉。

《象》曰：六五之吉，有慶也。

上六，豐其屋，蔀其家，闐其戶，闐其无人，三歲不覿，凶。

《象》曰：豐其屋，天際翔也；闐其戶，闐其无人，自藏也。

### 旅卦第五十六

旅。小亨，旅貞吉。

《象》曰：旅，小亨；柔得中乎外，而順乎剛，止而麗乎明，是以小亨，旅貞吉也。旅之時義大矣哉。

《象》曰：山上有火，旅；君子以明慎用刑，而不留獄。

初六，旅瑣瑣，斯其所取災。

《象》曰：旅瑣瑣，志窮災也。

六二，旅即次，懷其資，得童僕貞。

《象》曰：得童僕貞，終无尤也。

九三，旅焚其次，喪其童僕，貞厲。

《象》曰：旅焚其次，亦以傷矣，以旅與下，其義喪也。

九四，旅于處，得其資斧，我心不快。

《象》曰：旅于處，未得位也；得其資斧，心未快也。

六五，射雉，一矢亡，終以譽命。

《象》曰：終以譽命，上逮也。

上九，鳥焚其巢，旅人先笑後號咷，喪牛于易，凶。

《象》曰：以旅在上，其義焚也；喪牛于易，終莫之聞也。

### 巽卦第五十七

巽。小亨，利有攸往，利見大人。

《象》曰：重巽，以申命；剛巽乎中正而志行，柔皆順乎剛，是以小亨，利有攸往，利見大人。

《象》曰：隨風，巽；君子以申命行事。

初六，進退，利武人之貞。

《象》曰：進退，志疑也；利武人之貞，志治也。

九二，巽在床下，用史巫紛若，吉，无咎。

《象》曰：紛若之吉，得中也。

九三，頻巽，吝。

《象》曰：頻巽之吝，志窮也。

六四，悔亡，田獲三品。

《象》曰：田獲三品，有功也。

九五，貞吉，悔亡，无不利，无初有終；先庚三日，後庚三日，吉。

《象》曰：九五之吉，位正中也。

上九，巽在床下，喪其資斧，貞凶。

《象》曰：巽在床下，上窮也；喪其資斧，正乎凶也。

### 兌卦第五十八

兌。亨，利貞。

《象》曰：兌，說也。剛中而柔外，說以利貞，是以順乎天而應乎人。說以先民，民忘其勞；說以犯難，民忘其死。說之大，民勸矣哉。

《象》曰：麗澤，兌；君子以朋友講習。

初九，和兌，吉。

《象》曰：和兌之吉，行未疑也。

九二，孚兌，吉，悔亡。

《象》曰：孚兌之吉，信志也。

六三，來兌，凶。

《象》曰：來兌之凶，位不當也。

九四，商兌未寧，介疾有喜。

《象》曰：九四之喜，有慶也。

九五，孚于剝，有厲。

《象》曰：孚于剝，位正當也。

上六，引兌。

《象》曰：上六引兌，未光也。

### 渙卦第五十九

渙。亨，王假有廟，利涉大川，利貞。

《象》曰：渙，亨，剛來而不窮，柔得位乎外而上同。王假有廟，王乃在中也；利涉大川，乘木有功也。

《象》曰：風行水上，渙；先王以享于帝立廟。

初六，用拯馬壯，吉。

《象》曰：初六之吉，順也。

九二，渙奔其机，悔亡。

《象》曰：渙奔其机，得願也。

六三，渙其躬，无悔。

《象》曰：渙其躬，志在外也。

六四，渙其群，元吉。渙有丘，匪夷所思。

《象》曰：渙其群元吉，光大也。

九五，渙汗其大號，渙王居，无咎。

《象》曰：王居无咎，正位也。

上九，渙其血，去；逖出，无咎。

《象》曰：渙其血，遠害也。

### 節卦第六十

節。亨；苦節，不可貞。

《象》曰：節亨，剛柔分，而剛得中；苦節不可貞，其道窮也。說以行險，當位以節，中正以通，天地節而四時成。節以制度，不傷財，不害民。

《象》曰：澤上有水，節；君子以制數度，議德行。

初九，不出戶庭，无咎。

《象》曰：不出戶庭，知通塞也。

九二，不出門庭，凶。；

《象》曰：不出門庭，凶，失時極也。

六三，不節若，則嗟若，无咎。

《象》曰：不節之嗟，又誰咎也。

六四，安節，亨。

《象》曰：安節之亨，承上道也。

九五，甘節，吉，往有尚。

《象》曰：甘節之吉，居位中也。

上六，苦節，貞凶，悔亡。

《象》曰：苦節貞凶，其道窮也。

### 中孚第六十一

中孚。豚魚吉，利涉大川，利貞。

《象》曰：中孚，柔在內而剛得中；說而巽，孚乃化邦也。豚魚吉，信及豚魚也；利涉大川，乘木舟虛也；中孚以利貞，乃應乎天也。

《象》曰：澤上有風，中孚；君子以議獄緩死。

初九，虞，吉；有他，不燕。

《象》曰：初九虞吉，志未變也。

九二，鳴鶴在陰，其子和之，我有好爵，吾與爾靡之。

《象》曰：其子和之，中心願也。

六三，得敵，或鼓或罷，或泣或歌。

《象》曰：或鼓或罷，位不當也。

六四，月幾望，馬匹亡，无咎。

《象》曰：馬匹亡，絕類上也。

九五，有孚攣如，无咎。

《象》曰：有孚攣如，位正當也。

上九，翰音登于天，貞凶。

《象》曰：翰音登于天，何可長也。

### 小過卦第六十二

小過。亨，利貞，可小事，不可大事。飛鳥遺之音，不宜上，宜下，大吉。

《象》曰：小過，小者過而亨也；過以利貞，與時行也；柔得中，是以小事吉也；剛失位而不中，是以不可大事也；有飛鳥之象焉，飛鳥遺之音，不宜上宜下，大吉，上逆而下順也。

《象》曰：山上有雷，小過；君子以行過乎恭，喪過乎哀，用過乎儉。

初六，飛鳥以凶。

《象》曰：飛鳥以凶，不可如何也。

六二，過其祖，遇其妣，不及其君，遇其臣，无咎。

《象》曰：不及其君，臣不可過也。

九三，弗過防之，從或戕之，凶。

《象》曰：從或戕之，凶如何也。

九四，无咎，弗過遇之，往厲必戒，勿用永貞。

《象》曰：弗過遇之，位不當也；往厲必戒，終不可長也。

六五，密雲不雨，自我西郊，公弋取彼在穴。

《象》曰：密雲不雨，已上也。

上六，弗遇過之，飛鳥離之，凶，是謂災眚。

《象》曰：弗遇過之，已亢也。

### 既濟卦第六十三

既濟。亨小，利貞；初吉，終亂。

《象》曰：既濟亨，小者亨也；利貞，剛柔正而位當也；初吉，柔得中也；終止則亂，其道窮也。

《象》曰：水在火上，既濟；君子以思患而豫防之。

初九，曳其輪，濡其尾，无咎。

《象》曰：曳其輪，義无咎也。

六二，婦喪其茀，勿逐，七日得。

《象》曰：七日得，以中道也。

九三，高宗伐鬼方，三年克之，小人勿用。

《象》曰：三年克之，憊也。

六四，繻有衣袽，終日戒。

《象》曰：終日戒，有所疑也。

九五，東鄰殺牛，不如西鄰之禴祭，實受其福。

《象》曰：東鄰殺牛，不如西鄰之時也；實受其福，吉大來也。

上六，濡其首，厲。

《象》曰：濡其首厲，何可久也。

### 未濟卦第六十四

未濟。亨，小狐汔濟，濡其尾，无攸利。

《象》曰：未濟亨，柔得中也；小狐汔濟，未出中也；濡其尾，无攸利，不續終也；雖不當位，剛柔應也。

《象》曰：火在水上，未濟；君子以慎辨物居方。

初六，濡其尾，吝。

《象》曰：濡其尾，亦不知極也。

九二，曳其輪，貞吉。

《象》曰：九二貞吉，中以行正也。

六三，未濟，征凶，利涉大川。

《象》曰：未濟征凶，位不當也。

九四，貞吉，悔亡，震用伐鬼方，三年有賞于大國。

《象》曰：貞吉悔亡，志行也。

六五，貞吉，无悔，君子之光，有孚，吉。

《象》曰：君子之光，其暉吉也。

上九，有孚于飲酒，无咎；濡其首，有孚失是。

《象》曰：飲酒濡首，亦不知節也。



## 55【詩經國風 1-44】

### 1 關雎

關關雎鳩，在河之洲。

窈窕淑女，君子好逑。

參差荇菜，左右流之。

窈窕淑女，寤寐求之。

求之不得，寤寐思服。

悠哉悠哉，輾轉反側。

參差荇菜，左右采之。

窈窕淑女，琴瑟友之。

參差荇菜，左右芼之。

窈窕淑女，鐘鼓樂之。

### 2 葛覃

葛之覃兮，施于中谷，維葉萋萋

黃鳥于飛，集于灌木，其鳴喈喈。

葛之覃兮，施于中谷，維葉莫莫。

是刈是濩，為絺為綌，服之無斃。

言告師氏，言告言歸，薄汙我私。

薄澣我衣，害澣害否，歸寧父母。

### 3 卷耳

采采卷耳，不盈頃筐，嗟我懷人，寘彼周行。  
陟彼崔嵬，我馬虺隤，我姑酌彼金罍，維以不永懷。  
陟彼高岡，我馬玄黃，我姑酌彼兕觥，維以不永傷。  
陟彼砠矣，我馬瘠矣，我僕痛矣，云何吁矣。

### 4 樛木

南有樛木，葛藟纍之，樂只君子，福履綏之。  
南有樛木，葛藟荒之，樂只君子，福履將之。  
南有樛木，葛藟縈之，樂只君子，福履成之。

### 5 蠡斯

蠡斯羽，詵詵兮，宜爾子孫，振振兮。  
蠡斯羽，薨薨兮，宜爾子孫，繩繩兮。  
蠡斯羽，揖揖兮，宜爾子孫，蟄蟄兮。

### 6 桃夭

桃之夭夭，灼灼其華，之子于歸，宜其室家。  
桃之夭夭，有蕢其實，之子于歸，宜其家室。  
桃之夭夭，其葉蓁蓁，之子于歸，宜其家人。

### 7 兔置

肅肅兔置，椽之丁丁，赳赳武夫，公侯干城。  
肅肅兔置，施于中逵，赳赳武夫，公侯好仇。  
肅肅兔置，施于中林，赳赳武夫，公侯腹心。

### 8 采芣

采采芣苢，薄言采之。采采芣苢，薄言有之。  
采采芣苢，薄言掇之。采采芣苢，薄言捋之。  
采采芣苢，薄言袪之。采采芣苢，薄言禡之。

### 9 漢廣

南有喬木，不可休息，漢有游女，不可求思。  
漢之廣矣，不可泳思，江之永矣，不可方思。  
翹翢錯薪，言刈其楚，之子于歸，言秣其馬。  
漢之廣矣，不可泳思，江之永矣，不可方思。  
翹翢錯薪，言刈其蒺，之子于歸，言秣其駒。  
漢之廣矣，不可泳思，江之永矣，不可方思。

## 10 汝墳

遵彼汝墳，伐其條枚，未見君子，惄如調飢。  
遵彼汝墳，伐其條肄，既見君子，不我遐棄。  
魴魚潁尾，王室如燬，雖則如燬，父母孔邇。

## 11 麟之趾

麟之趾，振振公子，于嗟麟兮。  
麟之定，振振公姓，于嗟麟兮。  
麟之角，振振公族，于嗟麟兮。

## 國風- 召南

### 12 維鵲

維鵲有巢，維鳩居之。之子于歸，百兩御之。  
維鵲有巢，維鳩方之。之子于歸，百兩將之。  
維鵲有巢，維鳩盈之。之子于歸，百兩成之。

### 13 采芣

于以采芣，于沼于沚。于以用之，公侯之事。  
于以采芣，于澗之中。于以用之，公侯之宮。  
被之僮僮，夙夜在公。被之祁祁，薄言還歸。

### 14 草蟲

嘒嘒草蟲，趯趯阜螽。未見君子，憂心忡忡。  
亦既見止，亦既覯止，我心則降！  
陟彼南山，言采其蕨。未見君子，憂心惓惓。  
亦既見止，亦既覯止，我心則說！  
陟彼南山，言采其薇。未見君子，我心傷悲。  
亦既見止，亦既覯止，我心則夷！

### 15 采蘋

于以采蘋，南澗之濱。于以采藻，于彼行潦。  
于以盛之，維筐及筥。于以湘之，維錡及釜。  
于以奠之，宗室牖下。誰其尸之，有齊季女。

### 16 甘棠

蔽芾甘棠，勿剪勿伐，召伯所茇。  
蔽芾甘棠，勿剪勿敗，召伯所憩。  
蔽芾甘棠，勿剪勿拜，召伯所說。



## 17 行露

厭浥行露。豈不夙夜，謂行多露。

誰謂雀無角，何以穿我屋？誰謂女無家，何以速我獄？

雖速我獄，室家不足。

誰謂鼠無牙，何以穿我墉？誰謂女無家，何以速我訟？

雖速我訟，亦不女從。

## 18 羔羊

羔羊之皮，素絲五紵。退食自公，委蛇委蛇。

羔羊之革，素絲五緘。委蛇委蛇，自公退食。

羔羊之縫，素絲五總。委蛇委蛇，退食自公。

## 19 殷其雷

殷其雷，在南山之陽。何斯違斯？莫敢或遑。

振振君子，歸哉歸哉！

殷其雷，在南山之側。何斯違斯？莫敢遑息。

振振君子，歸哉歸哉！

殷其雷，在南山之下。何斯違斯？莫或遑處。

振振君子，歸哉歸哉！

## 20 標有梅

標有梅，其實七兮。求我庶士，迨其吉兮！

標有梅，其實三兮。求我庶士，迨其今兮！

標有梅，頃筐墜之。求我庶士，迨其謂之！

## 21 小星

嘒彼小星，三五在東。肅肅宵征，夙夜在公。寔命不同！

嘒彼小星，維參與昴。肅肅宵征，抱衾與裯。寔命不猶！

## 22 江有汜

江有汜，之子歸，不我以。不我以，其後也悔。

江有渚，之子歸，不我與。不我與，其後也處。

江有沱，之子歸，不我過。不我過，其嘯也歌。

## 23 野有死麇

野有死麇，白茅包之。有女懷春，吉士誘之。

林有樸檉，野有死鹿，白茅純束。有女如玉。

舒而脫脫兮，無感我悅兮，無使尫也吠。

## 24 何彼穠矣

何彼穠矣？唐棣之華。曷不肅雝？王姬之車。  
何彼穠矣？華如桃李。平王之孫，齊侯之子。  
其釣維何？維絲伊緡。齊侯之子，平王之孫。

## 25 騶虞

彼茁者葭，壹發五豝，于嗟乎！騶虞。  
彼茁者蓬，壹發五豝，于嗟乎！騶虞。

## 國風- 邶風

## 26 柏舟

汎彼柏舟，亦汎其流。耿耿不寐，如有隱憂。  
微我無酒，以敖以遊。  
我心匪鑿，不可以茹。亦有兄弟，不可以據。  
薄言往愬，逢彼之怒。  
我心匪石，不可轉也。我心匪席，不可卷也。  
威儀棣棣，不可選也。  
憂心悄悄，慍于群小。覯閔既多，受侮不少。  
靜言思之，寤辟有標。  
日居月諸，胡迭而微？心之憂矣，如匪澣衣。  
靜言思之，不能奮飛。

## 27 綠衣

綠兮衣兮，綠衣黃裏。心之憂矣，曷維其已？  
綠兮衣兮，綠衣黃裳。心之憂矣，曷維其亡？  
綠兮絲兮，女所治兮。我思古人，俾無訖兮。  
絺兮綌兮，淒其以風。我思古人，實獲我心。

## 28 燕燕

燕燕于飛，差池其羽。之子于歸，遠送于野。  
瞻望弗及，泣涕如雨。  
燕燕于飛，頡之頡之。之子于歸，遠于將之。  
瞻望弗及，佇立以泣。  
燕燕于飛，下上其音。之子于歸，遠送于南。  
瞻望弗及，實勞我心。  
仲氏任只，其心塞淵。終溫且惠，淑慎其身。  
先君之思，以勗寡人。

## 29 日月

日居月諸，照臨下土。乃如之人兮，逝不古處。  
胡能有定？寧不我顧？  
日居月諸，下土是冒。乃如之人兮，逝不相好。  
胡能有定？寧不我報？  
日居月諸，出自東方。乃如之人兮，德音無良。  
胡能有定？俾也可忘。  
日居月諸，東方自出。父兮母兮，畜我不卒。  
胡能有定？報我不述。

## 30 終風

終風且暴，顧我則笑。謔浪笑敖，中心是悼。  
終風且霾，惠然肯來。莫往莫來，悠悠我思。  
終風且曠，不日有曠。寤言不寐，願言則嚏。  
曠曠其陰，虺虺其雷。寤言不寐，願言則懷。

## 31 擊鼓

擊鼓其鏜，踴躍用兵。土國城漕，我獨南行。  
從孫子仲，平陳與宋。不我以歸，憂心有忡。  
爰居爰處？爰喪其馬？于以求之，于林之下。  
死生契闊，與子成說。執子之手，與子偕老。  
于嗟闊兮，不我活兮。于嗟洵兮，不我信兮。

## 32 凱風

凱風自南，吹彼棘心。棘心夭夭，母氏劬勞。  
凱風自南，吹彼棘薪。母氏聖善，我無令人。  
爰有寒泉，在浚之下。有子七人，母氏勞苦。  
睨睨黃鳥，載好其音。有子七人，莫慰母心。

## 33 雄雉

雄雉于飛，泄泄其羽。我之懷矣，自詒伊阻。  
雄雉于飛，下上其音。展矣君子，實勞我心。  
瞻彼日月，悠悠我思。道之云遠，曷云能來？  
百爾君子，不知德行。不忮不求，何用不臧。

## 34 匏有苦葉

匏有苦葉，濟有深涉。深則厲，淺則揭。  
有瀾濟盈，有鷺雉鳴。濟盈不濡軌，雉鳴求其牡。  
雝雝鳴鴈，旭日始旦。士如歸妻，迨冰未泮。

招招舟子，人涉卬否。人涉卬否，卬須我友。

### 35 谷風

習習谷風，以陰以雨。黽勉同心，不宜有怒。  
采葑采菲，無以下體。德音莫違，及爾同死。  
行道遲遲，中心有違。不遠伊邇，薄送我畿。  
誰謂荼苦，其甘如薺。宴爾新昏，如兄如弟。  
涇以渭濁，湜湜其沚。宴爾新昏，不我屑以。  
毋逝我梁，毋發我笱。我躬不閱，遑恤我後。  
就其深矣，方之舟之。就其淺矣，泳之游之。  
何有何亡？黽勉求之。凡民有喪，匍匐救之。  
不我能惱，反以我為讎。既阻我德，賈用不售。  
昔育恐育鞫，及爾顛覆。既生既育，比予于毒。  
我有旨蓄，亦以御冬。宴爾新昏，以我御窮。  
有洸有潰，既詒我肄。不念昔者，伊余來墜。

### 36 式微

式微式微，胡不歸？微君之故，胡為乎中露？  
式微式微，胡不歸？微君之躬，胡為乎泥中？

### 37 旄丘

旄丘之葛兮，何誕之節兮。叔兮伯兮，何多日也。  
何其處也？必有與也。何其久也？必有以也。  
狐裘蒙戎，匪車不東。叔兮伯兮，靡所與同。  
瑣兮尾兮，流離之子。叔兮伯兮，裊如充耳。

### 38 簡兮

簡兮簡兮，方將萬舞。日之方中，在前上處。  
碩人俣俣，公庭萬舞。有力如虎，執轡如組。  
左手執籥，右手秉翟。赫如渥赭，公言錫爵。  
山有榛，隰有苓。云誰之思？西方美人。彼美人兮，西方之人兮。

### 39 泉水

恣彼泉水，亦流于淇。有懷于衛，靡日不思。爰彼諸姬，聊與之謀。  
出宿于泂，飲餞于禰。女子有行，遠父母兄弟。問我諸姑，遂及伯姊。  
出宿于干，飲餞于言。載脂載牽，還車言邁。遄臻于衛，不瑕有害？  
我思肥泉，茲之永嘆。思須與漕，我心悠悠。駕言出遊，以寫我憂。

## 40 北門

出自北門，憂心殷殷。終窶且貧，莫知我艱。

已焉哉！天實為之，謂之何哉！

王事適我，政事一埤益我。我入自外，室人交徧謫我。

已焉哉！天實為之，謂之何哉。

王事敦我，政事一埤遺我。我入自外，室人交徧摧我。

已焉哉！天實為之，謂之何哉。

## 41 北風

北風其涼，雨雪其雱。惠而好我，攜手同行。其虛其邪，既亟只且！

北風其喈，雨雪其霏。惠而好我，攜手同歸。其虛其邪，既亟只且！

莫赤匪狐，莫黑匪烏。惠而好我，攜手同車。其虛其邪，既亟只且。

## 42 靜女

靜女其姝，俟我於城隅。愛而不見，搔首踟躕。

靜女其嬈，貽我彤管。彤管有煒，說懌女美。

自牧歸荑，洵美且異。匪女之為美，美人之貽。

## 43 新臺

新臺有泚，河水瀾瀾。燕婉之求，籛篠不鮮。

新臺有洒，河水浼浼。燕婉之求，籛篠不殄。

魚網之設，鴻則離之。燕婉之求，得此戚施。

## 44 二子乘舟

二子乘舟，汎汎其景。願言思之，中心養養。

二子乘舟，汎汎其逝。願言思之，不瑕有害。

## ㄟㄟㄟㄟㄟㄟ

## 56 【詩經國風 45-74】

### 45 柏舟

汎彼柏舟，在彼中河。髡彼兩髦，實維我儀。之死矢靡他，母也天只，不諒人只！

汎彼柏舟，在彼河側。髡彼兩髦，實維我特。之死矢靡慝，母也天只，不諒人只！

### 46 牆有茨

牆有茨，不可埽也。中冓之言，不可道也。所可道也，言之醜也。

牆有茨，不可襄也。中冓之言，不可詳也。所可詳也，言之長也。

牆有茨，不可束也。中冓之言，不可讀也。所可讀也，言之辱也。

## 47 君子偕老

君子偕老，副笄六珈。委委佗佗，如山如河。象服是宜，子之不淑，云如之何？

玼兮玼兮！其之翟也。鬢髮如雲，不屑髻也。玉之瑱也，象之揅也，揚且之皙也。胡然而天也，胡然而帝也。

嗟兮嗟兮！其之展也。蒙彼絢綺，是繼祥也。子之清揚，揚且之顏也。展如之人兮，邦之媛也。

## 48 桑中

爰采唐矣，沫之鄉矣。云誰之思？美孟姜矣。期我乎桑中，要我乎上宮，送我乎淇之上矣。

爰采麥矣，沫之北矣。云誰之思？美孟弋矣。期我乎桑中，要我乎上宮，送我乎淇之上矣。

爰采葑矣，沫之東矣。云誰之思，美孟庸矣。期我乎桑中，要我乎上宮，送我乎淇之上矣。

## 49 鶉之奔奔

鶉之奔奔，鵲之疆疆。人之無良，我以為兄。

鵲之疆疆，鶉之奔奔。人之無良，我以為君。

## 50 定之方中

定之方中，作于楚宮。揆之以日，作于楚室。樹之榛栗，椅桐梓漆，爰伐琴瑟。

升彼虛矣，以望楚矣。望楚與堂，景山與京。降觀于桑，卜云其吉，終然允臧。

靈雨既零，命彼倌人。星言夙駕，說于桑田。匪直也人，秉心塞淵，騶牝三千。

## 51 蝦蟇

蝦蟇在東，莫之敢指。女子有行，遠父母兄弟。

朝濟于西，崇朝其雨。女子有行，遠兄弟父母。

乃如之人也，懷昏姻也。大無信也，不知命也。

## 52 相鼠

相鼠有皮，人而無儀。人而無儀，不死何為？

相鼠有齒，人而無止。人而無止，不死何俟？

相鼠有體，人而無禮。人而無禮，胡不遄死？

### 53 千旄

子子千旄，在浚之郊。素絲紕之，良馬四之。彼姝者子，何以畀之？  
子子千旟，在浚之都。素絲組之，良馬五之。彼姝者子，何以予之？  
子子千旌，在浚之城。素絲祝之，良馬六之。彼姝者子，何以告之？

### 54 載馳

載馳載驅，歸唁衛侯。驅馬悠悠，言至于漕。大夫跋涉，我心則憂。  
既不我嘉，不能旋反。視爾不臧，我思不遠。既不我嘉，不能旋濟。  
視爾不臧，我思不闕。

陟彼阿丘，言采其蠹。女子善懷，亦各有行。許人尤之，眾穉且狂。  
我行其野，芄芄其麥。控于大邦，誰因誰極？大夫君子，無我有尤。  
百爾所思，不如我所之。

### 國風- 衛風

### 55 淇奧

瞻彼淇奧，綠竹猗猗。有匪君子，如切如磋，如琢如磨。瑟兮僩兮，  
赫兮咺兮。

有匪君子，終不可諼兮。

瞻彼淇奧，綠竹青青。有匪君子，充耳琇瑩，會弁如星。

瑟兮僩兮，赫兮咺兮。有匪君子，終不可諼兮。

瞻彼淇奧，綠竹如簣。有匪君子，如金如錫，如圭如璧。

寬兮綽兮，猗重較兮。善戲謔兮，不為虐兮。

### 56 考槃

考槃在澗，碩人之寬。獨寐寤言，永矢弗諼。

考槃在阿，碩人之邁。獨寐寤歌，永矢弗過。

考槃在陸，碩人之軸。獨寐寤宿，永矢弗告。

### 57 碩人

碩人其頎，衣錦褰衣。齊侯之子，衛侯之妻，東宮之妹。邢侯之姨，  
譚公維私。

手如柔荑，膚如凝脂。領如蝤蠐，齒如瓠犀。螭首蛾眉，巧笑倩兮，  
美目盼兮。

碩人敖敖，說于農郊。四牡有騶，朱幘鑣鑣。翟茀以朝。大夫夙退，  
無使君勞。

河水洋洋，北流活活。施罟濊濊，鱣鮪發發。葭葦揭揭，庶姜孽孽，  
庶士有暵。

## 58 氓

氓之蚩蚩，抱布貿絲。匪來貿絲，來即我謀。送子涉淇，至于頓丘。  
匪我愆期，子無良媒。將子無怒，秋以為期。  
乘彼坳垣，以望復關。不見復關，泣涕漣漣。既見復關，載笑載言。  
爾卜爾筮，體無咎言。以爾車來，以我賄遷。  
桑之未落，其葉沃若。于嗟鳩兮，無食桑葚。于嗟女兮，無與士耽。  
士之耽兮，猶可說也。女之耽兮，不可說也。  
桑之落矣，其黃而隕。自我徂爾，三歲食貧。淇水湯湯，漸車帷裳。  
女也不爽，士貳其行。士也罔極，二三其德。  
三歲為婦，靡室勞矣。夙興夜寐，靡有朝矣。言既遂矣，至於暴矣。  
兄弟不知，咥其笑矣。靜言思之，躬自悼矣。  
及爾偕老，老使我怨。淇則有岸，隰則有泮。總角之宴，言笑晏晏。  
信誓旦旦，不思其反。反是不思，亦已焉哉！

## 59 竹竿

籊籊竹竿，以釣于淇。豈不爾思，遠莫致之。  
泉源在左，淇水在右。女子有行，遠兄弟父母。  
淇水在右，泉源在左。巧笑之瑳，佩玉之儺。  
淇水泂泂，檜楫松舟。駕言出遊，以寫我憂。

## 60 芄蘭

芄蘭之支，童子佩觿。雖則佩觿，能不我知。容兮遂兮，垂帶悸兮。  
芄蘭之葉，童子佩鞶。雖則佩鞶，能不我甲。容兮遂兮，垂帶悸兮。

## 61 河廣

誰謂河廣？一葦杭之。誰謂宋遠？跂予望之。  
誰謂河廣？曾不容刀，誰謂宋遠？曾不崇朝。

## 62 伯兮

伯兮朅兮，邦之桀兮。伯也執殳，為王前驅。  
自伯之東，首如飛蓬。豈無膏沐，誰適為容。  
其雨其雨，杲杲出日。願言思伯，甘心首疾。  
焉得諼草，言樹之背。願言思伯，使我心痠。

## 63 有狐

有狐綏綏，在彼淇梁。心之憂矣，之子無裳。  
有狐綏綏，在彼淇厲。心之憂矣，之子無帶。  
有狐綏綏，在彼淇側。心之憂矣，之子無服。



## 64 木瓜

投我以木瓜，報之以瓊琚。匪報也，永以為好也。

投我以木桃，報之以瓊瑤。匪報也，永以為好也。

投我以木李，報之以瓊玖。匪報也，永以為好也。

## 國風- 王風

### 65 黍離

彼黍離離，彼稷之苗。行邁靡靡，中心搖搖。知我者，謂我心憂；  
不知我者，謂我何求。悠悠蒼天，此何人哉！

彼黍離離，彼稷之穗。行邁靡靡，中心如醉。知我者，謂我心憂；  
不知我者，謂我何求。悠悠蒼天，此何人哉！

彼黍離離，彼稷之實。行邁靡靡，中心如噎。知我者，謂我心憂；  
不知我者，謂我何求。悠悠蒼天，此何人哉！

### 66 君子于役

君子于役，不知其期，曷至哉？雞棲于埘，日之夕矣，羊牛下來。

君子于役，如之何勿思？

君子于役，不日不月，曷其有佸？雞棲于桀，日之夕矣，羊牛下括。

君子于役，苟無飢渴。

### 67 君子陽陽

君子陽陽，左執簧，右招我由房。其樂只且！

君子陶陶，左執翫，右招我由敖。其樂只且！

### 68 揚之水

揚之水，不流束薪。彼其之子，不與我戍申。懷哉懷哉，曷月予還歸哉？

揚之水，不流束楚。彼其之子，不與我戍甫。懷哉懷哉，曷月予還歸哉？

揚之水，不流束蒲。彼其之子，不與我戍許。懷哉懷哉，曷月予還歸哉？

### 69 中谷有蓷

中谷有蓷，暵其乾矣。有女仳離，嘒其嘆矣。嘒其嘆矣！遇人之艱難矣！

中谷有蓷，暵其脩矣。有女仳離，條其嘯矣。條其嘯矣！遇人之不淑矣！

中谷有蓷，暵其濕矣。有女仳離，啜其泣矣。啜其泣矣！何嗟及矣！

### 70 兔爰

有兔爰爰，雉離于羅。我生之初，尚無為。我生之後，逢此百罹。  
尚寐無吽。

有兔爰爰，雉離于罟。我生之初，尚無造。我生之後，逢此百憂。  
尚寐無覺！

有兔爰爰，雉離于罝。我生之初，尚無庸。我生之後，逢此百凶。

尚寐無聰！

### 71 葛藟

綿綿葛藟，在河之滸。終遠兄弟，謂他人父。謂他人父，亦莫我顧。

緜緜葛藟，在河之涘。終遠兄弟，謂他人母。謂他人母，亦莫我有。

緜緜葛藟，在河之漘。終遠兄弟，謂他人昆。謂他人昆，亦莫我聞。

### 72 采葛

彼采葛兮，一日不見，如三月兮！

彼采蕭兮，一日不見，如三秋兮！

彼采艾兮，一日不見，如三歲兮！

### 73 大車

大車檻檻，毳衣如芟。豈不爾思？畏子不敢。

大車嘽嘽，毳衣如璫。豈不爾思？畏子不奔。

穀則異室，死則同穴。謂予不信，有如皦日。

### 74 丘中有麻

丘中有麻，彼留子嗟。彼留子嗟，將其來施施。

丘中有麥，彼留子國。彼留子國，將其來食。

丘中有李，彼留之子。彼留之子，貽我佩玖。



## 57【詩經國風 75-113】

### 國風-鄭風

#### 75 緜衣

緜衣之宜兮，敝予又改為兮。適子之館兮，還予授子之粢兮。

緜衣之好兮，敝予又改造兮。適子之館兮，還予授子之粢兮。

緜衣之蓆兮，敝予又改作兮。適子之館兮，還予授子之粢兮。

#### 76 將仲子

將仲子兮，無踰我里，無折我樹杞。豈敢愛之，畏我父母，仲可懷也。父母之言，亦可畏也。

將仲子兮，無踰我牆，無折我樹桑。豈敢愛之，畏我諸兄。仲可懷也。諸兄之言，亦可畏也。

將仲子兮，無踰我園，無折我樹檀。豈敢愛之，畏人之多言。仲可懷也。人之多言，亦可畏也。

#### 77 叔于田

叔于田，巷無居人。豈無居人，不如叔也，洵美且仁。

叔于狩，巷無飲酒。豈無飲酒，不如叔也，洵美且好。

叔適野，巷無服馬。豈無服馬，不如叔也，洵美且武。

### 78 大叔于田

叔于田，乘乘馬，執轡如組，兩驂如舞。叔在藪，火烈具舉，禮褻暴虎，獻于公所。將叔無狃，戒其傷女。

叔于田，乘乘黃，兩服上襄，兩驂鴈行。叔在藪，火烈具揚，叔善射忌，又良御忌，抑磬控忌，抑縱送忌。

叔于田，乘乘鵠，兩服齊首，兩驂如手。叔在藪，火烈具阜，叔馬慢忌，叔發罕忌，抑釋搊忌，抑鬯弓忌。

### 79 清人

清人在彭，駟介旁旁，二矛重英，河上乎翱翔。

清人在消，駟介麇麇，二矛重喬，河上乎逍遙。

清人在軸，駟介陶陶，左旋右抽，中軍作好。

### 80 羔裘

羔裘如濡，洵直且侯。彼其之子，舍命不渝。

羔裘豹飾，孔武有力。彼其之子，邦之司直。

羔裘晏兮，三英粲兮。彼其之子，邦之彥兮。

### 81 遵大路

遵大路兮，摯執子之祛兮。無我惡兮，不寔故也。

遵大路兮，摯執子之手兮。無我醜兮，不寔好也。

### 82 女曰雞鳴

女曰雞鳴，士曰昧旦。子興視夜，明星有爛。將翱將翔，弋鳧與鴈。弋言加之，與子宜之。宜言飲酒，與子偕老。琴瑟在御，莫不靜好。知子之來之，雜佩以贈之。知子之順之，雜佩以問之。知子之好之，雜佩以報之。

### 83 有女同車

有女同車，顏如舜華。將翱將翔，佩玉瓊琚。彼美孟姜，洵美且都。

有女同行，顏如舜英。將翱將翔，佩玉將將。彼美孟姜，德音不忘。

### 84 山有扶蘇

山有扶蘇，隰有荷華。不見子都，乃見狂且。

山有橋松，隰有游龍。不見子充，乃見狡童。

### 85 蓍兮

蓍兮蓍兮，風其吹女。叔兮伯兮，倡予和女。

蓍兮蓍兮，風其漂女。叔兮伯兮，倡予要女。

## 86 狡童

彼狡童兮，不與我言兮。維子之故，使我不能餐兮。

彼狡童兮，不與我食兮。維子之故，使我不能息兮。

## 87 褰裳

子惠思我，褰裳涉溱。子不我思，豈無他人，狂童之狂也且。

子惠思我，褰裳涉洧。子不我思，豈無他士，狂童之狂也且。

## 88 丰

子之丰兮，俟我乎巷兮，悔予不送兮。

子之昌兮，俟我乎堂兮，悔予不將兮。

衣錦褰衣，裳錦褰裳。叔兮伯兮，駕予與行。

裳錦褰裳，衣錦褰衣。叔兮伯兮，駕予與歸。

## 89 東門之墀

東門之墀，茹蘆在阪。其室則邇，其人甚遠。

東門之栗，有踐家室。豈不爾思，子不我即。

## 90 風雨

風雨淒淒，雞鳴喈喈。既見君子，云胡不夷。

風雨瀟瀟，雞鳴膠膠。既見君子，云胡不瘳。

風雨如晦，雞鳴不已。既見君子，云胡不喜。

## 91 子衿

青青子衿，悠悠我心。縱我不往，子寧不嗣音。

青青子佩，悠悠我思。縱我不往，子寧不來。

挑兮達兮，在城闕兮。一日不見，如三月兮。

## 92 揚之水

揚之水，不流束楚。終鮮兄弟，維予與女。無信人之言，人實廷女。

揚之水，不流束薪。終鮮兄弟，維予二人。無信人之言，人實不信。

## 93 出其東門

出其東門，有女如雲。雖則如雲，匪我思存。縞衣綦巾，聊樂我員。

出其閭闔，有女如荼。雖則如荼，匪我思且。縞衣茹蘆，聊可與娛。

## 94 野有蔓草

野有蔓草，零露漙漙。有美一人，清揚婉兮。邂逅相遇，適我願兮。

野有蔓草，零露瀼瀼。有美一人，婉如清揚。邂逅相遇，與子皆臧。

## 95 溱洧

溱與洧，方渙渙兮。士與女，方秉簡兮。女曰觀乎，士曰既且。

且往觀乎洧之外，洵訏且樂。維士與女，伊其相謔，贈之以勺藥。

溱與洧，瀏其清矣。士與女，殷其盈矣。女曰觀乎，士曰既且。  
且往觀乎洧之外，洵訏且樂。維士與女，伊其將謔，贈之以勺藥。

## 國風-齊風

### 96 雞鳴

雞既鳴矣，朝既盈矣。匪雞則鳴，蒼蠅之聲。  
東方明矣，朝既昌矣。匪東方則明，月出之光。  
蟲飛薨薨，甘與子同夢。會且歸矣，無庶予子憎。

### 97 還

子之還兮，遭我乎狺之間兮。並驅從兩肩兮，揖我謂我儂兮。  
子之茂兮，遭我乎狺之道兮。並驅從兩牡兮，揖我謂我好兮。  
子之昌兮，遭我乎狺之陽兮。並驅從兩狼兮，揖我謂我臧兮。

### 98 著

俟我於著乎而，充耳以素乎而，尚之以瓊華乎而。  
俟我於庭乎而，充耳以青乎而，尚之以瓊瑩乎而。  
俟我於堂乎而，充耳以黃乎而，尚之以瓊英乎而。

### 99 東方之日

東方之日兮，彼姝者子，在我室兮。在我室兮，履我即兮。  
東方之月兮，彼姝者子，在我闥兮。在我闥兮，履我發兮。

### 100 東方未明

東方未明，顛倒衣裳。顛之倒之，自公召之。  
東方未晞，顛倒裳衣。倒之顛之，自公令之。  
折柳樊圃，狂夫瞿瞿。不能辰夜，不夙則莫。

### 101 南山

南山崔崔，雄狐綏綏。魯道有蕩，齊子由歸。既曰歸止，曷又懷止。  
葛屨五兩，冠綉雙止。魯道有蕩，齊子庸止。既曰庸止，曷又從止。  
蓺麻如之何？衡從其畝。取妻如之何？必告父母。既曰告止，曷又鞠止。  
析薪如之何？匪斧不克。取妻如之何？匪媒不得。既曰得止，曷又極止。

### 102 甫田

無田甫田，維莠騶騶。無思遠人，勞心忉忉。  
無田甫田，維莠桀桀。無思遠人，勞心怛怛。  
婉兮孌兮，總角丱兮。未幾見兮，突而弁兮。

### 103 盧令

盧令令，其人美且仁。

盧重環，其人美且鬢。

盧重鋠，其人美且偲。

### 104 敝笱

敝笱在梁，其魚魴鰈。齊子歸止，其從如雲。

敝笱在梁，其魚魴鱖。齊子歸止，其從如雨。

敝笱在梁，其魚唯唯。齊子歸止，其從如水。

### 105 載驅

載驅薄薄，簞芡朱韜。魯道有蕩，齊子發夕。

四驪濟濟，垂轡瀾瀾。魯道有蕩，齊子豈弟。

汶水湯湯，行人彭彭。魯道有蕩，齊子翱翔。

汶水滔滔，行人儻儻。魯道有蕩，齊子遊敖。

### 106 猗嗟

猗嗟昌兮，頎而長兮。抑若揚兮，美目揚兮。巧趨蹌兮，射則臧兮。

猗嗟名兮，美目清兮，儀既成兮，終日射侯。不出正兮。展我甥兮。

猗嗟夔兮，清揚婉兮。舞則選兮，射則貫兮。四矢反兮，以禦亂兮。

## 國風-魏風

### 107 葛屨

糾糾葛屨，可以履霜。摻摻女手，可以縫裳。要之襍之，好人服之。

好人提提，宛然左辟，佩其象揅。維是褊心，是以為刺。

### 108 汾沮洳

彼汾沮洳，言采其莫。彼其之子美無度，美無度，殊異乎公路。

彼汾一方，言采其桑。彼其之子美如英，美如英，殊異乎公行。

彼汾一曲，言采其蕒。彼其之子美如玉，美如玉，殊異乎公族。

### 109 園有桃

園有桃，其實之殽。心之憂矣，我歌且謠。不知我者，謂我士也驕。

彼人是哉，子曰何其，心之憂矣，其誰知之？其誰知之，蓋亦勿思。

園有棘，其實之食。心之憂矣，聊以行國。不知我者，謂我士也罔極。

彼人是哉，子曰何其。心之憂矣，其誰知之？其誰知之，蓋亦勿思。

### 110 陟岵

陟彼岵兮，瞻望父兮。父曰，嗟予子行役，夙夜無已。上慎旃哉，

猶來無止。

陟彼岵兮，瞻望母兮。母曰，嗟予季行役，夙夜無寐，上慎旃哉，猶來無棄。

陟彼岡兮，瞻望兄兮。兄曰，嗟予弟行役，夙夜必偕，上慎旃哉，猶來無死。

### 111 十畝之間

十畝之間兮，桑者閑閑兮，行與子還兮。

十畝之外兮，桑者泄泄兮，行與子逝兮。

### 112 伐檀

坎坎伐檀兮，寘之河之干兮，河水清且漣漪。

不稼不穡，胡取禾三百廛兮。不狩不獵，胡瞻爾庭有縣貍兮。彼君子兮，不素餐兮。

坎坎伐輻兮，寘之河之側兮，河水清且直漪。

不稼不穡，胡取禾三百億兮。不狩不獵，胡瞻爾庭有縣特兮。彼君子兮，不素食兮。

坎坎伐輪兮，寘之河之漘兮，河水清且淪漪。

不稼不穡，胡取禾三百困兮。不狩不獵，胡瞻爾庭有縣鶉兮。彼君子兮，不素飡兮。

### 113 碩鼠

碩鼠碩鼠，無食我黍。三歲貫女，莫我肯顧。

逝將去女，適彼樂土。樂土樂土，爰得我所。

碩鼠碩鼠，無食我麥。三歲貫女，莫我肯德。

逝將去女，適彼樂國。樂國樂國，爰得我直。

碩鼠碩鼠，無食我苗。三歲貫女，莫我肯勞。

逝將去女，適彼樂郊。樂郊樂郊，誰之永號。



## 58【詩經國風 114-160】

### 國風-唐風

#### 114 蟋蟀

蟋蟀在堂，歲聿其莫。今我不樂，日月其除。無已大康，職思其居。好樂無荒，良士瞿瞿。

蟋蟀在堂，歲聿其逝。今我不樂，日月其邁。無已大康，職思其外。好樂無荒，良士蹶蹶。

蟋蟀在堂，役車其休。今我不樂，日月其慆。無已大康，職思其憂。好樂無荒，良士休休。

### 115 山有樞

山有樞，隰有榆。子有衣裳，弗曳弗婁。子有車馬，弗馳弗驅。宛其死矣，他人是愉。

山有栲，隰有杻。子有廷內，弗洒弗埽。子有鐘鼓，弗鼓弗考。宛其死矣，他人是保。

山有漆，隰有栗。子有酒食，何不日鼓瑟？且以喜樂，且以永日。宛其死矣，他人入室。

### 116 揚之水

揚之水，白石鑿鑿。素衣朱襮，從子于沃。既見君子，云何不樂？

揚之水，白石皓皓。素衣朱繡，從子于鵠。既見君子，云何其憂？

揚之水，白石粼粼。我聞有命，不敢以告人。

### 117 椒聊

椒聊之實，蕃衍盈升。彼其之子，碩大無朋。椒聊且！遠條且！

椒聊之實，蕃衍盈匊。彼其之子，實大且篤。椒聊且！遠條且！

### 118 綢繆

綢繆束薪，三星在天。今夕何夕，見此良人。子兮子兮，如此良人何。

綢繆束芻，三星在隅。今夕何夕，見此邂逅。子兮子兮，如此邂逅何。

綢繆束楚，三星在戶。今夕何夕，見此粲者。子兮子兮，如此粲者何。

### 119 杕杜

有杕之杜，其葉湑湑。獨行踽踽，豈無他人？不如我同父。

嗟行之人，胡不比焉？人無兄弟，胡不飲焉？

有杕之杜，其葉菁菁。獨行裊裊，豈無他人？不如我同姓。

嗟行之人，胡不比焉？人無兄弟，胡不飲焉？

### 120 羔裘

羔裘豹袪，自我人居居。豈無他人？維子之故。

羔裘豹褰，自我人究究。豈無他人？維子之好。

### 121 鵲羽

肅肅鵲羽，集于苞栩。王事靡盬，不能蓺稷黍，父母何怙。

悠悠蒼天，曷其有所。

肅肅鵲翼，集于苞棘。王事靡盬，不能蓺黍稷，父母何食。

悠悠蒼天，曷其有極。

肅肅鵲行，集于苞桑。王事靡盬，不能蓺稻粱，父母何嘗。



悠悠蒼天，曷其有常。

### 122 無衣

豈曰無衣七兮，不如子之衣，安且吉兮！

豈曰無衣六兮，不如子之衣，安且燠兮！

### 123 有杕之杜

有杕之杜，生于道左。彼君子兮，噬肯適我。中心好之，曷飲食之。

有杕之杜，生于道周。彼君子兮，噬肯來遊。中心好之，曷飲食之。

### 124 葛生

葛生蒙楚，蔕蔓于野。予美亡此，誰與獨處！

葛生蒙棘，蔕蔓于域。予美亡此，誰與獨息！

角枕粲兮，錦衾爛兮。予美亡此，誰與獨旦！

夏之日，冬之夜。百歲之後，歸于其居。

冬之夜，夏之日。百歲之後，歸于其室。

### 125 采芩

采芩采芩，首陽之巔。人之為言，苟亦無信。舍旃舍旃，苟亦無然。

人之為言，胡得焉？

采苦采苦，首陽之下。人之為言，苟亦無與。舍旃舍旃，苟亦無然。

人之為言，胡得焉？

采葑采葑，首陽之東。人之為言，苟亦無從。舍旃舍旃，苟亦無然。

人之為言，胡得焉？

### 國風-秦風

#### 126 車鄰

有車鄰鄰，有馬白顛。未見君子，寺人之令。

阪有漆，隰有栗。既見君子，並坐鼓瑟。今者不樂，逝者其耄。

阪有桑，隰有楊。既見君子，並坐鼓簧。今者不樂，逝者其亡。

#### 127 駟驥

駟驥孔阜，六轡在手。公之媚子，從公于狩。

奉時辰牡，辰牡孔碩。公曰左之，舍拔則獲。

遊于北園，四馬既閑。輶車鸞鑣，載獫歇驕。

#### 128 小戎

小戎儻收，五檠梁輶。游環脅驅，陰鞞塗續。文茵暢轂，駕我騏驎。

言念君子，溫其如玉。在其板屋，亂我心曲。

四牡孔阜，六轡在手。騏驎是中，騶驪是驂。龍盾之合，鋈以艘輶。

言念君子，溫其在邑。方何為期，胡然我念之。

倭駟孔群，公矛鋈錚。蒙伐有苑，虎韞鏤膺。交韞二弓，竹閉緄滕。  
言念君子，載寢載興。厭厭良人，秩秩德音。

### 129 蒹葭

蒹葭蒼蒼，白露為霜。所謂伊人，在水一方。  
溯洄從之，道阻且長；溯游從之，宛在水中央。  
蒹葭淒淒，白露未晞。所謂伊人，在水之湄。  
溯洄從之，道阻且躋；溯游從之，宛在水中坻。  
蒹葭采采，白露未已。所謂伊人，在水之涘。  
溯洄從之，道阻且右；溯游從之，宛在水中沚。

### 130 終南

終南何有？有條有梅。君子至止，錦衣狐裘。顏如渥丹，其君也哉！  
終南何有？有紀有堂。君子至止，黻衣繡裳。佩玉將將，壽考不忘。

### 131 黃鳥

交交黃鳥，止于棘。誰從穆公，子車奄息。維此奄息，百夫之特。  
臨其穴，惴惴其慄。彼蒼者天，殲我良人。如可贖兮，人百其身。  
交交黃鳥，止于桑。誰從穆公，子車仲行。維此仲行，百夫之防。  
臨其穴，惴惴其慄。彼蒼者天，殲我良人。如可贖兮，人百其身。  
交交黃鳥，止于楚。誰從穆公，子車鍼虎。維此鍼虎，百夫之禦。  
臨其穴，惴惴其慄。彼蒼者天，殲我良人。如可贖兮，人百其身。

### 132 晨風

馱彼晨風，鬱彼北林。未見君子，憂心欽欽。如何如何，忘我實多。  
山有苞櫟，隰有六駘。未見君子，憂心靡樂。如何如何，忘我實多。  
山有苞棣，隰有樹檟。未見君子，憂心如醉。如何如何，忘我實多。

### 133 無衣

豈曰無衣？與子同袍。王于興師，修我戈矛，與子同仇。  
豈曰無衣？與子同澤。王于興師，修我矛戟，與子偕作。  
豈曰無衣？與子同裳。王于興師，脩我甲兵，與子偕行。

### 134 渭陽

我送舅氏，曰至渭陽。何以贈之？路車乘黃。  
我送舅氏，悠悠我思。何以贈之？瓊瑰玉珮。

### 135 權輿

於我乎！夏屋渠渠，今也每食無餘。于嗟乎！不承權輿。  
於我乎！每食四簋，今也每食不飽。于嗟乎！不承權輿。

## 國風-陳風

### 136 宛丘

子之湯兮，宛丘之上兮。洵有情兮，而無望兮。  
坎其擊鼓，宛丘之下。無冬無夏，值其鷺羽。  
坎其擊缶，宛丘之道。無冬無夏，值其鷺翮。

### 137 東門之枌

東門之枌，宛丘之栩。子仲之子，婆娑其下。  
穀旦于差，南方之原。不績其麻，市也婆娑。  
穀旦于逝，越以鬻邁。視爾如苴，貽我握椒。

### 138 衡門

衡門之下，可以棲遲。泌之洋洋，可以樂飢。  
豈其食魚，必河之魴。豈其取妻，必齊之姜。  
豈其食魚，必河之鯉。豈其取妻，必宋之子。

### 139 東門之池

東門之池，可以漚麻。彼美淑姬，可與晤歌。  
東門之池，可以漚紵。彼美淑姬，可與晤語。  
東門之池，可以漚菅。彼美淑姬，可與晤言。

### 140 東門之楊

東門之楊，其葉牂牂。昏以為期，明星煌煌。  
東門之楊，其葉肺肺。昏以為期，明星哲哲。

### 141 墓門

墓門有棘，斧以斯之。夫也不良，國人知之。知而不已，誰昔然矣。  
墓門有梅，有鴉萃止。夫也不良，歌以訊之。訊予不顧，顛倒思予。

### 142 防有鵲巢

防有鵲巢，邛有旨苕。誰俯予美？心焉忉忉。  
中唐有甍，邛有旨鷓。誰俯予美？心焉惕惕。

### 143 月出

月出皎兮，佼人僚兮。舒窈糾兮，勞心悄兮。  
月出皓兮，佼人憫兮。舒懣受兮，勞心慄兮。  
月出照兮，佼人燎兮。舒夭紹兮，勞心慘兮。

### 144 株林

胡為乎株林，從夏南。匪適株林，從夏南。  
駕我乘馬，說于株野。乘我乘駒，朝食于株。

### 145 澤陂

彼澤之陂，有蒲與荷。有美一人，傷如之何。寤寐無為，涕泗滂沱。  
彼澤之陂，有蒲與蘭。有美一人，碩大且卷。寤寐無為，中心悁悁。  
彼澤之陂，有蒲菡萏。有美一人，碩大且儼。寤寐無為，輾轉伏枕。

#### 國風-檜風

#### 146 羔裘

羔裘逍遙，狐裘以朝。豈不爾思，勞心忉忉。  
羔裘翱翔，狐裘在堂。豈不爾思，我心憂傷。  
羔裘如膏，日出有曜。豈不爾思，中心是悼。

#### 147 素冠

庶見素冠兮，棘人樂樂兮，勞心博博兮。  
庶見素衣兮，我心傷悲兮，聊與子同歸兮。  
庶見素韞兮，我心蘊結兮，聊與子如一兮。

#### 148 隰有萇楚

隰有萇楚，猗儺其枝。天之沃沃，樂子之無知。  
隰有萇楚，猗儺其華。天之沃沃，樂子之無家。  
隰有萇楚，猗儺其實。天之沃沃，樂子之無室。

#### 149 匪風

匪風發兮，匪車偈兮。顧瞻周道，中心怛兮。  
匪風飄兮，匪車嘒兮。顧瞻周道，中心弔兮。  
誰能亨魚？漑之釜鬻。誰將西歸？懷之好音。

#### 國風-曹風

#### 150 蜉蝣

蜉蝣之羽，衣裳楚楚。心之憂矣，於我歸處。  
蜉蝣之翼，采采衣服。心之憂矣，於我歸息。  
蜉蝣掘閱，麻衣如雪。心之憂矣，於我歸說。

#### 151 候人

彼候人兮，何戈與祿，彼其之子，三百赤芾。  
維鷦在梁，不濡其翼。彼其之子，不稱其服。  
維鷦在梁，不濡其味。彼其之子，不遂其媾。  
蒼兮蔚兮，南山朝隴。婉兮孌兮，季女斯饑。

#### 152 鶉鳴

鶉鳴在桑，其子七兮。淑人君子，其儀一兮。其儀一兮，心如結兮。  
鶉鳴在桑，其子在梅。淑人君子，其帶伊絲。其帶伊絲，其弁伊騏。  
鶉鳴在桑，其子在棘。淑人君子，其儀不忒。其儀不忒，正是四國。

鳴鳩在桑，其子在榛。淑人君子，正是國人。正是國人，胡不萬年。

### 153 下泉

冽彼下泉，浸彼苞稂。愔我寤歎，念彼周京。

冽彼下泉，浸彼苞蕭。愔我寤歎，念彼京周。

冽彼下泉，浸彼苞菁。愔我寤歎，念彼京師。

芄芄黍苗，陰雨膏之。四國有王，邠伯勞之。

### 國風-豳風

### 154 七月

七月流火，九月授衣。

一之日觴發，二之日栗烈。無衣無褐，何以卒歲？

三之日于耜，四之日舉趾。同我婦子，饁彼南畝，田畯至喜。

七月流火，九月授衣。

春日載陽，有鳴倉庚。女執懿筐，遵彼微行，爰求柔桑。

春日遲遲，采繁祁祁。女心傷悲，殆及公子同歸。

七月流火，八月萑葦。

蠶月條桑，取彼斧斨，以伐遠揚，猗彼女桑。

七月鳴鵙，八月載績。載玄載黃，我朱孔陽，為公子裳。

四月秀萋，五月鳴蜩。

八月其穫，十月隕箠。一之日于貉，取彼狐貉，為公子裘。

二之日其同，載纘武功。言私其縱，獻豸于公。

五月斯螽動股，六月莎雞振羽。七月在野，八月在宇，九月在戶，

十月蟋蟀入我床下。

穹窒熏鼠，塞向墜戶。嗟我婦子，曰為改歲，入此室處。

六月食鬱及薺，七月亨葵及菽，八月剝棗。十月穫稻，為此春酒，以介眉壽。

七月食瓜，八月斷壺，九月叔苴。采荼薪樗，食我農夫。

九月築場圃，十月納禾稼。黍稷重穰，禾麻菽麥。

嗟我農夫！我稼既同，上入執宮功。

晝爾于茅，宵爾索綯，亟其乘屋，其始播百穀。

二之日鑿冰沖沖，三之日納于凌陰，四之日其蚤，獻羔祭韭。

九月肅霜，十月滌場。朋酒斯饗，曰殺羔羊。

躋彼公堂，稱彼兕觥，萬壽無疆！

## 155 鷓鴣

鷓鴣鷓鴣！既取我子，無毀我室。恩斯勤斯，鬻子之閔斯。  
迨天之未陰雨，徹彼桑土，綢繆牖戶。今女下民，或敢侮予。  
予手拮据，予所持荼，予所蓄租，予口卒瘁，曰予未有室家。  
予羽譙譙，予尾翛翛，予室翹翹。風雨所漂搖，予維音嘒嘒。

## 156 東山

我徂東山，惓惓不歸。我來自東，零雨其濛。我東曰歸，我心西悲。  
制彼裳衣，勿士行枚。蜎蜎者蠋，烝在桑野。敦彼獨宿，亦在車下。  
我徂東山，惓惓不歸。我來自東，零雨其濛。果臝之實，亦施於宇。  
伊威在室，蠨蛸在戶。町疃鹿場，熠熠宵行。不可畏也，伊可懷也。  
我徂東山，惓惓不歸，我來自東，零雨其濛。鸛鳴于垤，婦歎于室。  
洒埽穹窒，我征聿至。有敦瓜苦，烝在栗薪。自我不見，于今三年。  
我徂東山，惓惓不歸。我來自東，零雨其濛。倉庚于飛，熠熠其羽。  
之子于歸，皇駁其馬。親結其縵，九十其儀。其新孔嘉，其舊如之何？

## 157 破斧

既破我斧，又缺我斨。周公東征，四國是皇。哀我人斯，亦孔之將。  
既破我斧，又缺我錡。周公東征，四國是吡。哀我人斯，亦孔之嘉。  
既破我斧，又缺我鉞。周公東征，四國是遘。哀我人斯，亦孔之休。

## 158 伐柯

伐柯如何？匪斧不克。取妻如何？匪媒不得。  
伐柯伐柯，其則不遠。我邁之子，籩豆有踐。

## 159 九罭

九罭之魚，鱒魴。我覲之子，袞衣繡裳。  
鴻飛遵渚，公歸無所，於女信處。  
鴻飛遵陸，公歸不復，於女信宿。  
是以有袞衣兮，無以我公歸兮，無使我心悲兮。

## 160 狼跋

狼跋其胡，載疐其尾。公孫碩膚，赤烏几几。  
狼疐其尾，載跋其胡。公孫碩膚，德音不瑕。



## 59【詩經小雅 161-200】

### 小雅

#### 小雅-鹿鳴之什

##### 161 鹿鳴

呦呦鹿鳴，食野之苹。我有嘉賓，鼓瑟吹笙。  
吹笙鼓簧，承筐是將。人之好我，示我周行。  
呦呦鹿鳴，食野之蒿。我有嘉賓，德音孔昭。  
視民不怵，君子是則是傲。我有旨酒，嘉賓式燕以敖。  
呦呦鹿鳴，食野之芩。我有嘉賓，鼓瑟鼓琴。  
鼓瑟鼓琴，和樂且湛。我有旨酒，以燕樂嘉賓之心。

##### 162 四牡

四牡騑騑，周道倭遲，豈不懷歸。王事靡盬，我心傷悲。  
四牡騑騑，嘽嘽駱馬，豈不懷歸。王事靡盬，不遑啓處。  
翩翩者騅，載飛載下，集于苞栩。王事靡盬，不遑將父。  
翩翩者騅，載飛載止，集于苞杞。王事靡盬，不遑將母。  
駕彼四駱，載驟駸駸，豈不懷歸。是用作歌，將母來諭。

##### 163 皇皇者華

皇皇者華，于彼原隰。駉駉征夫，每懷靡及。  
我馬維駒，六轡如濡。載馳載驅，周爰咨諏。  
我馬維騏，六轡如絲。載馳載驅，周爰咨謀。  
我馬維駱，六轡沃若。載馳載驅，周爰咨度。  
我馬維駟，六轡既均。載馳載驅，周爰咨詢。

##### 164 常棣

常棣之華，鄂不韡韡。凡今之人，莫如兄弟。  
死喪之威，兄弟孔懷。原隰裒矣，兄弟求矣。  
脊令在原，兄弟急難。每有良朋，況也永歎。  
兄弟鬩于牆，外禦其務。每有良朋，烝也無戎。  
喪亂既平，既安且寧。雖有兄弟，不如友生。  
儻爾籩豆，飲酒之飫。兄弟既具，和樂且孺。  
妻子好合，如鼓瑟琴。兄弟既翕，和樂且湛。  
宜爾室家，樂爾妻帑。是究是圖，亶其然乎！

##### 165 伐木

伐木丁丁，鳥鳴嚶嚶。出自幽谷，遷于喬木。嚶其鳴矣，求其友聲。  
相彼鳥矣，猶求友聲；矧伊人矣，不求友生。神之聽之，終和且平。

伐木許許，醜酒有藇。既有肥羜，以速諸父。寧適不來，微我弗顧。  
於粢酒埽，陳饋八簋。既有肥牡，以速諸舅。寧適不來，微我有咎。  
伐木于阪，醜酒有衍。籩豆有踐，兄弟無遠。民之失德，乾餱以愆。  
有酒湑我，無酒酤我。坎坎鼓我，蹲蹲舞我。迨我暇矣，飲此湑矣。

### 166 天保

天保定爾，亦孔之固。俾爾單厚，何福不除？俾爾多益，以莫不庶。  
天保定爾，俾爾戩穀。罄無不宜，受天百祿。降爾遐福，維日不足。  
天保定爾，以莫不興。如山如阜，如岡如陵，如川之方至，以莫不增。  
吉蠲為饗，是用孝享。禴祠烝嘗，于公先王。君曰卜爾萬壽無疆。  
神之弔矣，詒爾多福。民之質矣，日用飲食。群黎百姓，徧為爾德。  
如月之恆，如日之升，如南山之壽，不騫不崩。如松柏之茂，  
無不爾或承。

### 167 采芣

采芣采芣，芣亦作止。曰歸曰歸，歲亦莫止。  
靡室靡家，玁狁之故。不遑啓居，玁狁之故。  
采芣采芣，芣亦柔止。曰歸曰歸，心亦憂止。  
憂心烈烈，載飢載渴。我戍未定，靡使歸聘。  
采芣采芣，芣亦剛止。曰歸曰歸，歲亦陽止。  
王事靡盬，不遑啓處。憂心孔疚，我行不來。  
彼爾維何？維常之華。彼路斯何？君子之車。  
戎車既駕，四牡業業。豈敢定居？一月三捷。  
駕彼四牡，四牡騤騤。君子所依，小人所腓。  
四牡翼翼，象弭魚服。豈不日戒，玁狁孔棘。  
昔我往矣，楊柳依依。今我來思，雨雪霏霏。  
行道遲遲，載渴載饑。我心傷悲，莫知我哀。

### 168 出車

我出我車，于彼牧矣。自天子所，謂我來矣。  
召彼僕夫，謂之載矣。王事多難，維其棘矣。  
我出我車，于彼郊矣。設此旄矣，建彼旄矣。  
彼旃旃斯，胡不旒旒？憂心悄悄，僕夫況瘁。  
王命南仲，往城于方。出車彭彭，旂旐央央。  
天子命我，城彼朔方。赫赫南仲，玁狁于襄。  
昔我往矣，黍稷方華；今我來思，雨雪載塗。  
王事多難，不遑啓居。豈不懷歸？畏此簡書。



嘒嘒草蟲，趯趯阜螽。未見君子，憂心忡忡。  
既見君子，我心則降。赫赫南仲，薄伐西戎。  
春日遲遲，卉木萋萋。倉庚喈喈，采芣祁祁。  
執訊獲醜，薄言還歸。赫赫南仲，玁狁于夷。

### 169 杕杜

有杕之杜，有睆其實。王事靡盬，繼嗣我日。  
日月陽止，女心傷止，征夫遑止。  
有杕之杜，其葉萋萋。王事靡盬，我心傷悲。  
卉木萋止，女心悲止，征夫歸止。  
陟彼北山，言采其杞。王事靡盬，憂我父母。  
檀車幘幘，四杜瘡瘡，征夫不遠。  
匪載匪來，憂心孔疚。期逝不至，而多為恤。  
卜筮偕止，會言近止，征夫邇止。

### 170 魚麗

魚麗于罍，鱮鯨。君子有酒，旨且多。  
魚麗于罍，魴鱧。君子有酒，多且旨。  
魚麗于罍，鰕鯉。君子有酒，旨且有。  
物其多矣，維其嘉矣。  
物其旨矣，維其偕矣。  
物其有矣，維其時矣。

### 小雅-南有嘉魚之什

#### 171 南有嘉魚

南有嘉魚，烝然罩罩。君子有酒，嘉賓式燕以樂。  
南有嘉魚，烝然汕汕。君子有酒，嘉賓式燕以衍。  
南有樛木，甘瓠纍之。君子有酒，嘉賓式燕綏之。  
翩翩者騅，烝然來思。君子有酒，嘉賓式燕又思。

#### 172 南山有臺

南山有臺，北山有萊。樂只君子，邦家之基。樂只君子，萬壽無期。  
南山有桑，北山有楊。樂只君子，邦家之光。樂只君子，萬壽無疆。  
南山有杞，北山有李。樂只君子，民之父母。樂只君子，德音不已。  
南山有栲，北山有杻。樂只君子，遐不眉壽。樂只君子，德音是茂。  
南山有枸，北山有楸。樂只君子，遐不黃耇。樂只君子，保艾爾後。

#### 174 蓼蕭

蓼彼蕭斯，零露漙兮。既見君子，我心寫兮。燕笑語兮，是以有譽處兮。

蓼彼蕭斯，零露瀼瀼。既見君子，為龍為光。其德不爽，壽考不忘。  
蓼彼蕭斯，零露泥泥。既見君子，孔燕豈弟。宜兄宜弟，令德壽豈。  
蓼彼蕭斯，零露濃濃。既見君子，脩革沖沖。和鸞雝雝，萬福攸同。

### 174 湛露

湛湛露斯，匪陽不晞。厭厭夜飲，不醉無歸。  
湛湛露斯，在彼豐草。厭厭夜飲，在宗載考。  
湛湛露斯，在彼杞棘。顯允君子，莫不令德。  
其桐其椅，其實離離。豈弟君子，莫不令儀。

### 175 彤弓

彤弓弨兮，受言藏之。我有嘉賓，中心貺之。鐘鼓既設，一朝饗之。  
彤弓弨兮，受言載之。我有嘉賓，中心喜之。鐘鼓既設，一朝右之。  
彤弓弨兮，受言橐之。我有嘉賓，中心好之。鐘鼓既設，一朝疇之。

### 176 菁菁者莪

菁菁者莪，在彼中阿。既見君子，樂且有儀。  
菁菁者莪，在彼中沚。既見君子，我心則喜。  
菁菁者莪，在彼中陵。既見君子，錫我百朋。  
汎汎楊舟，載沉載浮。既見君子，我心則休。

### 177 六月

六月棲棲，戎車既飭。四牡騤騤，載是常服。  
玁狁孔熾，我是用急。王于出征，以匡王國。  
比物四驪，閑之維則。維此六月，既成我服。  
我服既成，于三十里。王于出征，以佐天子。  
四牡修廣，其大有顛。薄伐玁狁，以奏膚公。  
有嚴有翼，共武之服。共武之服，以定王國。  
玁狁匪茹，整居焦穫。侵鎬及方，至于涇陽。  
織文鳥章，白旆央央。元戎十乘，以先啟行。  
戎車既安，如輕如軒。四牡既佶，既佶且閑。  
薄伐玁狁，至于大原。文武吉甫，萬邦為憲。  
吉甫燕喜，既多受祉。來歸自鎬，我行永久。  
飲御諸友，粼鱉膾鯉。侯誰在矣，張仲孝友。

### 178 采芑

薄言采芑，于彼新田，于此菑畝。方叔涖止，其車三千，師干之試。  
方叔率止，乘其四騏，四騏翼翼。路車有奭，簟茀魚服，鉤膺鞶革。  
薄言采芑，于彼新田，于此中鄉。方叔涖止，其車三千，旂旐央央。

方叔率止，約軹錯衡，八鸞瑤瑤。服其命服，朱芾斯皇，有瑤葱珩。  
馱彼飛隼，其飛戾天，亦集爰止。方叔涖止，其車三千，師干之試。  
方叔率止，鉦人伐鼓，陳師鞠旅。顯允方叔，伐鼓淵淵，振旅闐闐。  
蠢爾蠻荆，大邦為讎。方叔元老，克壯其猶。方叔率止，執訊獲醜。  
戎車嘽嘽，嘽嘽焯焯，如霆如雷。顯允方叔，征伐玁狁，蠻荆來威。

### 179 車攻

我車既攻，我馬既同。四牡龐龐，駕言徂東。  
田車既好，四牡孔阜。東有甫草，駕言行狩。  
之子于苗，選徒囂囂。建旄設旒，搏獸于敖。  
駕彼四牡，四牡奕奕。赤芾金鳥，會同有繹。  
決拾既佞，弓矢既調。射夫既同，助我舉柴。  
四黃既駕，兩驂不猗。不失其馳，舍矢如破。  
蕭蕭馬鳴，悠悠旆旌。徒御不驚，大庖不盈。  
之子于征，有聞無聲。允矣君子，展也大成。

### 180 吉日

吉日維戊，既伯既禱。田車既好，四牡孔阜。升彼大阜，從其群醜。  
吉日庚午，既差我馬。獸之所同，麇鹿麇麇。漆沮之從，天子之所。  
瞻彼中原，其祁孔有。儻儻俟俟，或群或友。悉率左右，以燕天子。  
既張我弓，既挾我矢。發彼小豸，殪此大兕。以御賓客，且以酌醴。

### 小雅-鴻雁之什

#### 181 鴻雁

鴻雁于飛，肅肅其羽。之子于征，劬勞于野。爰及矜人，哀此鰥寡。  
鴻雁于飛，集于中澤。之子于垣，百堵皆作。雖則劬勞，其究安宅。  
鴻雁于飛，哀鳴嗷嗷。維此哲人，謂我劬勞。維彼愚人，謂我宣驕。

#### 182 庭燎

夜如何其？夜未央！庭燎之光，君子至止，鸞聲將將。  
夜如何其？夜未艾！庭燎晰晰，君子至止，鸞聲噦噦。  
夜如何其？夜鄉晨！庭燎有輝，君子至止，言觀其旂。

#### 183 沔水

沔彼流水，朝宗于海。馱彼飛隼，載飛載止。  
嗟我兄弟，邦人諸友，莫肯念亂，誰無父母？  
沔彼流水，其流湯湯。馱彼飛隼，載飛載揚。  
念彼不蹟，載起載行，心之憂矣，不可弭忘。  
馱彼飛隼，率彼中陵。民之訛言，寧莫之懲。我友敬矣，讒言其興。

## 184 鶴鳴

鶴鳴于九皋，聲聞于野。魚潛在淵，或在于渚。  
樂彼之園，爰有樹檀，其下維樛。它山之石，可以為錯。  
鶴鳴于九皋，聲聞于天。魚在于渚，或潛在淵。  
樂彼之園，爰有樹檀，其下維穀。它山之石，可以攻玉。

## 185 祈父

祈父，予王之爪牙。胡轉予于恤？靡所止居。  
祈父，予王之爪士。胡轉予于恤？靡所底止。  
祈父，亶不聰。胡轉予于恤？有母之尸饗。

## 186 白駒

皎皎白駒，食我場苗；絜之維之，以永今朝。所謂伊人，於焉逍遙。  
皎皎白駒，食我場藿；絜之維之，以永今夕。所謂伊人，於焉嘉客。  
皎皎白駒，貴然來思。爾公爾侯，逸豫無期。慎爾優游，勉爾遁思。  
皎皎白駒，在彼空谷。生芻一束，其人如玉。毋金玉爾音，而有遐心。

## 187 黃鳥

黃鳥黃鳥，無集于穀，無啄我粟。  
此邦之人，不我肯穀。言旋言歸，復我邦族。  
黃鳥黃鳥，無集于桑，無啄我梁。  
此邦之人，不可與明。言旋言歸，復我諸兄。  
黃鳥黃鳥，無集于栩，無啄我黍。  
此邦之人，不可與處。言旋言歸，復我諸父。

## 188 我行其野

我行其野，蔽芾其樗。昏姻之故，言就爾居。爾不我畜，復我邦家。  
我行其野，言采其蓫。昏姻之故，言就爾宿。爾不我畜，言歸斯復。  
我行其野，言采其菑。不思舊姻，求爾新特。成不以富，亦祇以異。

## 189 斯干

秩秩斯干，幽幽南山。如竹苞矣，如松茂矣。  
兄及弟矣，式相好矣，無相猶矣。  
似續妣祖，築室百堵，西南其戶。爰居爰處，爰笑爰語。  
約之閣閣，椽之橐橐。風雨攸除，鳥鼠攸去，君子攸芋。  
如跂斯翼，如矢斯棘，如鳥斯革，如翬斯飛，君子攸躋。  
殖殖其庭，有覺其楹。噲噲其正，嘖嘖其冥，君子攸寧。  
下莞上簟，乃安斯寢。乃寢乃興，乃占我夢。  
吉夢維何？維熊維羆，維虺維蛇。

大人占之：維熊維羆，男子之祥；維虺維蛇，女子之祥。  
乃生男子，載寢之牀，載衣之裳，載弄之璋。  
其泣喤喤，朱芾斯皇，室家君王。  
乃生女子，載寢之地，載衣之裼，載弄之瓦。  
無非無儀，唯酒食是議，無父母詒懼。  
斯干九章，四章章七句，五章章五句。

### 190 無羊

誰謂爾無羊？三百維群；誰謂爾無牛？九十其犝。  
爾羊來思，其角濺濺。爾牛來思，其耳溼溼。  
或降于阿，或飲于池，或寢或訛。  
爾牧來思，何蓑何笠，或負其餼。三十維物，爾牲則具。  
爾牧來思，以薪以蒸，以雌以雄。  
爾羊來思，矜矜兢兢，不騫不崩。麾之以肱，畢來既升。  
牧人乃夢：眾維魚矣，旒維旟矣。  
大人占之：眾維魚矣，實維豐年；旒維旟矣，室家溱溱。

### 小雅-節南山之什

#### 191 節南山

節彼南山，維石巖巖。赫赫師尹，民具爾瞻。  
憂心如惓，不敢戲談。國既卒斬，何用不監。  
節彼南山，有實其猗。赫赫師尹，不平謂何。  
天方薦瘡，喪亂弘多。民言無嘉，憯莫懲嗟。  
尹氏大師，維周之氏。秉國之均，四方是維。  
天子是毗，俾民不迷。不弔昊天，不宜空我師。  
弗躬弗親，庶民弗信。弗問弗仕，勿罔君子。  
式夷式已，無小人殆。瑣瑣姻亞，則無臚仕。  
昊天不傭，降此鞠訕。昊天不惠，降此大戾。  
君子如屆，俾民心闕；君子如夷，惡怒是違。  
不弔昊天，亂靡有定。式月斯生，俾民不寧。  
憂心如醒，誰秉國成？不自為政，卒勞百姓。  
駕彼四牡，四牡項領。我瞻四方，蹙蹙靡所騁。  
方茂爾惡，相爾矛矣。既夷既懌，如相齟矣。  
昊天不平，我王不寧。不懲其心，覆怨其正。  
家父作誦，以究王訕。式訛爾心，以畜萬邦。

## 192 正月

正月繁霜，我心憂傷。民之訛言，亦孔之將。  
念我獨兮，憂心京京。哀我小心，癩憂以痒。  
父母生我，胡俾我瘡？不自我先，不自我後。  
好言自口，莠言自口。憂心愈愈，是以有侮。  
憂心惻惻，念我無祿。民之無辜，并其臣僕。  
哀我人斯，于何從祿？瞻烏爰止，于誰之屋？  
瞻彼中林，侯薪侯蒸。民今方殆，視天夢夢。  
既克有定，靡人弗勝。有皇上帝，伊誰云憎？  
謂山蓋卑，為岡為陵。民之訛言，寧莫之懲。  
召彼故老，訊之占夢。具曰予聖，誰知烏之雌雄？  
謂天蓋高，不敢不局。謂地蓋厚，不敢不躋。  
維號斯言，有倫有脊。哀今之人，胡為虺蜴？  
瞻彼阪田，有苑其特。天之扞我，如不我克。  
彼求我則，如不我得。執我仇仇，亦不我力。  
心之憂矣，如或結之。今茲之正，胡然厲矣？  
燎之方揚，寧或滅之？赫赫宗周，褒姒威之。  
終其永懷，又窘陰雨。其車既載，乃棄爾輔。載輸爾載，將伯助予！  
無棄爾輔，員于爾輻。屢顧爾僕，不輸爾載。終踰絕險，曾是不意？  
魚在于沼，亦匪克樂。潛雖伏矣，亦孔之炤。憂心慘慘，念國之為虐。  
彼有旨酒，又有嘉殽。洽比其鄰，昏姻孔云。念我獨兮，憂心慙慙。  
仳仳彼有屋，蔌蔌方有穀。民今之無祿，天天是椽。嗇矣富人，  
哀此惻獨！

## 193 十月之交

十月之交，朔月辛卯。日有食之，亦孔之醜。  
彼月而微，此日而微。今此下民，亦孔之哀。  
日月告凶，不用其行。四國無政，不用其良。  
彼月而食，則維其常。此日而食，于何不臧。  
燁燁震電，不寧不令。百川沸騰，山冢峩崩。  
高岸為谷，深谷為陵。哀今之人，胡憊莫懲。  
皇父卿士，番維司徒。家伯冢宰，仲允膳夫。  
聚子內史，蹶維趣馬。楛維師氏，豔妻煽方處。  
抑此皇父，豈曰不時。胡為我作，不即我謀。  
徹我牆屋，田卒汙萊。曰予不戕，禮則然矣。

皇父孔聖，作都于向。擇三有事，宣侯多藏。  
不憚遺一老，俾守我王。擇有車馬，以居徂向。  
黽勉從事，不敢告勞。無罪無辜，讒口囂囂。  
下民之孽，匪降自天。噂沓背憎，職競由人。  
悠悠我里，亦孔之痍。四方有羨，我獨居憂。  
民莫不逸，我獨不敢休。天命不徼，我不敢傲我友自逸。

### 194 雨無正

浩浩昊天，不駿其德。降喪饑饉，斬伐四國。  
旻天疾威，弗慮弗圖。  
舍彼有罪，既伏其辜。若此無罪，淪胥以鋪。  
周宗既滅，靡所止戾。正大夫離居，莫知我勸。  
三事大夫，莫肯夙夜。  
邦君諸侯，莫肯朝夕。庶曰式臧，覆出為惡。  
如何昊天？辟言不信。如彼行邁，則靡所臻。  
凡百君子，各敬爾身。胡不相畏，不畏于天？  
戎成不退，饑成不遂。曾我讐御，憊憊日瘁。  
凡百君子，莫肯用訊。聽言則答，譖言則退。  
哀哉不能言，匪舌是出，維躬是瘁。  
哿矣能言，巧言如流，俾躬處休。  
維曰于仕，孔棘且殆。云不可使，得罪于天子；亦云可使，怨及朋友。  
謂爾遷于王都，曰予未有室家。鼠思泣血，無言不疾。昔爾出居，誰從作爾室？

### 195 小旻

旻天疾威，敷于下土。謀猶回遹，何日斯沮。  
謀臧不從，不臧覆用。我視謀猶，亦孔之邛。  
滄滄訛訛，亦孔之哀。謀之其臧，則具是違。  
謀之不臧，則具是依。我視謀猶，伊于胡底。  
我龜既厭，不我告猶。謀夫孔多，是用不集。  
發言盈庭，誰敢執其咎？如匪行邁謀，是用不得于道。  
哀哉為猶，匪先民是程，匪大猶是經，維邇言是聽，維邇言是爭。  
如彼築室于道謀，是用不潰于成。  
國雖靡止，或聖或否。民雖靡盬，或哲或謀，或肅或艾。  
如彼泉流，無淪胥以敗。  
不敢暴虎，不敢馮河。人知其一，莫知其他。

戰戰兢兢，如臨深淵，如履薄冰。

### 196 小宛

宛彼鳴鳩，翰飛戾天。我心憂傷，念昔先人。明發不寐，有懷二人。  
人之齊聖，飲酒溫克。彼昏不知，壹醉日富。各敬爾儀，天命不又。  
中原有菽，庶民采之。螟蛉有子，蜾蠃負之。教誨爾子，式穀似之。  
題彼脊令，載飛載鳴。我日斯邁，而月斯征。夙興夜寐，毋忝爾所生。  
交交桑扈，率場啄粟。哀我填寡，宜岸宜獄。握粟出卜，自何能穀？  
溫溫恭人，如集于木；惴惴小心，如臨于谷；戰戰兢兢，如履薄冰。

### 197 小弁

弁彼鸞斯，歸飛提提。民莫不穀，我獨于罹。  
何辜于天，我罪伊何？心之憂矣，云如之何？  
踳踳周道，鞠為茂草。我心憂傷，惄焉如擣。  
假寐永歎，維憂用老。心之憂矣，疢如疾首。  
維桑與梓，必恭敬止。靡瞻匪父，靡依匪母。  
不屬于毛，不罹于裏。天之生我，我辰安在？  
菀彼柳斯，鳴蜩嘒嘒。有漙者淵，萑葦淠淠。  
譬彼舟流，不知所屆。心之憂矣，不遑假寐。  
鹿斯之奔，維足伎伎。雉之朝雊，尚求其雌。  
譬彼壞木，疾用無枝。心之憂矣，寧莫之知。  
相彼投兔，尚或先之。行有死人，尚或瑾之。  
君子秉心，維其忍之。心之憂矣，涕既隕之。  
君子信讒，如或疇之。君子不惠，不舒究之。  
伐木掎矣，析薪柅矣。舍彼有罪，予之佗矣。  
莫高匪山，莫浚匪泉。君子無易由言，耳屬于垣。  
無逝我梁，無發我笱。我躬不閱，遑恤我後。

### 198 巧言

悠悠昊天，曰父母且。無罪無辜，亂如此憮。  
昊天已威，予慎無罪；昊天大憮，予慎無辜。  
亂之初生，僭始既涵；亂之又生，君子信讒。  
君子如怒，亂庶遄沮；君子如祉，亂庶遄已。  
君子屢盟，亂是用長；君子信盜，亂是用暴。  
盜言孔甘，亂是用餒。匪其止共，維王之邛。  
奕奕寢廟，君子作之。秩秩大猷，聖人莫之。  
他人有心，予忖度之。躍躍龜兔，遇犬獲之。



荏染柔木，君子樹之。往來行言，心焉數之。  
蛇蛇碩言，出自口矣。巧言如簧，顏之厚矣。  
彼何人斯，居河之麋。無拳無勇，職為亂階。  
既微且蘧，爾勇伊何？為猶將多，爾居徒幾何？

### 199 何人斯

彼何人斯？其心孔艱。胡逝我梁，不入我門。伊誰云從？維暴之云。  
二人從行，誰為此禍？胡逝我梁，不入唁我。始者不如今，云不我可。  
彼何人斯？胡逝我陳。我聞其聲，不見其身。不媿于人，不畏于天。  
彼何人斯？其為飄風。胡不自北？胡不自南？胡逝我梁？祇攪我心。  
爾之安行，亦不遑舍。爾之亟行，遑脂爾車。壹者之來，云何其盱。  
爾還而入，我心易也。還而不入，否難知也。壹者之來，俾我祇也。  
伯氏吹壎，仲氏吹篪。及爾如貫，諒不我知。出此三物，以詛爾斯。  
為鬼為蜮，則不可得。有覩面目，視人罔極。作此好歌，以極反側。

### 200 巷伯

萋兮斐兮，成是貝錦。彼譖人者，亦已大甚。  
哆兮侈兮，成是南箕。彼譖人者，誰適與謀？  
緝緝翩翩，謀欲譖人。慎爾言也，謂爾不信。  
捷捷幡幡，謀欲譖言。豈不爾受，既其女遷。  
驕人好好，勞人草草。蒼天蒼天！視彼驕人，矜此勞人。  
彼譖人者，誰適與謀？取彼譖人，投畀豺虎。  
豺虎不食，投畀有北。有北不受，投畀有昊。  
楊園之道，猗于畝丘。寺人孟子，作為此詩。凡百君子，敬而聽之。



## 60【詩經小雅 201-234】

### 小雅-谷風之什

#### 201 谷風

習習谷風，維風及雨。將恐將懼，維予與女；將安將樂，女轉棄予。  
習習谷風，維風及頹。將恐將懼，寘予于懷；將安將樂，棄予如遺。  
習習谷風，維山崔嵬。無草不死，無木不萎。忘我大德，思我小怨。

#### 202 蓼莪

蓼蓼者莪，匪莪伊蒿。哀哀父母，生我劬勞。  
蓼蓼者莪，匪莪伊蔚。哀哀父母，生我勞瘁。  
餅之罄矣，維罍之耻。鮮民之生，不如死之久矣！  
無父何怙？無母何恃？出則銜恤，入則靡至。

父兮生我，母兮鞠我。拊我畜我，長我育我。  
顧我復我，出入腹我。欲報之德，昊天罔極！  
南山烈烈，飄風發發。民莫不穀，我獨何害？  
南山律律，飄風弗弗。民莫不穀，我獨不卒。

### 203 大東

有饒簋飧，有捄棘匕。周道如砥，其直如矢。  
君子所履，小人所視。睠言顧之，潸焉出涕。  
小東大東，杼柚其空。糾糾葛屨，可以履霜。  
佻佻公子，行彼周行，既往既來，使我心疚。  
有冽沈泉，無浸穫薪。契契寤歎，哀我憚人。  
薪是穫薪，尚可載也。哀我憚人，亦可息也。  
東人之子，職勞不來；西人之子，粲粲衣服；  
舟人之子，熊羆是裘；私人之子，百僚是試。  
或以其酒，不以其漿；韜韜佩璲，不以其長。  
維天有漢，監亦有光。跂彼織女，終日七襄。  
雖則七襄，不成報章。睠彼牽牛，不以服箱。  
東有啓明，西有長庚。有捄天畢，載施之行。  
維南有箕，不可以簸揚。維北有斗，不可以挹酒漿。  
維南有箕，載翕其舌。維北有斗，西柄之揭。

### 204 四月

四月維夏，六月徂暑。先祖匪人，胡寧忍予。  
秋日淒淒，百卉具腓。亂離瘼矣，爰其適歸。  
冬日烈烈，飄風發發。民莫不穀，我獨何害。  
山有嘉卉，侯栗侯梅。廢為殘賊，莫知其尤。  
相彼泉水，載清載濁。我日構禍，曷云能穀。  
滔滔江漢，南國之紀。盡瘁以仕，寧莫我有。  
匪鶉匪鳶，翰飛戾天。匪鱣匪鮪，潛逃于淵。  
山有蕨薇，隰有杞棗。君子作歌，維以告哀。

### 205 北山

陟彼北山，言采其杞。偕偕士子，朝夕從事。王事靡盬，憂我父母。  
溥天之下，莫非王土；率土之濱，莫非王臣。大夫不均，我從事獨賢。  
四牡彭彭，王事傍傍。嘉我未老，鮮我方將。旅力方剛，經營四方。  
或燕燕居息，或盡瘁事國，或息偃在牀，或不已于行。  
或不知叫號，或慘慘劬勞，或棲遲偃仰，或王事鞅掌。

或湛樂飲酒，或慘慘畏咎，或出入風議，或靡事不為。

## 206 無將大車

無將大車，祇自塵兮。無思百憂，祇自疚兮。

無將大車，維塵冥冥。無思百憂，不出于頰。

無將大車，維塵離兮。無思百憂，祇自重兮。

## 207 小明

明明上天，照臨下土。我征徂西，至于芄野。二月初吉，載離寒暑。

心之憂矣，其毒大苦。念彼共人，涕零如雨。豈不懷歸，畏此罪罟。

昔我往矣，日月方除。曷云其還？歲聿云莫。念我獨兮，我事孔庶。

心之憂矣，憚我不暇。念彼共人，睠睠懷顧。豈不懷歸？畏此譴怒。

昔我往矣，日月方奧。曷云其還？政事愈蹙。歲聿云莫，采蕭穫菽。

心之憂矣，自詒伊戚。念彼共人，興言出宿。豈不懷歸？畏此反覆。

嗟爾君子，無恆安處。靖共爾位，正直是與。神之聽之，式穀以女。

嗟爾君子，無恆安息。靖共爾位，好是正直。神之聽之，介爾景福。

## 208 鼓鐘

鼓鐘將將，淮水湯湯，憂心且傷。淑人君子，懷允不忘。

鼓鐘喈喈，淮水潛潛，憂心且悲。淑人君子，其德不回。

鼓鐘伐鼈，淮有三洲，憂心且妯。淑人君子，其德不猶。

鼓鍾欽欽，鼓瑟鼓琴，笙磬同音。以雅以南，以籥不僭。

## 209 楚茨

楚楚者茨，言抽其棘。自昔何為？我蓺黍稷。我黍與與，我稷翼翼。

我倉既盈，我庾維億。以為酒食，以饗以祀。以妥以侑，以介景福。

濟濟跄跄，絜爾牛羊，以往烝嘗。或剝或亨，或肆或將。祝祭于祊，

祀事孔明，先祖是皇，神保是饗。孝孫有慶，報以介福，萬壽無疆。

執爨蹠蹠，為俎孔碩，或燔或炙。君婦莫莫，為豆孔庶，為賓為客。

獻醕交錯，禮儀卒度，笑語卒獲。神保是格，報以介福，萬壽攸酢。

我孔熯矣，式禮莫愆。工祝致告，徂賚孝孫。苾芬孝祀，神嗜飲食，

卜爾百福，如幾如式，既齊既稷，既匡既勅。永錫爾極，時萬時億。

禮儀既備，鍾鼓既戒。孝孫徂位，工祝致告。神具醉止，皇尸載起。

鼓鍾送尸，神保聿歸。諸宰君婦，廢徹不遲。諸父兄弟，備言燕私。

樂具入奏，以綏後祿。爾殽既將，莫怨具慶。既醉既飽，小大稽首。

神嗜飲食，使君壽考。孔惠孔時，維其盡之。子子孫孫，勿替引之。

## 210 信南山

信彼南山，維禹甸之。昉昉原隰，曾孫田之。我疆我理，南東其畝。  
上天同雲，雨雪雰雰。益之以霡霂，既優既渥，既霑既足，生我百穀。  
疆場翼翼，黍稷彧彧。曾孫之穡，以為酒食。畀我尸賓，壽考萬年。  
中田有廬，疆場有瓜。是剝是菹，獻之皇祖。曾孫壽考，受天之祜。  
祭以清酒，從以騂牡，享于祖考。執其鸞刀，以啓其毛，取其血膋。  
是烝是享，苾苾芬芬，祀事孔明。先祖是皇，報以介福，萬壽無疆。

### 小雅-甫田之什

## 211 甫田

倬彼甫田，歲取十千。我取其陳，食我農人。  
自古有年。今適南畝，或耘或耔，黍稷薿薿。攸介攸止，烝我髦士。  
以我齊明，與我犧羊，以社以方。我田既臧，農夫之慶。  
琴瑟擊鼓，以御田祖，以祈甘雨，以介我稷黍，以穀我士女。  
曾孫來止，以其婦子，饁彼南畝，田畯至喜。攘其左右，嘗其旨否。  
禾易長畝，終善且有。曾孫不怒，農夫克敏。  
曾孫之稼，如茨如梁；曾孫之庾，如坻如京。  
乃求千斯倉，乃求萬斯箱。黍稷稻粱，農夫之慶。報以介福，萬壽無疆。

## 212 大田

大田多稼，既種既戒，既備乃事。  
以我覃耜，俶載南畝，播厥百穀，既庭且碩，曾孫是若。  
既方既皂，既堅既好，不稂不莠。  
去其螟螣，及其蠹賊，無害我田穉。田祖有神，秉畀炎火。  
有渰萋萋，興雨祈祈，雨我公田，遂及我私。  
彼有不穫穉，此有不斂穧；彼有遺秉，此有滯穗，伊寡婦之利。  
曾孫來止，以其婦子，饁彼南畝，田畯至喜。  
來方禋祀，以其騂黑，與其黍稷。以享以祀，以介景福。

## 213 瞻彼洛矣

瞻彼洛矣，維水泱泱。君子至止，福祿如茨。韎韐有奭，以作六師。  
瞻彼洛矣，維水泱泱。君子至止，韎琫有珌。君子萬年，保其家室。  
瞻彼洛矣，維水泱泱。君子至止，福祿既同。君子萬年，保其家邦。

## 214 裳裳者華

裳裳者華，其葉湑兮。我覯之子，我心寫兮。我心寫兮，是以有譽處兮。  
裳裳者華，芸其黃矣。我覯之子，維其有章矣。維其有章矣，是以有慶矣。  
裳裳者華，或黃或白。我覯之子，乘其四駱。乘其四駱，六轡沃若。

左之左之，君子宜之。右之右之，君子有之。維其有之，是以似之。

### 215 桑扈

交交桑扈，有鶯其羽。君子樂胥，受天之祜。  
交交桑扈，有鶯其領。君子樂胥，萬邦之屏。  
之屏之翰，百辟為憲。不戢不難，受福不那。  
兕觥其觶，旨酒思柔。彼交匪敖，萬福來求。

### 216 鴛鴦

鴛鴦于飛，畢之羅之。君子萬年，福祿宜之。  
鴛鴦在梁，戢其左翼。君子萬年，宜其遐福。  
乘馬在廐，摧之秣之。君子萬年，福祿艾之。  
乘馬在廐，秣之摧之。君子萬年，福祿綏之。

### 217 頍弁

有頍者弁，實維伊何？爾酒既旨，爾殽既嘉。豈伊異人，兄弟匪他。  
薦與女蘿，施于松柏。未見君子，憂心弈弈；既見君子，庶幾說懌。  
有頍者弁，實維何期？爾酒既旨，爾殽既時。豈伊異人，兄弟具來。  
薦與女蘿，施于松上。未見君子，憂心怲怲；既見君子，庶幾有臧。  
有頍者弁，實維在首。爾酒既旨，爾殽既阜。豈伊異人，兄弟甥舅。  
如彼雨雪，先集維霰。死喪無日，無幾相見。樂酒今夕，君子維宴。

### 218 車牽

間關車之牽兮，思變季女逝兮。匪飢匪渴，德音來括。雖無好友，式燕且喜。  
依彼平林，有集維鷗。辰彼碩女，令德來教。式燕且譽，好爾無射。  
雖無旨酒，式飲庶幾；雖無嘉殽，式食庶幾；雖無德與女，式歌且舞。  
陟彼高岡，析其柞薪；析其柞薪，其葉湑兮。鮮我覯爾，我心寫兮。  
高山仰止，景行行止。四牡騑騑，六轡如琴。覯爾新昏，以慰我心。

### 219 青蠅

營營青蠅，止于樊。豈弟君子，無信讒言。  
營營青蠅，止于棘。讒人罔極，交亂四國。  
營營青蠅，止于榛。讒人罔極，構我二人。

### 220 賓之初筵

賓之初筵，左右秩秩。籩豆有楚，殽核維旅。酒既和旨，飲酒孔偕。  
鐘鼓既設，舉疇逸逸。大侯既抗，弓矢斯張。射夫既同，獻爾發功。  
發彼有的，以祈爾爵。  
籥舞笙鼓，樂既和奏。烝飭烈祖，以洽百禮。百禮既至，有壬有林。  
錫爾純嘏，子孫其湛。其湛曰樂，各奏爾能。賓載手仇，室人入又。

酌彼康爵，以奏爾時。

賓之初筵，溫溫其恭。其未醉止，威儀反反。曰既醉止，威儀幡幡。

舍其坐遷，屢舞僊僊。其未醉止，威儀抑抑。曰既醉止，威儀忸忸。

是曰既醉，不知其秩。

賓既醉止，載號載呶。亂我籩豆，屢舞僛僛。

是曰既醉，不知其郵；側弁之俄，屢舞傴傴。

既醉而出，並受其福；醉而不出，是謂伐德。飲酒孔嘉，維其令儀。

凡此飲酒，或醉或否。既立之監，或佐之史。

彼醉不臧，不醉反耻。式勿從謂，無俾大怠。

匪言勿言，匪由勿語。由醉之言，俾出童羖。三爵不識，矧敢多又。

### 小雅-魚藻之什

#### 221 魚藻

魚在在藻，有頌其首。王在在鎬，豈樂飲酒。

魚在在藻，有莘其尾。王在在鎬，飲酒樂豈。

魚在在藻，依于其蒲。王在在鎬，有那其居。

#### 222 采菽

采菽采菽，筐之筥之。君子來朝，何錫予之？

雖無予之，路車乘馬。又何予之，玄袞及黼。

觴沸檻泉，言采其芹。君子來朝，言觀其旂。

其旂淠淠，鸞聲嘒嘒。載駟載駟，君子所屆。

赤芾在股，邪幅在下。彼交匪紆，天子所予。

樂只君子，天子命之。樂只君子，福祿申之。

維柞之枝，其葉蓬蓬。樂只君子，殿天子之邦。

樂只君子，萬福攸同。平平左右，亦是率從。

汎汎揚舟，緋纜維之。樂只君子，天子葵之。

樂只君子，福祿膍之。優哉游哉，亦是戾矣。

#### 223 角弓

騂騂角弓，翩其反矣。兄弟昏姻，無胥遠矣。

爾之遠矣，民胥然矣。爾之教矣，民胥傲矣。

此令兄弟，綽綽有裕。不令兄弟，交相為瘡。

民之無良，相怨一方，受爵不讓，至于已斯亡。

老馬反為駒，不顧其後。如食宜飴，如酌孔取。

毋教猱升木，如塗塗附。君子有徽猷，小人與屬。

雨雪瀼瀼，見晛曰消。莫肯下遺，式居婁驕。

雨雪浮浮，見睍曰流。如蠻如髦，我是用憂。

## 224 菀柳

有菀者柳，不尚息焉。上帝甚蹈，無自暱焉。俾予靖之，後予極焉。

有菀者柳，不尚愒焉。上帝甚蹈，無自瘵焉。俾予靖之，後予邁焉。

有鳥高飛，亦傅于天。彼人之心，于何其臻？曷予靖之，居以凶矜。

## 225 都人士

彼都人士，狐裘黃黃。其容不改，出言有章。行歸于周，萬民所望。

彼都人士，臺笠緇撮。彼君子女，綢直如髮。我不見兮，我心不說。

彼都人士，充耳琇實。彼君子女，謂之尹吉。我不見兮，我心苑結。

彼都人士，垂帶而厲。彼君子女，卷髮如蠶。我不見兮，言從之邁。

匪伊垂之，帶則有餘。匪伊卷之，髮則有旃。我不見兮，云何盱矣。

## 226 采綠

終朝采綠，不盈一掬。予髮曲局，薄言歸沐。

終朝采藍，不盈一襜。五日為期，六日不詹。

之子于狩，言韞其弓。之子于釣，言綸之繩。

其釣維何？維魴及鱖。維魴及鱖，薄言觀者。

## 227 黍苗

芄芄黍苗，陰雨膏之。悠悠南行，召伯勞之。

我任我輦，我車我牛。我行既集，蓋云歸哉。

我徒我御，我師我旅。我行既集，蓋云歸處。

肅肅謝功，召伯營之。烈烈征師，召伯成之。

原隰既平，泉流既清。召伯有成，王心則寧。

## 228 隰桑

隰桑有阿，其葉有難。既見君子，其樂如何？

隰桑有阿，其葉有沃。既見君子，云何不樂？

隰桑有阿，其葉有幽。既見君子，德音孔膠。

心乎愛矣，遐不謂矣，中心藏之，何日忘之。

## 229 白華

白華菅兮，白茅束兮。之子之遠，俾我獨兮。

英英白雲，露彼菅茅。天步艱難，之子不猶。

漉池北流，浸彼稻田。嘯歌傷懷，念彼碩人。

樵彼桑薪，印烘于燧。維彼碩人，實勞我心。

鼓鍾于宮，聲聞于外。念子懆懆，視我邁邁。

有鷺在梁，有鶴在林。維彼碩人，實勞我心。

鴛鴦在梁，戢其左翼。之子無良，二三其德。  
有扁斯石，履之卑兮。之子之遠，俾我疢兮。

### 230 絲蠻

絲蠻黃鳥，止于丘阿。道之云遠，我勞如何。  
飲之食之，教之誨之。命彼後車，謂之載之。  
絲蠻黃鳥，止于丘隅。豈敢憚行，畏不能趨。  
飲之食之，教之誨之。命彼後車，謂之載之。  
絲蠻黃鳥，止于丘側。豈敢憚行，畏不能極。  
飲之食之，教之誨之。命彼後車，謂之載之。

### 231 瓠葉

幡幡瓠葉，采之亨之。君子有酒，酌言嘗之。  
有兔斯首，炮之燔之。君子有酒，酌言獻之。  
有兔斯首，燔之炙之。君子有酒，酌言酢之。  
有兔斯首，燔之炮之。君子有酒，酌言醕之。

### 232 漸漸之石

漸漸之石，維其高矣。山川悠遠，維其勞矣。武人東征，不遑朝矣。  
漸漸之石，維其卒矣。山川悠遠，曷其沒矣。武人東征，不皇出矣。  
有豕白蹄，烝涉波矣。月離于畢，俾滂沱矣。武人東征，不皇他矣。

### 233 苕之華

苕之華，芸其黃矣。心之憂矣，維其傷矣。  
苕之華，其葉青青。知我如此，不如無生。  
牂羊墳首，三星在罍，人可以食，鮮可以飽。

### 234 何草不黃

何草不黃，何日不行。何人不將，經營四方。  
何草不玄，何人不矜。哀我征夫，獨為匪民。  
匪兕匪虎，率彼曠野。哀我征夫，朝夕不暇。  
有芄者狐，率彼幽草。有棧之車，行彼周道。



## 61 【詩經大雅 235-265】

### 大雅-文王之什

#### 235 文王

文王在上，於昭于天，周雖舊邦，其命維新。  
有周不顯，帝命不時，文王陟降，在帝左右。



亶亶文王，令聞不已，陳錫哉周，侯文王孫子。  
文王孫子，本支百世，凡周之士，不顯亦世。  
世之不顯，厥猶翼翼，思皇多士，生此王國。  
王國克生，維周之楨，濟濟多士，文王以寧。  
穆穆文王，於緝熙敬止，假哉天命，有商孫子。  
商之孫子，其麗不億，上帝既命，侯于周服。  
侯服于周，天命靡常，殷士膚敏，裸將于京。  
厥作裸將，常服黼冔，王之蓋臣，無念爾祖。  
無念爾祖，聿脩厥德，永言配命，自求多福。  
殷之未喪師，克配上帝，宜鑒于殷，駿命不易。  
命之不易，無遏爾躬，宣昭義問，有虞殷自天。  
上天之載，無聲無臭，儀刑文王，萬邦作孚。

### 236 大明

明明在下，赫赫在上，天難忱斯，不易維王。天位殷適，使不挾四方。  
摯仲氏任，自彼殷商，來嫁于周，曰嬪于京。乃及王季，維德之行。  
大任有身，生此文王。  
維此文王，小心翼翼，昭事上帝，聿懷多福。厥德不回，以受方國。  
天監在下，有命既集，文王初載，天作之合。在洽之陽，在渭之涘。  
文王嘉止，大邦有子。  
大邦有子，倪天之妹，  
文定厥祥，親迎于渭。造舟為梁，不顯其光。  
有命自天，命此文王，于周于京，纘女維莘。長子維行，  
篤生武王，保右命爾，燮伐大商。  
殷商之旅，其會如林，矢于牧野，維予侯興。  
上帝臨女，無貳爾心。  
牧野洋洋，檀車煌煌，駟騶彭彭，  
維師尚父。時維鷹揚，涼彼武王，  
肆伐大商，會朝清明。

### 237 緜

緜緜瓜瓞，民之初生，自土沮漆。古公亶父，陶復陶穴，未有家室。  
古公亶父，來朝走馬，率西水滸，至于岐下。爰及姜女，聿來胥宇。  
周原膴膴，堇荼如飴，爰始爰謀，爰契我龜。曰止曰時，築室于茲。  
迺慰迺止，迺左迺右，迺疆迺理，迺宣迺畝。自西徂東，周爰執事。  
乃召司空，乃召司徒，俾立室家。其繩則直，縮版以載，作廟翼翼。

掄之陲陲，度之薨薨，築之登登，削屢馮馮。百堵皆興，鼙鼓弗勝。  
迺立臯門，臯門有伉，迺立應門，應門將將。迺立冢土，戎醜攸行。  
肆不殄厥愠，亦不隕厥問，柞棫拔矣，行道兌矣。混夷駸矣，維其喙矣。  
虞芮質厥成，文王蹶厥生。予曰有疏附，予曰有先後，予曰有奔奏，予曰有禦侮。

### 238 棫樸

芄芄棫樸，薪之樛之，濟濟辟王，左右趣之。  
濟濟辟王，左右奉璋，奉璋峨峨，髦士攸宜。  
淠彼涇舟，烝徒楫之，周王于邁，六師及之。  
倬彼雲漢，為章于天，周王壽考，遐不作人。  
追琢其章，金玉其相，勉勉我王，綱紀四方。

### 239 旱麓

瞻彼旱麓，榛楛濟濟，豈弟君子，干祿豈弟。  
瑟彼玉瓚，黃流在中，豈弟君子，福祿攸降。  
鳶飛戾天，魚躍于淵，豈弟君子，遐不作人。  
清酒既載，騂牡既備，以享以祀，以介景福。  
瑟彼柞棫，民所燎矣，豈弟君子，神所勞矣。  
莫莫葛藟，施于條枚，豈弟君子，求福不回。

### 240 思齊

思齊大任，文王之母，思媚周姜，京室之婦。  
大姒嗣徽音，則百斯男。  
惠于宗公，神罔時怨，神罔時恫。  
刑于寡妻，至于兄弟，以御于家邦。  
雝雝在宮，肅肅在廟，不顯亦臨，無射亦保。  
肆戎疾不殄，烈假不瑕。  
不聞亦式，不諫亦入。肆成人有德，小子有造。  
古之人無斃，譽髦斯士。

### 241 皇矣

皇矣上帝，臨下有赫，監觀四方，求民之莫。  
維此二國，其政不獲，維彼四國，爰究爰度。  
上帝耆之，憎其式廓，乃眷西顧，此維與宅。  
作之屏之，其菑其翳，修之平之，其灌其柶。  
啓之辟之，其檜其楛，攘之剔之，其檠其柘。  
帝遷明德，串夷載路，天立厥配，受命既固。

帝省其山，作棫斯拔，松柏斯兌，帝作邦作對。  
自大伯王季，維此王季。因心則友，則友其兄。  
則篤其慶，載錫之光。受祿無喪，奄有四方。  
維此王季，帝度其心。貊其德音，其德克明。  
克明克類，克長克君。王此大邦，克順克比。  
比于文王，其德靡悔。既受帝祉，施于孫子。  
帝謂文王，無然畔援。無然歆羨，誕先登于岸。  
密人不恭，敢距大邦。侵阮徂共，王赫斯怒。  
爰整其旅，以按徂旅。以篤于周祜，以對于天下。  
依其在京，侵自阮疆，陟我高岡，無矢我陵。  
我陵我阿，無飲我泉，我泉我池，度其鮮原。  
居岐之陽，在渭之將，萬邦之方，下民之王。  
帝謂文王，予懷明德，不大聲以色，不長夏以革。  
不識不知，順帝之則，帝謂文王，詢爾仇方。  
同爾兄弟，以爾鈞援，與爾臨衝，以伐崇墉。  
臨衝閑閑，崇墉言言，執訊連連，攸馘安安。  
是類是禡，是致是附，四方以無侮，臨衝茀茀。  
崇墉仡仡，是伐是肆，是絕是忽，四方以無拂。

## 242 靈臺

經始靈臺，經之營之，庶民攻之，不日成之。  
經始勿亟，庶民子來，王在靈囿，麀鹿攸伏。  
麀鹿濯濯，白鳥嚮嚮，王在靈沼，於物魚躍。  
虞業維縱，賁鼓維鏞，於論鼓鐘，於樂辟靡。  
於論鼓鐘，於樂辟靡，鼙鼓逢逢，朦瞍奏公。

## 243 下武

下武維周，世有哲王，三后在天，王配于京。  
王配于京，世德作求，永言配命，成王之孚。  
成王之孚，下土之式，永言孝思，孝思維則。  
媚茲一人，應侯順德，永言孝思，昭哉嗣服。  
昭茲來許，繩其祖武，於萬斯年，受天之祜。  
受天之祜，四方來賀，於萬斯年，不遐有佐。

## 244 文王有聲

文王有聲，遹駿有聲，遹求厥寧，遹觀厥成，文王烝哉。  
文王受命，有此武功，既伐于崇，作邑于豐，文王烝哉。  
築成伊瀆，作豐伊匹，匪棘其欲，遹追來孝，王后烝哉。  
王公伊濯，維豐之垣，四方攸同，王后維翰，王后烝哉。  
豐水東注，維禹之績，四方攸同，皇王維辟，皇王烝哉。  
鎬京辟廡，自西自東，自南自北，無思不服，皇王烝哉。  
考卜維王，宅是鎬京，維龜正之，武王成之，武王烝哉。  
豐水有芑，武王豈不仕，詒厥孫謀，以燕翼子，武王烝哉。

## 大雅-生民之什

### 245 生民

厥初生民，時維姜嫄，生民如何，克禋克祀，以弗無子。  
履帝武敏歆，攸介攸止，載震載夙，載生載育，時維后稷。  
誕彌厥月，先生如達，不坼不副，無菑無害。  
以赫厥靈，上帝不寧，不康禋祀，居然生子。  
誕寘之隘巷，牛羊腓字之，誕寘之平林，會伐平林。  
誕寘之寒冰，鳥覆翼之，鳥乃去矣，后稷呱矣。  
實覃實訐，厥聲載路。  
誕實訥訥，克岐克嶷，以就口食，蓺之荏菽。  
荏菽旆旆，禾役穰穰，麻麥幪幪，瓜瓞嗶嗶。  
誕后稷之穡，有相之道，茀厥豐草，種之黃茂。  
實方實苞，實種實裒，實發實秀，實堅實好。  
實穎實粟，即有邰家室。  
誕降嘉種，維秬維秠，維糜維芑，  
恆之秬秠，是穫是畝，恆之糜芑，是任是負，以歸肇祀。  
誕我祀如何，或舂或揄，或簸或蹂，釋之叟叟。  
烝之浮浮，載謀載惟，取蕭祭脂，取羝以軋。  
載燔載烈，以興嗣歲。  
卬盛于豆，于豆于登，其香始升，上帝居歆。  
胡臭亶時，后稷肇祀，庶無罪悔，以迄于今。

### 246 行葦

敦彼行葦，牛羊勿踐履，方苞方體，維葉泥泥。  
戚戚兄弟，莫遠具爾，或肆之筵，或授之几。  
肆筵設席，授几有緝御，或獻或酢，洗爵奠斝。

醯醢以薦，或燔或炙，嘉穀脾臄，或歌或嘏。  
敦弓既堅，四鍤既鈞，舍矢既均，序賓以賢。  
敦弓既句，既挾四鍤，四鍤如樹，序賓以不侮。  
曾孫維主，酒醴維醑，酌以大斗，以祈黃耇。  
黃耇台背，以引以翼，壽考維祺，以介景福。

### 247 既醉

既醉以酒，既飽以德，君子萬年，介爾景福。  
既醉以酒，爾殽既將，君子萬年，介爾昭明。  
昭明有融，高朗令終，令終有俶，公尸嘉告。  
其告維何，籩豆靜嘉，朋友攸攝，攝以威儀。  
威儀孔時，君子有孝子，孝子不匱，永錫爾類。  
其類維何，室家之壺，君子萬年，永錫祚胤。  
其胤維何，天被爾祿，君子萬年，景命有僕。  
其僕維何，釐爾女士，釐爾女士，從以孫子。

### 248 鳧鷖

鳧鷖在涇，公尸來燕來寧，爾酒既清，爾殽既馨。  
公尸燕飲，福祿來成。  
鳧鷖在沙，公尸來燕來宜，爾酒既多，爾殽既嘉。  
公尸燕飲，福祿來為。  
鳧鷖在渚，公尸來燕來處，爾酒既湑，爾殽伊脯。  
公尸燕飲，福祿來下。  
鳧鷖在渚，公尸來燕來宗，既燕于宗，福祿攸降。  
公尸燕飲，福祿來崇。  
鳧鷖在臚，公尸來止熏熏，旨酒欣欣，燔炙芬芬。  
公尸燕飲，無有後艱。

### 249 假樂

假樂君子，顯顯令德，宜民宜人，受祿于天。保右命之，自天申之。  
千祿百福，子孫千億。穆穆皇皇，宜君宜王。不愆不忘，率由舊章。  
威儀抑抑，德音秩秩，無怨無惡，率由群匹。受福無疆，四方之綱。  
之綱之紀，燕及朋友。百辟卿士，媚于天子。不解于位，民之攸墜。

### 250 公劉

篤公劉，匪居匪康，迺場迺疆，迺積迺倉。  
迺裹餼糧，于橐于囊，思輯用光，弓矢斯張。  
干戈戚揚，爰方啟行。

篤公劉，于胥斯原，既庶既繁，既順迺宣。

而無永歎，陟則在巘，復降在原。

何以舟之，維玉及瑤，鞞琫容刀。

篤公劉，逝彼百泉，瞻彼溇原，迺陟南岡。

乃覲于京，京師之野，于時處處，于時廬旅。

于時言言，于時語語。

篤公劉，于京斯依，蹇蹇濟濟，俾筵俾几。

既登乃依，乃造其曹，執豕于牢，酌之用匏。

食之飲之，君之宗之。

篤公劉，既溇既長，既景迺岡，相其陰陽。

觀其流泉，其軍三單，度其隰原，徹田為糧。

度其夕陽，豳居允荒。

篤公劉，于豳斯館，涉渭為亂，取厲取鍛。

止基迺理，爰眾爰有，夾其皇澗，溯其過澗。

止旅乃密，芮鞠之即。

## 251 洞酌

洞酌彼行潦，挹彼注茲，可以饑饉。豈弟君子，民之父母。

洞酌彼行潦，挹彼注茲，可以濯鬢。豈弟君子，民之攸歸。

洞酌彼行潦，挹彼注茲，可以濯漑。豈弟君子，民之攸墜。

## 252 卷阿

有卷者阿，飄風自南。豈弟君子，來游來歌，以矢其音。

伴奭爾游矣，優游爾休矣。豈弟君子，俾爾彌爾性，似先公酋矣。

爾土宇畷章，亦孔之厚矣。豈弟君子，俾爾彌爾性，百神爾主矣。

爾受命長矣，萑祿爾康矣。豈弟君子，俾爾彌爾性，純嘏爾常矣。

有馮有翼，有孝有德，以引以翼。豈弟君子，四方為則。

顛顛卬卬，如圭如璋，令聞令望。豈弟君子，四方為綱。

鳳凰于飛，翾翾其羽，亦集爰止。藹藹王多吉士，維君子使，媚于天子。

鳳凰于飛，翾翾其羽，亦傳于天。藹藹王多吉人，維君子命，媚于庶人。

鳳凰鳴矣，于彼高岡，梧桐生矣，于彼朝陽。莘莘萋萋，雝雝喈喈。

君子之車，既庶且多，君子之馬，既閑且馳。矢詩不多，維以遂歌。

## 253 民勞

民亦勞止，汙可小康，惠此中國，以綏四方。

無縱詭隨，以謹無良，式遏寇虐，憚不畏明。

柔遠能邇，以定我王。

民亦勞止，汙可小休，惠此中國，以為民逌。  
無縱詭隨，以謹惛愾，式遏寇虐，無俾民憂。  
無棄爾勞，以為王休。  
民亦勞止，汙可小息，惠此京師，以綏四國。  
無縱詭隨，以謹罔極，式遏寇虐，無俾作慝。  
敬慎威儀，以近有德。  
民亦勞止，汙可小愒，惠此中國，俾民憂泄。  
無縱詭隨，以謹醜厲，式遏寇虐，無俾正敗。  
戎雖小子，而式弘大。  
民亦勞止，汙可小安，惠此中國，國無有殘。  
無縱詭隨，以謹繾綣，式遏寇虐，無俾正反。  
王欲玉女，是用大諫。

## 254 板

上帝板板，下民卒瘁，出話不然，為猶不遠。  
靡聖管管，不實於亶，猶之未遠，是用大諫。  
天之方難，無然憲憲，天之方蹶，無然泄泄。  
辭之輯矣，民之洽矣，辭之懌矣，民之莫矣。  
我雖異事，及爾同僚，我即爾謀，聽我囂囂。  
我言維服，勿以為笑，先民有言，詢于芻蕘。  
天之方虐，無然謔謔，老夫灌灌，小子蹻蹻。  
匪我言耄，爾用憂謔，多將熇熇，不可救藥。  
天之方瘳，無為夸毗，威儀卒迷，善人載尸。  
民之方殿屎，則莫我敢葵，喪亂蔑資，曾莫惠我師。  
天之牖民，如堦如筮，如璋如圭，如取如攜。  
攜無曰益，牖民孔易，民之多辟，無自立辟。  
价人維藩，大師維垣，大邦維屏，大宗維翰。  
懷德維寧，宗子維城，無俾城壞，無獨斯畏。  
敬天之怒，無敢戲豫，敬天之渝，無敢馳驅。  
昊天曰明，及爾出王，昊天曰旦，及爾游衍。

## 大雅-蕩之什

### 255 蕩

蕩蕩上帝，下民之辟。疾威上帝，其命多辟。  
天生烝民，其命匪諶。靡不有初，鮮克有終。  
文王曰咨，咨汝殷商，曾是彊禦，曾是掇克，

曾是在位，曾是在服。天降滔德，女興是力。  
文王曰咨，咨女殷商，而秉義類，彊禦多懟，  
流言以對，寇攘式內。侯作侯祝，靡屆靡究。  
文王曰咨，咨女殷商。女奭佻于中國，斂怨以為德。  
不明爾德，時無背無側。爾德不明，以無陪無卿。  
文王曰咨，咨女殷商。天不湏爾以酒，不義從式。  
既愆爾止，靡明靡晦。式號式呼，俾晝作夜。  
文王曰咨，咨女殷商。如蜩如蟴，如沸如羹。  
小大近喪，人尚乎由行。內燬于中國，覃及鬼方。  
文王曰咨，咨女殷商。匪上帝不時，殷不用舊。  
雖無老成人，尚有典刑。曾是莫聽，大命以傾。  
文王曰咨，咨女殷商。人亦有言，顛沛之揭。  
枝葉未有害，本實先撥。殷鑒不遠，在夏后之世。

## 256 抑

抑抑威儀，維德之隅，人亦有言，靡哲不愚。  
庶人之愚，亦職維疾，哲人之愚，亦維斯戾。  
無競維人，四方其訓之，有覺德行，四國順之。  
訏謨定命，遠猶辰告，敬慎威儀，維民之則。  
其在于今，興迷亂于政，顛覆厥德，荒湛于酒。  
女雖湛樂，從弗念厥紹，罔敷求先王，克共明刑。  
肆皇天弗尚，如彼泉流，無淪胥以亡。  
夙興夜寐，灑掃庭內，維民之章。  
修爾車馬，弓矢戎兵，用戒戎作，用邊蠻方。  
質爾人民，謹爾侯度，用戒不虞。  
慎爾出話，敬爾威儀，無不柔嘉。  
白圭之玷，尚可磨也；斯言之玷，不可為也。  
無易由言，無曰苟矣，莫捫朕舌，言不可逝矣。  
無言不讎，無德不報，惠于朋友，庶民小子。  
子孫繩繩，萬民靡不承。  
視爾友君子，輯柔爾顏，不遐有愆。  
相在爾室，尚不愧于屋漏，無曰不顯，莫予云覲。  
神之格思，不可度思，矧可射思。  
辟爾為德，俾臧俾嘉，淑慎爾止，不愆于儀。  
不僭不賊，鮮不為則。投我以桃，報之以李。



彼童而角，實虹小子。  
荏染柔木，言緡之絲，溫溫恭人，維德之基。  
其維哲人，告之話言，順德之行，其維愚人。  
覆謂我僭，民各有心。  
於乎小子，未知臧否，匪手攜之，言示之事。  
匪面命之，言提其耳。借曰未知，亦既抱子。  
民之靡盈，誰夙知而莫成。  
昊天孔昭，我生靡樂。視爾夢夢，我心慘慘。  
誨爾諄諄，聽我藐藐。匪用為教，覆用為虐。  
借曰未知，亦聿既耄。  
於乎小子，告爾舊止。聽用我謀，庶無大悔。  
天方艱難，曰喪厥國。取譬不遠，昊天不忒。  
回遹其德，俾民大棘。

## 257 桑柔

菀彼桑柔，其下侯甸，捋采其劉，瘼此下民。  
不殄心憂，倉兄填兮，倬彼昊天，寧不我矜。  
四牡騤騤，旃旒有翩，亂生不夷，靡國不泯。  
民靡有黎，具禍以燼，於乎有哀，國步斯頻。  
國步蔑資，天不我將，靡所止疑，云徂何往。  
君子實維，秉心無競，誰生厲階，至今為梗。  
憂心慙慙，念我土宇，我生不辰，逢天憚怒。  
自西徂東，靡所定處，多我覯瘠，孔棘我圉。  
為謀為毖，亂況斯削，告爾憂恤，誨爾序爵。  
誰能執熱，逝不以濯，其何能淑，載胥及溺。  
如彼溯風，亦孔之僂，民有肅心，莽云不逮。  
好是稼穡，力民代食，稼穡維寶，代食維好。  
天降喪亂，滅我立王，降此蠱賊，稼穡卒痒。  
哀恫中國，具贅卒荒，靡有旅力，以念穹蒼。  
維此惠君，民人所瞻，秉心宣猶，考慎其相。  
維彼不順，自獨俾臧，自有肺腸，俾民卒狂。  
瞻彼中林，甡甡其鹿，朋友已譖，不胥以穀。  
人亦有言，進退維谷。  
維此聖人，瞻言百里，維彼愚人，覆狂以喜。  
匪言不能，胡斯畏忌。

維此良人，弗求弗迪，維彼忍心，是顧是復。  
民之貪亂，寧為荼毒。  
大風有隧，有空大谷，維此良人，作為式穀。  
維彼不順，征以中垢。  
大風有隧，貪人敗類，聽言則對，誦言如醉。  
匪用其良，覆俾我悖。  
嗟爾朋友，予豈不知而作，如彼飛蟲，時亦弋獲。  
既之陰女，反予來赫。  
民之罔極，職涼善背，為民不利，如云不克。  
民之回遹，職競用力。  
民之未戾，職盜為寇，涼曰不可，覆背善詈。  
雖曰匪予，既作爾歌。

## 258 雲漢

倬彼雲漢，昭回于天，王曰於乎何辜。  
今之人，天降喪亂，饑饉薦臻，靡神不舉，靡愛斯牲。  
圭璧既卒，寧莫我聽。  
旱既大甚，蘊隆蟲蟲，不殄禋祀，自郊徂宮。  
上下奠瘞，靡神不宗。  
后稷不克，上帝不臨。耗斁下土，寧丁我躬。  
旱既大甚，則不可推，兢兢業業，如霆如雷。  
周餘黎民，靡有孑遺。昊天上帝，則不我遺。  
胡不相畏，先祖于摧。  
旱既太甚，則不可沮，赫赫炎炎，云我無所。  
大命近止，靡瞻靡顧，群公先正，則不我助。  
父母先祖，胡寧忍予。  
旱既太甚，滌滌山川，旱魃為虐，如暎如焚。  
我心憚暑，憂心如熏。群公先正，則不我聞。  
昊天上帝，寧俾我遐。  
旱既太甚，黽勉畏去，胡寧瘖我以旱，慥不知其故。  
祈年孔夙，方社不莫，昊天上帝，則不我虞。  
敬恭明神，宜無悔怒。  
旱既太甚，散無友紀，鞫哉庶正，疚哉冢宰。  
趣馬師氏，膳夫左右。靡人不周，無不能止。  
瞻卬昊天，云如何里。

瞻卬昊天，有嘒其星，大夫君子，昭假無贏。  
大命近止，無棄爾成。何求為我，以戾庶正。  
瞻卬昊天，曷惠其寧。

## 259 崧高

崧高維嶽，駿極于天。維嶽降神，生甫及申。  
維申及甫，維周之翰。四國于蕃，四方于宣。  
亶亶申伯，王纘之事。于邑于謝，南國是式。  
王命召伯，定申伯之宅，登是南邦，世執其功。  
王命申伯，式是南邦，因是謝人，以作爾庸。  
王命召伯，徹申伯土田。王命傅御，遷其私人。  
申伯之功，召伯是營，有俶其城，寢廟既成。  
既成藐藐，王錫申伯，四牡騶騶，鈞膺濯濯。  
王遣申伯，路車乘馬，我圖爾居，莫如南土。  
錫爾介圭，以作爾寶，往近王舅，南土是保。  
申伯信邁，王餞于郟，申伯還南，謝于誠歸。  
王命召伯，徹申伯土疆，以峙其粃，式遄其行。  
申伯番番，既入于謝，徒御嘽嘽。  
周邦咸喜，戎有良翰。不顯申伯，王之元舅，文武是憲。  
申伯之德，柔惠且直，揉此萬邦，聞于四國。  
吉甫作誦，其詩孔碩，其風肆好，以贈申伯。

## 260 烝民

天生烝民，有物有則，民之秉彝，好是懿德。  
天監有周，昭假于下，保茲天子，生仲山甫。  
仲山甫之德，柔嘉維則，令儀令色，小心翼翼。  
古訓是式，威儀是力，天子是若，明命使賦。  
王命仲山甫，式是百辟，纘戎祖考，王躬是保。  
出納王命，王之喉舌，賦政于外，四方爰發。  
肅肅王命，仲山甫將之，邦國若否，仲山甫明之。  
既明且哲，以保其身，夙夜匪解，以事一人。  
人亦有言，柔則茹之，剛則吐之，維仲山甫，  
柔亦不茹，剛亦不吐，不侮矜寡，不畏彊禦。  
人亦有言，德輶如毛，民鮮克舉之，我儀圖之。  
維仲山甫舉之，愛莫助之，袞職有闕，維仲山甫補之。  
仲山甫出祖，四牡業業，征夫捷捷，每懷靡及。

四牡彭彭，八鸞鏘鏘，王命仲山甫，城彼東方。  
四牡騤騤，八鸞喈喈，仲山甫徂齊，式遄其歸。  
吉甫作誦，穆如清風，仲山甫永懷，以慰其心。

## 261 韓奕

奕奕梁山，維禹甸之，有倬其道，韓侯受命。  
王親命之，纘戎祖考，無廢朕命，夙夜匪解。  
虔共爾位，朕命不易，榦不庭方，以佐戎辟。  
四牡奕奕，孔修且張，韓侯入覲，以其介圭。  
入覲于王，王錫韓侯，淑旂綏章，篚芾錯衡，  
玄袞赤舄，鈎膺鏤錫，鞞鞞淺幘，條革金厄。  
韓侯出祖，出宿于屠，顯父餞之，清酒百壺。  
其殽維何？炰鱉鮮魚。其蔌維何？維筍及蒲。  
其贈維何？乘馬路車。籩豆有且，侯氏燕胥。  
韓侯取妻，汾王之甥。蹶父之子，韓侯迎止。  
于蹶之里，百兩彭彭，八鸞鏘鏘，不顯其光。  
諸娣從之，祁祁如雲。韓侯顧之，爛其盈門。  
蹶父孔武，靡國不到，為韓姑相攸，莫如韓樂。  
孔樂韓土，川澤訏訏，魴鱖甫甫，麀鹿嘓嘓。  
有熊有羆，有貓有虎，慶既令居，韓姑燕譽。  
溥彼韓城，燕師所完，以先祖受命，因時百蠻。  
王錫韓侯，其追其貊，奄受北國，因以其伯。  
實墉實壑，實畝實籍，獻其貔皮，赤豹黃羆。

## 262 江漢

江漢浮浮，武夫滔滔，匪安匪遊，淮夷來求。  
既出我車，既設我旗，匪安匪舒，淮夷來鋪。  
江漢湯湯，武夫洸洸，經營四方，告成于王。  
四方既平，王國庶定，時靡有爭，王心載寧。  
江漢之滸，王命召虎，式辟四方，徹我疆土。  
匪疚匪棘，王國來極，于疆于理，至于南海。  
王命召虎，來旬來宣，文武受命，召公維翰。  
無曰予小子，召公是似，肇敏戎公，用錫爾祉。  
釐爾圭瓚，秬鬯一卣，告于文人，錫山土田。  
于周受命，自召祖命，虎拜稽首，天子萬年。  
虎拜稽首，對揚王休，作召公考，天子萬壽。

明明天子，令聞不已，矢其文德，洽此四國。

### 263 常武

赫赫明明，王命卿士，南仲大祖，大師皇父。  
整我六師，以修我戎。既敬既戒，惠此南國。  
王謂尹氏，命程伯休父，左右陳行，戒我師旅。  
率彼淮浦，省此徐土，不留不處，三事就緒。  
赫赫業業，有嚴天子，王舒保作，匪紹匪遊。  
徐方繹騷，震驚徐方，如雷如霆，徐方震驚。  
王奮厥武，如震如怒，進厥虎臣，闚如虓虎。  
鋪敦淮濱，仍執醜虜，截彼淮浦，王師之所。  
王旅嘽嘽，如飛如翰，如江如漢，如山之苞。  
如川之流，綿綿翼翼，不測不克，濯征徐國。  
王猶允塞，徐方既來，徐方既同，天子之功。  
四方既平，徐方來庭，徐方不回，王曰還歸。

### 264 瞻卬

瞻卬昊天，則不我惠，孔填不寧，降此大厲。  
邦靡有定，士民其瘵，蠹賊蠹疾，靡有夷屆。  
罪罟不收，靡有夷瘳。  
人有土田，女反有之，人有民人，女覆奪之。  
此宜無罪，女反收之，彼宜有罪，女覆說之。  
哲夫成城，哲婦傾城。  
懿厥哲婦，為梟為鴟。婦有長舌，維厲之階。  
亂匪降自天，生自婦人。匪教匪誨，時維婦寺。  
鞠人忮忒，譖始竟背，豈曰不極，伊胡為慝。  
如賈三倍，君子是識，婦無公事，休其蠶織。  
天何以刺，何神不富，舍爾介狄，維予胥忌。  
不弔不祥，威儀不類，人之云亡，邦國殄瘁。  
天之降罔，維其優矣，人之云亡，心之憂矣。  
天之降罔，維其幾矣，人之云亡，心之悲矣。  
膚沸檻泉，維其深矣，心之憂矣，寧自今矣。  
不自我先，不自我後，藐藐昊天，無不克鞏。  
無忝皇祖，式救爾後。

## 265 召旻

旻天疾威，天篤降喪，瘠我饑饉，民卒流亡，我居圉卒荒。  
天降罪罟，蠹賊內訌，昏椽靡共，潰潰回遘，實靖夷我邦。  
皋皋訛訛，曾不知其玷，兢兢業業，孔填不寧，我位孔貶。  
如彼歲旱，草不潰茂，如彼棲苴，我相此邦，無不潰止。  
維昔之富，不如時。維今之疚，不如茲。彼疏斯禱，胡不自替，職兄斯引。  
池之竭矣，不云自頻，泉之竭矣，不云自中。溥斯害矣，職兄斯弘，不裁我躬。

昔先王受命，有如召公，日辟國百里，今也日蹙國百里。  
於乎哀哉，維今之人，不尚有舊。



## 62【詩經 266-305】

### 周頌-清廟之什

#### 266 清廟

於穆清廟，肅雝顯相，濟濟多士，秉文之德，對越在天。  
駿奔走在廟，不顯不承，無射於人斯。

#### 267 維天之命

維天之命，於穆不已，於乎不顯，文王之德之純。  
假以溢我，我其收之，駿惠我文王，曾孫篤之。

#### 268 維清

維清緝熙，文王之典。肇禋，迄用有成，維周之禎。

#### 269 烈文

烈文辟公，錫茲祉福，惠我無疆，子孫保之。  
無封靡于爾邦，維王其崇之，念茲戎功，繼序其皇之。  
無競維人，四方其訓之，不顯維德，百辟其刑之，於乎前王不忘。

#### 270 天作

天作高山，大王荒之。  
彼作矣，文王康之。彼徂矣岐，有夷之行。子孫保之。

#### 271 昊天有成命

昊天有成命，二后受之，成王不敢康，夙夜基命宥密。  
於緝熙，單厥心，肆其靖之。

## 272 我將

我將我享，維羊維牛，維天其右之。

儀式刑文王之典，日靖四方。伊嘏文王，既右饗之。

我其夙夜，畏天之威，于時保之。

## 273 時邁

時邁其邦，昊天其子之，實右序有周，薄言震之，莫不震疊。

懷柔百神，及河喬嶽，允王維后。

明昭有周，式序在位。載戢干戈，載櫜弓矢。

我求懿德，肆于時夏，允王保之。

## 274 執競

執競武王，無競維烈，不顯成康，上帝是皇。

自彼成康，奄有四方，斤斤其明。

鍾鼓喤喤，磬筦將將，降福穰穰，降福簡簡，

威儀反反。既醉既飽，福祿來反。

## 275 思文

思文后稷，克配彼天，立我烝民，莫匪爾極。

貽我來牟，帝命率育，無此疆爾界，陳常于時夏。

## 周頌-臣工之什

### 276 臣工

嗟嗟臣工，敬爾在公，王釐爾成，來咨來茹。

嗟嗟保介，維莫之春，亦又何求，如何新畬。

於皇來牟，將受厥明，明昭上帝，迄用康年。

命我眾人，庠乃錢鎛，奄觀銍艾。

### 277 噫嘻

噫嘻成王，既昭假爾，率時農夫，播厥百穀。

駿發爾私，終三十里，亦服爾耕，十千維耦。

### 278 振鷺

振鷺于飛，于彼西雝，我客戾止，亦有斯容。

在彼無惡，在此無斁，庶幾夙夜，以永終譽。

### 279 豐年

豐年多黍多稌，亦有高廩，萬億及秭。

為酒為醴，烝畀祖妣，以洽百禮，降福孔皆。

## 280 有瞽

有瞽有瞽，在周之庭，設業設虞，崇牙樹羽。  
應田縣鼓，執磬祝圉。  
既備乃奏，簫管備舉。嗶嗶厥聲，肅雝和鳴，先祖是聽。  
我客戾止，永觀厥成。

## 281 潛

猗與漆沮，潛有多魚，有鱸有鮪，鰈鱣鯉鯉。  
以享以祀，以介景福。

## 282 雝

有來雝雝，至止肅肅，相維辟公，天子穆穆。  
於薦廣牡，相予肆祀。  
假哉皇考，綏予孝子。宣哲維人，文武維后。  
燕及皇天，克昌厥后。綏我眉壽，介以繁祉。  
既右烈考，亦右文母。

## 283 載見

載見辟王，曰求厥章，龍旂陽陽，和鈴央央。  
儻革有鷖，休有烈光。  
率見昭考，以孝以享。以介眉壽，永言保之，思皇多祜。  
烈文辟公。綏以多福，俾緝熙于純嘏。

## 284 有客

有客有客，亦白其馬。有萋有且，敦琢其旅。  
有客宿宿，有客信信，言授之繫，以繫其馬。  
薄言追之，左右綏之。既有淫威，降福孔夷。

## 285 武

於皇武王，無競維烈，允文文王，克開厥後。  
嗣武受之，勝殷遏劉，耆定爾功。

## 周頌-閔予小子之什

### 286 閔予小子

閔予小子，遭家不造，嬛嬛在疚。  
於乎皇考，永世克孝。念茲皇祖，陟降庭止。  
維予小子，夙夜敬止。於乎皇王，繼序思不忘。

### 287 訪落

訪予落止，率時昭考，於乎悠哉，朕未有艾。將予就之，繼猶判渙。  
維予小子，未堪家多難。



紹庭上下，陟降厥家。休矣皇考，以保明其身。

## 288 敬之

敬之敬之，天維顯思，命不易哉，無曰高高在上。

陟降厥士，日監在茲。

維予小子，不聰敬止。日就月將，學有緝熙于光明。

佛時仔肩，示我顯德行。

## 289 小毖

予其懲，而毖後患，莫予荇蜂，自求辛螫。

肇允彼桃蟲，拚飛維鳥。未堪家多難，予又集于蓼。

## 290 載芟

載芟載柞，其耕澤澤，千耦其耘，徂隰徂畛。

侯主侯伯，侯亞侯旅，侯彊侯以。

有噲其鎰，思媚其婦，有依其士。

有略其耜，俶載南畝。播厥百穀，實函斯活。

驛驛其達，有厭其傑。厭厭其苗，緜緜其庶。

載穫濟濟，有實其積。萬億及秭。

為酒為醴，烝畀祖妣，以洽百禮。

有飶其香，邦家之光。

有椒其馨，胡考之寧。

匪且有且，匪今斯今，振古如茲。

## 291 良耜

翼翼良耜，俶載南畝，播厥百穀，實函斯活。

或來瞻女，載筐及筥，其饗伊黍，其筮伊糾。

其耨斯趙，以薈荼蓼。

荼蓼朽止，黍稷茂止。穫之挈挈，積之栗栗，

其崇如墉，其比如櫛。以開百室。

百室盈止，婦子寧止，殺時犉牡，有捄其角，

以似以續，續古之人。

## 292 絲衣

絲衣其紆，載弁俶俶，自堂徂基，自羊徂牛，鼎鼎及鼐。

兕觥其觶，旨酒思柔，不吳不敖，胡考之休。

## 293 酌

於鑠王師，遵養時晦，時純熙矣，是用大介。

我龍受之，躋躋王之造，載用有嗣。實維爾公允師。

## 294 桓

綏萬邦，婁豐年。

天命匪解，桓桓武王，保有厥士。于以四方，克定厥家。

於昭于天，皇以閒之。

## 295 賚

文王既勤止，我應受之。敷時繹思，我徂維求定。

時周之命，於繹思。

## 296 般

於皇時周，陟其高山，墮山喬嶽，允猶翕河。

敷天之下，裒時之對，時周之命。

## 魯頌-駟之什

### 297 駟

駟駟牡馬，在坰之野。

薄言駟者，有驕有皇。有驪有黃，以車彭彭。

思無疆，思馬斯臧。

駟駟牡馬，在坰之野。

薄言駟者，有騅有馵。有騂有騏，以車伾伾。

思無期，思馬斯才。

駟駟牡馬，在坰之野。

薄言駟者，有驪有駱。有騶有雒，以車繹繹。

思無斁，思馬斯作。

駟駟牡馬，在坰之野。

薄言駟者，有駟有馵。有驪有魚，以車祛祛。

思無邪，思馬斯徂。

### 298 有駟

有駟有駟，駟彼乘黃。夙夜在公，在公明明。

振振鷺，鷺于下，鼓咽咽，醉言舞，于胥樂兮。

有駟有駟，駟彼乘牡。夙夜在公，在公飲酒。

振振鷺，鷺于飛，鼓咽咽，醉言歸，于胥樂兮。

有駟有駟，駟彼乘駟。夙夜在公，在公載燕。

自今以始，歲其有，君子有穀，詒孫子，于胥樂兮。

## 299 泮水

思樂泮水，薄采其芹。  
魯侯戾止，言觀其旂。其旂茝茝，鸞聲噦噦。  
無小無大，從公于邁。  
思樂泮水，薄采其藻。  
魯侯戾止，其馬蹻蹻。其馬蹻蹻，其音昭昭。  
載色載笑，匪怒伊教。  
思樂泮水，薄采其芣。  
魯侯戾止，在泮飲酒。既飲旨酒，永錫難老。  
順彼長道，屈此群醜。  
穆穆魯侯，敬明其德。  
敬慎威儀，維民之則。允文允武，昭假烈祖。  
靡有不孝，自求伊祐。  
明明魯侯，克明其德。既作泮宮，淮夷攸服。  
矯矯虎臣，在泮獻馘。淑問如皋陶，在泮獻囚。  
濟濟多士，克廣德心。桓桓于征，狄彼東南。  
烝烝皇皇，不吳不揚。不告于訕，在泮獻功。  
角弓其觶，束矢其搜。戎車孔博，徒御無斁。  
既克淮夷，孔淑不逆。式固爾猶，淮夷卒獲。  
翩彼飛鴉，集于泮林。食我桑黹，懷我好音。  
憬彼淮夷，來獻其琛。元龜象齒，大賂南金。

## 300 閟宮

閟宮有恤，實實枚枚。  
赫赫姜嫄，其德不回。上帝是依，無災無害，彌月不遲。  
是生后稷，降之百福。  
黍稷重穆，稷穉菽麥，奄有下國，俾民稼穡。  
有稷有黍，有稻有秬，奄有下土，纘禹之緒。  
后稷之孫，實維大王。居岐之陽，實始翦商。  
至于文武，纘大王之緒。致天之屆，于牧之野，  
無貳無虞，上帝臨女。敦商之旅，克咸厥功。  
王曰叔父，建爾元子，俾侯于魯，大啓爾宇，為周室輔。  
乃命魯公，俾侯于東，錫之山川，土田附庸。  
周公之孫，莊公之子。龍旂承祀，六轡耳耳。春秋匪解，享祀不忒。  
皇皇后帝，皇祖后稷。享以騂犧，是饗是宜，降福既多。

周公皇祖，亦其福女。秋而載嘗，夏而福衡，白牡駢剛，犧尊將將。  
毛魚載羹，籩豆大房，萬舞洋洋，孝孫有慶。  
俾爾熾而昌，俾爾壽而臧，保彼東方，魯邦是常。  
不虧不崩，不震不騰，三壽作朋，如岡如陵。  
公車千乘，朱英綠縵，二矛重弓。  
公徒三萬，貝冑朱綬，烝徒增增。  
戎狄是膺，荊舒是懲，則莫我敢承。  
俾爾昌而熾，俾爾壽而富，黃髮台背，壽胥與試。  
俾爾昌而大，俾爾耆而艾，萬有千歲，眉壽無有害。  
泰山巖巖，魯邦所詹。奄有龜蒙，遂荒大東。  
至于海邦，淮夷來同，莫不率從，魯侯之功。  
保有鳧繹，遂荒徐宅，至于海邦，淮夷蠻貊。  
及彼南夷，莫不率從。莫敢不諾，魯侯是若。  
天錫公純嘏，眉壽保魯，居常與許，復周公之宇。  
魯侯燕喜，令妻壽母，宜大夫庶士，邦國是有，  
既多受祉，黃髮兒齒。  
徂來之松，新甫之柏，是斷是度，是尋是尺。  
松栢有鳥，路寢孔碩，新廟奕奕，奚斯所作。  
孔曼且碩，萬民是若。

### 商頌

#### 301 那

猗與那與，置我鞀鼓。奏鼓簡簡，衍我烈祖。湯孫奏假，綏我思成。  
鞀鼓淵淵，嘒嘒管聲。既和且平，依我磬聲。  
於赫湯孫，穆穆厥聲。庸鼓有數，萬舞有奕。  
我有嘉客，亦不夷懌。自古在昔，先民有作，  
溫恭朝夕，執事有恪。顧予烝嘗，湯孫之將。

#### 302 烈祖

嗟嗟烈祖，有秩斯祜。申錫無疆，及爾斯所，  
既載清酤，賚我思成。  
亦有和羹，既戒既平。醴假無言，時靡有爭，  
綏我眉壽，黃耇無疆。  
約軼錯衡，八鸞鶉鶉，以假以享，我受命溥將，  
自天降康，豐年穰穰。來假來饗，降福無疆。  
顧予烝嘗，湯孫之將。

### 303 玄鳥

天命玄鳥，降而生商，宅殷土芒芒。  
古帝命武湯，正域彼四方。方命厥后，奄有九有。  
商之先后，受命不殆，在武丁孫子。  
武丁孫子，武王靡不勝。龍旂十乘，大糝是承。  
邦畿千里，維民所止，肇域彼四海。  
四海來假，來假祁祁。景員維河，殷受命咸宜，百祿是何。

### 304 長發

濬哲維商，長發其祥，洪水芒芒，禹敷下土方，  
外大國是疆，幅隕既長。有娥方將，帝立子生商。  
玄王桓撥，受小國是達，受大國是達，  
率履不越，遂視既發。相土烈烈，海外有截。  
帝命不違，至于湯齊。  
湯降不遲，聖敬日躋。昭假遲遲，上帝是祗，帝命式于九圍。  
受小球大球，為下國綴旒，何天之休。  
不競不綵，不剛不柔，敷政優優，百祿是遒。  
受小共大共，為下國駿龐，何天之龍。  
敷奏其勇，不震不動，不難不竦，百祿是總。  
武王載旆，有虔秉鉞，如火烈烈，則莫我敢曷。  
苞有三蘖，莫遂莫達，九有有截。韋顧既伐，昆吾夏桀。  
昔在中葉，有震且業，允也天子，降予卿士。實維阿衡，實左右商王。

### 305 殷武

撻彼殷武，奮伐荆楚，采入其阻，裒荆之旅。  
有截其所，湯孫之緒。  
維女荆楚，居國南鄉，昔有成湯，自彼氐羌，  
莫敢不來享，莫敢不來王，曰商是常。  
天命多辟，設都于禹之績。歲事來辟，勿予禍適，稼穡匪解。  
天命降監，下民有嚴，不僭不濫，不敢怠遑，  
命于下國，封建厥福。  
商邑翼翼，四方之極，赫赫厥聲，濯濯厥靈，  
壽考且寧，以保我後生。  
陟彼景山，松柏丸丸，是斷是遷，方斲是虔，  
松栢有榦，旅楹有閑，寢成孔安。

## 63【尚書選】

### 一、堯典

1. 曰若稽古帝堯，曰放勳，欽明文思安安，允恭克讓，光被四表，格于上下。克明俊德，以親九族。九族既睦，平章百姓。百姓昭明，協和萬邦。黎民於變時雍。
2. 乃命羲和，欽若昊天，曆象日月星辰，敬授人時。分命羲仲，宅嵎夷，曰暘谷。寅賓出日，平秩東作。日中，星鳥，以殷仲春。厥民析，鳥獸孳尾。申命羲叔，宅南交。平秩南訛，敬致。日永，星火，以正仲夏。厥民因，鳥獸希革。分命和仲，宅西，曰昧谷。寅餞納日，平秩西成。宵中，星虛，以殷仲秋。厥民夷，鳥獸毛毳。申命和叔，宅朔方，曰幽都。平在朔易。日短，星昴，以正仲冬。厥民隩，鳥獸氄毛。帝曰：「咨！汝羲暨和。朞三百有六旬有六日，以閏月定四時，成歲。允釐百工，庶績咸熙。」
3. 帝曰：「疇咨！若時登庸？」放齊曰：「胤子朱啟明。」帝曰：「吁！嚚訟可乎？」  
帝曰：「疇咨若予采？」驩兜曰：「都！共工方鳩僝功。」帝曰：「吁！靜言庸違，象恭滔天。」  
帝曰：「咨！四岳，湯湯洪水方割，蕩蕩懷山襄陵，浩浩滔天。下民其咨，有能俾乂？」僉曰：「於！鯀哉。」帝曰：「吁！咈哉，方命圯族。」岳曰：「異哉！試可，乃已。」  
帝曰，「往，欽哉！」九載，績用弗成。
4. 帝曰：「咨！四岳。朕在位七十載，汝能庸命，巽朕位？」岳曰：「否德忝帝位。」曰：「明明揚側陋。」師錫帝曰：「有鰥在下，曰虞舜。」帝曰：「兪？予聞，如何？」岳曰：「瞽子，父頑，母嚚，象傲；克諧以孝，烝烝乂，不格姦。」帝曰：「我其試哉！女于時，觀厥刑于二女。」釐降二女于媯汭，嬪于虞。帝曰：「欽哉！」
5. 慎徽五典，五典克從；納于百揆，百揆時敘；賓于四門，四門穆穆；納于大麓，烈風雷雨弗迷。帝曰：「格！汝舜。詢事考言，乃言底可績，三載。汝陟帝位。」舜讓于德，弗嗣。
6. 正月上日，受終于文祖。在璿璣玉衡，以齊七政。肆類于上帝，禋于六宗，望于山川，徧于群神。輯五瑞。既月乃日，覲四岳群牧，班瑞于群后。  
歲二月，東巡守，至于岱宗，柴。望秩于山川，肆覲東后。協時月正日，同律度量衡。修五禮、五玉、三帛、二生、一死贄。如五器，卒乃復。五

月南巡守，至于南岳，如岱禮。八月西巡守，至于西岳，如初。十有一月朔巡守，至于北岳，如西禮。歸，格于藝祖，用特。五載一巡守，群后四朝。敷奏以言，明試以功，車服以庸。

7. 肇十有二州，封十有二山，濬川。象以典刑，流宥五刑，鞭作官刑，扑作教刑，金作贖刑。眚災肆赦，怙終賊刑。欽哉，欽哉，惟刑之恤哉！流共工于幽洲，放驩兜于崇山，竄三苗于三危，殛鯀于羽山，四罪而天下咸服。

二十有八載，帝乃殂落。百姓如喪考妣，三載，四海遏密八音。

8. 月正元日，舜格于文祖，詢于四岳，闢四門，明四目，達四聰。「咨，十有二牧！」曰，「食哉惟時！柔遠能邇，惇德允元，而難任人，蠻夷率服。」

9. 舜曰：「咨，四岳！有能奮庸熙帝之載，使宅百揆亮采，惠疇？」僉曰：「伯禹作司空。」帝曰：「俞，咨！禹，汝平水土，惟時懋哉！」禹拜稽首，讓于稷、契暨皋陶。帝曰：「俞，汝往哉！」

帝曰：「棄，黎民阻飢，汝后稷，播時百穀。」

帝曰：「契，百姓不親，五品不遜。汝作司徒，敬敷五教，在寬。」

帝曰：「皋陶，蠻夷猾夏，寇賊姦宄。汝作士，五刑有服，五服三就。五流有宅，五宅三居。惟明克允！」

帝曰：「疇若予工？」僉曰：「垂哉！」帝曰：「俞，咨！垂，汝共工。」垂拜稽首，讓于殳斨暨伯與。」帝曰：「俞，往哉！汝諧。」

帝曰：「疇若予上下草木鳥獸？」僉曰：「益哉！」帝曰：「俞，咨！益，汝作朕虞。」益拜稽首，讓于朱虎、熊羆。帝曰：「俞，往哉！汝諧。」

帝曰：「咨！四岳，有能典朕三禮？」僉曰：「伯夷！」帝曰：「俞，咨！伯，汝作秩宗。夙夜惟寅，直哉惟清。」伯拜稽首，讓于夔、龍。帝曰：「俞，往，欽哉！」

帝曰：「夔！命汝典樂，教胄子，直而溫，寬而栗，剛而無虐，簡而無傲。詩言志，歌永言，聲依永，律和聲。八音克諧，無相奪倫，神人以和。」夔曰：「於！予擊石拊石，百獸率舞。」

帝曰：「龍，朕聖讒說殄行，震驚朕師。命汝作納言，夙夜出納朕命，惟允！」

帝曰：「咨！汝二十有二人，欽哉！惟時亮天功。」

10. 三載考績，三考，黜陟幽明，庶績咸熙。分北三苗。

舜生三十徵庸，三十在位，五十載，陟方乃死。

## 二、皋陶謨

1. 曰若稽古。皋陶曰：「允迪厥德，謨明弼諧。」禹曰：「兪！如何？」皋陶曰：「都！慎厥身，修思永。惇敘九族，庶明勵翼，邇可遠，在茲。」禹拜昌言曰：「兪！」皋陶曰：「都！在知人，在安民。」禹曰：「吁！咸若時，惟帝其難之。知人則哲，能官人安民則惠。黎民懷之，能哲而惠，何憂乎驩兜？何遷乎有苗？何畏乎巧言令色孔壬？」則哲，能官人；能安民則惠，黎民懷之。能知能惠，何憂乎驩兜，何遷乎有苗，何畏乎巧言令色孔壬？」
2. 皋陶曰：「都！亦行有九德，亦言其人有德。乃言曰：載采采。」禹曰：「何？」皋陶曰：「寬而栗。柔而立，愿而恭，亂而敬，擾而毅，直而溫，簡而廉，剛而塞，彊而義，彰厥有常。吉哉！日宣三德，夙夜浚明有家。日嚴祗敬六德，亮采有邦，翕受敷施。九德咸事，俊乂在官。百僚師師，百工惟時。撫于五辰，庶績其凝。無教逸欲。有邦兢兢業業，一日二日萬幾。無曠庶官，天工人其代之。天敘有典，勅我五典五惇哉！天秩有禮，自我五禮有庸哉！同寅協恭和衷哉！天命有德，五服五章哉！天討有罪，五刑五用哉！政事懋哉懋哉！天聰明，自我民聰明，天明畏自我民明威。達于上下，敬哉有土。」
3. 皋陶曰：「朕言惠，可底行。」禹曰：「兪！乃言底可績。」皋陶曰：「予未有知，思曰贊贊襄哉！」
4. 帝曰：「來，禹！汝亦昌言。」禹拜曰：「都！帝，予何言？予思日孜孜。」皋陶曰：「吁！如何？」禹曰：「洪水滔天，浩浩懷山襄陵，下民昏墊。予乘四載，隨山刊木，暨益奏庶鮮食。予決九川，距四海，濬畎澮距川；暨稷播，奏庶艱食鮮食。懋遷有無，化居。烝民乃粒，萬邦作乂。」皋陶曰：「兪！師汝昌言。」禹曰：「都！帝，慎乃在位。」帝曰：「兪！禹曰：「安汝止，惟幾惟康。其弼直，惟動丕應。徯志以昭受上帝，天其申命用休。」
5. 帝曰：「吁！臣哉鄰哉！鄰哉臣哉！」禹曰：「兪！」帝曰：「臣作朕股肱耳目。予欲左右有民，汝翼。予欲宣力四方，汝為。予欲觀古人之象，日、月、星辰、山、龍、華蟲作會；宗彝、藻、火、粉米、黼、黻，絺繡，以五采彰施於五色，作服，汝明。予欲聞六律五聲八音，在治忽，以出納五言，汝聽。予違，汝弼，汝無面從，退有後言。欽四鄰！庶頑讒說，若不在時，侯以明之，撻以記之，書用識哉，欲並生哉！工以納言，時而颺之，格則承之庸之，否則威之。」



6. 禹曰：「俞哉！帝光天之下，至於海隅蒼生，萬邦黎獻，共惟帝臣，惟帝時舉。數納以言，明庶以功，車服以庸。誰敢不讓，敢不敬應？帝不時敷，同，日奏，罔功。」帝曰：「無若丹朱傲，惟慢遊是好，傲虐是作。罔晝夜頌頌，罔水行舟。朋淫於家，用殄厥世。予創若時，娶於塗山，辛壬癸甲。啟呱呱而泣，予弗子，惟荒度土功。弼成五服，至於五千。州十有二師，外薄四海，咸建五長，各迪有功，苗頑弗即工，帝其念哉！」
7. 帝曰：「迪朕德，時乃功，惟敘。」皋陶方祗厥敘，方施象刑，惟明。夔曰：「戛擊鳴球、搏拊、琴、瑟、以詠。」祖考來格，虞賓在位，群後德讓。下管鼗鼓，合止祝敔，笙鏞以閒。鳥獸蹌蹌；《簫韶》九成，鳳皇來儀。夔曰：「於！予擊石拊石，百獸率舞，庶尹允諧。」
8. 帝庸作歌，曰：「勅天之命，惟時惟幾。」乃歌曰：「股肱喜哉！元首起哉！百工熙哉！」皋陶拜手稽首颺言曰：「念哉！率作興事，慎乃憲，欽哉！屢省乃成，欽哉！」乃賡載歌曰：「元首明哉，股肱良哉，庶事康哉！」又歌曰：「元首叢脞哉，股肱惰哉，萬事墮哉！」帝拜曰：「俞，往欽哉！」

### 三、洪範

1. 惟十有三祀，王訪于箕子。王乃言曰：「嗚呼！箕子。惟天陰鷲下民，相協厥居，我不知其彝倫攸敘。」

箕子乃言曰：「我聞在昔，鯀堙洪水，汨陳其五行；帝乃震怒，不畀洪范九疇，彝倫攸斁。鯀則殛死，禹乃嗣興，天乃錫禹洪范九疇，彝倫攸敘。」

「初一日五行，次二曰敬用五事，次三曰農用八政，次四曰協用五紀，次五曰建用皇極，次六曰乂用三德，次七曰明用稽疑，次八曰念用庶徵，次九曰嚮用五福，威用六極。」

2. 「一、五行：一曰水，二曰火，三曰木，四曰金，五曰土。水曰潤下，火曰炎上，木曰曲直，金曰從革，土爰稼穡。潤下作鹹，炎上作苦，曲直作酸，從革作辛，稼穡作甘。」

「二、五事：一曰貌，二曰言，三曰視，四曰聽，五曰思。貌曰恭，言曰從，視曰明，聽曰聰，思曰睿。恭作肅，從作乂，明作哲，聰作謀，睿作聖。」

「三、八政：一曰食，二曰貨，三曰祀，四曰司空，五曰司徒，六曰司寇，七曰賓，八曰師。」

「四、五紀：一曰歲，二曰月，三曰日，四曰星辰，五曰歷數。」

3. 「五、皇極：皇建其有極，斂時五福，用敷錫厥庶民。惟時厥庶民于汝極，錫汝保極。凡厥庶民，無有淫朋；人無有比德，惟皇作極。凡厥庶民，有猷有為有守，汝則念之。不協于極，不罹于咎；皇則受之。而康而色，曰『予攸好德。』汝則錫之福。時人斯其惟皇之極。無虐瑩獨；而畏高明。人之有能有為，使羞其行，而邦其昌。凡厥正人，既富方谷；汝弗能使有好于而家，時人斯其辜。于其無好德，汝雖錫之福，其作汝用咎。無偏無陂，遵王之義；無有作好，遵王之道；無有作惡，遵王之路。無偏無黨，王道蕩蕩；無黨無偏，王道平平；無反無側，王道正直。會其有極，歸其有極。曰皇極之敷言，是彝是訓，于帝其訓。凡厥庶民，極之敷言，是訓是行，以近天子之光。曰天子作民父母，以為天下王。」
4. 「六、三德：一曰正直，二曰剛克，三曰柔克。平康正直，強弗友剛克，變友柔克；沈潛剛克，高明柔克。惟辟作福，惟辟作威，惟辟玉食，臣無有作福作威玉食；臣之有作福作威玉食，其害于而家、凶于而國。人用側頗僻，民用僭忒。」
5. 「七、稽疑：擇建立卜筮人，乃命卜筮，曰雨，曰霽，曰蒙，曰驛，曰克，曰貞，曰悔。凡七，卜五，占用二，衍忒。立時人作卜筮，三人占，則從二人之言。汝則有大疑，謀及乃心，謀及卿士，謀及庶人，謀及卜筮。汝則從、龜從、筮從、卿士從、庶民從，是之謂大同；身其康強，子孫其逢：吉。汝則從、龜從、筮從、卿士逆、庶民逆：吉。卿士從、龜從、筮從、汝則逆、庶民逆：吉。庶民從、龜從、筮從、汝則逆、卿士逆：吉。汝則從、龜從、筮逆、卿士逆、庶民逆：作內，吉；作外，凶。龜筮共違于人：用靜，吉；用作，凶。」
6. 「八、庶徵：曰雨，曰暘，曰燠，曰寒，曰風，曰時。五者來備，各以其敘，庶草蕃廡。一極備凶，一極無凶。曰休徵：曰肅，時雨若；曰乂，時暘若；曰哲，時燠若；曰謀，時寒若；曰聖，時風若。曰咎徵：曰狂，恆雨若；曰僭，恆暘若；曰豫，恆燠若；曰急，恆寒若；曰蒙，恆風若。曰王省惟歲，卿士惟月，師尹惟日。歲月日時無易，百穀用成，乂用明，俊民用章，家用平康。日月歲時既易，百穀用不成，乂用昏不明，俊民用微，家用不寧。庶民惟星，星有好風，星有好雨。日月之行，則有冬有夏；月之從星，則以風雨。」
- 「九、五福：一曰壽，二曰富，三曰康寧，四曰攸好德，五曰考終命。六極：一曰凶短折，二曰疾，三曰憂，四曰貧，五曰惡，六曰弱。」

#### 四、召誥

1. 惟二月既望，越六日乙未，王朝步自周，則至于豐。

惟太保先周公相宅；越若來三月，惟丙午朏，越三日戊申，太保朝至于洛，卜宅。厥既得卜，則經營。越三日庚戌，太保乃以庶殷，攻位于洛汭；越五日甲寅，位成。若翼日乙卯，周公朝至于洛，則達觀于新邑營。越三日丁巳，用牲于郊，牛二。越翼日戊午，乃社于新邑，牛一、羊一、豕一。越七日甲子，周公乃朝用書命庶殷——侯、甸、男、邦伯。厥既命庶庶，庶殷丕作。

2. 太保乃以庶邦冢君，出取幣，乃復入，錫周公。曰：「拜手稽首，旅王若公。誥告庶殷，越自乃御事。嗚呼！皇天上帝，改厥元子茲大國殷之命。惟王受命，無疆惟休，亦無疆惟恤。嗚呼！曷其奈何弗敬！

天既遐終大邦殷之命。茲殷多先哲王在天，越厥後王後民，茲服厥命；厥終智藏瘝在。夫知保抱攜持厥婦子，以哀籲天；徂厥亡出執。」

「嗚呼！天亦哀于四方民，其眷命用懋，王其疾敬德。相古先民有夏，天迪從子保；面稽天若，今時既墜厥命。今相有殷，天迪格保；面稽天若，今時既墜厥命。今沖子嗣，則無遺壽考；曰：其稽我古人之德，矧曰其有能稽謀自天。嗚呼！有王雖小，元子哉。其丕能誠于小民，今休。王不敢後，用顧畏于民畧。

王來紹上帝，自服于土中。旦曰：『其作大邑，其自時配皇天；毖祀于上下，其自時中乂，王厥有成命，治民今休。』王先服殷御事，比介于我有周御事。節性，惟日其邁；王敬作所，不可不敬德。」

3. 「我不可不監于有夏，亦不可不監于有殷。我不敢知曰，有夏服天命，惟有歷年；我不敢知曰，不其延，惟不敬厥德，乃早墜厥命。我不敢知曰，有殷受天命，惟有歷年；我不敢知曰，不其延，惟不敬厥德，乃早墜厥命。今王嗣受厥命，我亦惟茲二國命，嗣若功。王乃初服；嗚呼！若生子，罔不在厥初生；自貽哲命。今天其命哲，命吉凶，命歷年。知今我初服，宅新邑，肆惟王其疾敬德。王其德之用，祈天永命。

其惟王勿以小民淫用非彝，亦敢殄戮；用乂民，若有功。其惟王位在德元，小民乃惟刑；用于天下，越王顯。上下勤恤，其曰：『我受天命，丕若有夏歷年，式勿替有殷歷年。』欲王以小民受天永命。」

拜手稽首曰：「予小臣，敢以王之讎民、百君子、越友民，保受王威命明德。王末有成命，王亦顯。我非敢勤，惟恭奉幣、用供王，能祈天永命。」

## 五、秦誓

公曰：「嗟！我士！聽無嘩！予誓告汝群言之首。古人有言曰：『民訖自若，是多盤。責人斯無難；惟受責俾如流，是惟艱哉。』我心之憂：日月逾邁，若弗云來。惟古之謀人，則曰未就予忌；惟今之謀人，姑將以為親。雖則云然，尚繇詢茲黃髮，則罔所愆。番番良士，旅力既愆，我尚有之。佶佶勇夫，射御不違，我尚不欲。惟截截善論言，俾君子易辭，我皇多有之！昧昧我思之：如有一介臣，斷斷猗，無他技；其心休休焉，其如有容。人之有技，若己有之；人之彥聖，其心好之，不啻如自其口出，是能容之。以保我子孫黎民，亦職有利哉。人之有技，冒疾以惡之；人之彥聖，而違之俾不違，是不能容。以不能保我子孫黎民，亦曰殆哉。邦之杌隍，曰由一人；邦之榮懷，亦尚一人之慶。」



### 64【周禮選】

1. 大司樂：掌成均之法，以治建國之學政，而合國之子弟焉。凡有道者、有德者，使教焉；死則以為樂祖，祭於瞽宗。以樂德教國子：中和、只庸、孝友。以樂語教國子：興道、諷誦、言語。以樂舞教國子舞《云門》、《大卷》、《大咸》、《大韶》、《大夏》、《大濩》、《大武》。以六律、六同、五聲、八音、六舞大合樂，以致鬼神示，以和邦國，以諧萬民，以安賓客，以說遠人，以作動物。
2. 乃分樂而序之，以祭，以享，以祀。乃奏黃鐘，歌大呂，舞《雲門》，以祀天神。乃奏大蕤，歌應鐘，舞《咸池》，以祭地示。乃奏姑洗，歌南呂，舞《大韶》，以祀四望。乃奏蕤賓，歌函鐘，舞《大夏》，以祭山川。乃奏夷則，歌小呂，舞《大濩》，以享先妣。乃奏無射，歌夾鐘，舞《大武》，以享先祖。凡六樂者，文之以五聲，播之以八音。凡六樂者，一變而致羽物及川澤之祇，再變而致裸物及山林之祇，三變而致鱗物及丘陵之祇，四變而致毛物及墳衍之祇，五變而致介物及土祇，六變而致象物及天神。
3. 凡樂，圜鐘為宮，黃鐘為角，大蕤為徵，姑洗為羽，雷鼓雷鼗，孤竹之管，云和之琴瑟，《雲門》之舞；冬日至，於地上之圜丘奏之，若樂六變，則天神皆降，可得而禮矣。凡樂，函鐘為宮，大蕤為角，姑洗為徵，南呂為羽，靈鼓靈鼗，孫竹之管，空桑之琴瑟，《咸池》之舞；夏日至，於澤中之方丘奏之，若樂八變，則地示皆出，可得而禮矣。凡樂，黃鐘為宮，大呂為角，大蕤為徵，應鐘為羽，路鼓路鼗，陰竹之管，龍門之琴

瑟，《九德》之歌，《九韶》之舞；於宗廟之中奏之，若樂九變，則人鬼可得而禮矣！

4. 凡樂事：大祭祀，宿縣，遂以聲展之。王出入，則令奏《王夏》；尸出入，則令奏《肆夏》；牲出入，則令奏《昭夏》。帥國子而舞。大饗不入牲，其他皆如祭祀。大射，王出入，令奏《王夏》；及射，令奏《騶虞》。詔諸侯以弓矢舞。王大食，三宥，皆令奏鐘鼓。王師大獻，則令奏愷樂。凡日月食，四鎮五岳崩，大傀異災，諸侯薨，令去樂。大札、大凶、大災、大臣死，凡國之大憂，令弛縣。凡建國，禁其淫聲、過聲、凶聲、慢聲。大喪，涖廢樂器；及葬，藏樂器，亦如之。

## 二、冬官考工記（節）

1. 國有六職，百工與居一焉。或坐而論道；或作而行之；或審曲面勢，以飭五材，以辨民器；或通四方之珍異以資之；或飭力以長地財；或治絲麻以成之。

坐而論道，謂之王公；作而行之，謂之士大夫；審曲面勢，以飭五材，以辨民器，謂之百工；通四方之珍異以資之，謂之商旅；飭力以長地財，謂之農夫；治絲麻以成之，謂之婦功。

2. 粵無鎛，燕無函，秦無廬，胡無弓車。粵之無鎛也，非無鎛也，夫人而能為鎛也。燕之無函也，非無函也，夫人而能為函也。秦之無廬也，非無廬也，夫人而能為廬也。胡之無弓車也，非無弓車也，夫人而能為弓車也。知者創物。巧者述之守之，世謂之工。百工之事，皆聖人之作也。爍金以為刃，凝土以為器，作車以行陸，作舟以行水，此皆聖人之所作也。

3. 天有時，地有氣，材有美，工有巧。合此四者，然後可以為良。材美工巧，然而不良，則不時、不得地氣也。橘逾淮而北為枳，鵠鶩不逾濟，貉逾汶則死，此地氣然也。鄭之刀，宋之斤，魯之削，吳粵之劍，遷乎其地而弗能為良，地氣然也。燕之角，荊之干，妘胡之筍，吳粵之金錫，此材之美者也。天有時以生，有時以殺；草木有時以生，有時以死；石有時以泐；水有時以凝，有時以澤；此天時也。



## 65【儀禮選】

1. 士冠禮。

筮於廟門。主人玄冠、朝服、緇帶、素鞶，即位於門東，西面。有司如主人服，即位於西方，東面，北上。筮與席、所卦者，具饌於西塾。布席于門中，闌西闕外，西面。筮人執筮，抽上韝，兼執之，進受命於主人。宰

自右少退，贊命。筮人許諾，右還，即席坐，西面。卦者在左。卒筮，書卦，執以示主人。主人受，眡，反之。筮人還，東面；旅占，卒；進告吉。若不吉，則筮遠日，如初儀。徹筮席。宗人告事畢。

2. 主人戒賓。賓禮辭，許。主人再拜，賓答拜。主人退，賓拜送。

前期三日，筮賓，如求日之儀。

乃宿賓。賓如主人服，出門左，西面再拜。主人東面答拜，乃宿賓。賓許，主人再拜，賓答拜。主人退，賓拜送。宿贊冠者一人，亦如之。

厥明夕為期。於廟門之外。主人立于門東，兄弟在其南，少退，西面，北上。有司皆如宿服，立於西方，東面，北上，擯者請期，宰告曰：「質明行事。」告兄弟及有司。告事畢。擯者告期于賓之家。

3. 夙興，設洗，直於東榮，南北以堂深。水在洗東。陳服於房中西墉下，東領，北上。爵弁服；纁裳，純衣，緇帶，韎韐。皮弁服：素積，緇帶，素鞶。玄端：玄裳、黃裳、雜裳可也，緇帶、爵鞶。緇布冠缺項，青組纓屬于缺；緇纁，廣終幅，長六尺；皮弁笄，爵弁笄；緇組紘，纁邊；同篋。櫛實於篋。蒲筵二，在南。側尊一甌醴，在服北；有篋實勺、解、角柶。脯醢；南上。爵弁、皮弁、緇布冠，各一匱，執以待於西坵南，南面，東上。賓升則東面。

4. 主人玄端爵鞶，立於阼階下，直東序，西面。兄弟畢袵玄，立於洗東，西面，北上。擯者玄端，負東塾。將冠者采衣，紒，在房中，南面。

賓如主人服，贊者玄端從之，立于外門之外。擯者告。主人迎，出門左，西面，再拜。賓答拜。主人揖贊者，與賓揖，先入。每曲，揖。至于廟門，揖，入。三揖，至于階，三讓。主人升，立于序端，西面。賓西序，東面。贊者盥於洗西，升，立于房中，西面，南上。

5. 主人之贊者筵於東序，少北，西面。將冠者出房，南面。贊者奠纁、笄、櫛於筵南端。賓揖將冠者，將冠者即筵坐。贊者坐，櫛，設纁。賓降，主人降。賓辭，主人對。賓盥，卒，壹揖，壹讓，升。主人升，復初位。賓筵前坐，正纁，興，降西階一等。執冠者升一等，東面授賓。賓右手執項，左手執前，進容，乃祝，坐如初，乃冠；興，復位。贊者卒。冠者興，賓揖之。適房，服玄端爵鞶，出房，南面。

6. 賓揖之，即筵坐。櫛，設笄。賓盥、正纁如初，降二等，受皮弁，右執項，左執前，進祝；加之如初，復位。贊者卒紘。興，賓揖之。適房，服素積素鞶，容，出房，南面。

賓降三等，受爵弁，加之。服纁裳韎韐。其他如加皮弁之儀。

徹皮弁、冠、櫛、筵入于房。筵于戶西，南面。贊者洗于房中，側酌醴；加枳，覆之，面葉。賓揖，冠者就筵，筵西，南面。賓授醴于戶東，加枳，面枋，筵前北面。冠者筵西拜，受解，賓東面答拜。薦脯醢。冠者即筵坐，左執解，右祭脯醢，以枳祭醴三，興；筵末坐，啐醴，建枳，興；降筵，坐奠解，拜；執解興。賓答拜。

7. 冠者奠解於薦東，降筵；北面坐取脯；降自西階，適東壁，北面見于母。母拜受，子拜送，母又拜。

賓降，直西序，東面。主人降，復初位。冠者立于西階東，南面。賓字之，冠者對。

賓出。主人送於廟門外。請醴賓，賓禮辭，許。賓就次。

冠者見於兄弟，兄弟再拜，冠者答拜。見贊者，西面拜，亦如之。入見姑、姊，如見母。

乃易服，服玄冠、玄端、爵韠，奠摯見於君。遂以摯見於鄉大夫、鄉先生。

乃醴賓，以壹獻之禮。主人酬賓，束帛、儷皮。贊者皆與。贊冠者為介。賓出，主人送於外門外，再拜；歸賓俎。

(中略「若不醴」節)

8. 戒賓，曰：「某有子某。將加布於其首，願吾子之教之也。」賓對曰：

「某不敏，恐不能共事，以病吾子，敢辭。」主人曰：「某猶願吾子之終教之也！」賓對曰：「吾子重有命，某敢不從？」宿，曰：「某將加布於某之首，吾子將蒞之，敢宿。」賓對曰：「某敢不夙興？」

始加，祝曰：「令月吉日，始加元服。棄爾幼志，順爾成德。壽考惟祺，介爾景福。」再加，曰：「吉月令辰，乃申爾服。敬爾威儀，淑慎爾德。眉壽萬年，永受胡福。」三加，曰：「以歲之正，以月之令，咸加爾服。兄弟具在，以成厥德。黃耇無疆，受天之慶。」

醴辭曰：「甘醴惟厚，嘉薦令芳。拜受祭之，以定爾祥。承天之休，壽考不忘。」

醢辭曰：「旨酒既清，嘉薦宣時。始加元服，兄弟具來。孝友時格，永乃保之。」再醢，曰：「旨酒既滑，嘉薦伊脯。乃申爾服，禮儀有序。祭此嘉爵，承天之祜。」三醢，曰：「旨酒令芳，籩豆有楚。咸加爾服，餽升折俎。承天之慶，受福無疆。」

字辭曰：「禮儀既備，令月吉日，昭告爾字。爰字孔嘉，髦士攸宜。宜之于假，永受保之，曰伯某甫。」仲、叔、季，唯其所當。(下略)

## 66【禮記選】

### 一、曲禮上第一(節)

1. 曲禮曰：毋不敬，儼若思，安定辭。安民哉！

教不可長，欲不可從，志不可滿，樂不可極。

賢者狎而敬之，畏而愛之。愛而知其惡，憎而知其善。積而能散，安安而能遷。

臨財毋苟得，臨難毋苟免。很毋求勝，分毋求多。疑事毋質，直而勿有。

若夫，坐如尸，立如齊。禮從宜，使從俗。

夫禮者所以定親疏，決嫌疑，別同異，明是非也。

禮，不妄說人，不辭費。禮，不踰節，不侵侮，不好狎。修身踐言，謂之善行。行修言道，禮之質也。

禮聞取於人，不聞取人。禮聞來學，不聞往教。

2. 道德仁義，非禮不成。教訓正俗，非禮不備。分爭辨訟，非禮不決。君臣上下父子兄弟，非禮不定。宦學事師，非禮不親。班朝治軍，涖官行法，非禮威嚴不行。禱祠祭祀，供給鬼神，非禮不誠不莊。是以君子恭敬撝節退讓以明禮。

3. 鸚鵡能言，不離飛鳥；猩猩能言，不離禽獸。今人而無禮，雖能言，不亦禽獸之心乎？夫唯禽獸無禮，故父子聚麀。是故聖人作，為禮以教人。使人以有禮，知自別於禽獸。

4. 太上貴德，其次務施報。禮尚往來。往而不來，非禮也；來而不往，亦非禮也。人有禮則安，無禮則危。故曰：禮者不可不學也。

5. 夫禮者，自卑而尊人。雖負販者，必有尊也，而況富貴乎？富貴而知好禮，則不驕不淫；貧賤而知好禮，則志不懾。(下略)

### 二、檀弓第三(選)

1. 事親有隱而無犯，左右就養無方，服勤至死，致喪三年。事君有犯而無隱，左右就養有方，服勤至死，方喪三年。事師無犯無隱，左右就養無方，服勤至死，心喪三年。

2. 曾子寢疾，病。樂正子春坐於牀下，曾元、曾申坐於足，童子隅坐而執燭。童子曰：「華而晄，大夫之簣與？」子春曰：「止！」曾子聞之，瞿然曰：「呼！」曰：「華而晄，大夫之簣與？」曾子曰：「然，斯季孫之賜也，我未之能易也。元，起易簣。」曾元曰：「夫子之病革矣，不可以變，幸而至於旦，請敬易之。」曾子曰：「爾之愛我也不如彼。君子之愛人也以德，細人之愛人也以姑息。吾何求哉？吾得正而斃焉，斯已矣。」舉扶而易之。反席未安而沒。



3. 子張病，召申祥而語之曰：「君子曰終，小人曰死；吾今日其庶幾乎！」
4. 孔子蚤作，負手曳杖，消搖於門，歌曰：「泰山其頽乎？梁木其壞乎？哲人其萎乎？」既歌而入，當戶而坐。子貢聞之曰：「泰山其頽，則吾將安仰？梁木其壞、哲人其萎，則吾將安放？夫子殆將病也。」遂趨而入。夫子曰：「賜！爾來何遲也？夏后氏殯於東階之上，則猶在阼也；殷人殯於兩楹之間，則與賓主夾之也；周人殯於西階之上，則猶賓之也。而丘也殷人也。予疇昔之夜，夢坐奠於兩楹之間。夫明王不興，而天下其孰能宗予？予殆將死也。」蓋寢疾七日而沒。
5. 子路曰：「吾聞諸夫子：喪禮，與其哀不足而禮有餘也，不若禮不足而哀有餘也。祭禮，與其敬不足而禮有餘也，不若禮不足而敬有餘也。」
6. 子夏既除喪而見，予之琴，和之不和，彈之而不成聲。作而曰：「哀未忘也。先王制禮，而弗敢過也。」子張既除喪而見，予之琴，和之而和，彈之而成聲，作而曰：「先王制禮不敢不至焉。」
7. 有子問於曾子曰：「問喪於夫子乎？」曰：「聞之矣：喪欲速貧，死欲速朽。」有子曰：「是非君子之言也。」曾子曰：「參也聞諸夫子也。」有子又曰：「是非君子之言也。」曾子曰：「參也與子游聞之。」有子曰：「然，然則夫子有為言之也。」曾子以斯言告於子游。子游曰：「甚哉，有子之言似夫子也。昔者夫子居於宋，見桓司馬自為石椁，三年而不成。夫子曰：『若是其靡也，死不如速朽之愈也。』死之欲速朽，為桓司馬言之也。南宮敬叔反，必載寶而朝。夫子曰：『若是其貨也，喪不如速貧之愈也。』喪之欲速貧，為敬叔言之也。」曾子以子游之言告於有子，有子曰：「然，吾固曰：非夫子之言也。」曾子曰：「子何以知之？」有子曰：「夫子制於中都，四寸之棺，五寸之椁，以斯知不欲速朽也。昔者夫子失魯司寇，將之荆，蓋先之以子夏，又申之以冉有，以斯知不欲速貧也。」
8. 成子高寢疾，慶遺入，請曰：「子之病革矣，如至乎大病，則如之何？」子高曰：「吾聞之也：生有益於人，死不害於人。吾縱生無益於人，吾可以死害於人乎哉？我死，則擇不食之地而葬我焉。」
9. 晉獻公之喪，秦穆公使人弔公子重耳，且曰：「寡人聞之：亡國恆於斯，得國恆於斯。雖吾子儼然在憂服之中，喪亦不可久也，時亦不可失也。孺子其圖之。」以告舅犯，舅犯曰：「孺子其辭焉。喪人無寶，仁親以為寶。父死之謂何？又因以為利，而天下其孰能說之？孺子其辭焉。」公子重耳對客曰：「君惠弔亡臣重耳，身喪父死，不得與於哭泣之哀，以為君憂。父死之謂何？或敢有他志，以辱君義。」稽顙而不拜，哭而起，起而

不私。子顯以致命於穆公。穆公曰：「仁夫，公子重耳！夫稽顙而不拜，則未為後也，故不成拜；哭而起，則愛父也；起而不私，則遠利也。」

10. 公叔文子卒，其子戍請諡於君，曰：「日月有時，將葬矣。請所以易其名者。」君曰：「昔者衛國凶饑，夫子為粥與國之餓者，是不亦惠乎？昔者衛國有難，夫子以其死衛寡人，不亦貞乎？夫子聽衛國之政，修其班制，以與四鄰交，衛國之社稷不辱，不亦文乎？故謂夫子『貞惠文子』。」
11. 陳子車死於衛，其妻與其家大夫謀以殉葬，定，而後陳子亢至，以告曰：「夫子疾，莫養於下，請以殉葬。」子亢曰：「以殉葬，非禮也；雖然，則彼疾當養者，孰若妻與宰？得已，則吾欲已；不得已，則吾欲以二子者之為之也。」於是弗果用。
12. 子路曰：「傷哉貧也！生無以為養，死無以為禮也。」孔子曰：「啜菽飲水盡其歡，斯之謂孝；斂手足形，還葬而無槨，稱其財，斯之謂禮。」
13. 孔子過泰山側，有婦人哭於墓者而哀，夫子式而聽之。使子貢問之，曰：「子之哭也，壹似重有憂者。」而曰：「然，昔者吾舅死於虎，吾夫又死焉，今吾子又死焉。」夫子曰：「何為不去也？」曰：「無苛政。」夫子曰：「小子識之，苛政猛於虎也。」
14. 晉獻文子成室，晉大夫發焉。張老曰：「美哉輪焉！美哉奐焉！歌於斯，哭於斯，聚國族於斯。」文子曰：「武也得歌於斯，哭於斯，聚國族於斯，是全要領以從先大夫於九京也。」北面再拜稽首。君子謂之善頌善禱。
15. 仲尼之畜狗死，使子貢埋之，曰：「吾聞之也：敝帷不棄，為埋馬也；敝蓋不棄，為埋狗也。丘也貧，無蓋；於其封也，亦予之席，毋使其首陷焉。」路馬死，埋之以帷。
16. 孔子之故人曰原壤，其母死，夫子助之沐椁。原壤登木曰：「久矣予之不託於音也。」歌曰：「狸首之斑然，執女手之卷然。」夫子為弗聞也者而過之，從者曰：「子未可以已乎？」夫子曰：「丘聞之：親者毋失其為親也，故者毋失其為故也。」

### 三、禮運 第九(節)

1. 昔者仲尼與於蜡賓，事畢，出遊於觀之上，喟然而嘆。仲尼之嘆，蓋嘆魯也。言偃在側曰：「君子何嘆？」孔子曰：「大道之行也，與三代之英，丘未之逮也，而有志焉。」
2. 「大道之行也，天下為公。選賢與能，講信脩睦，故人不獨親其親，不獨子其子，使老有所終，壯有所用，幼有所長，矜寡孤獨廢疾者，皆有所

養。男有分，女有歸。貨惡其棄於地也，不必藏於己；力惡其不出於身也，不必為己。是故，謀閉而不興，盜竊亂賊而不作，故外戶而不閉，是謂大同。」

3. 「今大道既隱，天下為家。各親其親，各子其子，貨力為己。大人世及以為禮，城郭溝池以為固，禮義以為紀；以正君臣，以篤父子，以睦兄弟，以和夫婦，以設制度，以立田里，以賢勇知，以功為己。故謀用是作，而兵由此起。禹、湯、文、武、成王、周公，由此其選也。此六君子者，未有不謹於禮者也。以著其義，以考其信，著有過，刑仁講讓，示民有常。如有不由此者，在執者去，眾以為殃，是謂小康。」（下略）

#### 四、學記 第十八

1. 發慮憲，求善良，足以誨聞，不足以動眾；就賢體遠，足以動眾，未足以化民。君子如欲化民成俗，其必由學乎！

玉不琢，不成器；人不學，不知道。是故古之王者，建國君民，教學為先。《兌命》曰：「念終始典于學。」其此之謂乎！

雖有嘉肴，弗食，不知其旨也；雖有至道，弗學，不知其善也。是故，學，然後知不足，教，然後知困。知不足，然後能自反也；知困，然後能自強也，故曰：教學相長也。兌命曰：「學學半。」其此之謂乎！

2. 古之教者，家有塾，黨有庠，術有序，國有學。比年入學，中年考校。一年視離經辨志，三年視敬業樂群，五年視博習親師，七年視論學取友，謂之「小成」；九年知類通達，強立而不反，謂之「大成」。夫然後足以化民易俗，近者說服，而遠者懷之，此大學之道也。《記》曰：「蛾子時術之。」其此之謂乎！

3. 大學始教，皮弁祭菜，示敬道也；《宵雅》肄三，官其始也；入學鼓篋，孫其業也；夏楚二物，收其威也；未卜禘不視學，游其志也；時觀而弗語，存其心也；幼者聽而弗問，學不躐等也；此七者，教之大倫也。

《記》曰：「凡學：官先事，士先志。」其此之謂乎！

大學之教也時，教必有正業，退息必有居。學，不學操縵，不能安弦；不學博依，不能安《詩》；不學雜服，不能安禮；不興其藝，不能樂學。故君子之於學也，藏焉，脩焉，息焉，游焉。夫然，故安其學而親其師，樂其友而信其道。是以雖離師輔而不反也。《兌命》曰：「敬孫務時敏，厥修乃來。」其此之謂乎！今之教者，呻其佔畢，多其訊言。及于數進，而不顧其安；使人不由其誠，教人不盡其材；其施之也悖，其求之也佛。夫然，故隱其學而疾其師，苦其難而不知其益也，雖終其業，其去之必速。教之不刑，其此之由乎！

4. 大學之法，禁於未發之謂豫，當其可之謂時，不陵節而施之謂孫，相觀而善之謂摩。此四者，教之所由興也。發然後禁，則扞格而不勝；時過然後學，則勤苦而難成；雜施而不孫，則壞亂而不修；獨學而無友，則孤陋而寡聞；燕朋，逆其師；燕辟，廢其學；此六者，教之所由廢也。君子既知教之所由興，又知教之所由廢，然後可以為人師也。故君子之教喻也，道而弗牽，強而弗抑，開而弗達。道而弗牽則和，強而弗抑則易，開而弗達則思；和易以思，可謂善喻矣。

5. 學者有四失，教者必知之。人之學也，或失則多，或失則寡，或失則易，或失則止。此四者，心之莫同也。知其心，然後能救其失也。教也者，長善而救其失者也。善歌者，使人繼其聲；善教者，使人繼其志。其言也，約而達，微而臧，罕譬而喻，可謂繼志矣。

君子知至學之難易，而知其美惡，然後能博喻；能博喻然後能為師；能為師，然後能為長；能為長，然後能為君。故師也者，所以學為君也。是故擇師不可不慎也。《記》曰：「三王、四代唯其師。」此之謂乎！

6. 凡學之道，嚴師為難。師嚴然後道尊，道尊然後民知敬學。是故君之所不臣於其臣者二：當其為尸，則弗臣也；當其為師，則弗臣也。大學之禮，雖詔於天子，無北面；所以尊師也。

善學者，師逸而功倍，又從而庸之；不善學者，師勤而功半，又從而怨之。善問者，如攻堅木，先其易者，後其節目，及其久也，相說以解；不善問者，反此。善待問者，如撞鐘，叩之以小者則小鳴，叩之以大者則大鳴，待其從容，然後盡其聲；不善答問者反此。此皆進學之道也。

7. 記問之學，不足以為人師。必也其聽語乎，力不能問，然後語之；語之而不知，雖舍之可也。

良冶之子，必學為裘；良弓之子，必學為箕；始駕馬者反之，車在馬前。君子察於此三者，可以有志於學矣。

古之學者：比物醜類。鼓無當於五聲，五聲弗得不和。水無當於五色，五色弗得不章。學無當於五官。五官弗得不治。師無當於五服，五服弗得不親。君子曰：「大德不官，大道不器，大信不約，大時不齊。」察於此四者，可以有志於本矣。三王之祭川也，皆先河而後海；或源也，或委也。此之謂務本。

## 五、樂記 第十九(節)

1. 凡音之起，由人心生也。人心之動，物使之然也。感於物而動，故形於聲。聲相應，故生變；變成方，謂之音；比音而樂之，及干戚羽旄，謂之樂。樂者，音之所由生也；其本在人心之感於物也。是故，其哀心感者，

其聲噍以殺。其樂心感者，其聲嘽以緩。其喜心感者，其聲發以散；其怒心感者，其聲粗以厲；其敬心感者，其聲直以廉；其愛心感者，其聲和以柔。六者，非性也，感於物而后動。是故，先王慎所以感之者。故禮以道其志，樂以和其聲，政以一其行，刑以防其姦。禮樂刑政，其極一也；所以同民心而出治道也。

凡音者，生人心者也。情動於中，故形於聲。聲成文，謂之音。是故，治世之音安以樂，其政和。亂世之音怨以怒，其政乖。亡國之音哀以思，其民困。聲音之道，與政通矣。

2. 宮為君，商為臣，角為民，徵為事，羽為物。五者不亂，則無怙懣之音矣。宮亂則荒，其君驕。商亂則陂，其官壞；角亂則憂，其民怨；徵亂則哀，其事勤；羽亂則危，其財匱。五者皆亂，迭相陵，謂之慢。如此，則國之滅亡無日矣。鄭衛之音，亂世之音也，比於慢矣。桑間濮上之音，亡國之音也，其政散，其民流，誣上行私，而不可止也。

凡音者，生於人心者也。樂者，通倫理者也。是故，知聲而不知音者，禽獸是也；知音而不知樂者，眾庶是也。唯君子為能知樂，是故，審聲以知音，審音以知樂，審樂以知政，而治道備矣。是故，不知聲者，不可與言音；不知音者，不可與言樂。知樂，則幾於禮矣。禮樂皆得，謂之有德。德者得也。

是故樂之隆，非極音也。食饗之禮，非致味也。清廟之瑟，朱弦而疏越，壹倡而三歎，有遺音者矣。大饗之禮，尚玄酒而俎腥魚，大羹不和，有遺味者矣。是故，先王之制禮樂也，非以極口腹耳目之欲也，將以教民平好惡，而反人道之正也。

3. 人生而靜，天之性也；感於物而動，性之欲也。物至知知，然後好惡形焉。好惡無節於內，知誘於外，不能反躬，天理滅矣。夫物之感人無窮，而人之好惡無節，則是物至而人化物也。人化物也者，滅天理而窮人欲者也。於是有悖逆詐偽之心，有淫泆作亂之事。是故，強者脅弱，眾者暴寡，知者詐愚，勇者苦怯，疾病不養，老幼孤獨不得其所；此大亂之道也。

是故先王之制禮樂，人為之節；衰麻哭泣，所以節喪紀也；鐘鼓干戚，所以和安樂也；昏姻冠笄，所以別男女也；射鄉食饗，所以正交接也。禮節民心，樂和民聲，政以行之，刑以防之，禮樂刑政，四達而不悖，則王道備矣。

樂者為同，禮者為異。同則相親，異則相敬，樂勝則流，禮勝則離。合情飾貌者，禮樂之事也。禮義立，則貴賤等矣；樂文同，則上下和矣；好惡

著，則賢不肖別矣。刑禁暴、爵舉賢，則政均矣。仁以愛之，義以正之；如此，則民治行矣。

4. 樂由中出，禮自外作。樂由中出，故靜；禮自外作，故文。大樂必易，大禮必簡。樂至則無怨，禮至則不爭。揖讓而治天下者，禮樂之謂也。暴民不作，諸侯賓服，兵革不試，五刑不用，百姓無患，天子不怒。如此，則樂達矣。合父子之親，明長幼之序，以敬四海之內，天子如此，則禮行矣。

大樂與天地同和，大禮與天地同節；和，故百物不失；節，故祀天祭地。明，則有禮樂；幽，則有鬼神。如此，則四海之內，合敬同愛矣。禮者，殊事合敬者也；樂者，異文合愛者也。禮樂之情同，故明王以相沿也。故事與時並，名與功偕。

故鐘鼓管磬，羽籥干戚，樂之器也；屈伸俯仰、綴兆舒疾，樂之文也；簠簋俎豆、制度文章，禮之器也；升降上下，周還裼襲，禮之文也。故知禮樂之情者，能作；識禮樂之文者，能述。作者之謂聖，述者之謂明。明聖者，述作之謂也。

5. 樂者，天地之和也；禮者，天地之序也。和，故百物皆化；序，故群物皆別。樂由天作，禮以地制；過制則亂，過作則暴。明於天地，然後能興禮樂也。論倫無患，樂之情也；欣喜歡愛，樂之官也。中正無邪，禮之質也；莊敬恭順，禮之制也。若夫禮樂之施於金石，越於聲音，用於宗廟社稷，事乎山川鬼神，則此所與民同也。王者，功成作樂，治定制禮，其功大者，其樂備；其治辯者，其禮具。干戚之舞，非備樂也；孰亨而祀，非達禮也。五帝殊時，不相沿樂；三王異世，不相襲禮。樂極則憂，禮粗則偏矣。及夫敦樂而無憂，禮備而不偏者，其唯大聖乎！

天高地下，萬物散殊，而禮制行矣；流而不息，合同而化，而樂興焉。春作夏長，仁也；秋斂冬藏，義也。仁近於樂，義近於禮。樂者敦和，率神而從天；禮者別宜，居鬼而從地。故聖人作樂以應天，制禮以配地；禮樂明備，天地官矣。

6. 天尊地卑，君臣定矣；卑高已陳，貴賤位矣；動靜有常，小大殊矣。方以類聚，物以群分，則性命不同矣。在天成象，在地成形；如此，則禮者，天地之別也。地氣上齊，天氣下降，陰陽相摩，天地相蕩，鼓之以雷霆，奮之以風雨，動之以四時，煖之以日月，而百化興焉。如此，則樂者，天地之和也。

化不時，則不生；男女無辨，則亂升；天地之情也。及夫禮樂之極乎天而蟠乎地，行乎陰陽而通乎鬼神；窮高極遠而測深厚。樂著大始，而禮居成

物。著不息者，天也，著不動者，地也。一動一靜者，天地之間也。故聖人曰「禮樂」云。

## 六、經解 第二十六

1. 孔子曰：「入其國，其教可知也。其為人也：溫柔敦厚，《詩》教也；疏通知遠，《書》教也；廣博易良，《樂》教也；絜靜精微，《易》教也；恭儉莊敬，《禮》教也；屬辭比事，《春秋》教也。故《詩》之失，愚；《書》之失，誣；《樂》之失，奢；《易》之失，賊；《禮》之失，煩；《春秋》之失，亂。其為人也：溫柔敦厚而不愚，則深於《詩》者也；疏通知遠而不誣，則深於《書》者也；廣博易良而不奢，則深於《樂》者也；絜靜精微而不賊，則深於《易》者也；恭儉莊敬而不煩，則深於《禮》者也；屬辭比事而不亂，則深於《春秋》者也。」
2. 天子者，與天地參。故德配天地，兼利萬物，與日月並明，明照四海而不遺微小。其在朝廷，則道仁聖禮義之序；燕處，則聽雅頌之音；行步，則有環佩之聲；升車，則有鸞和之音。居處有禮，進退有度，百官得其宜，萬事得其序。《詩》云：「淑人君子，其儀不忒。其儀不忒，正是四國。」此之謂也。發號出令而民說，謂之和；上下相親，謂之仁；民不求其所欲而得之，謂之信；除去天地之害，謂之義。義與信，和與仁，霸王之器也。有治民之意而無其器，則不成。
3. 禮之於正國也：猶衡之於輕重也，繩墨之於曲直也，規矩之於方圓也。故衡誠縣，不可欺以輕重；繩墨誠陳，不可欺以曲直；規矩誠設，不可欺以方圓；君子審禮，不可誣以奸詐。  
是故，隆禮由禮，謂之有方之士；不隆禮不由禮，謂之無方之民。敬讓之道也。故以奉宗廟則敬，以入朝廷則貴賤有位，以處室家則父子親兄弟和，以處鄉里則長幼有序。孔子曰：「安上治民，莫善於禮。」此之謂也。
4. 故朝覲之禮，所以明君臣之義也。聘問之禮，所以使諸侯相尊敬也。喪祭之禮，所以明臣子之恩也。鄉飲酒之禮，所以明長幼之序也。昏姻之禮，所以明男女之別也。夫禮，禁亂之所由生，猶坊止水之所自來也。故以舊坊為無所用而壞之者，必有水敗；以舊禮為無所用而去之者，必有亂患。故昏姻之禮廢，則夫婦之道苦，而淫辟之罪多矣。鄉飲酒之禮廢，則長幼之序失，而爭鬥之獄繁矣。喪祭之禮廢，則臣子之恩薄，而倍死忘生者眾矣。聘覲之禮廢，則君臣之位失，諸侯之行惡，而倍畔侵陵之敗起矣。
5. 故禮之教化也微，其止邪也於未形，使人日徙善遠罪而不自知也。是以先王隆之也。《易》曰：「君子慎始，差若毫厘，繆以千里。」此之謂也。

## 七、孔子閒居第二十九

1. 孔子閒居，子夏侍。子夏曰：「敢問《詩》云：『凱弟君子，民之父母』，何如斯可謂民之父母矣？」孔子曰：「夫民之父母乎，必達於禮樂之原，以致五至，而行三無，以橫於天下。四方有敗，必先知之。此之謂民之父母矣。」
  2. 子夏曰：「民之父母，既得而聞之矣；敢問何謂『五至』？」孔子曰：「志之所至，詩亦至焉；詩之所至，禮亦至焉；禮之所至，樂亦至焉；樂之所至，哀亦至焉。哀樂相生。是故，正明目而視之，不可得而見也；傾耳而聽之，不可得而聞也；志氣塞乎天地，此之謂五至。」
  3. 子夏曰：「五至既得而聞之矣，敢問何謂三無？」孔子曰：「無聲之樂，無體之禮，無服之喪，此之謂三無。」子夏曰：「三無既得略而聞之矣，敢問何詩近之？」孔子曰：「『夙夜其命宥密』，無聲之樂也。『威儀逮逮，不可選也』，無體之禮也。『凡民有喪，匍匐救之』，無服之喪也。」
  4. 子夏曰：「言則大矣！美矣！盛矣！言盡於此而已乎？」孔子曰：「何為其然也！君子之服之也，猶有五起焉。」子夏曰：「何如？」子曰：「無聲之樂，氣志不違；無體之禮，威儀遲遲；無服之喪，內恕孔悲。無聲之樂，氣志既得；無體之禮，威儀翼翼；無服之喪，施及四國。無聲之樂，氣志既從；無體之禮，上下和同；無服之喪，以畜萬邦。無聲之樂，日聞四方；無體之禮，日就月將；無服之喪，純德孔明。無聲之樂，氣志既起；無體之禮，施及四海；無服之喪，施于孫子。」
  5. 子夏曰：「三王之德，參於天地，敢問：何如斯可謂參於天地矣？」孔子曰：「奉三無私以勞天下。」子夏曰：「敢問何謂三無私？」孔子曰：「天無私覆，地無私載，日月無私照。奉斯三者以勞天下，此之謂三無私。其在《詩》曰：『帝命不違，至於湯齊。湯降不遲，聖敬日齊。昭假遲遲，上帝是祗。帝命式於九圍。』是湯之德也。」
  6. 「天有四時，春秋冬夏，風雨霜露，無非教也。地載神氣，神氣風霆，風霆流形，庶物露生，無非教也。清明在躬，氣志如神，嗜欲將至，有開必先。天降時雨，山川出雲。其在《詩》曰：『嵩高惟嶽，峻極于天。惟嶽降神，生甫及申。惟申及甫，惟周之翰。四國于蕃，四方于宣。』此文武之德也。三代之王也，必先令聞，《詩》云：『明明天子，令聞不已。』三代之德也。『弛其文德，協此四國。』大王之德也。」
- 子夏蹶然而起，負牆而立，曰：「弟子敢不承乎！」



## 67【春秋左傳選】

### 一、鄭伯克段于鄆(隱公元年)

1. 初，鄭武公娶于申，曰武姜。生莊公及共叔段。莊公寤生，驚姜氏，故名曰寤生，遂惡之。愛共叔段，欲立之。亟請於武公，公弗許。及莊公即位，為之請制。公曰：「制，巖邑也，虢叔死焉，佗邑唯命。」請京，使居之，謂之京城大叔。

祭仲曰：「都城過百雉，國之害也。先王之制：大都不過參國之一；中，五之一；小，九之一。今京不度，非制也，君將不堪。」公曰：「姜氏欲之，焉辟害。」對曰：「姜氏何厭之有。不如早為之所，無使滋蔓，蔓，難圖也。蔓草猶不可除，況君之寵弟乎！」公曰：「多行不義，必自斃，子姑待之。」

2. 既而大叔命西鄙、北鄙貳於己。公子呂曰：「國不堪貳，君將若之何？欲與大叔，臣請事之；若弗與，則請除之，無生民心。」公曰：「無庸，將自及。」大叔又收貳以為己邑，至于廩延。子封曰：「可矣，厚將得眾。」公曰：「不義不暱，厚將崩。」

大叔完聚，繕甲兵，具卒乘，將襲鄭。夫人將啟之。公聞其期，曰：「可矣。」命子封帥車二百乘以伐京，京叛大叔段。段入于鄆，公伐諸鄆。五月辛丑，大叔出奔共。

3. 書曰：「鄭伯克段于鄆。」段不弟，故不言弟。如二君，故曰克。稱鄭伯，譏失教也。謂之鄭志。不言出奔，難之也。

遂寘姜氏于城潁，而誓之曰：「不及黃泉，無相見也！」既而悔之。潁考叔為潁谷封人，聞之。有獻於公，公賜之食。食舍肉，公問之，對曰：「小人有母，皆嘗小人之食矣，未嘗君之羹。請以遺之。」公曰：「爾有母遺，繄我獨無！」潁考叔曰：「敢問何謂也？」公語之故，且告之悔。對曰：「君何患焉？若闕地及泉，隧而相見，其誰曰不然？」公從之。公入而賦：「大隧之中，其樂也融融。」姜出而賦：「大隧之外，其樂也泄泄。」遂為母子如初。

君子曰：「潁考叔純孝也，愛其母，施及莊公。《詩》曰：『孝子不匱，永錫爾類。』其是之謂乎！」

### 二、周鄭交質(隱公三年)

鄭武公、莊公為平王卿士，王貳于虢，鄭伯怨王。王曰：「無之。」故周鄭交質，王子狐為質於鄭，鄭公子忽為質於周。

王崩，周人將畀虢公政。四月，鄭祭足帥師取溫之麥，秋又取成周之禾。周鄭交惡。

君子曰：「信不由中，質無益也。明恕而行，要之以禮，雖無有質，誰能間之？苟有明信，澗谿沼沚之毛，蘋蘩蕓藻之菜，筐筥錡釜之器，潢汙行潦之水，可薦於鬼神，可羞於王公。而況君子結二國之信，行之以禮，又焉用質？風有采繁采蘋，雅有行葦洞酌，昭忠信也。」

### 三、臧哀伯諫納郜鼎(桓公二年)

夏，四月，取郜大鼎于宋。戊申，納于大廟。非禮也。

臧哀伯諫曰：「君人者，將昭德塞違，以臨照百官，猶懼或失之，故昭令德以示子孫，是以清廟茅屋，大路越席，大羹不致，粢食不鑿，昭其儉也。衮冕黻珽，帶裳幅舄，衡紱紘紼，昭其度也。藻率鞞鞞，鞶厲游纓，昭其數也。火龍黼黻，昭其文也。五色比象，昭其物也，錫鸞和鈴，昭其聲也。三辰旂旗，昭其明也。」

「夫德，儉而有度，登降有數，文物以紀之，聲明以發之，以臨照百官，百官於是乎戒懼，而不敢易紀律。今滅德立違，而寘其賂器於大廟，以明示百官。百官象之，其又何誅焉。國家之敗，由官邪也；官之失德，寵賂章也。郜鼎在廟，章孰甚焉！武王克商，遷九鼎于維維，義士猶或非之，而況將昭違亂之賂器於大廟，其若之何？」公不聽。

周內史聞之曰：「臧孫達其有後於魯乎！君違，不忘諫之以德。」

### 四、季梁諫追楚師(桓公六年)

1. 楚武王侵隨，使蘧章求成焉，軍於瑕以待之。隨人使少師董成。

鬬伯比言于楚子曰：「吾不得志於漢東也，我則使然。我張吾三軍，而被吾甲兵，以武臨之。彼則懼而協以謀我，故難間也。漢東之國隨為大，隨張必棄小國。小國離，楚之利也。少師侈，請羸師以張之。」熊率且比曰：「季梁在，何益？」鬬伯比曰：「以為後圖，少師得其君。」王毀軍而納少師。

2. 少師歸，請追楚師，隨侯將許之。季梁止之，曰：「天方授楚。楚之羸，其誘我也，君何急焉？臣聞小之能敵大也，小道大淫。所謂道，忠於民而信於神也。上思利民，忠也；祝史正辭，信也。今民餒而君逞欲，祝史矯舉以祭，臣不知其可也。」

公曰：「吾牲牷肥腍，粢盛豐備，何則不信？」對曰：「夫民，神之主也。是以聖王先成民，而後致力於神。故奉牲以告曰『博碩肥腍』，謂民力之普存也，謂其畜之碩大蕃滋也，謂其不疾疫蠹也，謂其備腍咸有也。奉盛以告曰『絜粢豐盛』，謂其三時不害，而民和年豐也，奉酒醴以告曰『嘉粟旨酒』，謂其上下皆有嘉德而無違心也。所謂馨香，無讒慝也。故務其三時，脩其五教，親其九族，以致其禋祀，於是乎民和而神降之福，故動則有成。今民各有

心，而鬼神乏主，君雖獨豐，其何福之有？君姑脩政而親兄弟之國，庶免於難。」

隨侯懼而脩政，楚不敢伐。

## 五、曹劌論戰(莊公十年)

齊師伐我。公將戰，曹劌請見。其鄉人曰：「肉食者謀之，又何間焉？」劌曰：「肉食者鄙，未能遠謀。」乃入見。

問何以戰。公曰：「衣食所安，弗敢專也，必以分人。」對曰：「小惠未徧，民弗從也。」公曰：「犧牲玉帛，弗敢加也，必以信。」對曰：「小信未孚，神弗福也。」公曰：「小大之獄，雖不能察，必以情。」對曰：「忠之屬也，可以一戰！戰則請從。」

公與之乘，戰于長勺，公將鼓之。劌曰：「未可。」齊人三鼓。劌曰：「可矣。」齊師敗績，公將馳之。劌曰：「未可。」下視其轍，登軾而望之，曰：「可矣。」遂逐齊師。

既克，公問其故。對曰：「夫戰，勇氣也。一鼓作氣，再而衰，三而竭。彼竭我盈，故克之。夫大國，難測也，懼有伏焉。吾視其轍亂，望其旗靡，故逐之。」

## 六、齊桓公伐楚盟屈完(僖公四年)

1. 春，齊侯以諸侯之師侵蔡，蔡潰，遂伐楚。

楚子使與師言曰：「君處北海，寡人處南海，唯是風馬牛不相及也。不虞君之涉吾地也，何故？」管仲對曰：「昔召康公命我先君大公曰：『五侯九伯，女實征之，以夾輔周室。』賜我先君履，東至于海，西至于河，南至于穆陵，北至于無棣。爾貢包茅不入，王祭不共，無以縮酒，寡人是徵。昭王南征而不復，寡人是問。」對曰：「貢之不入，寡君之罪也，敢不共給？昭王之不復，君其問諸水濱。」師進，次于陘。

2. 夏，楚子使屈完如師。師退，次于召陵。

齊侯陳諸侯之師，與屈完乘而觀之。齊侯曰：「豈不穀是為，先君之好是繼。與不穀同好如何？」對曰：「君惠徼福於敝邑之社稷，辱收寡君，寡君之願也。」齊侯曰：「以此眾戰。誰能禦之？以此攻城，何城不克？」對曰：「君若以德綏諸侯，誰敢不服？君若以力，楚國方城以為城，漢水以為池，雖眾，無所用之。」

屈完及諸侯盟。

## 七、宮之奇諫假道(僖公五年)

晉侯復假道於虞以伐虢，宮之奇諫曰：「虢，虞之表也。虢亡，虞必從之。晉不可啟，寇不可翫，一之謂甚，其可再乎？諺所謂『輔車相依，脣亡齒寒』者，虞、虢之謂也。」

公曰：「晉，吾宗也。豈害我哉？」對曰：「大伯、虞仲，大王之昭也。大伯不從，是以不嗣。虢仲虢叔，王季之穆也，為文王卿士，勳在王室，藏於盟府。將虢是滅，何愛於虞？且虞能親於桓莊乎？其愛之也。桓莊之族何罪？而以為戮。不唯偏乎？親以寵偏，猶尚害之，況以國乎？」

公曰：「吾享祀豐潔，神必據我。」對曰：「臣聞之，鬼神非人實親，惟德是依，故《周書》曰：『皇天無親，惟德是輔。』又曰：『黍稷非馨，明德惟馨。』又曰：『民不易物，惟德絜物。』如是，則非德，民不和、神不享矣。神所馮依，將在德矣。若晉取虞，而明德以薦馨香，神其吐之乎？」弗聽，許晉使。宮之奇以其族行。曰：「虞不臘矣！在此行也，晉不更舉矣。」

冬，晉滅虢。師還，館於虞。遂襲虞，滅之，執虞公。

## 八、齊桓下拜受胙(僖公九年)

會于葵丘，尋盟，且脩好，禮也。

王使宰孔賜齊侯胙，曰：「天子有事于文武，使孔賜伯舅胙，齊侯將下拜。孔曰：「且有後命。天子使孔曰：『以伯舅耄老，加勞，賜一級，無下拜。』」對曰：「天威不遠顏咫尺，小白余敢貪天子之命，無下拜？恐隕越于下，以遺天子羞，敢不下拜！」下，拜；登，受。

## 九、陰飴甥對秦伯(僖公十五年)

十月，晉陰飴甥會秦伯，盟于王城。

秦伯曰：「晉國和乎？」對曰：「不和，小人恥失其君，而悼喪其親，不憚征繕，以立圉也，曰：『必報讎，寧事戎狄。』君子愛其君而知其罪，不憚征繕，以待秦命，曰：『必報德，有死無二。』，以此不和。」

秦伯曰：「國謂君何？」對曰：「小人感，謂之不免；君子恕，以為必歸。小人曰：『我毒秦，秦豈歸君？』君子曰：『我知罪矣，秦必歸君。貳而執之，服而舍之，德莫厚焉，刑莫威焉。服者懷德，貳者畏刑。此一役也，秦可以霸，納而不定，廢而不立，以德為怨，秦不其然。』

秦伯曰：「是吾心也。」改館晉侯，饋七牢焉。

## 十、展喜犒師(二十六年)

齊孝公伐我北鄙。公使展喜犒師，使受命于展禽。

齊侯未入竟，展喜從之。曰：「寡君聞君親舉玉趾，將辱於敝邑，使下臣犒執事。」齊侯曰：「魯人恐乎？」對曰：「小人恐矣，君子則否。」齊侯

曰：「室如縣罄，野無青草，何恃而不恐？」對曰：「恃先王之命。昔周公大政，股肱周室，夾輔成王，成王勞之，而賜之盟曰：『世世子孫，無相害也。』載在盟府，太師職之。桓公是以糾合諸侯，而謀其不協，彌縫其闕，而匡救其災，昭舊職也。及君即位，諸侯之望，曰：『其率桓之功。』我敝邑用不敢保聚，曰：『豈其嗣世九年，而棄命廢職，其若先君何？君必不然。』恃此以不恐。

齊侯乃還。

## 十一、秦晉殽之戰(僖公三十年至三十三年)

### (一)燭之武退秦師

僖公三十年九月甲午，晉侯秦伯圍鄭，以其無禮於晉，且貳於楚也。晉軍函陵，秦軍汜南。

佚之狐言於鄭伯曰：「國危矣，若使燭之武見秦君，師必退。」公從之。辭曰：「臣之壯也，猶不如人，今老矣，無能為也已。」公曰：「吾不能早用子，今急而求子，是寡人之過也。然鄭亡，子亦有不利焉！」許之，夜縋而出。

見秦伯，曰：「秦、晉圍鄭，鄭既知亡矣。若亡鄭而有益於君，敢以煩執事。越國以鄙遠，君知其難也，焉用亡鄭以陪鄰？鄰之厚，君之薄也。若舍鄭以為東道主，行李之往來，共其乏困，君亦無所害。且君嘗為晉君賜矣，許君焦瑕，朝濟而夕設版焉，君之所知也。夫晉何厭之有？既東封鄭，又欲肆其西封；不闕秦，焉取之？闕秦以利晉，唯君圖之！」秦伯說，與鄭人盟，使杞子、逢孫、楊孫戍之，乃還。

子犯謂擊之，公曰：「不可。微夫人之力不及此。因人之力而敝之，不仁；失其所與，不知。以亂易整，不武。吾其還也！」亦去之。

### (二)蹇叔哭師

三十二年冬，晉文公卒。庚辰，將殯於曲沃；出絳，柩有聲如牛。卜偃使大夫拜，曰：「君命大事，將有西師過軼我，擊之，必大捷焉。」

杞子自鄭使告于秦，曰：「鄭人使我掌其北門之管，若潛師以來，國可得也。」穆公訪諸蹇叔。蹇叔曰：「勞師以襲遠，非所聞也。師勞力竭，遠主備之，無乃不可乎！師之所為，鄭必知之；勤而無所，必有悖心。且行千里，其誰不知？」公辭焉。召孟明、西乞、白乙，使出師於東門之外。蹇叔哭之，曰：「孟子，吾見師之出，而不見其入也！公使謂之曰：『爾何知！中壽，爾墓之木拱矣。』」

蹇叔之子與師，哭而送之，曰：「晉人禦師必於殽，殽有二陵焉：其南陵，夏后臯之墓也；其北陵，文王之所辟風雨也。必死是間，余收爾骨焉。」秦師遂東。

### (三)弦高犒師

三十三年春，秦師過周北門，左右免胄而下，超乘者三百乘。王孫滿尚幼，觀之，言於王曰：「秦師輕而無禮，必敗。輕則寡謀，無禮則脫；入險而脫，又不能謀，能無敗乎？」及滑，鄭商人弦高，將市於周；遇之，以乘韋先牛十二，犒師，曰：「寡君聞吾子將步師出於敝邑，敢犒從者；不腆敝邑，為從者之淹，居則具一日之積，行則備一夕之衛。」且使遽告于鄭。鄭穆公使視客館，則束載厲兵秣馬矣。使皇武子辭焉，曰：「吾子淹久於敝邑，唯是脯資餼牽竭矣。為吾子之將行也，鄭之有原圃，猶秦之有具囿也；吾子取其麋鹿，以閒敝邑，若何？」杞子奔齊，逢孫、楊孫奔宋。孟明曰：「鄭有備矣，不可冀也。攻之不克，圍之不繼，吾其還也。」滅滑而還。

### (四)晉敗秦師於殽

晉原軫曰：「秦違蹇叔而以貪勤民，天奉我也。奉不可失，敵不可縱；縱敵患生，違天不祥，必伐秦師。」欒枝曰：「未報秦施而伐其師，其為死君乎？」先軫曰：「秦不哀吾喪，而伐吾同姓，秦則無禮，何施之為？吾聞之：一日縱敵，數世之患也。謀及子孫，可謂死君乎？」遂發命，遽興姜戎。子墨衰絰，梁弘御戎，萊駒為右。夏四月辛巳，敗秦師于殽，獲百里孟明視、西乞術、白乙丙以歸。遂墨以葬文公。晉於是始墨。

文嬴請三帥，曰：「彼實構吾二君，寡君若得而食之，不厭；君何辱討焉？使歸就戮於秦。以逞寡君之志，若何？」公許之。先軫朝，問秦囚，公曰：「夫人請之，吾舍之矣。」先軫怒曰：「武夫力而拘諸原，婦人暫而免諸國，墮軍實而長寇讎，亡無日矣！」不顧而唾。公使陽處父追之，及諸河，則在舟中矣。釋左驂以公命贈孟明；孟明稽首曰：「君之惠，不以纍臣釁鼓，使歸就戮於秦。寡君之以為戮，死且不朽；若從君惠而免之，三年將拜君賜。」

秦伯素服郊次，鄉師而哭曰：「孤違蹇叔，以辱二三子，孤之罪也。」不替孟明。「孤之過也，大夫何罪？且吾不以一眚掩大德！」

### 十二、王孫滿對楚子(宣公三年)

楚子伐陸渾之戎，遂至于雒，觀兵于周疆。

定王使王孫滿勞楚子，楚子問鼎之大小輕重焉。對曰：「在德不在鼎！昔夏之方有德也，遠方圖物，貢金九牧，鑄鼎象物，百物而為之備，使民知神、姦。故民入川澤山林，不逢不若，螭魅罔兩，莫能逢之。用能協于上下，以

承天休，桀有昏德，鼎遷于商，載祀六百。商紂暴虐，鼎遷于周，德之休明，雖小，重也；其姦回昏亂，雖大，輕也。天祚明德，有所底止。成王定鼎于郊廓，卜世三十，卜年七百，天所命也。周德雖衰，天命未改，鼎之輕重，未可問也。」

### 十三、齊國佐不辱命(成公二年)

晉師從齊師，入自丘輿，擊馬陘。齊侯使賓媚人賂以紀甌玉磬與地。不可，則聽客之所爲。

賓媚人致賂，晉人不可，曰：「必以蕭同叔子爲質，而使齊之封內盡東其畝。」

對曰：「蕭同叔子非他，寡君之母也。若以匹敵，則亦晉君之母也。吾子布大命於諸侯，而曰必質其母以爲信，其若王命何？且是以不孝令也。詩曰：『孝子不匱，永錫爾類。』若以不孝令於諸侯，其無乃非德類也乎？」

「先王疆理天下，物土之宜，而布其利。故詩曰：『我疆我理，南東其畝。』今吾子疆理諸侯，而曰盡東其畝而已，唯吾子戎車是利，無顧土宜。其無乃非先王之命也乎？反先王則不義，何以爲盟主？」

「其晉實有闕。四王之王也，樹德而濟同欲焉；五伯之霸也，勤而撫之，以役王命。今吾子求合諸侯，以逞無疆之欲。詩曰：『布政優優，百祿是道。』子實不優，而棄百祿，諸侯何害焉？」

「不然，寡君之命使臣，則有辭矣。曰：『子以君師辱於敝邑，不腆敝賦，以犒從者。畏君之震，師徒撓敗。』吾子惠徼齊國之福，不泯其社稷，使繼舊好。唯是先君之敝器土地不敢愛，子又不許，請收合餘燼，背城借一。敝邑之幸，亦云從也；況其不幸，敢不唯命是聽？」

### 十四、楚歸晉知罃(成公三年)

晉人歸楚公子穀臣與連尹襄老之尸于楚，以求知罃。於是荀首佐中軍矣，故楚人許之。

王送知罃，曰：「子其怨我乎？」對曰：「二國治戎，臣不才，不勝其任，以爲俘馘。執事不以釁鼓，使歸即戮，君之惠也。臣實不才，又誰敢怨？」

王曰：「然則德我乎？」對曰：「二國圖其社稷而求紓其民，各懲其忿以相宥也，兩釋纍囚，以成其好。二國有好，臣不與及。其誰敢德？」

王曰：「子歸，何以報我？」對曰：「臣不任受怨，君亦不任受德。無怨無德，不知所報？」

王曰：「雖然，必告不穀。」對曰：「以君之靈，纍臣得歸骨於晉，寡君之以爲戮，死且不朽。若從君之惠而免之，以賜君之外臣首。首其請于寡君，而以戮於宗，亦死且不朽。若不獲命，而使嗣宗職，次及於事，而帥偏師以

修封疆，雖遇執事，其弗敢違。其竭力致死，無有二心，以盡臣禮。所以報也！」

王曰：「晉未可與爭。」重為之禮而歸之。

### 十五、祁奚請免叔向(襄公二十一年)

欒盈出奔楚，宣子殺羊舌虎，囚叔向。

人謂叔向曰：「子離於罪，其為不知乎？」叔向曰：「與其死亡若何？詩曰：『優哉游哉，聊以卒歲。』知也！」

樂王鮒見叔向曰：「吾為子請。」叔向弗應。出，不拜。其人皆咎叔向。叔向曰：「必祁大夫。」室老聞之曰：「樂王鮒言於君，無不行，求救吾子，吾子不許；祁大夫所不能也，而曰必由之。何也？」叔向曰：「樂王鮒，從君者也，何能行？祁大夫外舉不棄讎，內舉不失親，其獨遺我乎？詩曰：『有覺德行，四國順之。』夫子覺者也。」

晉侯問叔向之罪於樂王鮒。對曰：「不棄其親，其有焉。」於是祁奚老矣，聞之，乘駟而見宣子，曰：「《詩》曰：『惠我無疆，子孫保之。』《書》曰：『聖有謨勳，明徵定保。』夫謀而鮮過、惠訓不倦者，叔向有焉，社稷之固也，猶將十世宥之，以勸能者。今壹不免其身，以棄社稷，不亦惑乎？鯀殛而禹興；伊尹放太甲而相之，卒無怨色；管蔡為戮，周公右王。若之何其以虎也棄社稷？子為善，誰敢不勉？多殺何為？」

宣子說，與之乘，以言諸公而免之。不見叔向而歸，叔向亦不告免焉而朝。

### 十六、魯叔孫豹論不朽(襄公二十四年)

二十四年春，穆叔如晉，范宣子逆之，問焉，曰：「古人有言曰，『死而不朽』，何謂也？」穆叔未對。宣子曰：「昔勾之祖，自虞以上為陶唐氏，在夏為御龍氏，在商為豕韋氏，在周為唐杜氏，晉主夏盟為范氏，其是之謂乎？」穆叔曰：「以豹所聞，此之謂世祿，非不朽也。魯有先大夫曰臧文仲，既沒，其言立，其是之謂乎！豹聞之：『大上有立德，其次有立功，其次有立言。』雖久不廢，此之謂不朽。若夫保姓受氏，以守宗祧，世不絕祀，無國無之，祿之大者，不可謂不朽。」

### 十七、子產告范宣子輕幣(襄公二十四年)

范宣子為政，諸侯之幣重，鄭人病之。

二月，鄭伯如晉。子產寓書於子西，以告宣子，曰：「子為晉國，四鄰諸侯不聞令德而聞重幣，僞也惑之。僞聞君子長國家者，非無賄之患，而無令名之難。夫諸侯之賄，聚於公室，則諸侯貳；若吾子賴之，則晉國貳。諸侯貳則晉國壞，晉國貳則子之家壞。何沒沒也？將焉用賄？」



「夫令名，德之輿也；德，國家之基也。有基無壞，無亦是務乎？有德則樂，樂則能久。詩云：『樂只君子，邦家之基。』有令德也夫！『上帝臨女，無貳爾心。』有令名也夫！恕思以明德，則令名載而行之，是以遠至邇安。毋寧使人謂子：『子實生我』，而謂：『子浚我以生乎』？象有齒以焚其身，賄也。」

宣子說，乃輕幣。

## 十八、季札觀周樂(襄公二十九年)

1. 吳公子札來聘。請觀於周樂。

使工爲之歌《周南》、《召南》，曰：「美哉！始基之矣，猶未也，然勤而不怨矣。」

爲之歌《邶》、《鄘》、《衛》，曰：「美哉！淵乎！憂而不困者也。吾聞衛康叔、武公之德如是，是其《衛風》乎？」

爲之歌《王》曰：「美哉！思而不懼。其周之東乎！」

爲之歌《鄭》，曰：「美哉！其細已甚，民弗堪也。是其先亡乎？」

爲之歌《齊》，曰：「美哉，泱泱乎！大風也哉！表東海者其大公乎？國未可量也。」

爲之歌《豳》，曰：「美哉，蕩乎！樂而不淫，其周公之東乎？」

爲之歌《秦》，曰：「此之謂夏聲。夫能夏則大，大之至也，其周之舊乎？」

爲之歌《魏》，曰：「美哉，泂泂乎！大而婉，險而易行。以德輔此，則明主也！」

爲之歌《唐》，曰：「思深哉！其有陶唐氏之遺民乎？不然，何憂之遠也？」

非令德之後，誰能若是？」爲之歌《陳》，曰：「國無主，其能久乎！」

自《鄆》以下，無譏焉！

2. 爲之歌《小雅》，曰：「美哉！思而不貳，怨而不言，其周德之衰乎？猶有先王之遺民焉！」爲之歌《大雅》，曰：「廣哉！熙熙乎！曲而有直體，其文王之德乎？」

爲之歌《頌》，曰：「至矣哉！直而不倨，曲而不屈；邇而不逼，遠而不攜；遷而不淫，復而不厭；哀而不愁，樂而不荒；用而不匱，廣而不宣；施而不費，取而不貪；處而不底，行而不流。五聲和，八風平；節有度，守有序。盛德之所同也！」

3. 見舞《象箛》、《南籥》者，曰：「美哉，猶有憾！」

見舞《大武》者，曰：「美哉，周之盛也！其若此乎？」

見舞《韶濩》者，曰：「聖人之弘也，而猶有慚德，聖人之難也！」

見舞《大夏》者，曰：「美哉！勤而不德。非禹其誰能修之！」

見舞《韶箭》者，曰：「德至矣哉！大矣！如天之無不幬也，如地之無不載也！雖甚盛德，其蔑以加於此矣！觀止矣！若有他樂，吾不敢請已！」

### 十九、子產論尹何為邑(襄公三十一年)

子皮欲使尹何為邑。子產曰：「少，未知可否。」子皮曰：「愿，吾愛之，不吾叛也。使夫往而學焉，夫亦愈知治矣。」

子產曰：「不可。人之愛人，求利之也。今吾子愛人則以政，猶未能操刀而使割也，其傷實多。子之愛人，傷之而已，其誰敢求愛於子？子於鄭國，棟也。棟折榱崩，僑將厭焉，敢不盡言？子有美錦，不使人學制焉；大官大邑，身之所庇也，而使學者制焉；其為美錦，不亦多乎？僑聞學而後入政，未聞以政學者也。若果行此，必有所害。譬如田獵，射御貫，則能獲禽；若未嘗登車射御，則敗績厭覆是懼，何暇思獲？」

子皮曰：「善哉！虎不敏。吾聞君子務知大者、遠者，小人務知小者、近者。我，小人也。衣服附在吾身，我知而慎之；大官、大邑，所以庇身也，我遠而慢之。微子之言，吾不知也。他日我曰：『子為鄭國，我為吾家，以庇焉，其可也。』今而後知不足。自今請，雖吾家，聽子而行。」

子產曰：「人心之不同，如其面焉。吾豈敢謂子面如吾面乎？抑心所謂危，亦以告也。」

子皮以為忠，故委政焉。子產是以能為鄭國。

### 二十、子產論政寬猛(昭公二十年)

鄭子產有疾。謂子大叔曰：「我死，子必為政。唯有德者能以寬服民，其次莫如猛。夫火烈，民望而畏之，故鮮死焉；水懦弱，民狎而翫之，則多死焉，故寬難。」疾數月而卒。

大叔為政，不忍猛而寬。鄭國多盜，取人於萑苻之澤。大叔悔之，曰：「吾早從夫子，不及此。」興徒兵以攻萑苻之盜，盡殺之，盜少止。

仲尼曰：「善哉！政寬則民慢，慢則糾之以猛。猛則民殘，殘則施之以寬。寬以濟猛；猛以濟寬，政是以和。」《詩》曰：『民亦勞止，汔可小康；惠此中國，以綏四方。』施之以寬也。『毋從詭隨，以謹無良；式遏寇虐，慘不畏明。』糾之以猛也。『柔遠能邇，以定我王。』平之以和也。又曰：

『不競不綌，不剛不柔，佈政優優，百祿是道。』和之至也。」

及子產卒，仲尼聞之，出涕曰：「古之遺愛也。」

### 二十一、子貢釋衛侯于吳(哀公十二年)

吳徵會于衛。初，衛人殺吳行人且姚而懼，謀於行人子羽，子羽曰：「吳方無道，無乃辱吾君，不如止也。」子木曰：「吳方無道，國無道，必棄疾於

人。吳雖無道，猶足以患衛，往也。長木之斃，無不標也；國狗之瘕，無不噬也，而況大國乎？」

秋，衛侯會吳于鄖。公及衛侯宋皇瑗盟，而卒辭吳盟。吳人藩衛侯之舍，子服景伯謂子貢曰，夫諸侯之會，事既畢矣，侯伯致禮，地主歸餼，以相辭也。今吳不行禮於衛，而藩其君舍以難之，子盍見大宰？」乃請束錦以行，語及衛故，大宰詬曰：「寡君願事衛君，衛君之來也緩，寡君懼，故將止之。」子貢曰：「衛君之來，必謀於其眾。其眾或欲或否，是以緩來。其欲來者，子之黨也；其不欲來者，子之讐也。若執衛君，是墮黨而崇讐也。夫墮子者，得其志矣。且合諸侯，而執衛君，誰敢不懼？墮黨崇讐，而懼諸侯，或者難以霸乎！」

大宰詬說，乃舍衛侯。



## 68【國語、戰國策選】

### 一、祭公諫征犬戎(國語·周語)

1. 穆王將徵犬戎。祭公謀父諫曰：「不可。先王耀德不觀兵。夫兵戢而時動，動則威；觀則玩，玩則無震。是故周文公之《頌》曰：『載戢干戈，載橐弓矢。我求懿德，肆于時夏，允王保之。』先王之於民也，懋正其德，而厚其性；阜其財求而利其器用；明利害之鄉，以文修之，使務利而避害，懷德而畏威，故能保世以滋大。

2. 「昔我先世后稷，以服事虞夏。及夏之衰也，棄稷不務，我先王不窋用失其官，而自竄於戎翟之間。不敢怠業，時序其德，纂修其緒，修其訓典；朝夕恪勤，守以敦篤，奉以忠信。奕世戴德，不忝前人。至於武王，昭前之光明而加之以慈和，事神保民，莫不欣喜。商王帝辛，大惡於民，庶民不忍，欣戴武王，以致戎於商牧。是先王非務武也，勤恤民隱，而除其害也。

3. 「夫先王之制，邦內甸服，邦外侯服，侯衛賓服，蠻夷要服，戎狄荒服。甸服者祭，侯服者祀，賓服者享，要服者貢，荒服者王。日祭、月祀、時享、歲貢、終王，先王之訓也！

有不祭則修意；有不祀則修言；有不享則修文；有不貢則修名；有不王則修德。序成而有不至則修刑。於是乎有刑不祭，伐不祀、徵不享、讓不貢、告不王。於是乎有刑罰之辟，有攻伐之兵，有征討之備，有威讓之令，有文告之辭。布令陳辭，而又不至，則增修於德，而無勤民於遠。是以近無不聽，遠無不服。

4. 「今自大畢、伯士之終也，犬戎氏以其職來王，天子曰：『予必以不享征之。』且觀之兵，其無乃廢先王之訓，而王幾頓乎？吾聞夫犬戎樹惇，帥舊德，而守終純固，其有以御我矣。」

5.

王不聽，遂征之。得四白狼四白鹿以歸，自是荒服者不至。

## 二、王孫圉論楚寶(國語·楚語)

1. 王孫圉聘於晉，定公饗之。趙簡子鳴玉以相，問於王孫圉曰：「楚之白珩猶在乎？」對曰：「然。」簡子曰：「其爲寶也幾何矣？」

曰：「未嘗爲寶。楚之所寶者，曰觀射父，能作訓辭，以行事於諸侯，使無以寡君爲口實。又有左史倚相，能道訓典，以敘百物，以朝夕獻善敗于寡君，使寡君無忘先王之業；又能上下說乎鬼神，順道其欲惡，使神無有怨痛於楚國。又有藪曰雲，連徒洲，金、木、竹、箭之所生也，龜、珠、角、齒、皮、革、羽、毛，所以備賦用，以戒不虞者也；所以共幣帛，以賓享於諸侯者也。若諸侯之好幣具，而導之以訓辭，有不虞之備，而皇神相之，寡君其可以免罪於諸侯，而國民保焉。此楚國之寶也。若夫白珩，先王之玩也，何寶之焉？」

2. 「圉聞國之寶，六而已。明王聖人能制議百物，以輔相國家，則寶之；玉足以庇廕嘉穀，使無水旱之災，則寶之；龜足以憲臧否，則寶之；珠足以禦火災，則寶之；金足以禦兵亂，則寶之；山林藪澤，足以備財用，則寶之。若夫譁囂之美，楚雖蠻夷，不能寶也！」

## (附)戰國策

### 一、魯共公擇言

梁王魏嬰觴諸侯於范臺。酒酣，請魯君舉觴。魯君興，避席擇言曰：「昔者帝女令儀狄作酒而美，進之禹，禹飲而甘之，遂疏儀狄，絕旨酒，曰：『後世必有以酒亡其國者。』齊桓公夜半不寐，易牙乃煎敖燔炙，和調五味而進之，桓公食之而飽，至旦不覺，曰：『後世必有以味亡其國者。』晉文公得南之威，三日不聽朝，遂推南之威而遠之，曰：『後世必有以色亡其國者。』楚王登強臺而望崩山，左江而右湖，以臨彷徨，其樂忘死，遂盟強臺而弗登，曰：『後世必有以高臺陂池亡其國者。』今主君之尊，儀狄之酒也；主君之味，易牙之調也；左白臺而右閭須，南威之美也；前夾林而後蘭臺，強臺之樂也。有一於此，足以亡其國，今主君兼此四者，可無戒與？」梁王稱善相屬。

## 二、唐雎說信陵君

信陵君殺晉鄙，救邯鄲，破秦人，存趙國，趙王自郊迎。唐雎謂信陵君曰：「臣聞之曰：『事有不可知者，有不可不知者；有不可忘者，有不可不忘者。』」信陵君曰：「何謂也？」對曰：「人之憎我也，不可不知也；吾憎人也，不可得而知也。人之有德於我也，不可忘也；吾有德於人也，不可不忘也。今君殺晉鄙，救邯鄲，破秦人，存趙國，此大德也。今趙王自郊迎，卒然見趙王，臣願君之忘之也！」信陵君曰：「無忌謹受教。」



## 69【春秋公羊傳選】

### 一、隱公元年(公元前七百二十二年)

1. **經**元年春，王正月。

**傳**元年者何？君之始年也。春者何？歲之始也。王者孰謂？謂文王也。曷為先言王而後言正月？王正月也。何言乎王正月？大一統也。公何以不言即位？成公意也。何成乎公之意？公將平國而反之桓。曷為反之桓？桓幼而貴，隱長而卑，其為尊卑也微，國人莫知。隱長又賢，諸大夫扳隱而立之。隱於是焉而辭立，則未知桓之將必得立也。且如桓立，則恐諸大夫之不能相幼君也，故凡隱之立為桓立也。隱長又賢，何以不宜立？立適以長不以賢，立子以貴不以長。桓何以貴？母貴也。母貴則子何以貴？子以母貴，母以子貴。

2. **經**三月，公及邾婁儀父盟于昧。

**傳**及者何？與也，會、及、暨，皆與也。曷為或言會，或言及，或言暨？會猶最也，及猶汲汲也，暨猶暨暨也。及，我欲之；暨，不得已也。儀父者何？邾婁之君也。何以名？字也。曷為稱字？褒之也。曷為褒之？為其與公盟也。與公盟者眾矣，曷為獨褒乎此？因其可褒而褒之。此其為可褒奈何？漸進也。昧者何？地期也。

3. **經**夏，五月，鄭伯克段于鄆。

**傳**克之者何？殺之也。殺之，則曷為謂之克？大鄭伯之惡也。曷為大鄭伯之惡？母欲立之，已殺之，如勿與而已矣。段者何？鄭伯之弟也。何以不稱弟？當國也。其地何？當國也。齊人殺無知何以不地？在內也。在內雖當國不地也。不當國雖在外，亦不地也。

4. **經**秋七月，天王使宰咺來歸惠公仲子之賵。

**傳**宰者何？官也。咺者何？名也。曷為以官氏？宰士也。惠公者何？隱之考也。仲子者何？桓之母也。何以不稱夫人？桓未君也。賵者何？喪事有賵。

贈者，蓋以馬，以乘馬束帛。車馬曰贈，貨財曰賻，衣被曰襚。桓未君則諸侯曷為來贈之？隱為桓立，故以桓母之喪告于諸侯。然則何言爾？成公意也。其言來何？不及事也。其言惠公仲子何？兼之，兼之非禮也。何以不言及仲子？仲子微也。

5. 經 九月，及宋人盟于宿。

傳 孰及之？內之微者也。

6. 經 冬，十有二月，祭伯來。

傳 祭伯者何？天子之大夫也。何以不稱使？奔也。奔則曷為不言奔？王者無外；言奔，則有外之辭也。

7. 經 公子益師卒。

傳 何以不日？遠也。所見異辭，所聞異辭，所傳聞異辭。

## 二、隱公二年(公元前七百二十年)

1. 經 三年春，王二月，己巳，日有食之。

傳 何以書？記異也。日食則曷為或日或不日？或言朔或不言朔？曰「某月某日朔，日有食之」者，食正朔也；其或日或不日，或失之前，或失之後。失之前者，朔在前也；失之後者，朔在後也。

2. 經 三月庚戌，天王崩。

傳 何以不書葬？天子記崩不記葬，必其時也。諸侯記卒記葬，有天子存，不得必其時也。曷為或言崩或言薨？天子曰崩，諸侯曰薨，大夫曰卒，士曰不祿。

3. 經 夏四月辛卯，尹氏卒。

傳 尹氏者何？天子之大夫也。其稱尹氏何？貶。曷為貶？譏世卿；世卿，非禮也。外大夫不卒，此何以卒？天王崩，諸侯之主也。

4. 經 秋，武氏子來求賻。

傳 武氏子者何？天子之大夫也。其稱武氏子何？譏。何譏爾？父卒子未命也。何以不稱使？當喪未君也。武氏子來求賻，何以書？譏。何譏爾？喪事無求，求賻非禮也，蓋通于下。

5. 經 八月庚辰，宋公和卒。

6. 經 冬十有二月，齊侯、鄭伯盟于石門。

7. 經 癸未，葬宋繆公。

傳 葬者曷為或日或不日？不及時而日，渴葬也；不及時而不日，慢葬也。過時而日，隱之也；過時而不日，謂之不能葬也。當時而不日，正也。當時而日，危不得葬也。此當時何危爾？宣公謂繆公曰：「以吾愛與夷，則不若愛女；以為社稷宗廟主，則與夷不若女，盍終為君矣？」宣公死，繆公立，繆

公逐其二子莊公馮與左師勃，曰：「爾為吾子，生毋相見，死毋相哭。」與夷復曰：「先君之所為不與臣國而納國乎君者，以君可以為社稷宗廟主也。今君逐君之二子而將致國乎與夷，此非先君之意也。且使子而可逐，則先君其逐臣矣。」繆公曰：「先君之不爾逐可知矣，吾立乎此，攝也。」終致國乎與夷。莊公馮弑與夷。故君子大居正，宋之禍，宣公為之也。

### 三、桓公十有一年(公元前七百零一年)

1. 經春，正月，齊人、衛人、鄭人盟于惡曹。
2. 經夏五月癸未，鄭伯寤生卒。
3. 經秋，七月，葬鄭莊公。九月，宋人執鄭祭仲。

傳祭仲者何？鄭相也。何以不名？賢也。何賢乎祭仲？以為知權也。其為知權奈何？古者鄭國處于留。先鄭伯有善于鄆公者，通乎夫人，以取其國而遷鄭焉，而野留。莊公死已葬，祭仲將往省于留，塗出于宋，宋人執之，謂之曰：「為我出忽而立突。」祭仲不從其言，則君必死、國必亡；從其言，則君可以生易死，國可以存易亡。少遼緩之，則突可故出，而忽可故反，是不可得則病，然後有鄭國。古人之有權者，祭仲之權是也。權者何？權者反於經，然後有善者也。權之所設，舍死亡無所設。行權有道，自貶損以行權，不害人以行權。殺人以自生，亡人以自存，君子不為也。

4. 經突歸于鄭。

傳突何以名？挈乎祭仲也。其言歸何？順祭仲也。

5. 經鄭忽出奔衛。忽何以名？《春秋》伯、子、男一也，辭無所貶。
6. 經柔會宋公、陳侯、蔡叔盟于折。

傳柔者何？吾大夫之未命者也。

7. 經公會宋公于夫童。
8. 經冬十有二月，公會宋公于闕。

### 四、莊公四年(公元前六百九十年)

1. 經春王二月，夫人姜氏饗齊侯于祝丘。
2. 經三月，紀伯姬卒。
3. 經夏，齊侯、陳侯、鄭伯遇于垂。
4. 經紀侯大去其國。

傳大去者何？滅也。孰滅之？齊滅之。曷為不言齊滅之？為襄公諱也。《春秋》為賢諱。何賢乎襄公？復讎也。何讎爾？遠祖也。哀公亨乎周，紀侯譖之。以襄公之為於此焉者，事祖禰之心盡矣。盡者何？襄公將復讎乎紀，卜之曰：「師喪分焉。」「寡人死之，不為不吉也！」遠祖者幾世乎？九世矣。九世猶可以復讎乎？雖百世可也。家亦可乎？曰：「不可。」國何以

可？國君一體也。先君之恥，猶今君之恥也。今君之恥，猶先君之恥也。國君何以為一體？國君以國為體，諸侯世，故國君為一體也。

今紀無罪，此非怒與？曰：「非也。」古者有明天子，則紀侯必誅，必無紀者。紀侯之不誅，至今有紀者，猶無明天子也。古者諸侯必有會聚之事、相朝聘之道，號辭必稱先君以相接，然則齊、紀無說焉，不可以並立乎天下。故將去紀侯者，不得不去紀也。有明天子則襄公得為若行乎？曰：「不得也。」不得則襄公曷為為之？上無天子，下無方伯，緣恩疾者可也。

5. 經 六月乙丑，齊侯葬紀伯姬。

傳 外夫人不書葬，此何以書？隱之也。何隱爾？其國亡矣，徒葬於齊爾。此復讎也，曷為葬之？滅其可滅，葬其可葬。此其為可葬奈何？復讎者非將殺之，逐之也。以為雖遇紀侯之殯，亦將葬之也。

6. 經 秋，七月。

7. 經 冬，公及齊人狩於郟。

傳 公曷為與微者狩？齊侯也。齊侯則其稱人何？諱與讎狩也。前此者有事矣，後此者有事矣，則曷為獨於此焉譏？於讎者將壹譏而已，故擇其重者而譏焉，莫重乎其與讎狩也。於讎者則曷為將壹譏而已？讎者無時焉可與通，通則為大譏不可勝譏，故將壹譏而已，其餘從同同。

## 五、莊公十有三年(公元前六百八十一年)

1. 經 春，齊侯、宋人、陳人、蔡人、邾婁人會于北杏。

2. 經 夏六月，齊人滅遂。

3. 經 秋七月。

4. 經 冬，公會齊侯盟于柯。

傳 何以不日？易也。其易奈何？桓之盟不日，其會不致，信之也。其不日何以始乎此？莊公將會乎桓，曹子進曰：「君之意何如？」莊公曰：「寡人之生則不若死矣！」曹子曰：「然則君請當其君，臣請當其臣。」莊公曰：「諾。」於是會乎桓。莊公升壇，曹子手劍而從之。管子進曰：「君何求乎？」曹子曰：「城壞壓竟，君不圖與？」管子曰：「然則君將何求？」曹子曰：「愿請汶陽之田。」管子顧曰：「君許諾。」桓公曰：「諾。」曹子請盟，桓公下與之盟。已盟，曹子揮劍而去之。要盟可犯，而桓公不欺；曹子可讎，而桓公不怨。桓公之信著乎天下，自柯之盟始焉。

## 六、僖公二年(公元前六百五十八年)

1. 經 春王正月，城楚丘。

傳 孰城？城衛也。曷為不言城衛？滅也。孰滅之？蓋狄滅之。曷為不言狄滅之？為桓公諱也。曷為為桓公諱？上無天子，下無方伯，天下諸侯有相滅亡



者，桓公不能救，則桓公恥之也。然則孰城之？桓公城之。曷為不言桓公城之？不與諸侯專封也。曷為不與？實與而文不與。文曷為不與？諸侯之義，不得專封。諸侯之義，不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。

2. 經夏，五月辛巳，葬我小君哀姜。

傳哀姜者何？莊公之夫人也。

3. 經虞師、晉師滅夏陽。

傳虞，微國也，曷為序乎大國之上？使虞首惡也。曷為使虞首惡？虞受賂，假滅國者道，以取亡焉。其受賂奈何？獻公朝諸大夫而問焉，曰：「寡人夜者寢而不寐，其意也何？」諸大夫有進對者曰：「寢不安與？其諸侍御有不在側者與？」獻公不應。

荀息進曰：「虞郭見與？」獻公揖而進之，遂與之入而謀曰：「吾欲攻郭，則虞救之，攻虞則郭救之，如之何？愿與子慮之。」荀息對曰：「君若用臣之謀，則今日取郭，而明日取虞爾，君何憂焉？」獻公曰：「然則奈何？」荀息曰：「請以屈產之乘，與垂棘之白璧，往必可得也。則寶出之內藏，藏之外府；馬出之內廄，繫之外廄爾，君何喪焉？」獻公曰：「諾。雖然，宮之奇存焉，如之何？」荀息曰：「宮之奇知則知矣！雖然，虞公貪而好寶，見寶必不從其言。請終以往。」於是終以往。

虞公見寶許諾。宮之奇果諫：「記曰：『唇亡則齒寒。』虞、郭之相救，非相為賜。則晉今日取郭，而明日虞從而亡爾。君請勿許也。」虞公不從其言，終假之道以取郭。還，四年，反取虞。虞公抱寶牽馬而至。荀息見曰：「臣之謀何如？」獻公曰：「子之謀則已行矣，寶則吾寶也，雖然，吾馬之齒亦已長矣！」蓋戲之也。夏陽者何？郭之邑也。曷為不繫于郭？國之也。曷為國之？君存焉爾。

4. 經秋九月，齊侯、宋公、江人、黃人盟于貫澤。

傳江人、黃人者何？遠國之辭也。遠國至矣，則中國曷為獨言齊宋至爾？大國言齊、宋，遠國言江、黃，則以其餘為莫敢不至也。

5. 經冬十月，不雨。

傳何以書？記異也。

6. 經楚人侵鄭。

## 七、宣公六年(公元前六百零三年)

1. 經春，晉趙盾、衛孫免侵陳。

傳趙盾弑君，此其復見何？親弑君者趙穿也。親弑君者趙穿，則曷為加之趙盾？不討賊也。何以謂之不討賊？晉史書賊曰：「晉趙盾弑其君夷獯。」趙

盾曰：「天乎！無辜！吾不弑君，誰謂吾弑君者乎？」史曰：「爾為仁為義，人弑爾君，而復國不討賊，此非弑君如何？」趙盾之復國奈何？靈公為無道，使諸大夫皆內朝，然後處乎臺上引彈而彈之，已趨而辟丸，是樂而已矣。趙盾已朝而出，與諸大夫立於朝，有人荷畚，自閨而出者。趙盾曰：「彼何也？夫畚曷為出乎閨？」呼之不至，曰：「子大夫也，欲視之則就而視之。」趙盾就而視之，則赫然死人也。趙盾曰：「是何也？」曰：「膳宰也，熊蹯不熟，公怒以斗擊而殺之，支解，將使我棄之。」趙盾曰：「嘻！」趨而入。靈公望見趙盾，慙而再拜。趙盾逡巡，北面再拜稽首，趨而出，靈公心忤焉，欲殺之。

於是使勇士某者往殺之，勇士入其大門，則無人門焉者；入其閨，則無人閨焉者；上其堂，則無人焉。俯而闚其戶，方食魚膾。勇士曰：「嘻！子誠仁人也！吾子入之大門，則無人焉；入子之閨，則無人焉；上子之堂，則無人焉；是子之易也。子為晉國重卿而食魚膾，是子之儉也。君將使我殺子，吾不忍殺子也。雖然，吾亦不可復見吾君矣。」遂刎頸而死。靈公聞之怒，滋欲殺之甚，眾莫可使往者。

於是伏甲于宮中，召趙盾而食之。趙盾之車右祁彌明者，國之力士也，佗然從乎趙盾而入，放乎堂下而立。趙盾已食，靈公謂盾曰：「吾聞子之劍蓋利劍也，子以示我，吾將觀焉。」趙盾起將進劍，祁彌明自下呼之曰：「盾食飽則出，何故拔劍於君所？」趙盾知之，躊躇而走。靈公有周狗，謂之獒，呼獒而屬之，獒亦躊躇而從之。祁彌明逆而踐之，絕其頷。趙盾顧曰：「君之獒不若臣之獒也！」然而宮中甲鼓而起，有起于甲中者，抱趙盾而乘之。趙盾顧曰：「吾何以得此于子？」曰：「子某時，所食活我于暴桑下者也。」趙盾曰：「子名為誰？」曰：「吾君孰為介？子之乘矣，何問吾名？」趙盾驅而出，眾無留之者。趙穿緣民眾不說，起殺靈公，然後迎趙盾而入，與之立于朝，而立成公黑臀。

2. 經夏四月。

3. 經秋八月，螽。

4. 經冬十月。

## 八、宣公十有五年(公元前五百九十四年)

1. 經春，公孫歸父會楚子于宋。

2

經夏，五月，宋人及楚人平。

傳外平不書，此何以書？大其平乎己也。何大乎其平乎己？莊王圍宋，軍有七日之糧爾，盡此不勝，將去而歸爾。於是使司馬子反乘堙而闚宋城，宋華

元亦乘堙而出見之。司馬子反曰：「子之國何如？」華元曰：「憊矣。」曰：「何如？」曰：「易子而食之，析骸而炊之。」司馬子反曰：「嘻！甚矣憊！雖然，吾聞之也，圍者柑馬而秣之，使肥者應客，是何子之情也？」華元曰：「吾聞之，君子見人之危則矜之，小人見人之危則幸之。吾見子之君子也，是以告情于子也。」司馬子反曰：「諾，勉之矣！吾軍亦有七日之糧爾，盡此不勝，將去而歸爾。」揖而去之。

反于莊王。莊王曰：「何如？」司馬子反曰：「憊矣！」曰：「何如？」曰：「易子而食之，析骸而炊之。」莊王曰：「嘻！甚矣憊！雖然，吾今取此，然後而歸爾。」司馬子反曰：「不可。臣已告之矣，軍有七日之糧爾。」莊王怒曰：「吾使子往視之，子曷為告之？」司馬子反曰：「以區區之宋，猶有不欺人之臣，可以楚而無乎？是以告之也。」莊王曰：「諾。舍而止。雖然，吾猶取此然後歸爾。」司馬子反曰：「然則君請處于此，臣請歸爾。」莊王曰：「子去我而歸，吾孰與處于此？吾亦從子而歸爾。」引師而去之。

故君子大其平乎己也。此皆大夫也，其稱人何？貶。曷為貶？平者在下也。

3. **經**六月癸卯，晉師滅赤狄潞氏，以潞子嬰兒歸。

**傳**潞何以稱子？潞子之為善也，躬足以亡爾。雖然，君子不可不記也。離于夷狄，而未能合于中國。晉師伐之，中國不救，狄人不有，是以亡也。

4. **經**秦人伐晉。

5. **經**王札子殺召伯、毛伯。

**傳**王札子者何？長庶之號也。

6. **經**秋，螽。

7. **經**仲孫蔑會齊高固于牟婁。

8. **經**初稅畝。

**傳**初者何？始也。稅畝者何？履畝而稅也。初稅畝何以書？譏。何譏爾？譏始履畝而稅也。何譏乎始履畝而稅？古者什一而藉。古者曷為什一而藉？什一者天下之中正也。多乎什一，大桀小桀；寡乎什一，大貉小貉。什一者天下之中正也，什一行而頌聲作矣。

9. **經**冬，螽生。

**傳**未有言螽生者，此其言螽生何？螽生不書，此何以書？幸之也。幸之者何？猶曰受之云爾。受之云爾者何？上變古易常，應是而有天災，其諸則宜於此焉變矣。

## 九、成公二年(公元前五百八十九年)

1. 經春，齊侯伐我北鄙。

2. 經夏，四月丙戌，衛孫良夫帥師及齊師戰于新築，衛師敗績。

3. 經六月癸酉，季孫行父、臧孫許、叔孫僑如、公孫嬰齊帥師會晉郤克、衛孫良夫、曹公子手及齊侯戰于鞏，齊師敗績。

傳曹無大夫，公子手何以書？憂內也。

4. 經秋七月，齊侯使國佐如師。己酉，及國佐盟于袁婁。

傳君不行使乎大夫，此其行使乎大夫何？佚獲也。其佚獲奈何？師還齊侯，晉郤克投戟，逡巡再拜稽首馬前。逢丑父者，頃公之車右也。面目與頃公相似，衣服與頃公相似，代頃公當左。使頃公取飲，頃公操飲而至，曰：「革取清者。」頃公用是佚而不反。逢丑父曰：「吾賴社稷之神靈，吾君已免矣。」郤克曰：「欺三軍者其法奈何？」曰：「法斲。」於是斲逢丑父。

己酉，及齊國佐盟于袁婁。曷為不盟于師而盟于袁婁？前此者，晉郤克與臧孫許同時而聘于齊。蕭同姪子者，齊君之母也，踊于楮而窺客，則客或跛或眇，於是使跛者逐跛者，使眇者逐眇者。二大夫出，相與踦閭而語，移日然後相去。齊人皆曰：「患之起必自此始！」二大夫歸，相與率師為鞏之戰，齊師大敗。

齊侯使國佐如師，郤克曰：「與我紀侯之胤，反魯、衛之侵地，使耕者東畝，且以蕭同姪子為質，則吾舍子矣。」國佐曰：「與我紀侯之胤，請諾。反魯、衛之侵地，請諾。使耕者東畝，是則土齊也。蕭同姪子者，齊君之母也。齊君之母，猶晉君之母也，不可。請戰，壹戰不勝請再，再戰不勝請三，三戰不勝則齊國盡子之有也，何必以蕭同姪子為質？」揖而去之。郤克撫魯、衛之使，使以其辭而為之請，然後許之。逮于袁婁而與之盟。

5. 經八月壬午，宋公鮑卒。

6. 經庚寅，衛侯遫卒。

7. 經取汶陽田。

傳汶陽田者何？鞏之賂也。

8. 經冬，楚師、鄭師侵衛。

9. 經十有一月，公會楚公子嬰齊于蜀。

10. 經丙申，公及楚人、秦人、宋人、陳人、衛人、鄭人、齊人、曹人、邾婁人、薛人、鄆人盟于蜀。

傳此楚公子嬰齊也，其稱人何？得一貶焉爾。

## 十、哀公十有四年(公元前四百八十一年)

1. **經**春，西狩獲麟。

**傳**何以書？記異也。何異爾？非中國之獸也。然則孰狩之？薪采者也。薪采者則微者也，曷為以狩言之？大之也。曷為大之？為獲麟大之也。曷為獲麟大之？麟者仁獸也。有王者則至，無王者則不至。有以告者曰：「有麋而角者。」孔子曰：「孰為來哉！孰為來哉！」反袂拭面，涕沾袍，顏淵死，子曰：「噫！天喪予。」子路死，子曰：「噫！天祝予。」西狩獲麟，孔子曰：「吾道窮矣！」

《春秋》何以始乎隱？祖之所逮聞也。所見異辭，所聞異辭，所傳聞異辭。何以終乎哀十四年？曰：「備矣！」君子曷為為《春秋》？撥亂世，反諸正，莫近諸《春秋》。則未知其為是與？其諸君子樂道堯舜之道與？末不亦樂乎堯舜之知君子也？制《春秋》之義以俟後聖，以君子之為亦有樂乎此也。



### 70【春秋穀梁傳選】

#### 一、隱公元年(公元前七百二十二年)

1. **經**元年，春，王正月。

**傳**雖無事，必舉正月，謹始也。公何以不言即位？成公志也。焉成之？言君之不取為公也。君之不取為公何也？將以讓桓也。讓桓正乎？曰不正。《春秋》成人之美，不成人之惡。隱不正而成之，何也？將以惡桓也。其惡桓何也？隱將讓而桓弑之，則桓惡矣。桓弑而隱讓，則隱善矣。善則其不正為何也？《春秋》貴義而不貴惠，信道不信邪。孝子揚父之美，不揚父之惡。先君之欲與桓，非正也，邪也。雖然，既勝其邪心以與隱矣，已探先君之邪志，而遂以與桓，則是成父之惡也。兄弟，天倫也。為子受之父，為諸侯受之君，已廢天倫而忘君父，以行小惠，曰小道也。若隱者，可謂輕千乘之國；蹈道，則未也。

2. **經**三月，公及邾儀父盟於昧。

**傳**及者何？內為志焉爾。儀，字也。父，猶傅也，男子之美稱也。其不言邾子何也？邾之上古微，未爵命於周也。不日，其盟渝也。昧，地名也。

3. **經**夏，五月，鄭伯克段於鄆。

**傳**克者何？能也。何能也？能殺也。何以不言殺？見段之有徒眾也。段，鄭伯弟也。何以知其為弟也？殺世子，母弟目君，以其目君，知其為弟也。段弟也，而弗謂弟；公子也，而弗謂公子，貶之也。段失子弟之道矣，賤段而甚鄭伯也。何甚乎鄭伯？甚鄭伯之處心積慮，成於殺也。於鄆，遠也。猶曰

取之其母之懷中而殺之云爾，甚之也。然則為鄭伯者宜奈何？緩追逸賊，親親之道也。

4. 經秋七月，天王使宰咺來歸惠公、仲子之賵。

傳母以子氏。仲子者何？惠公之母、孝公之妾也。禮，賵人之母則可，賵人之妾則不可。君子以其可辭受之。其志，不及事也。賵者何也？乘馬曰賵，衣衾曰襚，貝玉曰含，錢財曰賻。

5. 經九月，及宋人盟於宿。

傳及者何？內卑者也。宋人，外卑者也。卑者之盟，不日。宿，邑名也。

6. 經冬，十二月，祭伯來。

傳來者，來朝也。其弗謂朝何也？寰內諸侯，非有天子之命，不得出會諸侯。不正其外交，故弗與朝也。聘弓鏃矢，不出竟場。束脩之肉，不行竟中，有至尊者，不貳之也。

7. 經公子益師卒。

傳大夫日卒，正也。不日卒，惡也。

## 二、桓公元年(公元前七百一十一年)

1. 經元年春。王正月，公即位。

傳桓無王，其曰王何也？謹始也。其曰無王何也？桓弟弑兄，臣弑君，天子不能定諸侯，不能救百姓，不能去以為無王之道，遂可以至焉爾。元年有王，所以治桓也。正月，公即位。繼故不言即位，正也。繼故不言即位之為正何也？曰先君不以其道終，則子弟不忍即位也。繼故而言即位，則是與聞乎弑也。繼故而言即位，是為與聞乎弑何也？曰先君不以其道終，已正即位之道而即位，是無恩於先君也。

2. 經三月，公會鄭伯於垂。鄭伯以璧假許田。

傳會者，外為主焉爾。假不言以，言以，非假也。非假而曰假，諱易地也。禮，天子在上，諸侯不得以地相與也。無田則無許可知矣，不言許，不與許也。許田者，魯朝宿之邑也。邠者，鄭伯之所受命而祭泰山之邑也。用見魯之不朝於周，而鄭之不祭泰山也。

3. 經夏，四月，丁未，公及鄭伯盟於越。

傳及者，內為志焉爾。越，盟地之名也。

4. 經秋，大水。

傳高下有水災，曰大水。

5. 經冬，十月。

傳無事焉，何以書？不遺時也。《春秋》編年，四時具而後為年。

### 三、僖公二年(公元前六百五十八年)

1. 經二年，春，王正月，城楚丘。

傳楚丘者何？衛邑也。國而曰城，此邑也，其曰城何也？封衛也。則其不言城衛何也？衛未遷也。其不言衛之遷焉何也？不與齊侯專封也。其言城之者，專辭也。故非天子不得專封諸侯。諸侯不得專封諸侯，雖通其仁，以義而不與也。故曰：仁不勝道。

2. 經夏，五月，辛巳，葬我小君哀姜。

3. 經虞師、晉師滅夏陽。

傳非國而曰滅，重夏陽也。虞無師，其曰師何也？以其先晉，不可以不言師也。其先晉何也？為主乎滅夏陽也。夏陽者，虞虢之塞邑也。滅夏陽而虞虢舉矣。

虞之為主乎滅夏陽何也？晉獻公欲伐虢，荀息曰：「君何不以屈產之乘、垂棘之璧，而借道乎虞也？」公曰：「此晉國之寶也。如受吾幣而不借吾道，則如之何？」荀息曰：「此小國之所以事大國也。彼不借吾道，必不敢受吾幣。如受吾幣而借吾道，則是我取之中府而藏之外府，取之中廩而置之外廩也。」公曰：「宮之奇存焉，必不使受之也。」荀息曰：「宮之奇之為人，達心而懦，又少長於君。達心則其言略，懦則不能強諫，少長於君則君輕之。且夫玩好在耳目之前，而患在一國之後，此中知以上乃能慮之。臣料虞君，中知以下也。」公遂借道而伐虢。

宮之奇諫曰：「晉國之使者，其辭卑而幣重，必不便於虞。」虞公弗聽，遂受其幣而借之道。宮之奇諫曰：「語曰：『脣亡則齒寒。』其斯之謂與！」挈其妻子以奔曹。獻公亡虢，五年而後舉虞。荀息牽馬操璧而前曰：「璧則猶是也，而馬齒加長矣！」

4. 經秋，九月，齊侯、宋公、江人、黃人盟于貫。

傳貫之盟，不期而至者江人、黃人也。江人、黃人者，遠國之辭也。中國稱齊、宋，遠國稱江、黃，以為諸侯皆來至也。

5. 經冬，十月，不雨。

傳不雨者，勤雨也。

6. 經楚人侵鄭。

### 四、哀公十有四年(公元前四百八十一年)

1. 經十有四年春，西狩獲麟。

傳引取之也。狩地，不地不狩也。非狩而曰狩，大獲麟，故大其適也。其不言來，不外麟於中國也。其不言有，不使麟不恆於中國也。

## 71【金剛經 1-8 分】姚秦三藏法師鳩摩羅什譯

### 法會因由分 第一

如是我聞，一時，佛在舍衛國祇樹給孤獨園，與大比丘眾千二百五十人俱。爾時，世尊食時，著衣持鉢，入舍衛大城乞食。於其城中，次第乞已，還至本處。飯食訖，收衣鉢，洗足已，敷座而坐。

### 善現啟請分 第二

時，長老須菩提在大眾中即從座起，偏袒右肩，右膝著地，合掌恭敬而白佛言：「希有！世尊！如來善護念諸菩薩，善付囑諸菩薩。世尊！善男子、善女人，發阿耨多羅三藐三菩提心，云何應住，云何降伏其心？」佛言：「善哉，善哉。須菩提！如汝所說，如來善護念諸菩薩，善付囑諸菩薩。汝今諦聽！當為汝說：善男子、善女人，發阿耨多羅三藐三菩提心，應如是住，如是降伏其心。」「唯然，世尊！願樂欲聞。」

### 大乘正宗分 第三

佛告須菩提：「諸菩薩摩訶薩應如是降伏其心！所有一切眾生之類：若卵生、若胎生、若濕生、若化生；若有色、若無色；若有想、若無想、若非有想非無想，我皆令入無餘涅槃而滅度之。如是滅度無量無數無邊眾生，實無眾生得滅度者。何以故？須菩提！若菩薩有我相、人相、眾生相、壽者相，即非菩薩。」

### 妙行無住分 第四

「復次，須菩提！菩薩於法，應無所住，行於布施，所謂不住色布施，不住聲香味觸法布施。須菩提！菩薩應如是布施，不住於相。何以故？若菩薩不住相布施，其福德不可思量。須菩提！於意云何？東方虛空可思量不？」

「不也，世尊！」「須菩提！南西北方四維上下虛空可思量不？」「不也，世尊！」「須菩提！菩薩無住相布施，福德亦復如是不可思量。須菩提！菩薩但應如所教住。」

### 如理實現分 第五

「須菩提！於意云何？可以身相見如來不？」「不也，世尊！不可以身相得見如來。何以故？如來所說身相，即非身相。」佛告須菩提：「凡所有相，皆是虛妄。若見諸相非相，即見如來。」

### 正信希有分 第六

須菩提白佛言：「世尊！頗有眾生，得聞如是言說章句，生實信不？」佛告須菩提：「莫作是說。如來滅後，後五百歲，有持戒修福者，於此章句能生信心，以此為實，當知是人於一佛二佛三四五佛而種善根，已於無量千萬佛所種諸善根，聞是章句，乃至一念生淨信者，須菩提！如來悉知悉見，是



諸眾生得如是無量福德。何以故？是諸眾生無復我相、人相、眾生相、壽者相；無法相，亦無非法相。何以故？是諸眾生若心取相，即為著我人眾生壽者。若取法相，即著我人眾生壽者。何以故？若取非法相，即著我人眾生壽者，是故不應取法，不應取非法。以是義故，如來常說：『汝等比丘，知我說法，如筏喻者；法尚應捨，何況非法。』」

### 無得無說分 第七

「須菩提！於意云何？如來得阿耨多羅三藐三菩提耶？如來有所說法耶？」須菩提言：「如我解佛所說義，無有定法名阿耨多羅三藐三菩提，亦無有定法如來可說。何以故？如來所說法，皆不可取、不可說、非法、非非法。所以者何？一切賢聖，皆以無為法而有差別。」

### 依法出生分 第八

「須菩提！於意云何？若人滿三千大千世界七寶以用布施，是人所得福德，寧為多不？」須菩提言：「甚多，世尊！何以故？是福德即非福德性，是故如來說福德多。」「若復有人，於此經中受持，乃至四句偈等，為他人說，其福勝彼。何以故？須菩提！一切諸佛，及諸佛阿耨多羅三藐三菩提法，皆從此經出。須菩提！所謂佛法者，即非佛法。」



## 72【金剛經 9-16 分】

### 一相無相分 第九

「須菩提！於意云何？須陀洹能作是念：『我得須陀洹果』不？」須菩提言：「不也，世尊！何以故？須陀洹名為入流，而無所入，不入色聲香味觸法，是名須陀洹。」「須菩提！於意云何？斯陀含能作是念：『我得斯陀含果』不？」須菩提言：「不也，世尊！何以故？斯陀含名一往來，而實無往來，是名斯陀含。」「須菩提！於意云何？阿那含能作是念：『我得阿那含果』不？」須菩提言：「不也，世尊！何以故？阿那含名為不來，而實無不來，是故名阿那含。」「須菩提！於意云何？阿羅漢能作是念，『我得阿羅漢道』不？」須菩提言：「不也，世尊！何以故？實無有法名阿羅漢。世尊！若阿羅漢作是念：『我得阿羅漢道』，即為著我人眾生壽者。世尊！佛說我得無諍三昧，人中最為第一，是第一離欲阿羅漢。世尊！我不作是念：『我是離欲阿羅漢』。世尊！我若作是念：『我得阿羅漢道』，世尊則不說須菩提是樂阿蘭那行者，以須菩提實無所行，而名須菩提，是樂阿蘭那行。」

### 莊嚴淨土分 第十

佛告須菩提：「於意云何？如來昔在燃燈佛所，於法有所得不？」「不也，世尊！如來在燃燈佛所，於法實無所得。」「須菩提！於意云何？菩薩莊嚴

佛土不？」「不也，世尊！何以故？莊嚴佛土者，即非莊嚴，是名莊嚴。」  
「是故須菩提！諸菩薩摩訶薩，應如是生清淨心，不應住色生心，不應住聲香味觸法生心，應無所住而生其心。須菩提！譬如有人，身如須彌山王，於意云何？是身為大不？」須菩提言：「甚大，世尊！何以故？佛說非身，是名大身。」

### 無為福勝分 第十一

「須菩提！如恆河中所有沙數，如是沙等恆河，於意云何？是諸恆河沙寧為多不？」須菩提言：「甚多，世尊！但諸恆河尚多無數，何況其沙。」  
「須菩提！我今實言告汝：若有善男子、善女人，以七寶滿爾所恆河沙數，三千大千世界，以用布施，得福多不？」須菩提言：「甚多，世尊！」  
佛告須菩提：「若善男子、善女人，於此經中，乃至受持四句偈等，為他人說，而此福德勝前福德。」

### 尊重正教分 第十二

「復次，須菩提！隨說是經，乃至四句偈等，當知此處，一切世間、天、人、阿修羅，皆應供養，如佛塔廟，何況有人盡能受持、讀誦。須菩提！當知是人，成就最上第一希有之法；若是經典所在之處，即為有佛，若尊重弟子。」

### 如法受持分 第十三

爾時，須菩提白佛言：「世尊！當何名此經，我等云何奉持？」佛告須菩提：「是經名為《金剛般若波羅蜜》，以是名字，汝當奉持。所以者何？須菩提！佛說般若波羅蜜，即非般若波羅蜜，是名般若波羅蜜。須菩提！於意云何？如來有所說法不？」須菩提白佛言：「世尊！如來無所說。」  
「須菩提！於意云何？三千大千世界所有微塵，是為多不？」須菩提言：「甚多，世尊！」  
「須菩提！諸微塵，如來說非微塵，是名微塵。如來說世界，非世界，是名世界。須菩提！於意云何？可以三十二相見如來不？」  
「不也，世尊！不可以三十二相得見如來。何以故？如來說三十二相，即是非相，是名三十二相。」  
「須菩提！若有善男子、善女人，以恆河沙等身命布施；若復有人，於此經中，乃至受持四句偈等，為他人說，其福甚多。」

### 離相寂滅分 第十四

爾時，須菩提聞說是經，深解義趣，涕淚悲泣，而白佛言：「希有，世尊！佛說如是甚深經典，我從昔來所得慧眼，未曾得聞如是之經。世尊！若復有人得聞是經，信心清淨，即生實相，當知是人，成就第一希有功德。世尊！是實相者，即是非相，是故如來說名實相。世尊！我今得聞如是經典，信解

受持，不足為難，若當來世，後五百歲，其有眾生，得聞是經，信解受持，是人即為第一希有。

何以故？此人無我相、無人相、無眾生相、無壽者相。所以者何？我相即是非相，人相、眾生相、壽者相即是非相。何以故？離一切諸相，即名諸佛。」佛告須菩提：「如是！如是！若復有人得聞是經，不驚、不怖、不畏，當知是人甚為希有。何以故？須菩提！如來說第一波羅蜜，即非第一波羅蜜，是名第一波羅蜜。須菩提！忍辱波羅蜜，如來說非忍辱波羅蜜，是名忍辱波羅蜜。何以故？須菩提！如我昔為歌利王割截身體，我於爾時，無我相、無人相、無眾生相、無壽者相。

何以故？我於往昔節節支解時，若有我相、人相、眾生相、壽者相，應生嗔恨。須菩提！又念過去，於五百世作忍辱仙人，於爾所世，無我相、無人相、無眾生相、無壽者相。是故須菩提！菩薩應離一切相，發阿耨多羅三藐三菩提心，不應住色生心，不應住聲香味觸法生心，應生無所住心。若心有住，即為非住。是故佛說：『菩薩心不應住色布施。』須菩提！菩薩為利益一切眾生故，應如是布施。如來說：一切諸相，即是非相。又說：一切眾生，即非眾生。須菩提！如來是真語者、實語者、如語者、不誑語者、不異語者。須菩提！如來所得法，此法無實無虛。須菩提！若菩薩心住於法，而行布施，如人入暗，即無所見。若菩薩心不住法，而行布施，如人有目，日光明照，見種種色。須菩提！當來之世，若有善男子、善女人，能於此經受持、讀誦，即為如來，以佛智慧，悉知是人，悉見是人，皆得成就無量無邊功德。」

### 持經功德分 第十五

「須菩提！若有善男子、善女人，初日分以恆河沙等身布施；中日分復以恆河沙等身布施；後日分亦以恆河沙等身布施，如是無量百千萬億劫，以身布施；若復有人，聞此經典，信心不逆，其福勝彼。何況書寫、受持、讀誦、為人解說。須菩提！以要言之，是經有不可思議、不可稱量、無邊功德。如來為發大乘者說，為發最上乘者說。若有人能受持、讀誦、廣為人說，如來悉知是人，悉見是人，皆得成就不可量、不可稱、無有邊、不可思議功德。如是人等，即為荷擔如來阿耨多羅三藐三菩提。

何以故？須菩提！若樂小法者，著我見、人見、眾生見、壽者見，即於此經，不能聽受、讀誦、為人解說。須菩提！在在處處，若有此經，一切世間、天、人、阿修羅，所應供養，當知此處即為是塔，皆應恭敬，作禮圍繞，以諸華香而散其處。」

## 能淨業障分 第十六

「復次，須菩提！善男子、善女人，受持、讀誦此經，若為人輕賤，是人先世罪業，應墮惡道，以今世人輕賤故，先世罪業即為消滅，當得阿耨多羅三藐三菩提。」「須菩提！我念過去無量阿僧祇劫，於燃燈佛前，得值八百四千萬億那由他諸佛，悉皆供養承事，無空過者，若復有人，於後末世，能受持、讀誦此經，所得功德，於我所供養諸佛功德，百分不及一，千萬億分，乃至算數譬喻所不能及。須菩提！若善男子、善女人，於後末世，有受持、讀誦此經，所得功德，我若具說者，或有人聞，心即狂亂，狐疑不信。須菩提！當知是經義不可思議，果報亦不可思議。」



## 73【金剛經 17-24 分】

### 究竟無我分 第十七

爾時，須菩提白佛言：「世尊！善男子、善女人，發阿耨多羅三藐三菩提心，云何應住？云何降伏其心？」佛告須菩提：「善男子、善女人，發阿耨多羅三藐三菩提心者，當生如是心，我應滅度一切眾生。滅度一切眾生已，而無有一眾生實滅度者。何以故？須菩提！若菩薩有我相、人相、眾生相、壽者相，即非菩薩。所以者何？須菩提！實無有法發阿耨多羅三藐三菩提心者。」「須菩提！於意云何？如來於燃燈佛所，有法得阿耨多羅三藐三菩提不？」「不也，世尊！如我解佛所說義，佛於燃燈佛所，無有法得阿耨多羅三藐三菩提。」佛言：「如是！如是！須菩提！實無有法，如來得阿耨多羅三藐三菩提。須菩提！若有法如來得阿耨多羅三藐三菩提者，燃燈佛即不與我授記：『汝於來世，當得作佛，號釋迦牟尼。』以實無有法得阿耨多羅三藐三菩提，是故燃燈佛與我授記，作是言：『汝於來世，當得作佛，號釋迦牟尼。』何以故？如來者，即諸法如義。

若有人言：『如來得阿耨多羅三藐三菩提』。須菩提！實無有法，佛得阿耨多羅三藐三菩提。須菩提！如來所得阿耨多羅三藐三菩提，於是中無實無虛。是故如來說：一切法皆是佛法。須菩提！所言一切法者，即非一切法，是故名一切法。須菩提！譬如人身長大。」須菩提言：「世尊！如來說人身長大，即為非大身，是名大身。」「須菩提！菩薩亦如是。若作是言：『我當滅度無量眾生』，即不名菩薩。何以故？須菩提！實無有法名為菩薩。是故佛說：一切法，無我、無人、無眾生、無壽者。須菩提！若菩薩作是言『我當莊嚴佛土』，是不名菩薩。何以故？如來說：莊嚴佛土者，即非莊嚴，是名莊嚴。須菩提！若菩薩通達無我法者，如來說名真是菩薩。」

## 一體同觀分 第十八

「須菩提！於意云何？如來有肉眼不？」

「如是，世尊！如來有肉眼。」

「須菩提！於意云何？如來有天眼不？」

「如是，世尊！如來有天眼。」

「須菩提！於意云何？如來有慧眼不？」

「如是，世尊！如來有慧眼。」

「須菩提！於意云何？如來有法眼不？」

「如是，世尊！如來有法眼。」

「須菩提！於意云何？如來有佛眼不？」

「如是，世尊！如來有佛眼。」

「須菩提！於意云何？如恆河中所有沙，佛說是沙不？」

「如是，世尊！如來說是沙。」

「須菩提！於意云何？如一恆河中所有沙，有如是沙等恆河，是諸恆河所有沙數佛世界，如是寧為多不？」「甚多，世尊！」佛告須菩提：「爾所國土中，所有眾生，若干種心，如來悉知。何以故？如來說諸心，皆為非心，是名為心。所以者何？須菩提！過去心不可得，現在心不可得，未來心不可得。」

## 法界通化分 第十九

「須菩提！於意云何？若有人滿三千大千世界七寶，以用布施，是人以是因緣，得福多不？」「如是，世尊！此人以是因緣，得福甚多。」「須菩提！若福德有實，如來不說得福德多；以福德無故，如來說得福德多。」

## 離色離相分 第二十

「須菩提！於意云何？佛可以具足色身見不？」「不也，世尊！如來不應以具足色身見。何以故？如來說具足色身，即非具足色身，是名具足色身。」

「須菩提！於意云何？如來可以具足諸相見不？」「不也，世尊！如來不應以具足諸相見。何以故？如來說諸相具足，即非具足，是名諸相具足。」

## 非說所說分 第二十一

「須菩提！汝勿謂如來作是念『我當有所說法。』莫作是念，何以故？若人言如來有所說法，即為謗佛，不能解我所說故。須菩提！說法者，無法可說，是名說法。」爾時，慧命須菩提白佛言：「世尊！頗有眾生，於未來世，聞說是法，生信心不？」佛言：「須菩提！彼非眾生，非不眾生。何以故？須菩提！眾生眾生者，如來說非眾生，是名眾生。」

## 無法可得分 第二十二

須菩提白佛言：「世尊！佛得阿耨多羅三藐三菩提，為無所得耶？」佛言：「如是，如是。須菩提！我於阿耨多羅三藐三菩提，乃至無有少法可得，是名阿耨多羅三藐三菩提。」

## 淨心行善分 第二十三

復次，須菩提！是法平等，無有高下，是名阿耨多羅三藐三菩提。以無我、無人、無眾生、無壽者，修一切善法，即得阿耨多羅三藐三菩提。須菩提！所言善法者，如來說即非善法，是名善法。

## 福智無比分 第二十四

「須菩提！若三千大千世界中，所有諸須彌山王，如是等七寶聚，有人持用布施；若人以此《般若波羅蜜經》，乃至四句偈等，受持、讀誦，為他人說，於前福德，百分不及一，百千萬億分，乃至算數譬喻所不能及。」



## 74【金剛經 25-32 分】

### 化無所化分 第二十五

「須菩提！於意云何？汝等勿謂如來作是念：『我當度眾生。』須菩提！莫作是念。何以故？實無有眾生如來度者。若有眾生如來度者，如來即有我、人、眾生、壽者。須菩提！如來說：『有我者，即非有我，而凡夫之人，以為有我。』須菩提！凡夫者，如來說即非凡夫，是名凡夫。」

### 法身非相分 第二十六

「須菩提！於意云何？可以三十二相觀如來不？」須菩提言：「如是！如是！以三十二相觀如來。」佛言：「須菩提！若以三十二相觀如來者，轉輪聖王即是如來。」須菩提白佛言：「世尊！如我解佛所說義，不應以三十二相觀如來。」爾時，世尊而說偈言：「若以色見我，以音聲求我，是人行邪道，不能見如來」

### 無斷無滅分 第二十七

「須菩提！汝若作是念『如來不以具足相故，得阿耨多羅三藐三菩提。』須菩提！莫作是念『如來不以具足相故，得阿耨多羅三藐三菩提。』須菩提！汝若作是念，發阿耨多羅三藐三菩提心者，說諸法斷滅。莫作是念！何以故？發阿耨多羅三藐三菩提心者，於法不說斷滅相。」

### 不受不貪 第二十八

「須菩提！若菩薩以滿恆河沙等世界七寶，持用布施；若復有人，知一切法無我，得成於忍；此菩薩勝前菩薩所得功德。何以故？須菩提！以諸菩薩不

受福德故。」須菩提白佛言：「世尊！云何菩薩不受福德？」「須菩提！菩薩所作福德，不應貪著，是故說不受福德。」

### 威儀寂靜分 第二十九

「須菩提！若有人言：『如來若來、若去；若坐、若臥。』是人不解我所說義。何以故？如來者，無所從來，亦無所去，故名如來。」

### 一合理相分 第三十

「須菩提！若善男子、善女人，以三千大千世界碎為微塵，於意云何？是微塵眾，寧為多不？」須菩提言：「甚多，世尊！何以故？若是微塵眾實有者，佛即不說是微塵眾，所以者何？佛說微塵眾，即非微塵眾，是名微塵眾。世尊！如來所說三千大千世界，即非世界，是名世界。何以故？若世界實有者，即是一合相。如來說：『一合相，即非一合相，是名一合相。』須菩提！一合相者，即是不可說，但凡夫之人，貪著其事。」

### 知見不生分 第三十一

「須菩提！若人言佛說我見、人見、眾生見、壽者見。須菩提！於意云何？是人解我說義不？」「不也，世尊！是人不解如來所說義。何以故？世尊說：我見、人見、眾生見、壽者見，即非我見、人見、眾生見、壽者見，是名我見、人見、眾生見、壽者見。」「須菩提！發阿耨多羅三藐三菩提心者，於一切法，應如是知，如是見，如是信解，不生法相。須菩提！所言法相者，如來說即非法相，是名法相。」

### 應化非真分 第三十二

「須菩提！若有人以滿無量阿僧祇世界七寶，持用布施。若有善男子、善女人，發菩提心者，持於此經，乃至四句偈等，受持、讀誦，為人演說，其福勝彼。云何為人演說，不取於相，如如不動。何以故？」「一切有為法，如夢幻泡影，如露亦如電，應作如是觀」

佛說是經已，長老須菩提，及諸比丘、比丘尼、優婆塞、優婆夷，一切世間、天、人、阿修羅，聞佛所說，皆大歡喜，信受奉行。



### 75【壇經行由品第一】

時，大師至寶林，韶州韋刺史與官僚入山請師，出於城中大梵寺講堂，為眾開緣說法。師升座次，刺史官僚三十餘人、儒宗學士三十餘人、僧尼道俗一千餘人，同時作禮，願聞法要。

大師告眾曰：『善知識！菩提自性，本來清淨，但用此心，直了成佛。善知識！且聽惠能行由得法事意。』

惠能嚴父，本貫范陽，左降流于嶺南，作新州百姓。此身不幸，父又早亡，老母孤遺，移來南海，艱辛貧乏，於市賣柴。

時，有一客買柴，使令送至客店；客收去，惠能得錢，却出門外，見一客誦經。惠能一聞經語，心即開悟，遂問：「客誦何經？」客曰：「金剛經。」復問：「從何所來，持此經典？」客云：「我從蘄州黃梅縣東禪寺來。其寺五祖忍大師在彼主化，門人一千有餘；我到彼中禮拜，聽受此經。大師常勸僧俗：但持金剛經，即自見性，直了成佛。」惠能聞說，宿昔有緣，乃蒙一客取銀十兩與惠能令充老母衣糧，教便往黃梅參禮五祖。惠能安置母畢，即便辭違，不經三十餘日，便至黃梅，禮拜五祖。

祖問曰：「汝何方人？欲求何物？」惠能對曰：「弟子是嶺南新州百姓。遠來禮師，惟求作佛，不求餘物。」祖言：「汝是嶺南人，又是獼獠，若為堪作佛？」惠能即曰：「人雖有南北，佛性本無南北；獼獠身與和尚不同，佛性有何差別？」五祖更欲與語，且見徒眾總在左右，乃令隨眾作務。惠能曰：「惠能啟和尚，弟子自心常生智慧，不離自性，即是福田。未審和尚教作何務？」祖云：「這獼獠根性大利！汝更勿言，著槽廠去！」惠能退至後院，有一行者，差惠能破柴踏碓。經八月餘。

祖一日忽見惠能曰：「吾思汝之見可用，恐有惡人害汝，遂不與汝言，汝知之否？」惠能曰：「弟子亦知師意，不敢行至堂前，令人不覺。」

祖一日喚諸門人總來，吾向汝曰：「世人生死事大；汝等終日只求福田，不求出離生死苦海。自性若迷，福何可救？汝等各去自看智慧，取自本心般若之性，各作一偈來呈吾看，若悟大意，付汝衣法為第六代祖。火急速去！不得遲滯！思量即不中用！見性之人，言下須見。若如此者，輪刀上陣，亦得見之。」

眾得處分，退而遞相謂曰：「我等眾人，不須澄心用意作偈，將呈和尚有何所益？神秀上座現為教授師，必是他得，我輩謾作偈頌，枉用心力。」諸人聞語，總皆息心，咸言：「我等以後依止秀師，何煩作偈？」

神秀思惟：「諸人不呈偈者，為我與他為教授師，我須作偈將呈和尚。若不呈偈，和尚如何知我心中見解深淺？我呈偈意，求法即善，覓祖即惡，却同凡心奪其聖位奚別？若不呈偈，終不得法。大難！大難！」

五祖堂前，有步廊三間，擬請供奉盧珍畫「楞伽經變相」及「五祖血脈圖」，流傳供養。

神秀作偈成已，數度欲呈，行至堂前，心中恍惚，遍身汗流，擬呈不得；前後經四日，一十三度呈偈不得。秀乃思惟：「不如向廊下書著，從他和尚看見，忽若道好，即出禮拜，云是秀作；若道不堪，枉向山中數年、受人禮



拜，更修何道？」是夜三更，不使人知，自執燈，書偈於南廊壁間，呈心所見。

偈曰：「身是菩提樹，心如明鏡台，時時勤拂拭，勿使惹塵埃。」秀書偈了，便却歸房，人總不知。秀復思惟：「五祖明日見偈歡喜，即我與法有緣；若言不堪，自是我迷，宿業障重，不合得法。聖意難測！」房中思想，坐臥不安，直至五更。

祖已知神秀入門未得，不見自性。天明，祖喚盧供奉來，向南廊壁間繪畫圖相，忽見其偈，報言：「供奉却不用畫，勞爾遠來。經云：凡所有相，皆是虛妄。但留此偈，與人誦持。依此偈修，免墮惡道；依此偈修，有大利益。」令門人：「炷香禮敬，盡誦此偈，即得見性。」門人誦偈，皆歎：「善哉！」

祖三更喚秀入堂，問曰：「偈是你作否？」秀言：「實是秀作，不敢妄求祖位；望和尚慈悲，看弟子有少智慧否？」祖曰：「汝作此偈，未見本性，只到門外未入門內。如此見解，覓無上菩提，了不可得。無上菩提，須得言下識自本心，見自本性，不生不滅。於一切時中，念念自見，萬法無滯，一真一切真，萬境自如如。如如之心，即是真實。若如是見，即是無上菩提之自性也。汝且去一兩日思惟，更作一偈，將來吾看；汝偈若入得門，付汝衣法。」神秀作禮而出。又經數日，作偈不成，心中恍惚，神思不安，猶如夢中，行坐不樂。

復兩日，有一童子於碓坊過，唱誦其偈，惠能一聞便知此偈未見本性。雖未蒙教授，早識大意。遂問童子曰：「誦者何偈？」童子曰：「爾這獼猴不知。大師言：世人生死事大，欲得傳付衣法，令門人作偈來看，若悟大意，即付衣法為第六祖。神秀上座於南廊壁上書無相偈，大師令人皆誦。依此偈修，免墮惡道；依此偈修，有大利益。」惠能曰：「我亦要誦此，結來生緣。上人！我此踏碓八個餘月，未曾行到堂前，望上人引至偈前禮拜。」童子引至偈前禮拜。惠能曰：「惠能不識字，請上人為讀。」時有江州別駕，姓張名日用，便高聲讀。惠能聞已，遂言：「亦有一偈。望別駕為書。」別駕言：「汝亦作偈，其事希有！」惠能向別駕言：「欲學無上菩提，不可輕於初學。下下人有上上智，上上人有沒意智。若輕人，即有無量無邊罪。」別駕言：「汝但誦偈，吾為汝書。汝若得法，先須度吾，勿忘此言。」

惠能偈曰：「菩提本無樹，明鏡亦非台，本來無一物，何處惹塵埃？」

書此偈已，徒眾總驚，無不嗟訝；各相謂言：「奇哉！不得以貌取人！何得多時，使他肉身菩薩？」祖見眾人驚怪，恐人損害，遂將鞋擦了偈曰：「亦未見性。」眾以為然。

次日祖潛至碓坊，見能腰石舂米，語曰：「求道之人，為法忘軀，當如是乎？」乃問曰：「米熟也未？」惠能曰：「米熟久矣！猶欠篩在。」祖以杖擊碓三下而去。惠能即會祖意，三鼓入室；祖以袈裟遮圍不令人見，為說金剛經，至「應無所住而生其心」，惠能言下大悟「一切萬法不離自性」。遂啟祖言：「何期自性本自清淨！何期自性本不生滅！何期自性本自具足！何期自性本無動搖！何期自性能生萬法！」祖知悟本性，謂惠能曰：「不識本心，學法無益。若識自本心，見自本性，即名丈夫、天人師、佛。」

三更受法，人盡不知，便傳頓教及衣鉢。云：「汝為第六代祖，善自護念，廣度有情，流布將來，無令斷絕！聽吾偈曰：有情來下種，因地果還生，無情亦無種，無性亦無生。」

祖復曰：「昔達摩大師，初來此土，人未之信，故傳此衣以為信體，代代相承；法則以心傳心，皆令自悟自解。自古佛佛惟傳本體，師師密付本心。衣為爭端，止汝勿傳！若傳此衣，命如懸絲。汝須速去！恐人害汝。」惠能啟曰：「向甚處去？」祖云：「逢懷則止，遇會則藏。」

惠能三更領得衣鉢，云：「能本是南中人，素不知此山路，如何出得江口？」五祖言：「汝不須憂，吾自送汝。」祖相送直至九江驛，祖令上船，五祖把艖自搖。惠能言：「請和尚坐，弟子合搖艖。」祖云：「合是吾渡汝。」惠能曰：「迷時師度，悟了自度；度名雖一，用處不同。惠能生在邊方，語音不正，蒙師傳法，今已得悟，只合自性自度。」祖云：「如是！如是！以後佛法，由汝大行。汝今好去，努力向南；不宜速說，佛法難起。」惠能辭違祖已，發足南行，兩月中間，至大庾嶺。

五祖歸，數日不上堂，眾疑，詣問曰：「和尚少病少惱否？」曰：「病即無，衣法已南矣。」問誰人傳授。曰：「能者得之」眾乃知焉。逐後數百人來，欲奪衣鉢。一僧俗姓陳名惠明，先是四品將軍，性行麤糙；極意參尋，為眾人先趁及惠能。

惠能擲下衣鉢於石上，曰：「此衣表信，可力爭耶？能隱草莽中。惠明至，提掇不動，乃喚云：「行者！行者！我為法來，不為衣來。」惠能遂出，盤坐石上。惠明作禮云：「望行者為我說法。」惠能云：「汝既為法而來，可屏息諸緣，勿生一念，吾為汝說。」明良久，惠能云：「不思善，不思惡，正與麼時，那個是明上座本來面目？」惠明言下大悟，復問云：「上來密語密意外，還更有密意否？」惠能云：「與汝說者即非密也。汝若返照，密在

汝邊。」明曰：「惠明雖在黃梅，實未省自己面目。今蒙指示，如人飲水，冷暖自知。今行者即惠明師也。」惠能曰：「汝若如是，吾與汝同師黃梅，善自護持。」明又問：「惠明今後向甚處去？」惠能曰：「逢袁則止，遇蒙則居。」明禮辭。

惠能後至曹溪，又被惡人尋逐，乃於四會避難獵人隊中，凡經一十五載，時與獵人隨宜說法。獵人常令守網，每見生命盡放之。每至飯時，以菜寄煮肉鍋；或問、則對曰：「但喫肉邊菜。」

一日思惟：「時當弘法，不可終遯。」遂出至廣州法性寺；值印宗法師講涅槃經。時有風吹幡動，一僧曰「風動」，一僧曰「幡動」，議論不已。惠能進曰：「不是風動，不是幡動，仁者心動。」一眾駭然。

印宗延至上席，徵詰奧義，見惠能言簡理當，不由文字。宗云：「行者定非常人！久聞黃梅衣法南來，莫是行者否？」惠能曰：「不敢！」宗於是作禮，告請「傳來衣鉢、出示大眾」。宗復問曰：「黃梅付囑，如何指授？」

惠能曰：「指授即無，惟論見性，不論禪定解脫。」宗曰：「何不論禪定解脫？」惠能曰：「為是二法，不是佛法，佛法是不二之法。」宗又問：「如何是佛法不二之法？」

惠能曰：「法師講涅槃經，明佛性是佛法不二之法。如高貴德王菩薩白佛言：犯四重禁、作五逆罪、及一闍提等，當斷善根佛性否？佛言：善根有二，一者常，二者無常，佛性非常非無常，是故不斷——名為不二。一者善，二者不善，佛性非善非不善——是名不二。蘊之與界，凡夫見二，智者了達其性無二，無二之性即是佛性。」

印宗聞說，歡喜合掌，言：「某甲講經，猶如瓦礫；仁者論義，猶如真金。」於是為惠能薙髮，願事為師。惠能遂於菩提樹下開東山法門。

惠能於東山得法，辛苦受盡，命似懸絲。今日得與使君官僚僧尼道俗同此一會，莫非累劫之緣！亦是過去生中供養諸佛，同種善根，方始得聞如上頓教得法之因。教是先聖所傳，不是惠能自智。願聞先聖教者，各令淨心；聞了，各自除疑；如先代聖人無別。」

一眾聞法，歡喜作禮而退。



## 76【壇經般若品第二】

次日，韋使君請益，師陞座告大眾曰：『總淨心念「摩訶般若波羅蜜多」！』復云：『善知識！菩提般若之智，世人本自有之，只緣心迷不能自悟。須假大善知識示導見性！當知愚人智人，佛性本無差別；只緣迷悟不同，所以有愚有智。吾今為說「摩訶般若波羅蜜」法，使汝等各得智慧。志心諦聽！吾為汝說。』

善知識！世人終日口念般若，不識自性般若，猶如說食不飽。口但說空，萬劫不得見性，終無有益。

善知識！摩訶般若波羅蜜是梵語，此言大智慧到彼岸。此須心行，不在口念。口念心不行，如幻如化，如露如電；口念心行，則心口相應，本性是佛，離性無別佛。何名摩訶？摩訶是大。心量廣大，猶如虛空，無有邊畔，亦無方圓大小，亦非青黃赤白，亦無上下長短，亦無瞋無喜、無是無非、無善無惡、無有頭尾。諸佛剎土，盡同虛空。世人妙性本空，無有一法可得；自性真空，亦復如是。

善知識！莫聞我說空便即著空！第一莫著空！若空心靜坐，即著無記空。

善知識！世界虛空，能含萬物色像：日月星宿、山河大地、泉源溪澗、草木叢林、惡人善人、惡法善法、天堂地獄、一切大海、須彌諸山、總在空中。世人性空，亦復如是。

善知識！自性能含萬法是大，萬法在諸人性中。若見一切人「惡之與善」，盡皆不取不捨，亦不染著，心如虛空，名之為大；故曰摩訶。

善知識！迷人口說，智者心行。又有迷人，空心靜坐，百無所思，自稱為大；此一輩人，不可與語，為邪見故。

善知識！心量廣大，遍周法界。用即了了分明，應用便知一切。一切即一，一即一切，去來自由，心體無滯，即是般若。

善知識！一切般若智，皆從自性而生，不從外入——莫錯用意！——名為真性自用。一真一切真。心量大事，不行小道。口莫終日說空，心中不修此行！恰似凡人自稱國王，終不可得。非吾弟子！

善知識！何名般若？般若者，唐言智慧也。一切處所，一切時中，念念不愚，常行智慧，即是般若行。一念愚即般若絕，一念智即般若生。世人愚迷，不見般若。口說般若，心中常愚。常自言我修般若；念念說空，不識真空。般若無形相，智慧心即是。若作如是解，即名般若智。

何名波羅蜜？此是西國語，唐言到彼岸，解義離生滅。著境生滅起，如水有波浪，即名為此岸；離境無生滅，如水常通流，即名為彼岸；故號波羅蜜。

善知識！迷人口念，當念之時，有妄有非。念念若行，是名真性。悟此法者，是般若法；修此行者，是般若行。不修，即凡；一念修行，自身等佛。

善知識！凡夫即佛，煩惱即菩提。前念迷即凡夫，後念悟即佛；前念著境即煩惱，後念離境即菩提。

善知識！摩訶般若波羅蜜，最尊最上最第一；無住無往亦無來，三世諸佛從中出。當用大智慧，打破五蘊煩惱塵勞。如此修行，定成佛道，變三毒為戒定慧。

善知識！我此法門，從一般若生八萬四千智慧。何以故？為世人有八萬四千塵勞。若無塵勞，智慧常現，不離自性。悟此法者，即是無念。無憶無著，不起誑妄，用自真如性，以智慧觀照，於一切法不取不捨，即是見性成佛道。

善知識！若欲入甚深法界及般若三昧者，須修般若行，持誦金剛般若經，即得見性。當知此經功德，無量無邊；經中分明讚歎，莫能具說。此法門是最上乘，為大智人說，為上根人說。小根小智人聞，心生不信。何以故？譬如天龍下雨於閻浮提，城邑聚落，悉皆漂流，如漂草葉。若雨大海，不增不減。若大乘人，若最上乘人，聞說金剛經，心開悟解，故知本性自有般若之智；自用智慧常觀照故，不假文字。譬如雨水，不從无有，元是龍能興致，令一切眾生、一切草木、有情無情、悉皆蒙潤。百川眾流，卻入大海，合為一體；眾生本性般若之智，亦復如是。

善知識！小根之人聞此頓教，猶如草木，根性小者，若被大雨，悉皆自倒，不能增長。小根之人，亦復如是。元有般若之智，與大智人更無差別，因何聞法不自開悟？緣邪見障重，煩惱根深，猶如大雲覆蓋於日，不得風吹，日光不現。般若之智亦無大小，為一切眾生自心迷悟不同。迷心外見，修行覓佛，未悟自性，即是小根。若開悟頓教，不執外修，但於自心常起正見，煩惱塵勞常能不染，即是見性。

善知識！內外不住，去來自由，能除執心，通達無礙。能修此行，與般若經本無差別。

善知識！一切修多羅及諸文字，大小二乘，十二部經，皆因人置。因智慧性，方能建立。若無世人，一切萬法本自不有。故知：萬法本自人興；一切經書，因人說有。緣其人中有愚有智，愚為小人，智為大人。愚者問於智人，智者與愚人說法。愚人忽然悟解心開，即與智人無別。

善知識！不悟，即佛是眾生；一念悟時，眾生是佛。故知萬法盡在自心。何不從自心中頓見真如本性？菩薩戒經云：「我本元自性清淨。」若識自心見性，皆成佛道。淨名經云：「即時豁然，還得本心。」

善知識！我於忍和尚處，一聞言下便悟，頓見真如本性。是以將此教法流行，令學道者頓悟菩提，各自觀心，自見本性。若自不悟，須覓大善知識一解最上乘法者，直示正路。是善知識有大因緣，所謂「化導令得見性」，一切善法因善知識能發起故。三世諸佛，十二部經，在人性中本自具有；不能自悟，須求善知識指示方見。若自悟者，不假外求；若一向執謂須他善知識望得解脫者，無有是處。何以故？自心內有知識自悟。若起邪迷，妄念顛

倒，外善知識雖有教授，救不可得。若起正真般若觀照，一剎那間，妄念俱滅；若識自性，一悟即至佛地。

善知識！智慧觀照，內外明徹，識自本心。若識本心，即得解脫。若得解脫即是般若三昧，般若三昧即是無念。何名無念？知見一切法，心不染著，是為無念。用即徧一切處，亦不著一切處；但淨本心，使六識出六門，於六塵中無染無雜，來去自由，通用無滯，即是般若三昧，自在解脫，名無念行。若百物不思，常令念絕；即是法縛，即名邊見。

善知識！悟無念法者，萬法盡通；悟無念法者，見諸佛境界；悟無念法者，至佛地位。

善知識！後代得吾法者，將此頓教法門，於同見同行，發願受持如事佛故，終身而不退者，定入聖位。然須傳授從上以來默傳分付，不得匿其正法。若不同見同行，在別法中，不得傳付，損彼前人，究竟無益。恐愚人不解，謗此法門，百劫千生，斷佛種性。

善知識！吾有一「無相頌」各須誦取，在家出家，但依此修。若不自修，惟記吾言，亦無有益。

聽吾頌曰：「說通及心通，如日處虛空；唯傳見性法，出世破邪宗。

法即無頓漸，迷悟有遲疾；只此見性門，愚人不可悉。

說即雖萬般，合理還歸一；煩惱暗宅中，常須生慧日。

邪來煩惱至，正來煩惱除；邪正俱不用，清淨至無餘。

菩提本自性，起心即是妄；淨心在妄中，但正無三障。

世人若修道，一切盡不妨；常自見己過，與道即相當。

色類自有道，各不相妨惱；離道別覓道，終身不見道。

波波度一生，到頭還自懊；欲得見真道，行正即是道；

自若無道心，闇行不見道。

若真修道人，不見世間過；若見他人非，自非卻是左。

他非我不非，我非自有過；但自卻非心，打除煩惱破；

憎愛不關心，長伸兩腳臥。

欲擬化他人，自須有方便；勿令彼有疑，即是自性現。

佛法在世間，不離世間覺；離世覓菩提，恰如求兔角。

正見名出世，邪見是世間；邪正盡打卻，菩提性宛然。

此頌是頓教，亦名大法船；迷聞經累劫，悟則剎那間。」

師復曰：『今於大梵寺說此頓教，普願法界眾生言下見性成佛。』

時，韋使君與官僚道俗聞師所說，無不省悟。一時作禮，皆歎：『善哉！何期嶺南有佛出世！』

### 77【壇經疑問品第三】

一日，韋刺史為師設大會齋。齋訖，刺史請師陞座，同官僚士庶肅容再拜，問曰：『弟子聞和尚說法，實不可思議。今有少疑，願大慈悲，特為解說。』師曰：『有疑即問，吾當為說。』

韋公曰：『和尚所說，可不是達摩大師宗旨乎？』師曰：『是』公曰：『弟子聞達摩初化梁武帝，帝問云：「朕一生造寺度僧，布施設齋，有何功德？」達摩言：「實無功德。」弟子未達此理，願和尚為說。』

師曰：『實無功德。勿疑先聖之言！武帝心邪，不知正法；造寺度僧，布施設齋，名為求福，不可將福便為功德。功德在法身中，不在修福。』

師又曰：『見性是功，平等是德；念念無滯，常見本性真實妙用，名為功德。內心謙下是功，外行於禮是德；自性建立萬法是功，心體離念是德；不離自性是功，應用無染是德。若覓功德法身，但依此作，是真功德。若修功德之人，心即不輕，常行普敬。心常輕人，吾我不斷，即自無功；自性虛妄不實，即自無德；為吾我自大，常輕一切故。善知識！念念無間是功，心行平直是德；自修性是功，自修身是德。善知識！功德須自性內見，不是布施供養之所求也。是以福德與功德別。武帝不識真理，非我祖師有過。』

刺史又問曰：『弟子常見僧俗念阿彌陀佛，願生西方。請和尚說，得生彼否？願為破疑！』

師曰：『使君善聽！惠能與說。世尊在舍衛城中，說西方引化經文，分明去此不遠。若論相說里數，有十萬八千，即身中十惡八邪，便是說遠。說遠為其下根，說近為其上智；人有兩種，法無兩般。迷悟有殊，見有遲疾。迷人念佛求生於彼，悟人自淨其心，所以佛言「隨其心淨即佛土淨」。使君東方人，但心淨即無罪；雖西方人，心不淨亦有愆。東方人造罪，念佛求生西方；西方人造罪，念佛求生何國？凡愚不了自性，不識身中淨土，願東願西；悟人在處一般。所以佛言「隨所住處恒安樂」。使君心地但無不善，西方去此不遙。若懷不善之心，念佛往生難到。今勸善知識，先除十惡。即行十萬；後除八邪，乃過八千；

念念見性，常行平直，到如彈指，便覩彌陀。使君但行十善，何須更願往生？不斷十惡之心，何佛即來迎請？若悟無生頓法，見西方只在剎那；不悟，念佛求生，路遙如何得達？惠能與諸人移西方如剎那間目前便見。各願見否？』

眾皆頂禮云：『若此處見，何須更願往生？願和尚慈悲，便現西方，普令得見。』師言：『大眾！世人自色身是城，眼耳鼻舌是門。外有五門，內有意

門。心是地，性是王；王居心地上。性在王在，性去王無。性在身心存，性去身心壞。佛向性中作，莫向身外求！自性迷即是眾生，自性覺即是佛。慈悲即是觀音，喜捨名為勢至。能淨即釋迦，平直即彌陀。人我是須彌，邪心是海水，煩惱是波浪，毒害是惡龍，虛妄是鬼神，塵勞是魚鼈，貪瞋是地獄，愚癡是畜生。善知識！常行十善，天堂便至；除人我，須彌倒；去邪心，海水竭；煩惱無，波浪滅；毒害忘，魚龍絕。自心地上覺性如來，放大光明，外照六門清淨，能破六欲諸天。自性內照，三毒即除；地獄等罪，一時消滅。內外明徹，不異西方。不作此修，如何到彼？』

大眾聞說，了然見性。悉皆禮拜，俱歎：『善哉！』唱言：『普願法界眾生，聞者一時悟解。』

師言：『善知識！若欲修行，在家亦得，不由在寺。在家能行，如東方人心善；在寺不修，如西方人心惡。但心清淨，即是自性西方』。

韋公又問：『在家如何修行？願為教授。』師言：『吾與大眾說無相頌，但依此修，常與吾同處無別。若不作此修，剃髮出家，於道何益？』

頌曰：『心平何勞持戒？行直何用修禪？恩則孝養父母，義則上下相憐；讓則尊卑和睦，忍則眾惡無喧。若能鑽木取火，淤泥定生紅蓮。苦口的是良藥，逆耳必是忠言。改過必生智慧，護短心內非賢。日用常行饒益，成道非由施錢。菩提只向心覓，何勞向外求玄？聽說依此修行，天堂只在目前。』

師復曰：『善知識！總須依偈修行，見取自性，直成佛道！法不相待。眾人且散，吾歸曹溪。眾若有疑，卻來相問。』

時，刺史官僚，在會善男信女，各得開悟。信受奉行。



## 78【壇經定慧品第四】

師示眾云：『善知識！我此法門，以定慧為本。大眾勿迷言「定慧別」！定慧一體，不是二。定是慧體，慧是定用；即慧之時定在慧，即定之時慧在定。若識此義，即是定慧等學。諸學道人！莫言「先定發慧、先慧發定」各別！作此見者，法有二相。口說善語，心中不善；空有定慧，定慧不等。若心口俱善，內外一如，定慧即等。自悟修行，不在於諍；若諍先後，即同迷人。不斷勝負，卻增「我法」，不離四相。』

善知識！定慧猶如何等？猶如燈光。有燈即光，無燈即暗；燈是光之體，光是燈之用；名雖有二，體本同一。此定慧法，亦復如是。』

師示眾云：『善知識！一行三昧者，於一切處行住坐臥常行一直心是也。淨名經云：「直心是道場，直心是淨土。」莫：心行諂曲、口但說直！口說一行三昧、不行直心！但行直心，於一切法勿有執著！迷人著法相，執一行



三昧，直言「常坐不動、妄不起心、即是一行三昧」。作此解者，即同無情，卻是障道因緣。

善知識！道須通流！何以卻滯？心不住法，道即通流。心若住法，名為自縛。若言常坐不動是，只如舍利弗宴坐林中卻被維摩詰訶。善知識！又有人教坐，看心觀淨，不動不起，從此置功。迷人不會，便執成顛，如此者眾。如是相教，故知大錯。』

師示眾云：『善知識！本來正教無有頓漸，人性自有利鈍。迷人漸修，悟人頓契；自識本心，自見本性，即無差別；所以立頓漸之假名。

善知識！我此法門，從上以來，先立無念為宗，無相為體，無住為本。無相者，於相而離相；無念者，於念而無念；無住者，人之本性。於世間善惡好醜，乃至冤之與親，言語觸刺欺爭之時，並將為空，不思酬害。

念念之中，不思前境。若前念今念後念，念念相續不斷，名為繫縛。於諸法上，念念不住，即無縛也。此是以「無住」為本。

善知識！外離一切相，名為「無相」。能離於相，即法體清淨。此是以「無相」為體。

善知識！於諸境上，心不染，曰「無念」。於自念上，常離諸境，不於境上生心。若只百物不思，念盡除却；一念絕即死，別處受生；是為大錯。學道者思之！若不識法意，自錯猶可，更勸他人；自迷不見，又謗佛經。所以立「無念」為宗。

善知識！云何立「無念」為宗？只緣口說見性迷人，於境上有念，念上便起邪見，一切塵勞妄想從此而生。自性本無一法可得，若有所得，妄說禍福，即是塵勞邪見。故此法門立「無念」為宗。

善知識！無者，無何事？念者，念何物？無者，無二相，無諸塵勞之心。念者，念真如本性。真如即是念之體，念即是真如之用。真如自性起念，非眼耳鼻舌能念。真如有性，所以起念；真如若無，眼耳鼻色聲當時即壞。

善知識！真如自性起念，六根雖有見聞覺知，不染萬境，而真性常自在。故經云：「能善分別諸法相，於第一義而不動。」』



## 79【壇經坐禪品第五】

師示眾云：『此門坐禪，元不看心，亦不看淨，亦不是不動。若言看心，心原是妄，知心如幻，故無所看也。若言看淨，人性本淨，由妄念故蓋覆真如，但無妄想，性自清淨；起心著淨，却生淨妄；妄無處所，看者是妄。淨無形相，却立淨相，言是工夫；作此見者，障自本性，却被淨縛。

善知識！若修不動者，但見一切人時，不見人之是非善惡過患，即是自性不動。善知識！迷人身雖不動，開口便說他人是非長短好惡，與道違背。若看心看淨，即障道也。』

師示眾云：『善知識！何名「坐禪」？此法門中，無障無碍，外於一切善惡境界心念不起，名為「坐」；內見自性不動，名為「禪」。

善知識！何名「禪定」？外離相為禪，內不亂為定。外若著相，內心即亂；外若離相，心即不亂。本性自淨自定，只為見境思境即亂。若見諸境心不亂者，是真定也。善知識！外離相即禪，內不亂即定，外禪內定，是為「禪定」。菩薩戒經云：「我本性元自清淨。」善知識！於念念中，自見本性清淨，自修、自行，自成佛道。』



## 80【壇經懺悔品第六】

時，大師見廣韶洎四方士庶駢集山中聽法，於是陞座告眾曰：『來！諸善知識！此事須從自性中起。於一切時，念念自淨其心，自修其行，見自己法身，見自心佛，自度自戒，始得不假到此。既從遠來，一會於此，皆共有緣。今可各各胡跪！先為傳「自性五分法身香」，次授「無相懺悔」。』眾胡跪。

師曰：『一，戒香：即自心中無非、無惡、無嫉妒、無貪瞋、無劫害，名「戒香」。二，定香：即觀諸善惡境相，自心不亂，名「定香」。三，慧香：自心無礙，常以智慧觀照自性，不造諸惡；雖修眾善，心不執著；敬上念下，矜恤孤貧；名「慧香」。四，解脫香：即自心無所攀緣，不思善，不思惡，自在無礙，名「解脫香」。五，解脫知見香：自心既無所攀緣善惡，不可沈空守寂，即須廣學多聞，識自本心，達諸佛理，和光接物，無我無人，直至菩提，真性不易，名「解脫知見香」。善知識！此香各自內薰，莫向外覓！

又與汝等授「無相懺悔」，滅三世罪，令得三業清淨。善知識！各隨我語一時道：「弟子等，從前念今念及後念，念念不被愚迷染；從前所有惡業愚迷等罪，悉皆懺悔，願一時消滅，永不復起。弟子等，從前念今念及後念，念念不被憍誑染；從前所有惡業憍誑等罪，悉皆懺悔，願一時消滅，永不復起。弟子等，從前念今念及後念，念念不被嫉妒染；從前所有惡業嫉妒等罪，悉皆懺悔，願一時消滅，永不復起。」

善知識！以上是為「無相懺悔」。云何名「懺」？云何名「悔」？懺者，懺其前愆；從前所有惡業，愚迷憍誑嫉妒等罪，悉皆盡懺，永不復起，是名為懺。悔者，悔其後過；從今以後，所有惡業，愚迷憍誑嫉妒等罪，今已覺

悟，悉皆永斷，更不復作，是名為悔，故稱懺悔。凡夫愚迷，只知懺其前愆，不知悔其後過。以不悔故，前罪不滅，後過又生。前罪既不滅，後過復又生，何名「懺悔」！

善知識！既懺悔已，與善知識發「四弘誓願」，各須用心正聽：「自心眾生無邊誓願度，自心煩惱無邊誓願斷；自性法門無盡誓願學，自性無上佛道誓願成。」

善知識！大家豈不道「眾生無邊誓願度」？怎麼道，且不是惠能度。善知識！心中眾生，所謂邪迷心、誑妄心、不善心、嫉妒心、惡毒心，如是等心，盡是眾生；各須自性自度，是名真度。何名「自性自度」？即自心中邪見煩惱愚癡眾生，將正見度。既有正見，使般若智打破愚癡迷妄眾生，各各自度。邪來正度，迷來悟度，愚來智度。惡來善度，如是度者，名為真度。又，煩惱無邊誓願斷：將自性般若智除卻虛妄思想心是也。又，法門無盡誓願學：須自見性，常行正法，是名真學。又，無上佛道誓願成：既常能下心，行於真正，離迷離覺，常生般若，除真除妄，即見佛性，即言下佛道成。常念修行，是願力法。

善知識！今發「四弘願」了，更與善知識授「無相三歸依戒」。善知識！歸依覺，兩足尊；歸依正，離欲尊；歸依淨，眾中尊。從今日去，稱覺為師，更不歸依邪魔外道！以自性三寶常自證明。勸善知識歸依自性三寶：佛者，覺也；法者，正也；僧者，淨也。自心歸依覺，邪迷不生，少欲知足，能離財色，名兩足尊。自心歸依正，念念無邪見，以無邪見故，即無人我憤高貪愛執著，名離欲尊。自心歸依淨，一切塵勞愛欲境界，自性皆不染著。名眾中尊。若修此行，是自歸依。凡夫不會，從日至夜，受三歸戒；若言歸依佛，佛在何處？若不見佛，憑何所歸？言卻成妄。

善知識！各自觀察！莫錯用心！經文分明言「自歸依佛」，不言「歸依他佛」。自佛不歸，無所依處。今既自悟，各須歸依自心三寶！內調心性，外敬他人，是自歸依也。

善知識！既歸依自三寶竟，各各志心，吾與說「一體三身自性佛」。令汝等見三身，了然自悟自性。總隨我道：「於自色身歸依清淨法身佛，於自色身歸依圓滿報身佛，於自色身歸依千百億化身佛。」

善知識！色身是舍宅，不可言歸。向者三身佛，在自性中，世人總有。為自心迷，不見內性；外覓三身如來，不見自身中有三身佛。汝等聽說！令汝等於自身中見自性有三身佛。此三身佛，從自性生，不從外得。何名「清淨法身佛」？世人性本清淨，萬法從自性生。思量一切惡事，即生惡行；思量一切善事，即生善行。如是諸法在自性中，如天常清，日月常明，為浮雲蓋

覆，上明下暗；忽遇風吹雲散，上下俱明，萬象皆現。世人性常浮游，如彼天雲。善知識！智如日，慧如月，智慧常明；於外著境，被自念浮雲蓋覆自性，不得明朗。若遇善知識，聞真正法，自除迷妄，內外明徹，於自性中，萬法皆現，見性之人亦復如是，此名清淨法身佛。

善知識！自心歸依自性，是歸依真佛。自歸依者，除却自性中不善心、嫉妒心、諂曲心、吾我心、誑妄心、輕人心、慢他心、邪見心、憤高心、及一切時中不善之行；常自見己過，不說他人好惡，是自歸依。常須下心，普行恭敬，即是見性通達，更無滯礙，是自歸依。

何名「圓滿報身」？譬如一燈能除千年暗，一智能滅萬年愚。莫思向前，已過不可得；常思於後，念念圓明，自見本性。善惡雖殊，本性無二；無二之性，名為實性。於實性中，不染善惡，此名「圓滿報身佛」。自性起一念惡，滅萬劫善因；自性起一念善，得恒沙惡盡。直至無上菩提，念念自見，不失本念，名為「報身」。

何名「千百億化身」？若不思萬法，性本如空；一念思量，名為「變化」。思量惡事，化為地獄；思量善事，化為天堂；毒害，化為龍蛇；慈悲，化為菩薩；智慧，化為上界；愚癡，化為下方。自性變化甚多，迷人不能省覺。念念起惡，常行惡道；回一念善，智慧即生。此名「自性化身佛」。

善知識！法身本具，念念自性自見即是報身佛，從報身思量即是化身佛。自悟自修自性功德，是真歸依。皮肉是色身，色身是宅舍，不言歸依也。但悟自性三身，即識自性佛。吾有一「無相」頌。若能誦持，言下令汝積劫迷罪一時消滅。』

頌曰：『迷人修福不修道，只言修福便是道；布施供養福無邊，心中三惡元來造。擬將修福欲滅罪，後世得福罪還在；但向心中除罪緣，各自性中真懺悔；忽悟大乘真懺悔，除邪行正即無罪；學道常於自性觀，即與諸佛同一類。吾祖唯傳此頓法，普願見性同一體；若欲當來覓法身，離諸法相心中洗。努力自見莫悠悠！後念忽絕一世休！若悟大乘得自性，虔恭合掌至心求。』

師言：『善知識！總須誦取，依此修行！言下見性，雖去吾千里，如常在吾邊。於此言下不悟，即對面千里，何勤遠來？珍重好去！』一眾聞法，靡不開悟，歡喜奉行。



## 81【壇經機緣品第七】

師自黃梅得法，回至韶州曹侯村，人無知者。時，有儒士劉志略，禮遇甚厚。志略有姑為尼，名無盡藏，常誦大涅槃經。師暫聽即知妙義，遂為解

說。尼乃執卷問字，師曰：『字即不識，義即請問。』尼曰：『字尚不識，焉能會義？』師曰：『諸佛妙理，非關文字。』尼驚異之，遍告里中耆德云：『此是有道之士，宜請供養。』有魏武系孫曹叔良及居民，競來瞻禮。時寶林古寺，自隋末兵火，已廢。遂於故基重建梵宇，延師居之；俄成寶坊。師住九月餘日，又為惡黨尋逐，師乃遁於前山；被其縱火焚草木，師隱身挨入石中得免。石今有師跌坐膝痕及衣布之紋，因名「避難石」。師憶五祖懷會止藏之囑，遂行隱於二邑焉。

僧法海，韶州曲江人也，初參祖師問曰：『即心即佛，願垂指諭。』師曰：『前念不生即心，後念不滅即佛；成一切相即心，離一切相即佛。吾若具說，窮劫不盡。聽吾偈曰：「即心名慧，即佛乃定；定慧等持，意中清淨。悟此法門，由汝習性。用本無生，雙修是正。」』

法海言下大悟，以偈讚曰：『即心元是佛，不悟而自屈；我知定慧因，雙修離諸物。』

僧法達，洪州人，七歲出家，常誦法華經；來禮祖師，頭不至地。師訶曰：『禮不投地，何如不禮？汝心中必有一物。蘊習何事耶？』曰：『念法華經已及三千部。』祖曰：『汝若念至萬部，得其經意，不以為勝，則與吾偕行。汝今負此事業，都不知過！聽吾偈曰：「禮本折慢幢，頭奚不至地？有我罪即生，亡功福無比。」』

師又曰：『汝名甚麼？』曰：『法達。』師曰：『汝名法達，何曾達法？』復說偈曰：『汝今名法達，勤誦未休歇；空誦但循聲，明心號菩薩。汝今有緣故，吾今為汝說；但信佛無言，蓮華從口發。』

達聞偈，悔謝曰：『而今而後，當謙恭一切。弟子誦法華經，未解經義，心常有疑。和尚智慧廣大，願略說經中義理！』師曰：『法達！法即甚達，汝心不達；經本無疑，汝心自疑。汝念此經，以何為宗？』達曰：『學人根性闇鈍，從來但依文誦念，豈知宗趣！』

師曰：『吾不識文字，汝試取經誦一遍，吾當為汝解說。』法達即高聲念經，至譬喻品，師曰：『止！此經原來以因緣出世為宗。縱說多種譬喻，亦無越於此。何者因緣？經云：「諸佛世尊，唯以一大事因緣故出現於世。」一大事者，佛之知見也。世人外迷著相，內迷著空；若能於相離相，於空離空，即是內外不迷。若悟此法，一念心開，是為開佛知見。

佛，猶覺也；分為四門：開「覺知見」，示「覺知見」，悟「覺知見」，入「覺知見」。若聞開示，便能悟入，即「覺知見」——「本來真性」而得出現。汝慎勿錯解經意！見他道「開示悟入」，自是佛之知見，我輩無分。若作此解，乃是謗經毀佛也。彼既是佛，已具知見，何用更開？汝今當信：佛

知見者，只汝自心，更無別佛。蓋為一切眾生，自蔽光明，貪愛塵境，外緣內擾，甘受驅馳；便勞他世尊，從三昧起，種種苦口，勸令寢息；莫向外求，與佛無二；故云開佛知見。吾亦勸一切人，於自心中常開佛之知見。世人心邪，愚迷造罪，口善心惡，貪瞋嫉妒，諂佞我慢，侵人害物，自開眾生知見；若能正心，常生智慧，觀照自心，止惡行善，是自開佛之知見。汝須念念開佛知見，勿開眾生知見！開佛知見，即是出世；開眾生知見，即是世間。汝若但勞勞執念，以為功課者，何異犛牛愛尾？」

達曰：『若然者，但得解義，不勞誦經耶？』師曰：『經有何過？豈障汝念？只為迷悟在人，損益由己。口誦心行，即是轉經；口誦心不行，即是被經轉。聽吾偈曰：「心迷法華轉，心悟轉法華；誦經久不明，與義作讎家。無念念即正，有念念成邪；有無俱不計，常御白牛車。」』

達聞偈，不覺悲泣，言下大悟，而告師曰：『法達從昔已來，實未曾轉法華，乃被法華轉。』

再啟曰：『經云：「諸大聲聞乃至菩薩，皆盡思共度量，不能測佛智。」今令凡夫但悟自心，便名佛之知見；自非上根，未免疑謗。又經說三車，羊鹿牛車與白牛之車如何區別？願和尚再垂開示！』

師曰：『經意分明，汝自迷背。諸三乘人，不能測佛智者，患在度量也；饒伊盡思共推，轉加懸遠。佛本為凡夫說，不為佛說；此理若不肯信者，從他退席。殊不知坐却白牛車，更於門外覓三車。況經文明向汝道：「唯一佛乘，無有餘乘。若二若三，乃至無數方便，種種因緣譬喻言詞，是法皆為一佛乘故。」汝何不省？三車是假，為昔時故；一乘是實，為今時故。只教汝去假歸實；歸實之後，實亦無名。應知所有珍財，盡屬於汝，由汝受用；更不作父想，亦不作子想，亦無用想，是名持法華經。從劫至劫，手不釋卷；從晝至夜，無不念時也。』

達蒙啟發，踴躍歡喜，以偈讚曰：『經誦三千部，曹溪一句亡；未明出世旨，寧歇累生狂？羊鹿牛權設，初中後善揚。誰知火宅內，元是法中王？』

師曰：『汝今後方可名念經僧也。』達從此領玄旨，亦不輟誦經。

僧智通，壽州安豐人，看楞伽經約千餘遍，而不會三身四智，禮師求解其義。師曰：『三身者：清淨法身，汝之性也；圓滿報身，汝之智也；千百億化身，汝之行也。若離本性，別說三身，即名有身無智；若悟三身無有自性，即名四智菩提。聽吾偈曰：「自性具三身，發明成四智；不離見聞緣，超然登佛地。吾今為汝說，諦信永無迷。莫學馳求者，終日說菩提！」』

通再啟曰：『四智之義，可得聞乎？』師曰：『既會三身，便明四智，何更問耶？若離三身，別談四智，此名有智無身；即此有智，還成無智。』復說

偈曰：『大圓鏡智性清淨，平等性智心無病，妙觀察智見非功，成所作智同圓鏡。五八六七果因轉，但用名言無實性；若於轉處不留情，繁興永處那伽定。』

通頓悟性智，遂呈偈曰：『三身元我體，四智本心明；身智融無礙，應物任隨形。起修皆妄動，守住匪真精；妙旨因師曉，終亡染污名。』

僧智常；信州貴谿人，髫年出家，志求見性。一日參禮，師問曰：『汝從何來？欲求何事？』曰：『學人近往洪州白峰山禮大通和尚，蒙示見性成佛之義，未決狐疑。遠來投禮，伏望和尚慈悲指示。』

師曰：『彼有何言句？汝試舉看。』曰：『智常到彼，凡經三月，未蒙示誨，為法切故，一夕獨入丈室，請問：「如何是某甲本心本性？」大通乃曰：「汝見虛空否？」對曰：「見。」彼曰：「汝見虛空有相貌否？」對曰：「虛空無形，有何相貌？」彼曰：「汝之本性，猶如虛空；了無一物可見是名正見，無一物可知是名真知。無有青黃長短，但見本源清淨、覺體圓明，即名見性成佛，亦名如來知見。」學人雖聞此說，猶未決了，乞和尚開示！』

師曰：『彼師所說，猶存見知，故令汝未了。吾今示汝一偈：「不見一法存無見，大似浮雲遮日面；不知一法守空知，還如太虛生閃電。此之知見瞥然興，錯認何曾解方便？汝當一念自知非，自己靈光常顯現。」』

常聞偈已，心意豁然，乃述偈曰：『無端起知見，著相求菩提；情存「一念悟」，寧越昔時迷？自性覺源體，隨照枉遷流；不入祖師室，茫然趣兩頭。』

智常一日問師曰：『佛說三乘法，又言最上乘，弟子未解，願為教授。』師曰：『汝觀自本心，莫著外法相！法無四乘，人心自有等差：見聞轉誦是小乘，悟法解義是中乘，依法修行是大乘；萬法盡通，萬法俱備，一切不染，離諸法相，一無所得，名最上乘。乘是行義，不在口爭。汝須自修，莫問吾也！一切時中，自性自如。』常禮謝，執侍，終師之世。

僧志道，廣州南海人也。請益曰：『學人自出家，覽涅槃經十載有餘，未明大意；願和尚垂誨！』師曰：『汝何處未明？』曰：『「諸行無常，是生滅法；生滅滅已，寂滅為樂。」於此疑惑。』師曰：『汝作麼生疑？』曰：

『一切眾生皆有二身，謂色身法身也。色身無常，有生有滅；法身有常，無知無覺。經云：「生滅滅已、寂滅為樂」者，不審何身寂滅？何身受樂？若色身者，色身滅時，四大分散，全然是苦，苦不可言樂。若法身寂滅，即同草木瓦石，誰當受樂？又法性是生滅之體，五蘊是生滅之用；一體五用，生滅是常；生則從體起用，滅則攝用歸體。若聽更生，即有情之類不斷不滅；

若不聽更生，則永歸寂滅，同於無情之物。如是，則一切諸法被涅槃之所禁伏，尚不得生，何樂之有？」

師曰：『汝是釋子，何習外道斷常邪見而議最上乘法？據汝所說，即色身外別有法身，離生滅求於寂滅；又推涅槃常樂，言有身受用。斯乃執吝生死，耽著世樂。汝今當知！佛為一切迷人認五蘊和合為自體相，分別一切法為外塵相；好生惡死，念念遷流，不知夢幻虛假，枉受輪迴；以常樂涅槃，翻為苦相，終日馳求。佛愍此故，乃示涅槃真樂，剎那無有生相，剎那無有滅相，更無生滅可滅，是則寂滅現前；當現前時，亦無現前之量，乃謂常樂。此樂無有受者，亦無不受者。豈有一體五用之名？何況更言涅槃禁伏諸法令永生？斯乃謗佛毀法！』

聽吾偈曰：「無上大涅槃，圓明常寂照；凡愚謂之死，外道執為斷，諸求二乘人、目以為無作；盡屬情所計，六十二見本。妄立虛假名，何為真實義？惟有過量人，通達無取捨。以知：五蘊法，及以蘊中我，外現眾色像，一一音聲相；平等如夢幻，不起凡聖見，不作涅槃解，二邊三際斷。常應諸根用，而不起用想；分別一切法，不起分別想。劫火燒海底，風鼓山相擊，真常寂滅樂，涅槃相如是。吾今強言說，令汝捨邪見。汝勿隨言解，許汝知少分。」』志道聞偈大悟，踴躍作禮而退。

行思禪師，生吉州安城劉氏，聞曹溪法席盛化，逕來參禮，遂問曰：『當何所務，即不落階級？』師曰：『汝曾作甚麼來？』曰：『聖諦亦不為。』師曰：『落何階級？』曰：『聖諦尚不為，何階級之有？』師深器之，令思首眾。一日，師謂曰：『汝當分化一方，無令斷絕！』思既得法，遂回吉州青原山，弘法紹化。

懷讓禪師，金州杜氏子也；初謁嵩山安國師，安發之曹溪參叩。讓至，禮拜。師曰：『甚處來？』曰：『嵩山。』師曰：『甚麼物恁麼來？』曰：『說似一物即不中。』師曰：『還可修證否？』曰：『修證即不無，污染即不得。』師曰：『只此不污染，諸佛之所護念。汝既如是，吾亦如是。西方般若多羅識：「汝足下出一馬駒，踏殺天下人。」應在汝心，不須速說！』讓豁然契會，遂執侍左右一十五載，日臻玄奧。後往南嶽，大闡禪宗。

永嘉玄覺禪師，溫州戴氏子，少習經論，精天台止觀法門；因看維摩經，發明心地。偶師弟子玄策相訪，與其劇談，出言暗合諸祖。策云：『仁者得法師誰？』曰：『我聽方等經論，各有師承；後於維摩經悟佛心宗，未有證明者。』策云：『威音王已前即得，威音王已後，無師自悟，盡是天然外道。』曰：『願仁者為我證據。』策云：『我言輕。曹溪有六祖大師，四方』



雲集，並是受法者。若去，則與偕行。』覺遂同策來參，繞師三匝，振錫而立。

師曰：『夫沙門者，具三千威儀，八萬細行。大德自何方而來，生大我慢？』覺曰：『生死事大，無常迅速。』師曰：『何不體取無生、了無速乎？』曰：『體即無生，了本無速。』師曰：『如是！如是！』玄覺方具威儀禮拜。須臾告辭，師曰：『返太速乎。』曰：『本自非動，豈有速耶？』師曰：『誰知非動？』曰：『仁者自生分別。』師曰：『汝甚得無生之意。』曰：『無生豈有意耶？』師曰：『無意誰當分別？』曰：『分別亦非意。』師曰：『善哉！少留一宿！』時謂一宿覺。

禪者智隍，初參五祖，自謂已得正受；庵居長坐，積二十年。師弟子玄策，遊方至河朔，聞隍之名，造庵問云：『汝在此作甚麼？』隍曰：『入定。』策云：『汝云入定，為有心入耶？無心入耶？若無心入者，一切無情草木瓦石，應合得定；若有心入者，一切有情含識之流，亦應得定。』隍曰：『我正入定時，不見有「有無」之心。』策云：『不見有「有無」之心，即是常定，何有出入？若有出入，即非大定。』隍無對，良久，問曰：『師嗣誰耶？』策曰：『我師曹溪六祖。』隍云：『六祖以何為禪定？』策云：『我師所說：妙湛圓寂，體用如如。五陰本空，六塵非有；不出不入，不定不亂。禪性無住，離「住禪寂」；禪性無生，離「生禪想」；心如虛空，亦無虛空之量。』隍聞是說，徑來謁師。師問云：『仁者何來？』隍具述前緣。師云：『誠如所言。汝但心如虛空，不著空見；應用無碍，動靜無心；凡聖情忘，能所俱泯；性相如如，無不定時也。』隍於是大悟，二十年「所得心」，都無影響。隍後禮辭，復歸河北，開化四眾。

一僧問師云：『黃梅意旨，甚麼人得？』師云：『會佛法人得。』僧云：『和尚還得否？』師云：『我不會佛法。』

師，一日欲濯所授之衣而無美泉，因至寺後五里許，見山林鬱茂，瑞氣盤旋，師振錫卓地，泉應手而出，積以為池，乃膝跪浣衣石上。忽有一僧來禮拜，云：『方辯，是西蜀人。方辯遠來，願見我師傳來衣鉢。』師乃出示，次問：『上人攻何事業？』曰：『善塑。』師正色曰：『汝試塑看。』辯罔措。過數日，塑就真相，可高七寸，曲盡其妙。師笑曰：『汝只解塑性，不解佛性。』師舒手摩方辯頂，曰：『永為人天福田！』師仍以衣酬之。辯取衣分為三：一披塑像，一自留，一用椶裹瘞地中。誓曰：『後得此衣，乃吾出世住持於此，重建殿宇。』

有僧舉臥輪禪師偈云：『臥輪有伎倆，能斷百思想；對境心不起，菩提日日長。』師聞之，曰：『此偈未明心地。若依而行之，是加繫縛。』因示一偈曰：『惠能沒伎倆，不斷百思想；對境心數起，菩提作麼長。』



## 82【壇經頓漸品第八】

時祖師居曹溪寶林，神秀大師在荊南玉泉寺；於時兩宗盛化，人皆稱南能北秀，故有南北二宗頓漸之分。而學者莫知宗趣。師謂眾曰：『法本一宗，人有南北；法即一種，見有遲疾。何名頓漸？法無頓漸；人有利鈍，故名頓漸。』然秀之徒眾，往往譏南宗祖師：『不識一字，有何所長？』秀曰：『他得無師之智，深悟上乘，吾不如也。且吾師五祖，親傳衣法，豈徒然哉！吾恨不能遠去親近，虛受國恩。汝等諸人毋滯於此！可往曹溪參決！』一日，命門人志誠曰：『汝聰明多智，可為吾到曹溪聽法；若有所聞，盡心記取，還為吾說。』

志誠稟命至曹溪，隨眾參請，不言來處。時，祖師告眾曰：『今有盜法之人，潛在此會。』志誠即出禮拜，具陳其事。師曰：『汝從玉泉來，應是細作。』對曰：『不是。』師曰：『何得不是？』對曰：『未說即是，說了不是。』師曰：『汝師若為示眾？』對曰：『常指誨大眾，住心觀淨，長坐不臥。』師曰：『住心觀淨，是病非禪。常坐拘身，於理何益？聽吾偈曰：「生來坐不臥，死去臥不坐；一具臭骨頭，何為立功課？」』

志誠再拜曰：『弟子在秀大師處，學道九年，不得契悟；今聞和尚一說，便契本心。弟子生死事大，和尚大慈，更為教示！』師曰：『吾聞汝師教示學人戒定慧法，未審汝師說戒定慧行相如何？與吾說看！』誠曰：『秀大師說：「諸惡莫作名為戒，諸善奉行名為慧，自淨其意名為定。」彼說如此。未審和尚以何法誨人？』師曰：『吾言有法與人，即為誑汝；但隨方解縛，假名三昧。如汝師所說戒定慧，實不可思議也。吾所見戒定慧又別。』志誠曰：『戒定慧只合一種，如何更別？』師曰：『汝師戒定慧接大乘人，吾戒定慧接最上乘人；悟解不同，見有遲疾。汝聽吾說！與彼同否？吾所說法，不離自性；離性說法，名為「相」說，自性常迷。須知一切萬法皆從自性起用，是真戒定慧法。聽吾偈曰：「心地無非自性戒，心地無癡自性慧，心地無亂自性定；不增不減自金剛，身去身來本三昧。」』誠聞偈，悔謝，乃呈一偈曰：『五蘊幻身，幻何究竟？迴趣真如，法還不淨！』師然之。

復語誠曰：『汝師戒定慧，勸小根智人；吾戒定慧，勸大根智人。若悟自性，亦不立菩提涅槃，亦不立解脫知見；無一法可得，方能建立萬法。若解此意，亦名佛身，亦名菩提涅槃，亦名解脫知見。見性之人，立亦得，不立

亦得。去來自由，無滯無礙；應用隨作，應語隨答；普見化身、不離自性，即得「自在神通、遊戲三昧」；是名見性。」

志誠再啟師曰：『如何是不立義？』師曰：『自性無非、無礙、無亂，念念般若觀照，常離法相，自由自在。縱橫盡得，有何可立？自性自悟，頓悟頓修，亦無漸次，所以不立一切法。諸法寂滅，有何次第？』志誠禮拜，願為執侍，朝夕不懈。

僧志徹，江西人，本姓張，名行昌；少任俠。自南北分化，二宗主雖亡彼我，而徒侶競起愛憎。時，北宗門人，自立秀師為第六祖，而忌祖師傳衣為天下聞，乃囑行昌來刺師。師心通，預知其事，即置金十兩於座間。時夜暮，行昌入祖室，將欲加害，師舒頸就之，行昌揮刃者三，悉無所損。師曰：『正劍不邪，邪劍不正；只負汝金，不負汝命。』行昌驚仆，久而方蘇，求哀悔過，即願出家。師遂與金，言：『汝且去！恐徒眾翻害於汝。汝可他日易形而來，吾當攝受。』行昌稟旨宵遁；後投僧出家，具戒精進。一日，憶師之言，遠來禮覲。師曰：『吾久念汝，汝來何晚？』曰：『昨蒙和尚捨罪，今雖出家苦行，終難報德。其惟傳法度生乎？弟子常覽涅槃經，未曉「常」「無常」義，乞和尚慈悲，略為解說！』師曰：『無常者，即佛性也；有常者，即一切善惡諸法分別心也。』曰：『和尚所說，大違經文。』師曰：『吾傳佛心印，安敢違於佛經？』曰：『經說佛性是常，和尚卻言無常；善惡諸法乃至菩提心，皆是無常，和尚卻言是常；此即相違，令學人轉加疑惑。』師曰：『涅槃經，吾昔聽尼無盡藏讀誦一遍，便為講說，無一字一義不合經文。乃至為汝，終無二說。』曰：『學人識量淺昧，願和尚委曲開示。』

師曰：『汝知否？佛性若常，更說甚麼善惡諸法？乃至窮劫無有一人發菩提心者？故吾說無常，正是佛說真常之道也。又，一切諸法若無常者，即物物皆有自性，容受生死，而真常性有不遍之處；故吾說常者，是佛說真無常。佛比為凡夫外道執於邪常，諸二乘人於常計無常，共成八倒，故於涅槃了義教中，破彼偏見，而顯說真常真樂真我真淨。汝今依言背義，以斷滅無常及確定死常，而錯解佛之圓妙最後微言；縱覽千遍，有何所益？』行昌忽然大悟，說偈曰：『因守無常心，佛說有常性；不知方便者，猶春池拾礫。我今不施功，佛性而現前；非師相授與，我亦無所得。』師曰：『汝今徹也，宜名志徹。』徹禮謝而退。

有一童子，名神會，襄陽高氏子；年十三，自玉泉來參禮。師曰：『知識！遠來艱辛！還將得「本」來否？若有本則合識主，試說看！』會曰：『以無住為本，見即是主。』師曰：『這沙彌爭合取次語？』會乃問曰：『和尚坐』

禪，還見不見？」師以拄杖打三下，云：『吾打汝是痛不痛？』對曰：『亦痛亦不痛。』師曰：『吾亦見亦不見。』神會問：『如何是亦見亦不見？』師云：『吾之所見，常見自心過愆，不見他人是非好惡，是以亦見亦不見。汝言亦痛亦不痛如何？汝若不痛，同其木石；若痛，則同凡夫，即起恚恨。汝向前見不見是二邊，痛不痛是生滅；汝自性且不見，敢爾弄人？』神會禮拜悔謝。

師又曰：『汝若心迷不見，問善知識覓路；汝若心悟，即自見性，依法修行。汝自迷不見自心，却來問吾見與不見。吾見自知，豈代汝迷？汝若自見，亦不代吾迷。何不自知自見、乃問吾見與不見？』神會再禮百餘拜，求謝過愆；服勤給侍，不離左右。

一日，師告眾曰：『吾有一物，無頭無尾，無名無字，無背無面，諸人還識否？』神會出曰：『是諸佛之本源，神會之佛性。』師曰：『向汝道無名無字，汝便喚作本源佛性。汝向去有把茆蓋頭，也只成個知解宗徒。』

師見諸宗難問，咸起惡心，多集座下，愍而謂曰：『學道之人，一切善念惡念，應當盡除。無名可名，名於「自性」；無二之性，是名「實性」。於實性上建立一切教門，言下便須自見！』諸人聞說，總皆作禮，請事為師。



### 83【壇經護法品第九】

神龍元年上元日，則天中宗詔云：『朕請安秀二師，宮中供養；萬幾之暇，每究一乘。二師推讓云：「南方有能禪師，密授忍大師衣法，傳佛心印，可請彼問。」今遣內侍薛簡，馳詔請迎。願師慈念、速赴上京！』師上表辭疾，願終林麓。

薛簡曰：『京城禪德皆云：「欲得會道，必須坐禪習定；若不因禪定而得解脫者，未之有也。」未審師所說法如何？』師曰：『道由心悟，豈在坐也？經云：「若言如來若坐若臥，是行邪道。」何故？無所從來，亦無所去，無生無滅是如來清淨禪，諸法空寂是如來清淨坐。究竟無證，豈況坐耶？』

簡曰：『弟子回京，主上必問；願師慈悲，指示心要，傳奏兩宮，及京城學道者；譬如一燈，然百千燈，冥者皆明，明明無盡。』師云：『道無明暗，明暗是代謝之義。明明無盡，亦是有盡，相待立名。故淨名經云：「法無有比，無相待故。」』簡曰：『明喻智慧，暗喻煩惱；修道之人，倘不以智慧照破煩惱，無始生死憑何出離？』師曰：『煩惱即是菩提，無二無別。若以智慧照破煩惱者，此是二乘見解，羊鹿等機。上智大根，悉不如是。』

簡曰：『如何是大乘見解？』師曰：『明與無明，凡夫見二；智者了達其性無二。無二之性，即是實性。實性者：處凡愚而不減，在賢聖而不增；住煩

惱而不亂，居禪定而不寂；不斷不常，不來不去，不在中間及其內外。不生不滅，性相如如，常住不遷，名之曰「道」。』

簡曰：『師說不生不滅，何異外道？』師曰：『外道所說不生不滅者，將滅止生，以生顯滅；滅猶不滅，生說不生。我說不生不滅者，本自無生，今亦不滅，所以不同外道。汝若欲知心要，但一切善惡都莫思量，自然得入清淨心體，湛然常寂，妙用恒沙。』

簡蒙指教，豁然大悟，禮辭歸闕，表奏師語。其年九月三日，有詔獎諭師曰：『師辭老疾，為朕修道，國之福田！師若淨名，託疾毗耶，闡揚大乘，傳諸佛心，談不二法。薛簡傳師指授如來知見；朕積善餘慶，宿種善根，值師出世，頓悟上乘。感荷師恩，頂戴無已！』並奉磨衲袈裟及水晶鉢，敕韶州刺史修飾寺宇，賜師舊居為國恩寺焉。



#### 84【壇經付囑品第十】

師一日喚門人法海、志誠、法達、神會、智常、智通、志徹、志道、法珍、法如等曰：『汝等不同餘人，吾滅度後，各為一方師。吾今教汝說法，不失本宗。先須舉三科法門，動用三十六對，出沒即離兩邊，說一切法莫離自性！忽有人問汝法，出語盡雙，皆取對法，來去相因；究竟二法盡除，更無去處。

三科法門者，「陰、界、入」也。陰是五陰，「色、受、想、行、識」是也。入是十二入，外六塵「色、聲、香、味、觸、法」內六門「眼、耳、鼻、舌、身、意」是也。界是十八界，「六塵、六門、六識」是也。自性能含萬法，名含藏識。若起思量，即是轉識。生六識，出六門，見六塵；如是一十八界，皆從自性起「用」。自性若邪，起十八邪；自性若正，起十八正。若「惡用」即「眾生用」，「善用」即「佛用」。「用」由何等，由自性有。

對法，外境。無情五對：天與地對，日與月對，明與暗對，陰與陽對，水與火對；此是五對也。法相語言十二對：語與法對，有與無對，有色與無色對，有相與無相對，有漏與無漏對，色與空對，動與靜對，清與濁對，凡與聖對，僧與俗對，老與少對，大與小對；此是十二對也。自性起用十九對：長與短對，邪與正對，癡與慧對，愚與智對，亂與定對，慈與毒對，戒與非對，直與曲對，實與虛對，險與平對，煩惱與菩提對，常與無常對，悲與害對，喜與瞋對，捨與慳對，進與退對，生與滅對，法身與色身對，化身與報身對；此是十九對也。』

師言：『此三十六對法，若解用，即道貫一切經法，出入即離兩邊。自性動用，共人言語，外於相離相，內於空離空。若全著相，即長邪見；若全執空，即長無明。執空之人，有謗經，直言「不用文字」。既云不用文字，人亦不合語言，只此語言便是文字之相。又云：「直道不立文字」。即此「不立」兩字。亦是文字。見人所說，便即謗他言著文字。汝等須知！自迷猶可，又謗佛經。不要謗經！罪障無數！若著相於外，而作法求真；或廣立道場，說有無之過患；如是之人，累劫不可見性。但聽依法修行，又莫百物不思而於道性窒礙！若聽說不修，令人反生邪念。但依法修行，無住相法施。汝等若悟，依此說，依此用，依此行，依此作，即不失本宗。若有人問汝義，問有，將無對；問無，將有對；問凡，以聖對；問聖，以凡對；二道相因，生中道義。如一問一對，餘問一依此作，即不失理也。設有人問：「何名為暗？」答云：「明是因，暗是緣，明沒則暗，以明顯暗，以暗顯明，來去相因，成中道義。」餘問悉皆如此。汝等於後傳法，依此轉相教授，勿失宗旨！』

師於太極元年壬子，延和七月，命門人往新州國恩寺建塔，並令促工。次年夏末，落成。七月一日，集徒眾曰：『吾至八月，欲離世間。汝等有疑，早須相問，為汝破疑，令汝迷盡。吾若去後，無人教汝。』法海等聞，悉皆涕泣；惟有神會，神情不動，亦無涕泣。

師云：『神會小師，卻得善不善等，毀譽不動，哀樂不生。餘者不得，數年山中竟脩何道？汝今悲泣，為憂阿誰？若憂吾不知去處，吾自知去處。吾若不知去處，終不預報於汝。汝等悲泣，蓋為不知吾去處；若知吾去處，即不合悲泣。法性本無生滅去來。汝等盡坐，吾與汝說一偈，名曰「真假動靜偈」。汝等誦取此偈，與吾意同；依此脩行，不失宗旨。』眾僧作禮，請師說偈。

偈曰：『一切無有真，不以見於真；若見於真者，是見盡非真。若能自有真，離假即心真。自心不離假，無真何處真？有情即解動，無情即不動；若修不動行，同無情不動。若覓「真不動」，動上有不動。不動是不動，無情無佛種。能善分別相，第一義不動。但作如此見，即是真如用。報諸學道人，努力須用意！莫於大乘門，却執生死智！若言下相應，即共論佛義；若實不相應，合掌令歡喜。此宗本無諍，諍即失道意；執逆諍法門，自性入生死。』

時，徒眾聞說偈已，普皆作禮。並體師意，各各攝心，依法修行，更不敢諍。乃知大師不久住世，法海上座再拜問曰：『和尚入滅之後，衣法當付何人？』師曰：『吾於大梵寺說法，以至於今，鈔錄流行，目曰「法寶壇

經」。汝等守護，遞相傳授，度諸群生；但依此說，是名正法。今為汝等說法，不付其衣。蓋為汝等信根淳熟，絕對無疑，堪任大事；然據先祖達摩大師付授偈意，衣不合傳。偈曰：「吾本來茲土，傳法救迷情；一華開五葉，結果自然成。」』

師復曰：『諸善知識！汝等各各淨心，聽吾說法。若欲成就種智，須達一相三昧，一行三昧。若於一切處而不住相，於彼相中不生憎愛亦無取捨，不念利益成壞等事，安閒恬靜，虛融澹泊，此名「一相三昧」。若於一切處，行住坐臥，純一直心不動道場，真成淨土，此名「一行三昧」。若人具二三昧：如地有種，含藏長養，成熟其實；一相一行亦復如是。我今說法，猶如時雨，普潤大地；汝等佛性，譬諸種子，遇茲霑洽，悉得發生。承吾旨者，絕獲菩提；依吾行者，定證妙果。聽吾偈曰：『心地含諸種，普雨悉皆萌；頓悟華情已，菩提果自成。』』

師說偈已，曰：『其法無二，其心亦然。其道清淨，亦無諸相。汝等慎勿「觀靜」及「空其心」！此心本淨，無可取捨。各自努力，隨緣好去。』爾時，徒眾作禮而退。

大師，七月八日，忽謂門人曰：『吾欲歸新州，汝等速理舟楫！』大眾哀留甚堅。師曰：『諸佛出現，猶示涅槃；有來必去，理亦常然。吾此形骸，歸必有所。』眾曰：『師從此去，早晚可回。』師曰：『葉落歸根，來時無口。』

又問曰：『正法眼藏，傳付何人？』師曰：『有道者得，無心者通。』又問：『後莫有難否？』師曰：『吾滅後五六年，當有一人來取吾首。聽吾記曰：「頭上養親，口裏須餐；遇滿之難，楊柳為官。」』又云：『吾去七十年，有二菩薩，從東方來，一出家，一在家，同時興化，建立吾宗；締緝伽藍，昌隆法嗣。』問曰：『未知從上佛祖應現已來，傳授幾代？願垂開示！』師云：『古佛應世，已無數量，不可計也。今以七佛為始：過去莊嚴劫，毗婆尸佛，尸棄佛，毗舍浮佛；今賢劫，拘留孫佛，拘那含牟尼佛，迦葉佛，釋迦文佛；是為七佛。』

釋迦文佛首傳摩訶迦葉尊者，第二阿難尊者，第三商那和修尊者，第四優婆塞多尊者，第五提多迦尊者，第六彌遮迦尊者，第七娑須密多尊者，第八佛馱難提尊者，第九伏馱密多尊者，第十脇尊者，十一富那夜奢尊者，十二馬鳴大士，十三迦毗摩羅尊者，十四龍樹大士，十五迦那提婆尊者，十六羅睺羅多尊者，十七僧伽難提尊者，十八伽耶舍多尊者，十九鳩摩羅多尊者，二十闍耶多尊者，二十一婆修盤頭尊者，二十二摩拏羅尊者，二十三鶴勒那尊者，二十四師子尊者，二十五婆舍斯多尊者，二十六不如蜜多尊者，二十七

般若多羅尊者，二十八菩提達摩尊者，二十九慧可大師，三十僧璨大師，三十一道信大師，三十二弘忍大師，惠能是為三十三祖。從上諸祖，各有稟承。汝等向後，遞代流傳，毋令乖誤！』

大師，先天二年癸丑歲，八月初三日，於國恩寺齋罷，謂諸徒眾曰：『汝等各依位坐，吾與汝別。』法海白言：『和尚留何教法，令後代迷人得見佛性？』師言：『汝等諦聽！後代迷人，若識眾生，即是佛性；若不識眾生，萬劫覓佛難逢。吾今教汝識自心眾生，見自心佛性。欲求見佛，但識眾生；只為眾生迷佛，非是佛迷眾生。自性若悟，眾生是佛；自性若迷，佛是眾生。自性平等，眾生是佛；自性邪險，佛是眾生。汝等心若險曲，即佛在眾生中；一念平直，即是眾生成佛。我心自有佛，自佛是真佛。自若無佛心，何處求真佛？汝等自心是佛，更莫狐疑！外無一物而能建立，皆是本心生萬種法。故經云：「心生種種法生，心滅種種法滅。」吾今留一偈，與汝等別，名「自性真佛偈」。後代之人，識此偈意，自見本心，自成佛道。』偈曰：『真如自性是真佛，邪見三毒是魔王；邪迷之時魔在舍，正見之時佛在堂。性中邪見三毒生，即是魔王來住舍；正見自除三毒心，魔變成佛真無假。法身報身及化身，三身本來是一身；若向性中能自見，即是成佛菩提因。本從化身生淨性，淨性常在化身中；性使化身行正道，當來圓滿真無窮。淫性本是淨性因，除淫即是淨性身；性中各自離五欲，見性剎那即是真。今生若遇頓教門，忽遇自性見世尊。若欲修行覓作佛，不知何處擬求真？若能心中自見真，有真即是成佛因；不見自性外覓佛，起心總是大癡人。頓教法門今已留，救度世人須自修；報汝當來學道者，不作此見悠悠。』

師說偈已，告曰：『汝等好住，吾滅度後，莫作世情悲泣兩淚！受人弔問，身著孝服，非吾弟子！亦非正法！但識自本心，見自本性，無動無靜，無生無滅，無去無來，無是無非，無住無往。恐汝等心迷，不會吾意，今再囑汝，令汝見性。吾滅度後，依此修行，如吾在日。若違吾教，縱吾在世，亦無有益。』復說偈曰：『兀兀不修善，騰騰不造惡，寂寂斷見聞，蕩蕩心無著。』

師說偈已，端坐至三更，忽謂門人曰：『吾行矣！』奄然遷化。於時異香滿室，白虹屬地，林木變白，禽獸哀鳴。

十一月，廣韶新三郡官僚，洎門人僧俗，爭迎真身，莫決所之。乃焚香禱曰：『香煙指處，師所歸焉！』時，香煙直貫曹溪。十一月十三日，遷神龕併所傳衣鉢而回。



次年七月二十五日出龕，弟子方辯以香泥上之。門人憶念取首之記，遂先以鐵葉漆布，固護師頸入塔。忽於塔內白光出現，直上衝天，三日始散。韶州奏聞，奉敕立碑紀師道行。

師，春秋七十有六，年二十四傳衣，三十九祝髮。說法利生三十七載。得旨嗣法者四十三人，悟道超凡者莫知其數。達摩所傳信衣，中宗賜磨衲寶鉢，及方辯塑師真相，并道具等，主塔侍者尸之，永鎮寶林道場。流傳壇經，以顯宗旨。此皆興隆三寶，普利群生者。



## 【F百孝經聖訓輯要】

### 01【百字經聖訓輯要 1 至 10 篇】

#### 1 天地重孝孝當先

1. 道育天地，運行日月，萬物長養，一寒一暑，陰陽消長。乾道成男，坤道成女，然後夫婦、父子、君臣、上下，進而禮義樂章。
2. 宇宙間息息相關，禮之始，孝居上，天地明察，神明彰，歷代的先王，以孝治國安家邦，聖賢仙佛，孝慈為標榜。
3. 孝悌，仁之本，本立道生。上天降福，祥瑞臻，家運昌隆，事事順暢，子孫代代康寧。反之，有如車離軌，災禍不斷。故君子應以孝當先，怡謹盡孝，尊親事親為大，慎恭篤行。

#### 2 一個孝字全家安

1. 凡為人子，孝敬是先，其次友愛，協和兄弟。若非父母，豈有此身？試問身從何來，親為生我之本。孝為何事？人所自有之心也。慈烏反哺，猶知報恩，人而不孝，烏雀不若。
2. 孝之道，言不可得而盡也。盡得小孝，可稱端人良士；盡得大孝，即可入聖超凡。家家孝友，兄弟雍和，息事省爭，安分循理。
3. 孝行由自親長而推之，始于事親則家和，中於事君則國安，終于立身行道，揚名于後世，以顯父母，罔極之恩，報於萬一，稱蓋世之孝也。

#### 3 孝順能生孝順子

1. 夫孝乃天之經，地之義也。綱常倫理，首重乎孝；千經萬典，猶以孝悌為先。當思父母，撫育栽培，推乾就濕之恩，及不忍孩子飢寒之心。觀羊有跪乳之恩，鴉有反哺之義，人生於天地之中，萬物之長，亦應知孝親。順親之意，承親之志，顯親之名。
2. 雖父母有過，當是諫而不逆，婉容愉色，勞能無怨，勿有惱怒愁煩之態；下氣怡聲，竭己心力之奉親，以得歡心為本。冬溫夏清，晨昏定省，雖為菽水雞豚之養，猶勝於親歿之椎牛之祭也已矣。

#### 4 孝順子弟必明賢

1. 古有廿四孝，各居賢名；現代孝子女，幾顧親心？科技多昌盛，文明之下，天性多泯滅，弑親可聞。智士於靜夜，捫心自想，父母生養苦，數十寒春，一朝兒長成，各立門戶，兒供親溫飽，以博孝名。侍老少所需，體恤關心，毋以養犬馬，一般心情，莫待親不在，空燒紙金。
2. 想想孩提時，有過親不怪；今父母有錯，你卻恨難排。無冤不成家，父子互為債，退一步思量，海闊天空白，關係可改變，只要心存愛。

#### 5 孝是人道第一步

1. 夫先王之道，莫大於孝；仲尼之教，莫本於孝。欲成聖人之全德，必立孝以誠其身，廣其忠恕。
2. 孝者，人倫之始，大道之基，事親之本也。冠乎眾德而開其端；本乎聖志而立其基；首乎善行而達世範；尊乎宗祖而淵流長；誠乎親朋而忠社稷；終乎慕親而身示道。故推其孝悌，以奠萬德之基，注萬世之源。己行無慊，達純德全孝，以宜家宜國人。

#### 6 孝子謝世即為仙

1. 孝悌，德行第一事。故曰：行仁之本。始以事親，中以事君，終以立身。愛親者，不敢惡於人；敬親者，不敢慢於人。
2. 事雙親，氣要平和，色要溫雅，語要真誠，心要寬慈怡。不可冷淡心，不可生煩惱心，不可生驚怖心，不能有愁悶心，不能有難言，不能有愧恨心。居則致其敬；養則致其樂；病則致其憂；喪則致其哀；祭則致其嚴。是故子曰：「安民親愛，莫善於孝；親民禮順，莫善於悌。」

#### 7 自古忠臣多孝子

1. 眾善之首，乃孝為先。孝者，德之本歟，教之所由生也。是以為人子，當侍親無違，事之以禮，於居、養、病、喪、祭，必敬、樂、憂、哀、嚴。時時持孝之始，切切體孝之終。盡心竭力，勞而無怨矣。
2. 繼能宜廣此心，推至社稷，親親仁民，孝事於君，立身行道，以忠孝節義制身謹度。察古今聖賢輩，皆為忠孝士，能持忠孝大義者，方為孝子乎！

#### 8 君選賢臣舉孝廉

1. 其為人也以孝悌，而好犯上者鮮矣；不好犯上作亂者，未之有也其所聞。先王之道經天下，禮之用也和為貴，恭近於禮訪賢良，文能安邦武定國，忠臣出於孝子弟，精忠報國岳武穆，三顧茅廬亮出任，李密陳情誓盡忠。
2. 聖朝以孝政經綸，互古明君舉孝廉，周公吐握民歸心，德孝興也國之基。令德也夫無貳心，恕思明德以民政令，信為天地之大本，用之以國安民心。堯帝禪讓舜攝政，不久天下以大治，四海昇平。

## 9 盡心竭力孝父母

1. 天下溺，援之以道，闡道宏德，不遺餘力。明體達用，本立道生，樹立典範。禮之規循，義之濟貧，孝之竭力體行。神色恭敬，誠懇態度，奉養雙親，慎行其身。大孝尊親，其次弗辱，其下能養。

2. 身也者，父母之遺體也。行父母之遺體，敢不敬乎？居處不莊，非孝也；事君不忠，非孝也；蒞官不敬，非孝也；朋友不信，非孝也；戰慄無勇，非孝也，災及於親。

## 10 孝道不獨講吃穿

1. 父母恩德，南山巍巍，生我劬勞，衣食無缺。拊我、畜我、長我、育我，出入腹我，顧我寶貝。日夜伴隨，綻放光輝，日復一日，始盡無悔。歲月人催，臉頰憔悴，換得兒女，功成名位。欲報恩德，孝心為貴，親親為大，仁者德培。

2. 孝子事親，居致敬意，晨昏定省，虔誠以對。承歡濃情，微言禮節，菜根淡薄，方是真味。養親和樂，氣平悅色，愛心關懷，不至無微。事親幾諫，見志不從，順意承志，委曲無違。了然根源，正心修身，立身行道，光耀門楣。



## 02【百字經聖訓輯要 11-20 篇】

### 11 孝道貴在心中孝

1. 事親竭心力，和順誠敬矣。出告反面，合乎情與理。能設身處地，婉容低聲氣，遠慮周而密，往來識大體。鞠育之恩情，永銘記心底，點水泉湧報，效聖法賢奇，敦品更勵志，言行不越矩。

2. 綱常與倫理，用心來倡提，恢復那古禮，移風挽頹溺。承先啟後進，宜鞏固根基，反樸歸真，少煩惱憂慮。萬靈之首兮，孝行來力舉，齊家和安樂，能立身與揚名，威儀傳千里。

### 12 孝親親責莫回言

1. 竭力孝父母，小心存敬意，慎勿慢親顏，凡事體用心。奉勸世上人，供養父母親，常當孝順兒。親恩重如山，抱之育之憐，知養生孝親，人子望厚報，有親不能孝，何以堪稱人？居敬表孝心，衣食備其全，時時來體踐，昊天罔極德。

2. 仁孝若推廣，治家則家齊，天理仁風施，明道覺性真。倫常若遵蹈，純孝已克全，侍側和悅態，恭敬德懷慎。堯舜之孝行，世人須效法，十哲立楷模，廉潔閔子騫，千秋萬人頌，白陽立典範，聖賢德業永留傳。

### 13 惜乎人間不識孝

1. 夫孝，天之經也，地之義也，民之行也。孝道乃為人之根本，本立道生，家和萬事興。惜乎世人不識真孝，倫常顛倒，道理不明，以致造下無邊罪過，苦海沉淪，何日盡矣！

2. 斯今臨義，白陽修士，當篤志力行，挽化社會不良風氣，推廣三代同堂，提倡道化家庭，實踐孝悌治家，振興禮儀之邦。此生立身行道於人間，少懷老安為心愿，行大大孝以慰父母，顯親揚名，開萬世太平。功崇德昭，孝範美評。

#### 14 回心復孝天理還

1. 孝子反古復始，不忘其所由生，是以求修身嚴謹，涵養中和，不敢偏離正道。若有心不存慎終之規，口不吐訓格之言，好利不厭，淫行無度，私心詭譎，從惡如流，暴慢失禮，驕縱無德，忤親、逆親、傷親之心者，悔悟、思痛、改過，回復到赤子純真之情性。

2. 擇賢託身，以忠、信、仁、義自勉，能知所務，知所執，自強不息，又篤行信道，方為愛親、敬親、安慰親心之舉，更是轉禍為福之法。天道好還、絲毫不爽、至理之言勿忘。

#### 15 諸事不順因不孝

1. 觀今之天下，而言孝悌，人幾視為迂腐之談，皆謂不適于用乎！如今不重孝悌之人多也。聖人之德，本於人倫，堯舜之道，不外孝悌。古來旋乾轉坤之偉人，皆出自孝悌中來哉！

2. 不孝與不悌相因，事親與事長並重，故薄於倫常之地者，必無真事業。所謂入則孝，出則悌，人人興起，家家慕效，則漸還淳古之俗。天下萬善孝為之本，眾當自省，勉勵行之，福報自臻。

#### 16 怎知孝能感動天

1. 孝當竭力，忠則盡命，以養父母，孝無始終。孝順不失，保其祿位，敬事則順，可以化民。則天之明，孝之大也，天地之經，民之也行。

2. 先王之教，陳以德義，博愛之心，莫遺其親，明王以孝治天下也。以事其親，百姓歡心，有覺德行，四國順之，災害不生，天下和平。

3. 聖人之德，加以孝乎？容止可觀，以臨其民，成其德教，行其政令，君親臨之，仁德歌頌，莫善於孝，教民禮順，安上治民，風調雨順。修身慎行，通於神明，天祐社稷世大同。

#### 17 孝道貴順無他妙

1. 天取人以德，德首重於孝。聖人之德由孝顯，其為本而教民之。古聖相傳，堯舜一脈，皆行孝道也。人受生於親，親恩以鞠，故孝親者貴順，順其

親有道；舜之孝，以德順其親，而常安樂；閔損之孝，使人不聞其父母之言。

2. 孝乃始於事親，終於立身。欲順親者，先誠其身，依禮能：孝其親必德成；順其親必信朋；敬其親必順長；恭其親必序悌。故愛親敬尊之義，在克成其孝，以顯親之德，而推其四海矣。

## 18 孝順不分女共男

1. 孝道始於侍親，事親當以敬禮歡心為本，不可有勞倦、愁苦、怨懟之態。尊親應報國恩，守道盡忠，不敢毀傷髮膚，恭順而無違心志。

2. 忠孝若能克盡，立身必合乎於倫常，不敢造次悖禮，日常中低心氣、婉容、愉色，不惡於人，恪遵禮義規矩，方能報父母養育之恩。

3. 為人子者，若能時時省思，反求諸己，否盡孝？否順親？於此天長日久，必得眾人欽敬，長輩寬心，風範樹立矣。

## 19 福祿皆由孝字得

1. 人生一世名，草木一春興；禍福與災祿，全由自招迎。倫常孝為首，百善不逆行；根本處做去，諸事皆亨通。

2. 孝親由心意，非做表面功；時常感恩大，此身難報宗。承歡膝下樂，老者性如童；只要多關愛，噓寒問暖冬。兩代便無礙，代溝暢如風；為人子與媳。毋逆多順從。

3. 父母有缺點，也應多包容；捫心且自對，未必樣樣懂。遷就不衝動，尊嚴互維恭；妯娌連襟和，上下樂融融。家和萬事興，長幼無憂忡；天降福祿壽，孝者美名封。

## 20 天將孝子另眼觀

1. 人謂天下惟孝至難；予謂天下惟孝至易，何謂也？此為天性所素具，及于父母，謂之孝；兄弟，謂之悌；同族，謂之敦睦；朋友，謂之信義；鄰里鄉黨，謂之慈善。一名一物，不忍毀傷；一絲一粟，不忍拋棄；一草一木，不忍殘害，謂之公德。

2. 初基不固，其源不清，故，孝為百行之原也。初本不立，無以植其體。經曰：立愛自親始，立敬自長始，孝悌之至，通于神明。行孝道，非惟鄉人重之，官司敬之，天地鬼神亦將祐之。力行孝，樹典範，名揚千秋。



## 03【百字經聖訓輯要 21-30 篇】

### 21 人人都可孝父母

1. 天道必須由人道來修起，孝乃道德根本，行孝知恩報本，人人敬親、愛親、順父母，盡力做到孝親心。骨肉至情深，為人兒女報恩義，善惟親心恭敬存，孝親之道奉行導。
2. 居則致其敬；養則致其樂；病則致其憂；喪則致其哀；祭則致其嚴。興家立品顯揚，遵於親，孝親之理貴實行，承言順從。

### 22 孝敬父母如敬天

1. 天地無私，以德為尊；禮賢容眾，化育萬民。妙法不二，無字經文；覺路印證，率性之門。忠恕而已，過化存神；宏儒懷志，扶振綱倫。窮力贊天，浩氣長存；格物除欲，唯理可陳。淑世之用，仁里為親；圭臬彰顯，教化之根。
2. 淳風再現，唐堯明君，王道不失，孝悌立身。家戶欣榮，百代傳人；古訓聖書，明德維新。美玉韞積，斯志難伸，涅而不緇，鶴立雞群。蜉蝣一夢，借假修真；超凡聖入，九六飛昇。慈氏彌勒，渡世祥禎。

### 23 孝子口裡有孝語

1. 萬物無本則不生；萬水無源則不流。自性天賦與，此身父母育。為人子，孝為先，孝與順，緊相連，勿使惱怒常使歡，暖衣飽食無飢寒。爾能孝，子亦孝，看簷前，點滴連，父慈子孝人欽羨，孝悌為仁之根源。
2. 成佛聖，做仙真，必孝慈，忠義全，肯犧牲，勤奉獻，濟原皇，道脈延。修道士，行大孝，一報恩，二了愿，渡迷子，建功端，一子成，玄祖沾。逢人勤孝福慧添，孝思孝行感地天，以孝傳世，國泰民安。

### 24 孝婦面上帶孝顏

1. 中饋由來豈可輕，相夫教子慧賢名，有條不紊齊家務，婦職無虧孝道成。順親本是性天成，悅色和顏細語聲，恭敬唯唯言謹從，惕勵奉行孝德名。
2. 聖門坤道立杆影，念載含辛守為節，侍奉公婆勤教子，孝心終得感蒼穹。孝道存心勉力行，願期深入悟分明，還須實踐誠於中，美德流傳啟群眾。
3. 恭敬翁姑意志堅，為人媳婦禮猶虔，晨昏定省無辭苦，孝道周全感佛仙。奉行孝道本當然，子職孝養不計年，克紹箕裘勤積德，可格天心福慧延。

### 25 公婆上邊能盡孝

1. 夫妻緣分千年結，至愛情深甘苦隨，貧富與共同進退，相互扶持育兒傑。若無公婆君何來？敬愛雙老如親爹，家欲和諧第一步，便是長幼禮有別，經常隨便變放肆，該放鬆時則不威。

2. 親子之間有互動，避免子女錯行為，祖孫三代同修道，增加相處機會也。小孩有良好規範，老人有成就發揮，相同目標來奉獻，修辦真心不虛偽，身為人媳實要角，居中調節顯德美。

## 26 又落孝來又落賢

1. 女子好學，知書達禮，才德兼備，氣志足嘉，和顏悅色，正身潔行，端一誠莊，貞靜廉謹，不忘古訓，三從四德，將合二姓之好。

2. 婚禮者，禮之大本。夫婦之道，人倫大節，義以和親，恩以好合。勤儉主持家務，輔佐丈夫，賢德婦女，足為楷模。成婦禮，明婦順，家庭和睦，家室長久，恭敬、溫和、慈愛、不嫉不妒，靜專動直、恪慎克孝，肅恭神人，不失其儀，崇蠡斯百葉之祉，孝賢柔順，名落其實，欽哉至德，不忘曰篤。

## 27 女得淑名先學孝

1. 古庭訓宜室家，教後人知禮法。重貲財薄父母，此人子情義寡。嫁女兒擇佳婿，娶媳婦淑女誇。父子和家不退，兄弟和不分家。人根本知孝悌，求成果育根芽。要子女孝敬你，你先孝爹娘他。

2. 賢媳女敬夫婿，孝公婆勤持家。空拜佛有何用？不知孝不如鴉。縱然是親有錯，諫勤之效果佳。以德行來示道，可感化罪洗刷。要渡人先渡己，齊家國平天下。知先後立命達。

## 28 三從四德孝在前

1. 婦純其德，苟不以孝作中，縱敦親睦鄰，善德難固。婦謹其言，苟不誠孝敬和，縱能言善辯，言之無禮。婦正其容，苟不行孝立身，縱端莊嫻淑，賢明難持。婦精其工，苟不順孝奉親，縱百藝集身，用之無義。

2. 婦有三從之義，不矜善其孝德，則在家難寬二老心，從夫難匡正其志，教子難出忠孝子。習效帝堯之女，立母儀，專一承順孝完全，倫理順序遵循行，內睦家道自昌興。

## 29 孝在鄉黨人欽敬

1. 至德要道即孝悌，為人知曉此道義，敬父如天，母如地，事親可立身齊，行孝揚名世遺，百善孝順作起。

2. 恩澤如海莫能比，三年劬勞含辛育，慈烏有反哺之恩，羔羊有跪乳之義，報答終身以萬一。晨昏定省躬踐，菽水承歡樂怡，父慈子孝家康定，樹立典範，人當學習。

3. 無念爾祖，聿修厥德，上不驕，高不危，長守富貴保社稷。身修而後家齊國治，忠臣出孝悌。金銀財寶貴，父母更寶矣。飲水思源，知孝親貴唯一，孝為德之本，是大道之根基。

### 30 孝在家中大小歡

1. 人倫開始，肇端夫婦，良緣夙締，佳偶天成。眼前爽利，家宅光明，歡笑欣欣。欲人愛，必先愛人，欲子孝順，己先孝父母。三代同堂重慶下，孫娛親，祖賢孝孫，後輩發達，似蘭玉聯芳，始為盡孝盡善，家園美矣。
2. 兄弟既翕，花萼相輝，孟季齊芳，棣華競秀。孝者胸懷歡暢，長壽可期，順時保千金體，愷悌氣，災沴不干。心正諸邪不侵，家和諸福吉祥。



### 04【百字經聖訓輯要 31-40 篇】

#### 31 孝子逢人就勸孝

1. 萬家生佛，親親長長，洽于民心天運彰。冥玄尊性，親仁善鄰，修齊治平眾囑望。菩薩跡襲，親愛成誠，援溺濟危察探詳。道貌慈嚴，親和力事，理智融諧淨德揚。謹身節用，親賢遠佞，坦率無爭輔贊襄。
2. 光分靈，親召閉疏，視重大體惜恩賞。宏儒碩覺，親炙秉彝，感佩昌導積志昂。良伴協弼，親歷歸程，慎始敬終遞史章。實事求是，親聽誓愿，所成豐穰報穹蒼。撫綏四方，親迎寅畏，威鳳祥麟丕孝仰。

#### 32 孝化風俗人品端

1. 百行之首，以孝為先；移風易俗，以品德為要。古之賢哲，力行不倦，以身示教，其容止可親，舉止可道，思想民風純正，皆以修身行孝為本。
2. 愛親者，不敢惡於人；敬親者，不敢慢於人；樂親者，不敢怒於人；養親者，不敢傷於人；兄愛而友弟，敬而順和。
3. 孝子百世之宗，仁人天下之命，君子知命立命，立身行道，以顯耀家齊、國治、民安、天下平。賢者荷擔使命，為青史立杆標。

#### 33 生前孝子聲價貴

1. 孝治天下安家邦，至德要道天地藏。為人之子孝根本，實踐綱常父母養。天性發揚達至善，儒家思想修性德望。生前事奉竭盡力，恭敬親心孝昭彰。閔氏體寒御車轉，何曾埋怨後母娘？車前跪父留母在，三子免受風雨霜。
2. 孝子心量無邊廣，容納百川遠流長。友愛弟幼甚慈憐，深情流露契心房。真心感動母向善，融和相處家呈祥。德性彰顯行日常，單衣順母立標榜。後人效法德業高，名流萬芳人敬仰。

#### 34 死後孝子萬古傳

1. 天最喜孝子，孝子明倫常。精誠勤服侍，孝行留典章。瑞氣滿庭繞，吉祥隨身旁。福慧暗中生，避劫免災殃。孝心越渾大，種植彌深剛。菩提心灼見，威儀涵容養。孝道行黽勉，修行有義方。三綱正其位，五倫必禎祥。



2. 孝子忠節義，一行可興邦。允執厥中立，顯印如圭璋。利生承疇志，唯道息猖狂。體用兼賅備，必能日益彰。且看古賢者，一孝眾頌揚。善俗導人心，孝德世扶匡。英名遠近播，聖德日月長，萬古永流芳。

### 35 處世惟有孝力大

1. 孝者，百行之本也。能化：厲色惡語成婉言謙遜；博弈飲酒成潔身自好；好勇鬥狠成溫文儒雅；驕奢淫佚成樸儉厚實；耳目之欲成恭本正傳；推兄誘弟成棣華增映。

2. 修身自治，貨財利達，處之不踰其則；貧賤患難，無喪廉恥失正。一舉足，一言語，弗敢辱身，喪心，羞親之失。而能：居處以莊，事君盡忠，蒞官誠敬，朋友講信，戰陳有勇。以敦厚品德，氣協四維，光耀乾坤。

### 36 孝能感動地和天

1. 孝道之須知：要安養父母之身，使之生活無虞；要敬順父母之心，使之精神無憂；要顧全父母之義，使之綱常無虧；要渡脫父母之苦，使之得道無惑。

2. 要不辱父母之名，子當修身謹嚴；要顯揚父母之德，子當行道不輟；要恆保父母之樂，子當齊家修辦；要追思父母之慈，子當早晚祭拜；要報答父母之恩，子當立志成道。

3. 要解卻皇<sub>天</sub>之憂，必須渡盡蒼生，要體貼皇<sub>天</sub>之意，必須代天宣化；要寬慰皇<sub>天</sub>之心，必須建功立德；要永伴皇<sub>天</sub>之身，必須覺行圓滿。

### 37 孝經孝文把孝勸

1. 妙哉百孝經，仙佛慈悲傳聖音。有緣得之者，誠敬慎獨合天心。勸化為人子，聞經解經照經行。爾若真誠孝，恆誠一貫保初心。如是忤逆兒，懺悔前非速改進。聖訓知遵兮，純然無為多感應。箕裘世代業，樹德仁風立門庭。

2. 勸世人，教子百藝身，不如一孝。遺子一經，勝過千金，以來道，孝心孝行。推廣百孝經，示易俗移風。感化世間人，自把祖蔭。孝子齊家修，治國不紊。本立而道生，孝道推循。天下如一家，存乎孝字。孝子芳名，自古至今。

### 38 孝父孝母孝祖先

1. 孝經云：人之行莫大於孝。故知，縱有高官厚祿，而無實孝者，其德必虧，其餘無可求也。

2. 惜哉世人蓼莪忘，追名逐利本末顛。不知孝行眾善勸，敬悅親心繼志傳。古有張元孝感格，藥師經頌祖目見

。平仲鬻身葬其父，蔡順拾桑孝母顏。

3. 念祖修德大雅云，孝行始終萬人瞻。修身立德建功果，一子成道拔祖先。移孝作忠闡大道，渡化眾生離苦淵。如此孝子動鬼神，顯揚祖德在世間。

### 39 父母生子原為孝

1. 養親莫過於誠敬，食無求飽貴貼心。恭而有禮日常行，面無色難篤於親。百里負米子路孝，臥冰求鯉王祥盡。親嚐湯藥漢文帝，賣身葬父孝感天。懷橘遺親賢陸績，行傭供母感盜賊。恣蚊飽血極其孝，棄官尋親朱壽昌。戲彩娛親老萊子，拾桑供母於蔡順。扇枕溫衾香九歲，刻木事親慎終遠。單衣順母閔子騫，哭竹生筍謂孟宗。

### 40 能孝就是好兒男

1. 孝是真情的流露，是自然的行為，是對父母慈愛的回報。無須學習，不必強制，天性中本來具足，雖然平凡卻無限可貴。
2. 為人子女，除了對父母生活用心照應，更要能體貼父母之心情。不悖教悔、循仁義，進而能夠渡眾闡道，使親安心、開心、放心，一生歡樂無憂。
3. 吾人能發揮大孝的精神，利益天下蒼生，不僅是個人生命價值之展現，也是報答親恩之妙法。善用今生，把握時機，讓父母及祖先都能以我為榮，才是真正行大大孝之好兒男。



## 05【百字經聖訓輯要 41-50 篇】

### 41 為人能把父母孝

1. 真正的孝子，絕不說錯話，不做錯事，能自愛，因為自身是父母生命的延續。愛妻子，曉得妻子是事親與祭祀的主理人。也愛子女，明白子女是為父母親傳宗接代的人。並感化百姓，也能自愛。愛妻又愛子，讓孝道落實在每個家庭。
2. 君子自勉，要謹記在心，說話謙遜，態度恭敬，臉色溫和，如此侍奉雙親，必得孝子之名，而後輩子孫，亦以此回報在你的身上。

### 42 下輩孝子照樣還

1. 尊親不辱身，不羞親，矜矜言舉，品健格全。事親禮恭，卑伏不厭倦，情柔委婉，同小兒真。奉親心悅，歡愉表態，物質供之，色怡無怨。養親體貼，至入細微，和顏對待，無憂煩安。
2. 順親服從，意誠當先，親有過錯，諫而不逆。敬親如天，謹重熱忱，晨昏定省，冬溫夏清。孝親心志，恆忠篤實，終身慕親，寸草春暉。愛親莫敢惡人，必仁，勿敢怠慢人，必莊重。祭親以禮，慎終追遠，飲水思源，永弗忘本。念親德業，善揚恩澤，踵武遺志，克紹裘踐。

### 43 堂上父母不知孝

1. 天生地養也，人道不可虧。髮膚父母給，貴盡忠孝節。孝為百善行，逆親心有愧。有過即懺悔，浪子內德培。轉識增智慧。
2. 烏鴉尚反哺，羔羊知跪乳。頂天立地學，親恩養育巍。含莘茹苦備，劬勞流汗血，堂上父母孝，孝悌家和諧。為人孝違悖，忘恩悖義為，因果誅其罪，窮途遇窘境，顛沛苦海，六趣輪迴。

### 44 不孝受窮莫怨天

1. 人生天地間，孝字豈能免？一子敦誠孝，二老歡餘年。門風孝行箴，子孫純良賢；苟若薄所生，厚待妻孥先；視親如婢奴，司廚老無閒；己錦衣玉食，父母行乞間；持刀殘弑親，暴戾譏辱顏，泥像刀揮斬，神鬼譴。
2. 天道難容不孝子，不孝怙恃罪滔天。繩網親屍葫依樣，眼前不孝子習然。現報須知原不爽，因果業力有循環。禱求功名終不第，困餓終身福壽減。

### 45 孝子面帶太和象

1. 夫孝，天之經也，地之義也，民之行也。天地之經，而民是則之，其更為百行之原。精而極之，亦可參贊化育；而人間第一事，教民親愛，莫大於孝。
2. 子曰：今之孝者，是謂能養，至於犬馬，皆能有養，不敬，何以別乎？故不敬其親，而敬他人者，謂之悖禮；不愛其親，而愛他人者，謂之悖德。
3. 事親之際，處必和氣，心現愉色，動婉容以得其歡。為人之子，出于心之至誠，報親恩于萬一。永言孝思，孝思維則，人人皆親其親，長其長，則天下平。

### 46 入孝出悌自然安

1. 夫孝，乃天地之經義，民當則之。應天之明，因地之利，以順天下。故先聖見教之可以化民，故先之以博愛，而民莫遺其親；陳之以德義，而民興行；處之以敬讓，而民不爭；導之以禮樂，而民和睦；示之以好惡，而民知禁。
2. 今倡提孝道，主在端其本，立其基。本即心也。先正其心，正其行。心坦然，性安穩，則日常中以身示道，承上啟下禮合宜，由己作起，端正風俗。

### 47 親在應孝不知孝

1. 天地之性人為貴，人之行莫大於孝。夫孝，道之尊，德之本。應曉父生我也，母鞠我也，哀哀父母，生我劬勞，欲報深恩，昊天罔極。
2. 盡孝無難，誠順其心意，有隱無犯。事親，居致恭敬，養致歡悰，病至憫怛。有一分，應盡一分，或富或貧者，皆是各量己力。

3. 乳狗搏人，伏雞搏狸，恩出心中，然故魚銜索，幾何不蠹？二親之壽，忽若過隙，莫到樹欲靜風不止，子欲養親不待，悔之晚矣。

#### 48 親死知孝後悔難

1. 手抱嬰孩方知親勞，父母恩深可比山高。誰無父母可以依靠？失親兒女如鳥失巢。為人兒女當能盡孝，立身行道揚名德韜。父母尚在奉養誠抱，渡其求道同修靈苗。莫等無常一朝來到，親人獄府受罪煎熬，那時後悔再難行孝，靈前祭拜枉然哀嚎，唯以真功真德迴向，超拔脫苦洗罪業滔。

2. 盡孝即時才對，晨昏承歡無違，進而發揚道業，渡化有緣歸覺。孝者才德尊貴，可享宗廟神威，得名祿壽位備，宜民宜人毋虧，孝感動天，困境迎刃解。

#### 49 孝在心孝不在貌

1. 木鐸一聲徹九天，覺世牖民渡坤乾。人爵未有天爵貴，普度收圓綻白蓮。學聖禮賢佛事辦，善養浩然儀翩翩。溯德厚生道一貫，泱泱不絕玲瓏觀。率性為道無名始，儒風是師百世傳。

2. 存誠不蔽素心見，臥龍晏起足智前。虧盈攸歸遊神論，磐志而行使命擔。一身征塵金剛煉，笑看曇花戲人間。鴻鵠高飛天地闊，雲淡風輕茗自甘，共邀知音賞幽蘭。

#### 50 孝貴實行不在言

1. 人之行，莫大於孝。始於事親，中於事君，終於立身。深體頂天立地之人，天性出於率真，孝心乃天然，察蓼莪義理，侍親如佛無違。當可如：居致敬、養致樂、病致憂、喪致哀、祭致嚴。

2. 謂敬親者，當念念

尊重、誠謹、和婉、順承；得歡顏、不忤逆、不慢怠，盡心竭力為始。時時持孝之始，為愿立己；切切體孝之終，為行正品，行有道，德本也。



### 06【百字經聖訓輯要 51-60 篇】

#### 51 孝子齊家全家樂

1. 夫孝，乃為德之本，教之所由生也。是以為人子女者，必孝於父母，而欲孝於父母者，必修道涵德。首格其外物，致其良知，正守本心，誠其初意，葆其真性，圓明安舒，修其善身，器量廣大。繼之能達至家齊。

2. 齊家，乃治國平天下之本。一家仁，一國興仁，是故諭父母明道，兄弟入理，以道修身，以德潤身。秉天心，存善念，懷大志，創聖業。父慈子孝，兄友弟恭，齊其家，修辦和樂哉。

## 52 孝子治國萬民安

1. 觀百行之基，萬行之始，唯孝；察聖門之傳，賢者之立，唯孝。孝，行於家則家齊；孝，治於國則萬民安。知堯舜治天下，克明峻德，以親九族，力行孝悌不虧，而可達齊家治國也。

2. 齊家之道，乃治平之基；忠恕之道，乃治平之則。故實行德政，其德永著，此乃承襲聖人德教，體行治國九經，恪遵五達道，自可民用和睦，上下無怨，使其禍平而安邦定國。人人安居樂業，必老安少懷。故治國，以三綱定社稷，五德奠乾坤，以臻太平。

## 53 五穀豐登皆因孝

1. 孝是一股強大光明的力量，可以造就溫馨和諧，又歡悅喜樂的磁場，五穀在孝心感應下，都能起良善的變化。蔬果鮮美，健全有機，稻麥與芽菜含藏活力；花朵盛開，光彩又美麗。

2. 四季豐收樂無比，汗水融在笑容裡。因為在孝子的世界裡。有愛、勤奮、以及毅力。蟲蟻走避，不會侵襲；雨水滋潤，不會過與不及，陽光給予歡呼，天人真心祝福，萬類感其德，真誠助之，滿願如意。

## 54 一孝即是太平年

1. 唯誠行孝悌者，其心必仁慈寬厚，明禮達義；必無非禮犯上之事，悖逆詐偽之行。其人能推孝友之道，使倫常昭著。門庭瑞靄，家道昌明，家範教化，推及庶民。

2. 誠能親其親而長其長，樂其樂而利其利，使民風純善，綱常古禮垂昭，恆貫流行。國興德風，以推道四海；異域同化，近悅並遠來。是以人人皆孝悌友信，成其善行，則盜竊不作，謀閉不興，門庭焉需閉？

## 55 能孝不分貧和富

1. 生民之本，孝為之先。養生送死，其義最大。於其生也，愛敬之道。於其死也，盡哀戚之情。夫孝，始於事親，中於事君，終於立身，以顯雙親，揚名孝之大。至於生死始終，無所不用其極。

2. 大孝尊親，其次不辱，其次能養，無關乎富貴貧賤得失榮枯。於膝下親嚴之性，始為完足；於天經地義之理，始相貫通；於德教政令之化，始能暢遂；而教所由生，又何疑乎？

## 56 善體親心是孝男

1. 侍奉父母最重要的，就是要能體貼親心，用真誠、喜愛、尊敬，來表達人子之孝。歷史上先賢古聖，其純真美善的孝行，刻劃出親情的歡樂，和諧與可貴感人，傳頌遍世界各地。從古至今，深植在後人的心中，成為永垂不朽的佳話。

2. 而我們除了，無盡心儀、禮敬、讚嘆，古聖先賢孝心、孝行之外，更要起而效法。把握父母有生之年，用真心、真愛、真情、來快樂、溫暖父母的心。讓子女的溫順、體貼，成為二老永恆的守護，不倒的依靠。

### 57 兄弟和睦即為孝

1. 天下無有不是之父母，世間最難得者，兄弟情誼。一木所生，勿離勿棄，貧富窮通，福禍共棲。兄弟既翕，和安且耽，同生羽翼，不分此彼。手足愛恭，長幼有序，歡言一室，識諸大體。弟傲如象，學舜之行，推田相讓，怨尤平息。

2. 勤儉持家，先志勉惕，家人羨，祖德留遺。父母血骨，掌珠國器，何忍爭端，忘卻孝依。無為生養，親恩罔極，變起鬩牆，惹親傷急。為人子，當承歡膝下，若錯良機，欲孝難兮，知恩惜福，盡孝奠基。

### 58 忍讓二字把孝全

1. 處事立身，孝悌為本。兄弟和睦，忍讓恪遵。忍者息怨，保家安身。讓者謙遜，無起糾紛。有愛堪忍，慈悲恕仁，有情退讓，本是同根。齊家和樂，真誠感人。姑嫂相愛，包容關心。妯娌互助，姊妹至親。有事商量，溝通原因。動機純善，利己利人。有錯知改，另作新民。

2. 頑石點頭，全憑愛心。氣度寬宏，福氣祥臻。孝順父母，菩薩二尊。修善立德，澤及子孫。天地重孝，為人感恩。無有父母，何有我們？木本水源，代代傳承。締造祥和世，萬眾得歡欣。

### 59 孝從難處見真孝

1. 父母親，育幼恩養，兒女何以報償？每思推乾居安臥，內心感恩感傷。深怕兒女身受傷，呵護叮嚀耳旁。幼學壯行握方向，牽腸掛肚奔忙。兒女遠行事業創，父母親淚流成行。父母愛子心，遠比山高與水長。

2. 父母親，培植恩養，兒女何以報償？驚覺父母髮蒼蒼，觸景心痛心傷。攜兒女導之綱常，用心教化義方。真愛滋養開心窗，心靈聖潔明亮。父母永遠是導航，守護著兒女成長。未盡菽水歡，誠祈禱父母福壽長。

### 60 孝容滿面承親顏

1. 親者，必需和其顏，悅其色，誠心敬意。不生驕慢之心、怠慢之意、輕慢之神、傲慢之色；時時笑容滿面，言辭柔婉。

2. 故修士必以行孝道，凡事躬親，不假他人之手，奉親之責，不推拖逃避，不敷衍了事。日常生活，必使親安於規律，食飲有節，起居有常，身心靈皆健康。

3. 引親入大道之門；啟親明真理之奧；使親聆福音之美；令親沐甘霖之澤。循序漸進，迪化父母，啟發本性之自然，參與道場之事務，期能正己成人，廣結善緣，普渡九六，道化天下。



## 07【百字經聖訓輯要 61-70 篇】

### 61 父母雙全正宜孝

1. 樹欲靜而風不止，子欲養而親不在。若能生前誠敬養，且勝後墳諸供拜。非名山不留仙住，是真佛論家常在。人間百善孝為首，盡人合天身不殆。子曰色難明其意，自問深省己心態。今之孝者謂能養，不敬何以別乎待？
2. 雙親之年豈不知？喜懼之餘盡孝快。父母唯疾心憂也，故當體心身自愛。事親幾諫和顏現，見志不從敬弗改。勞而莫怨亦體逆，躬行孝責無旁貸。毋遠處尋求菩薩，速孝家中二老邁。

### 62 孝思鰥寡親影單

1. 仰對青山綠水奔流，瞧見戶樞深鎖依舊，獨見吾親單影守候，歲月流逝穿越數秋，死者如逝此身難再，誰盡孝思淚滴床頭？
2. 逢食思親雙手炊事，闔家共餐美味香色。愛心撫育無微不至，日復一日兒健康碩。望月圓時清風吹拂，孤燈伴隨語涕灑落。後悔當初未能醒悟，生前行孝克盡職責。
3. 爾今爾後立身行道，晨昏定省侍親左右。銘肌鏤骨賜以優言，勵短引長懇切感格。念佛行善迴向親恩，養育之恩深如山河。善能滋木欣欣向榮，庇蔭後代子孫福澤。

### 63 趕緊孝來光陰快

1. 生命來與去，運本難主張。莫道還年輕，未來路漫長。既有且珍惜，身外勿戀狂。多善利群生，少慾身心養。散發光與熱，溫暖世滄涼。
2. 人與生俱來，佛性能潛藏。受指靈山塔，一點真太陽。當頭醒春夢，亟起奔康莊。入孝出悌守，啓迷化羔羊。朝聞夕死可，只因空相往。
3. 佛法在世，不離世覺，悟則剎那，迷經累劫。破除邊見，萬法盡通，心無染著，明澈光輝。塵勞愛慾，需自放下，懺悔已過，重整愚邪。眾生即悟，雙修性命，照見般若，自在無為。

### 64 親由我孝壽由天

1. 躬親撫養，嚐糞憂心；禱告北斗，孝感動天。滌親溺器，盡其誠孝；鹿乳奉親，孝行可觀。嚙指痛心，母子連心；孝親本分，富貴在天。
2. 人有善愿，必得天憐；孝義為先，聖賢德範。虧親是禍，孝親得福；神欽鬼伏，神目如電。行如明鏡，報應循環；舉頭三尺，神明可鑑。

3. 人若行孝，家道必興；擇善而從，兒孫孝賢。子孝父母，必得寬心；貞婦賢孝，美名留傳。積善之家，必有餘慶；不善之家，難留親顏。忠孝並行，庭前生瑞草。仁孝恪遵，價值意深遠。

### 65 生前能孝方為孝

1. 人生大本，孝當為先，欲報昊天恩。今之孝者，謂之有養，不敬犬馬同。親在一日，敬親時刻，文武孝德承。親心弗得，不足為人，事親豈弗順？行孝及時，無微弗至，風吹燭熄恨。萬金空奠，椎牛而祭，何曾黃泉存？生前盡孝，菽水敬養，亦能承歡心。

2. 養體之孝，酒食甘旨，重在心敬誠。養志之孝，親心安樂，仿聖賢曾參。養德之孝，婉諫修德，善道不離身。養性之孝，使親入聖，萬古流芳名。

### 66 死後盡孝徒枉然

1. 父母生我，受盡勞苦；十月懷胎，辛酸滿腹。惦念胎兒，全神貫注；夜以繼日，愛心守護。身心俱疲，容顏凋枯，寢食難安，汗水淚珠。求神拜佛，祈禱祝福：孩兒健康，平安產出。慈恩廣如，河海深度；恩重難報，娘親心苦。

2. 堂上父母，百年稀少；如獲至寶，心悅照顧。此時不親，等待何時？有錢難買，在生父母。在生之時，不知敬重；死後盡孝，凝視淚燭。人應及時，感懷孝思；善繼承志，光宗耀祖。躬身行孝，上天不辜；定保子孫和樂睦。

### 67 孝順傳家孝是寶

1. 夫孝乃大道之美，百行之本。是故有道之人子，必孝順於父母。晨昏定省，冬溫夏清，出告返面，色悅辭和，事親不煩，勞身不怨，從命不逆，婉諫不倦，能恕其親之過而崇其美；補其親之短而取其長；順其親之意而悅其心；善其親之體而覺其性。

2. 人人以孝之德為寶，戶戶以聖之道相傳。民用和睦，上下相親，達父慈而教；子孝而箴，兄愛而友；弟恭而順；夫和而義；妻柔而正；姑誠而從；婦聽而婉。修身齊家，習聖賢君子之行，法仙佛菩薩之愿，使天下盡歸善，復世界為大同。

### 68 孝性溫和孝味甘

1. 天下父母，為兒勤勞，為女操，籌劃職挑，責任劬勞。厥齡方少，諸務未曉，敷衍了，親心的教導，諄諄教誨言至寶。少年到老，。牽腸掛肚為兒好，深怕兒病痛身邊繞，膝下懷思，恤憫孩提細關照，開心誇揚，兒女歡笑。



2. 可嘆世人，幾人力行孝道？功成名就，不思父母苦勞。窮年愛護，換輕視諷嘲；兒女妄為，親心隱痛絞。烏鴉反哺，羊羔跪乳人人曉，孝敬椿萱時刻守牢，晨昏定省，敬愛如同養兒少，報答親恩巍巍浩浩。

### 69 羊羔跪乳尚知孝

1. 宦遊人兒，每從故門歸，望此青山依舊，草木蒼鬱。常聞人言，總覺是別離人腸中，親情喪，難撫懷。

2. 屢見白髮猶勞奔忙，縱心力漸衰，仍記掛子女際遇順舛。然又幾多兒女，於風起清夜中，愴及年邁？自問受其親恩，胡不思，點滴簷前？

3. 孝有三：大孝尊親，其次弗辱，其下能養。今謂能養，豈關珍饈否？誠心敬，恐色難哉！當知物有何貴賤？全乎孝行。心有何差別？全乎孝篤。齊孝安宅乎！

### 70 烏鴉反哺孝親顏

1. 說孝道，人皆知，孝悌行者幾人實？養兒成，是怙恃，天經地義兒孝之。論養親，先養志，兒能顯親大孝至。發自心，行於外，敬孝父母在日日。嚴慈在，不遠出，游必有方告親知。慈親年，當曉知，欲報親恩須握時。立此身，行大道，超拔父母趁此時。萬善緣，孝開端，毆辱弑親喪良知。

2. 思羊羔跪乳叩親恩，烏鴉反哺報慈親。畜牲且知昊天恩，為兒豈可失人倫？性成孝友本天性，兒當反哺孝親心。敦誠純良孝庭訓，教妻子同孝義真。撰寫孝文孝歌誦，孝念可登五福門。



## 08【百字經聖訓輯要 71-84 篇】

### 71 為人若是不知孝

1. 父母本是活神仙，不敬父母是倒顛。孝子孝心感地天，大大之孝報恩前。今聞孝道方明詮，以往無知求懺前。行為端正儀容顏，嚴立身，行道德風顯。

2. 昔日孝子，孝敬親顏；觀今棄親，孝敬少年。猶日西出，落東邊，堪嘆彝倫錯認倒亂顛。

3. 所謂色難必須明詮，孝從難處細微表現，牢記父母，慈語銘言。感恩父母，育化深遠，扶養恩典。

### 72 不如禽獸實可憐

1. 天下第一可敬者，忠臣孝子。父母不患不嚴慈，患溺愛不知教導，養不教，父之過，寵兒敗子。孝子百世之宗，仁人天下之命。以愛妻子之心愛父母，以媚字奉親。思夫妻常楚撻譴呵，恩義俱廢，夫婦離棄，家庭不興，子難孝順。

2. 教兒嬰孩，無教只愛，飲食恣欲，宜誠翻獎，應訶反笑，至無識無知，驕慢成習，逮成長，終敗德。許旌陽射鹿，母鹿腸寸斷。吳起母歿喪不臨，鷓鴣亦歸孔門，何況人乎？

### 73 百行萬善孝為首

1. 立百福之基，人倫首當依。開萬善之門，納賢良同楫。孝義傳千古，逆親惡果被。好事雖做盡，不孝枉善舉。爾敬雙親樂，子女必學你。何須人前說，自有公論提。孝之經云終，立身行大道。揚名顯父母，時人勤自勉，毋使度時虛。

2. 羊羔跪乳鴉反哺，爾豈不如禽獸乎！學富五車財萬貫，更應惜福感恩殊。無有父母怎有吾？當以賢德報寸絲。惟有忠孝感天地，長留青史後世出。

### 74 當知孝字是根源

1. 當仁行亟，誠信務實為根本。志同道合，盡己之命了於心。奉養誠抱，渡其求道，同修靈苗。莫等無常一朝來到，親人獄府受煎熬，那時後悔，再難行孝。

2. 明德新民，了悟一字，止至善；智慧圓滿，真知法喜，覺心歡。常清常靜，外亂不生；隨順眾生，內心平等。人我是非，不入心境，時刻觀照清明。

3. 大道根源理蘊藏，道化自然啟賢良。天命可畏職責扛，前途行濟眾宣揚。仁為己任輝煌創，道務宏展德布廣。良人攀取品蓮香，信愿行證邁康莊。語寄：「明本」。

### 75 念佛行善也是孝

1. 如佛之慈心，量寬福厚德潤身；如佛之悲愿，濟世救人明燈引；如佛之隨喜，方便為門行精進；如佛之捨得，提起放下喜樂吟。人生指南尋方針，覺悟明本根。

2. 存善念，慧日照臨；發善心，博厚可親；講善語，仁風提振；舉善行，霽月和煦。承繼聖哲精神，心體身行，矢志不移，轉法輪。

3. 身體髮膚，不敢毀傷，孝之始也；立身行道，揚名後世，孝之終也。大作為，齊聚大力量，創新合時達，學佛行善百代馨。

### 76 孝仗佛力超九天

1. 木有根本水有源，為人敬老能尊賢。親疏長幼禮儀顯，綱領倫常克己先。起居坐臥合中道，不急不躁煉乾元。身體髮膚當愛惜，孝親侍長日常間。噓寒問暖切莫少，下氣怡聲承歡顏。

2. 烏鴉反哺羊跪乳，萬靈之首盡孝前。奉養雙親無倦顏，孝道力行德性添。忠孝節義威名遠，善願天助化劫焉。孝能感動天與地，舉孝尊親標美言。佛恩浩蕩澤被祐，玄祖沾光樂陶然。

## 77 大哉孝乎大哉孝

1. 天下慈愛的父母，養兒育女真辛苦，不計心酸奔塵苦，勞心勞力的付出，無微不至心呵護，父母的心不覺苦。常懷念幼身安舒，虛心問暖愛心付，繫子情深要幸福，給予精神的支柱，讓我安心常駐。

2. 喚醒良知心體悟，看父母偉大督促，時刻提兒前途，兒立業成功，讓父母歡喜常住。立身行道呀！大哉孝乎！這成就，揚父母，此恩此德要清楚，感恩父母聖道築。

## 78 孝矣無窮孝無邊

1. 萬般勞瘁有時休，育子無盡頭。持家耐苦重任荷，訓誨不憚求。幼得親全安樂多，各盡其歡樂悠悠。體親至意，承養順柔，和顏悅色琢。以善規親，進諫委曲，養必兼善妥。願親常安無煩憂，眾善齊家修。

2. 盡孝無難順心意，膝下歡樂聚。修身為寶德培立，垂裕於後世。一葉靈根非易植，子孫相傳養親志。惟孝為源，百行始知，我孝父母矣。孝之為道，自然一理，無俟勉強矣。孝理自在孝必至，惟孝格天配地。

## 79 此篇句句不離孝

1. 身體髮膚不可傷，父精母血孕恩長。子女須行孝，愛護身健康，莫讓椿萱苦斷腸。立身孝昭彰，謹守志益強，毅力效賢向前往。天倫共樂眾分享，啊！建立典範綱常。

2. 聞孝道，當知孝親，實際作為人敬欽。知孝悌，禮義忠信，以身作則倡綱倫。內外修，立德立品，行持正念道唯尊。感懷念親恩，感懷念親恩，父母恩情似海深。赤子人心，事親至孝眾欽。啓迪教凡人，啓迪教凡人，前賢垂範為娛親。

## 80 離孝人倫顛倒顛

1. 人生在世，貴盡忠孝節義，方於人道不愧，可立於天地之間。反之，身雖在世，其心已死，是謂偷生。人心即神，神即心，若是欺心，便是欺神。故，君子三畏四知，以慎其獨。

2. 勿謂暗室可欺，屋漏可愧；一動一靜，神明鑒察；十目十手，理所必至；報應昭昭，不爽毫髮。

3. 淫為萬惡首，孝為百行原，凡：有逆理，於心有愧者，勿謂有利而行之；有合理，於心無愧者，勿謂無利而不行。善惡兩途，禍福攸分；行善福報，作惡禍臨。

## 81 念得十遍千個孝

1. 帶著笑容行孝，是天底下最幸福的事。微笑是那麼那麼地習慣，孝順是那麼地自然，此二者的結合，能讓心靈光明踏實；讓人生產生無窮的希望與力量；讓家庭美滿又歡樂；更能讓社會繁榮，安定祥和。
2. 因為笑與孝，是本性最原始的擁有，通天徹地，和喜神善神互相感應。不只有貴人來扶持助力，還有宇宙綿綿不絕的賜予及恩寵，永遠照顧快樂的孝子。

## 82 念得百遍萬孝全

1. 真如本性孝為念，依佛修行效古賢。至誠發出志一貫，盡忠盡孝盡節廉。相傳法要無二念，時刻二六孝行前。一念孝親口體養，再念孝心歡娛添。三念五孝省過愆，立身行道慕椿萱。
2. 念茲在茲孝力堅，終生孝行不間斷。力行萬善順親顏，自身等佛大悲愿。千福萬壽經中求，莫若孝子仁德延。誦經千遍體佛意，體行無差方靈驗。人人持誦百孝篇，已立化人孝道宣。念得百遍萬孝全。

## 83 千遍萬遍常常念

1. 迷者口說，智者心行。修辦行忠孝之道，須務實唸經消業，體踐培德顯道格。念念由心起，真誠敬意無欺。息貪嗔、灌醍醐；破愚癡、妄想。端正心思，導正行為，尋回孝之根本。
2. 時衰道危，人心不古，倫常掃地，猶唯孝道，更是失其根源。四維不彰，世風漸漸日下，邪說盛行，以致釀成世界紛亂，黎庶甚遭殃。孝經孝文，乾坤二道遵從，日復堯天舜日，由上至下，以孝治國，天下太平。

## 84 消災免難百孝篇

1. 念淨，心如日月合明。了悟人生本命，由知止而念正，萬理達也，惟需篤行。首立品，先格物，在心誠，明辨事理人情。覺知本立而道生之體用，飲水且思源之警。回歸原點，推理百行之源。
2. 孝，出多少聖賢之名，觀今世風日下，古德淪喪之慟，招下無數天災人禍，怨聲載道處可聞，使得風聲鶴唳之猛，嘆，世人至今不知醒悟，當求自我省思。欲挽頹風，惟重整倫常之德，復古風之盛，以歷史興衰為鏡，當下人人克盡本分，力推百孝篇，期安平。

